

國家文物局

清代傳記叢書



明文書局印行

清代傳記叢刊·綜錄類⑦
周 駿 富 輯

國朝耆獻類徵初編
(十七)

卷六四至
卷七三



(清)李桓輯

明文書局印行

國朝耆獻類徵初編卷六十四目錄

卿貳二十四

黃叔琳 子登賢

陳汝咸

文志鯨

穆和倫

補錄

陳汝咸

四
十
月
美
在
子
地
一
二
一
一

國朝耆獻類徵初編卷六十四

通奉大夫前署江西巡撫江西布政使司布政使湘陰李桓輯

物貳二十四

黃叔琳 子登賢

黃叔琳順天大興人康熙三十年一甲三名進士授編修累遷侍講四十四年丁父憂服闋補原官授山東提督學政四十八年遷鴻臚寺少卿留學政任五十一年遷通政司參議五十七年遷左僉都御史五十八年晉太常寺卿六十一年遷內閣學士尋遷刑部右侍郎雍正元年三月充江南鄉試正考官調吏部侍郎九月命偕兩淮鹽政謝賜履赴湖廣同總督楊宗仁酌定鹽價革除

兩規每鹽一包減價六釐昂不得過一錢二分四釐其安豐場鹽較梁埽場再減二釐從之二年二月奏言兵糧撥運支給俱布政使程道爲政先期打點方撥臨近標營否卽撥遠汛加徵運費輸輓累民兵丁嗷嗷待哺查標營汛地各有定所屯衛徵收亦有定額乞諭督撫確查兵數先儘本州縣衛所額米撥給不敷再於附近州縣撥運庶民無苛擾兵獲飽騰上是之下部議行是月授浙江巡撫奏言各部書吏紹興人冒籍順天等處已定議改正見任浙江首領佐雜及在部候選候補之員掣得浙省缺及各省俸滿升補浙省者籍開順天直隸如實係原籍浙江均請查明咨部改補部議從之時御史錢廷獻請濬浙江東西湖蓄水灌

田部議叔琳會同總督滿保確勘定議叔琳等奏言仁和錢塘海甯三縣田數萬頃全藉省城上下兩塘河水灌溉兩河水源皆自西湖流注湖居省西匯南北諸山水週三十餘里水由涌金門入城其出艮山門者入上塘河由臨平達海甯出錢塘者由三閘至松木場桃花港與武林門之水共注響水閘凡湖墅支河與古蕩西溪沿山之田皆資其利餘水入下塘河而仁和北鄉及錢塘之下八鄉寶霑蔭焉其所以灌溉利溥者一由沿湖山水暢流入湖一由山水來路設閘以阻浮沙一由上塘五十里外有東湖爲之停蓄自閘廢土淤民占爲田埂內植桑柏蕩內栽荷蓄魚利甚微而所損三縣田畝逾鉅萬請照西湖舊址清出歸湖去埂塞開通

水源其淤泥葑草則幫築於舊隄之上以固隄址沿隄釘椿編竹不使淤泥入湖襄湖各橋建閘啟閉城內河道一爲東河一爲小河又有中西北之分係西湖血脈應酌量修濬其上塘河一帶河身支港浙省至江南吳江縣界官塘運河支河港汊壩堰阡門俱關水利應一律疏濬部議如所請三月 諭曰爾到任未久於薦舉人才處頗涉輕率嗣後當加慎重八月有密奏叔琳赴楚查鹽時受鹽商吳雨山賄關說派充總商並庇海甯陳氏僕其弟御史叔璈巡視臺灣過杭州家人與鋪戶爭鬪叔琳拘責鋪戶至死到任後杭城罷市三次 諭曰黃叔琳因前差江南主試及任吏部侍郎聲名頗好故用爲浙江巡撫自命下日屢次召見觀其精氣

頓異語言浮泛跪領朕一切訓旨總不安詳存神敬聽彼時朕卽疑之及到浙撫之任舉薦不公敷奏不當密摺奏請之事件件支離兼多先請託在廷諸臣奏聞而黃叔琳之摺隨繼之此等作用徒自取罪戾耳朕頻降嚴諭而黃叔琳置若罔聞今覽此奏事雖屑小黃叔琳初任卽如此肆志將來放縱何事而不忍爲也大負朕之任用著解任陳氏僕人黃叔璥兩案與罷市三次情由著將軍安泰等秉公嚴審吳兩山一案著侍郎李周望等嚴審定擬具奏八月安泰等奏稱叔琳庇陳世侃僕金甯祥爭毆罪杖斃店民賀懋芳屬實並無伊弟叔璥拘責鋪戶及罷市事部議革職擬流十一月李周望等奏訊叔琳向吳兩山借貸並非賄求 詔免窮

究三年正月 命赴海塘效力乾隆元年二月授山東按察使八月疏言向例佐雜官不准相驗嗣廣西巡撫臣金鉉奏印官公出委佐雜相驗不必請鄰封但佐雜不足資彈壓又事非切己吏誤填報夤緣賄囑多致蒙混及印官承審之時惟據屍格定傷難成信讞應請仍照舊例行九月又言審案定限 欽部案件四月命案六月盜案一年限滿不結揭參後具扣限四月審結逾限二參照易結不結例議處立法至善嗣經河東督臣田文鏡題定四月限者州縣兩月解府州府州一月解司司二十日解督撫六月限者州縣三月解府州府州一月半解司司一月解督撫一年限者州縣七月解府州府州兩月解司司一月半解督撫逾限分別議

處雖以清釐適啟通融那改之弊案件遲延多不揭參至定案時攤爲逾限不及一月例得免議竟無易結不結處分請仍照舊例庶承審官不敢仍前怠玩部議均從之二年九月遷山東布政使三年八月奏言東省師生空缺銀例由州縣解交學政學政造冊移司如遇按試遠郡轉解需時或解到正值封門校士不能隨到隨收趕副奏銷州縣多罹參處請嗣後令學政開印後覈造應扣銀數移司其銀卽令州縣徑解司庫收兌又言養濟院孤貧口糧每名歲給銀米三兩六錢於地丁項下撥給但編銀州縣二月開徵可依期給發至編米例於九月隨漕徵收春夏秋三季米係州縣將養廉折銀墊給僕養廉不能及時支領或收令更換卽給

發愆期請酌借司庫存公耗羨銀給發至秋收徵米除給冬季口糧餘米不必易銀解還司庫卽畱備次年春夏秋口糧存倉遞及報銷部議俱如所請四年丁母憂七年服闋授詹事以山東布政使任內誤揭屬員諱盜革任十六年 諭曰原任詹事黃叔琳以康熙辛未探花年臻大耋重遇臚傳歲紀洵稱熙朝人瑞著從優加給侍郎銜二十一年卒子登賢官至副都御史

右 國史館本傳

按狀公姓黃氏諱叔琳字岷圃順天府大興縣人王父曰爾悟字某某原無爲州同知父曰華蕃字澗采大城教諭祖父皆以公貴初 封儒林郎翰林編修晉 贈通奉大夫刑部右侍郎康熙辛

未公年二十以一甲第三人成進士由編修積資洊擢卿貳開府
晚節以詹事加侍郎銜家居乾隆丙子正月卒於里第年八十有
五著 一素堂詩文集行世學者稱北平先生公之先本徽州歙
縣姓程氏本生王父曰伯起字瑞芝順治初嘗攝陝西郿縣篆旣
罷任流寓京師後索逋西遊爲盜所害本生王母柳先瑞芝公歿
子卽澗采公生甫髫而家難起養於繼母舅黃卽無爲公遂後黃
氏澗采念黃氏恩重而無爲公無嗣子終其身不忍歸宗每於霜
露節望空祀其本生父母嗚咽流涕及卒公始置木主奉安室之
西偏用成乃父之志公生五歲無爲公口授經書有神童稱閱十
有一年甲戌公在翰林又九年遷國子司業明年再遷侍讀居父

憂越三年視學山東雍正元年以刑部侍郎典試江南得人之盛
爲數十年來未有平生接引後進孜孜若不及性好著書隨時與
所善商榷參校藏書萬卷或從公借看無不應公餘坐一室中日
事披覽及登大臺令子若孫口誦而聽之有得輒筆記之其好學
如此嗟乎世謂少年科第一不幸大抵以學未成而遽竊世榮志
滿氣得則或棄其素業若涕唾然又得之旣易則不知求得者之
難甚且蔑視老成傲睨來秀而一切不以屑意若公則得自學富
之後旣得而學益進又與天下有學者共樂之至老且歿而後已
是科第不足累公而惟公乃足以榮科第而增其重也 世宗憲
皇帝在藩邸知公名及卽位數 召對稱 旨三遷至吏部左侍

郎二年出撫兩浙杭州旁邑多里巷豪猾把持鄉曲慢侮搢紳善
爲飛語巧中官莫能制公銳意欲除之取其魁十許人杖而械之
通衢用示媿創就有病死者一人而適與公媿眷同里遂以疑
似被劫落職聽勘謫海塘工次效力閱六七年事漸白放歸並豁
免塘工所貸官錢顧猶僦屋以居母子惴惴乾隆元年 天子廉
得公故儒吏無他起爲山東按察使尋遷布政使給還向所籍產
於是遣子登賢歸奉母夫人吳居德壽堂舊第焉公撫浙時值夏
旱禱於三竺之神步行二十餘里旋反雨大降校士撫署及敷文
書院進諸生爲講畫文義諄諄然如家人以故雖在任日淺而人
思之其起任山左墨吏帖息包苴不行有東來人爲予言悉與狀

合夫焉有吏畏民懷若此而冒爲殺不辜通私謁者此所以卒見
原於 先帝而再造於 聖明優游暮景以榮名終非倖致也公
之再起年已六十有五母夫人垂九十矣雍正中 先帝嘗徹
御座木瓜盛以青龍瓷盤漬以薇露而 諭曰供母聞香又 御
書德門壽母四大字榜以賜所謂德壽堂者以是得名乾隆七年
居憂服除改擢詹事尋以兩司任內事註誤追論罷職 上亦憐
公老欲休閒之前五六年庚辛鄉會兩科後輩踵門通名公爲賦
詩敘同年事 聞於 上其冬遂有復職加銜之 命且褒爲熙
朝人瑞天下榮之癸卯江南之役歸途遇一生詆諆試官而自矜
誦其文末終篇公笑止之曰秀才奈何次作云云乎其人大慚而

退山東按察任內有屬吏進所畫扇十枚公歎曰民方苦潦且蝗而足下顧暇爲此其人亦大慚而退蓋心乎治一事而無所苟者其隨時發見輒亦相應如此祖父旣得封贈如公官祖妣李母吳並累贈夫人原配馮繼配武又繼配武並累贈夫人側室王封恭人同母弟琬琪璪並貴知名庶母弟曰瑄子二長卽登賢丙辰進士見任刑科給事中後武夫人生次登穀同丙辰榜見任山西知平陽府王恭人生女二長適靜海辛丑進士前刑部侍郎見任太常少卿勵公宗萬次適同縣丁巳進士原任吏部文選司主事溫君葆經孫曰端絨秉經符綵曾孫曰堯閩某月某日其孤啟三夫人窆而合葬於某山之原王恭人耐焉或曰濶采公多

男子宜若擇一以後程而歸之江南則應之曰而不觀狀所稱無
爲公病亟時澗采公嘗以爲請而默然不應乎吁是可哀已人不
能無子而有孫歸孫殆於歸其子矣澗采無舅氏將不得有其身
又何有於子孫今始終後黃而本生王父母之祀亦世守於別室
永永無祧報恩返本庶幾其兩得焉禮以義起者也銘曰

西山蒼蒼上都是疆伊何降神曰中西坊有道而文富貴壽康牙
籤萬軸玳瑁爲裝集外所傳尙以車量小正夏書六官周京易鈔
韋絕詩統振綱顏訓節要史通補亡付孫四傳合纂是攻甯盜之
擅罔詒以金溯昔海波七邑漂風大官重繭就宿道旁後以罪謫
亦在斯鄉豈天相苦爲利浙氓曾有孝子刺仇於登父不受誅脫

以朝庠後作憲司視此勸懲會河爲患雨亦暴漲展期春賑緩責
秋糧 帝曰兪哉維藩維城凡茲懿軌仕學相章矧其家政作則
以身閨闈列女昆弟田荆當世極盛必有老成士仰山斗人識景
慶其生其化乃物之常夫惟舊物雖化不忘爰表其阡勒之幽宮
本程之齋實育於黃

右墓誌銘陳兆崙撰

黃先生諱叔琳字崑圃大興人始生具夙慧成童卽通四書五經
從學饒仲如研窮性理之奧又從吳述庵究經世學年二十以康
熙辛未第二名進士列館職益自淬礪與衛旣齊討論宋八語錄
恂恂然有醇儒風見者不覺其爲少年鼎甲也嗣歷講讀晉卿貳

司文衡秉節鉞落職復起屏藩山左詹事東宮公餘常手一編以
至耄耄不廢當督學山東時毅然以興賢育才爲己任捐脩三賢
祠於泰山之麓奉宋胡安定孫明復石徂徠款薦如舊俾學者知
所景從又興復白雪松林兩書院延師儒選才僑捐備膏火造士
多窮經數用之英翕然稱盛其巡撫浙江也剪除巨惡辨釋冤獄
災傷則賑之貪墨則黜之尤以薦賢爲重所汲引者如萊州守嚴
有禧長清令劉輝祖皆以循良遷秩而分校禮闈主試江南所拔
取者理學有如任宗丞啟運經學有如陳司業祖范文學有如徐
孝廉文靖入祀賢良者則徐撫軍士林潘敏惠思築也張太史澹
夏太史用脩李觀察慎修輩皆端方博洽與先生教學相長其餘

名士宿儒建樹接踵未可悉數先生善識天下才俊方望溪爲諸
生時來謁一見稱莫逆交凡望溪所著周禮春秋之學皆與先生
相復指劃無少閒他如周大璋顧進又數十人不憚千里或不閒
歲時親炙就正則其學之及人遠矣生平著述有硯北易鈔闡發
河洛之精蘊詩經統說折衷羣說之異同夏小正傳註史通訓故
補註文心雕龍輯註顏氏家訓節鈔硯北雜錄則於經濟學術各
有指歸纂言粹美著語精純有功儒林豈小補哉計先生自五歲
就塾享壽八十有五益二萬九千日中無日不學也可謂純篤君
子矣尹嘉銓曰有是哉先生之虛懷善受至老不衰也甲戌秋先
生行年八十有三授余史通訓故補注余讀至疑古惑經二篇請

於先生欲取昌黎削荀揚不合聖經之義酌爲節刪毋致貽誤來
學先生怡然從之且作後序以志過於戲過亦何傷善補爲貴昔
衛武公耄而好學日誦抑戒以自警終成睿聖之名先生有同揆
矣北學編云

右學案唐鑑輯

崑圃先生愛才如渴聞人一長必稱揚之使成名蓋宰相心事也
年十九登第後庚午辛未諸舉人進士兩詣其第稱後同年宴會
誠 熙朝盛事云

右 國朝詩別裁集小傳沈德潛撰

湯西厓少宰右會以詩名世者四十年其懷清堂集未及手編身

後門下士王雪子收拾之得二十卷而湯氏後人陵替是集爲人
賺而有之黃崑圃先生方罷浙撫僑吳中聞之悵惋爲追理而仍
歸湯氏並鈔副本藏於家初侍郎爲掌科視學中州清介無匹及
迴翔槐棘聲名頓減歿後頗叢訾議崑圃先生曰湯侍郎勳名操
履他年國史自有定論吾輩可弗深求但平情而論謂非文苑之
渠詞人之傑諒不可得則聽其生平著述流落散漫詎非後死之
愧坐客聞此言皆爲於邑久之

雍正元年黃崑圃先生叔琳典江南鄉試填榜竣事揖監臨曰一
榜三經師可爲 朝廷得人慶矣蓋謂荆谿任啟運常熟陳祖范
當塗徐文靖也

右紀聞陳康祺撰

黃登賢

黃登賢順天大興人父叔琳官至侍郎有傳登賢乾隆元年進士分戶部學習七年補主事累遷郎中十一年遷御史十二年疏言各省幕客聚省會易滋弊請 敕督撫驅逐其府廳州縣罷職後在原任省分作幕者恐啟營私之漸應禁之 從之十八年遷吏科給事中十九年轉刑科掌印給事中二十年登賢以父年逾八旬呈請終養奏入 諭曰黃登賢籍隸大興伊父雖年逾八旬然見居京師何必呈請終養嗣後凡遇遠差著停其派往二十一年丁父憂二十三年服闋補戶科給事中尋轉刑科掌印給事初中

各省糧船在通州出糶餘米例禁碁嚴至是 特詔弛其禁二十
四年夏京師闕雨 命設廠平糶並截漕糧撥近京州縣減糶以
濟民食登賢疏請 敕漕運總督倉場侍郎照上年 恩旨聽運
丁在通出糶所餘倉米以惠丁裕民 從之五月遷太常寺少卿
三十五年正月遷光祿寺卿三月遷太常寺卿五月 上御門辦
事登賢私於班後憩坐部議革職 詔畱任二十六年六月因儀
牲所飼牛疲瘦不行查參部議革任 詔免之三十二年遷宗人
府府丞三十三年十月遷左副都御史十一月 命偕侍郎喀甯
阿往湖南查審參革通判金文鎔控茶陵州浮銷城隍工程案尋
勘無短少浮冒情弊金文鎔以捏控擬杖流三十四年二月擢倉

場侍郎六月署漕運總督旋因倉場任內於米色潮溼未經奏參
部議降一級 詔畱任十一月實授漕運總督三十五年八月奏
請添建倉廩剝船兌運均經部駁並面奏欲查閱徒陽運河奉
旨申飭據實回奏尋奏臣條陳建廠剝船二摺並面奏欲行看河
一事不諳事體實屬昏愦請交部嚴加議處部議降三級調用十
一月授左副都御史三十七年四月監北城糶務三十九年九月
提督河南學政尋調山東學政四十九年卒

右 國史館本傳

北平黃昆圃侍郎叔琳以康熙庚寅視學山東越六十年哲嗣忍
廬都諫登賢亦持節是邦其訓士遜才一以家訓爲圭臬士林稱

頌弗置云

右紀聞陳康祺撰

國月寺狀頁故刀扁
卷八下四卿或二十四

七

國朝詩林卷之八

三

陳汝成

有學術而後有治功學術陋則治功卑出宰州縣則爲俗吏入爲
卿士則如贅疣居位愈高刺譏愈大儒者之學小用大用宰一邑
與治天下無二道也吾師四明陳公以康熙丙子歲由翰林出宰
漳浦調南靖入爲刑部曹晉臺中洊歷大理寺少卿奉使秦中以
卒其孤本醇以書來請銘世遠受知最深亦知公最深者故不敢
辭公諱汝成字莘學號心齋先世自青州徙家鄞世有聞人傳十
二世至怡庭公諱錫嘏字介眉有學行天下無不知有介眉先生
是時浙東多學者萬季野以史學名李杲堂以古文名介眉先生
則以經學名由康熙乙卯解元中丙辰進士歷官編修生四子公

其次也公自少穎異通經史長侍怡庭公從黃梨洲先生講經已
知其要領嫻文采氣岸高一世登戊午賢書辛未成進士選翰林
院庶吉士改知福建漳浦縣公憤俗吏一切補苴苟且之治邑多
詞訟胥役搜民錢如囊取公於小事令鄉族調處大者用紙皂如
期至剖晰如流閩俗輕生因諄語爭競食惡草懸梁服溲以破人
家官役因之株及鄉族公令死者親屬收斂餘無所問賦役爲一
縣大政公慨然曰吾當爲漳浦立百世之利舊時族有戶長地丁
藉以徵納強弱有後先之弊黠者緣爲奸公定三百畝爲一戶令
民各具親供計實產自立徵戶糧多者爲戶長以次輪催丁亦如
之催科不擾而國賦蚤完又念鄉邑民居保分有大小則奸匪易

匿公務有不均之歎定二百家爲一保畫一平均至今賴之延文
醇行潔者爲義學師月朔望課古今文詩賦榜其高下初三十八
日萃一邑之秀於明倫堂講五經性理擇諸生輪講親爲剖要難
歲丁亥儀封張孝先先生撫閩開鼇峰書院延九郡名宿修書講
學邑士被選者九人儀封公每嘉歎曰漳浦多士令君之功也公
又嫉邪教之害正拒天主教不使入境俗有所謂無爲教者籍教
堂四所改爲育嬰堂肄業舍親毀城東淫祀像鞭之以解眾惑歲
戊子制撫以南靖難治調公南靖浦人扶老攜幼數千人泣送數
十里公揮涕遣之治靖一年內擢刑部福建清吏司主事逐舞文
吏晉廣西道監察御史巡視西城懲左道捕奸匪威明大著上疏

陳臺灣事宜謂臺灣土廣滋奸往臺人民宜加盤覈各縣不得輕給一照鳳山諸羅兩縣宜歸本治不得聚郡城換臺兵丁宜嚴頂冒杜日久驕橫之漸又疏陳沿海歹船非挂號稽查所能斷絕商船利走外洋無礁嶼便晝夜兼行風利帆駛難攔劫若從沿邊迂迴挂號賊遂得截劫於必經之地至巡哨之船當以南北風信爲準不得泛行分汛又陳弭盜之策 上覽疏嘉納至今環海商民每食必念曰省我挂號一節陳公力也五十一年冬海賊陳尙義遣周錦赴兵部投就撫狀公在浦時知此賊係海中之魁因摺薦孝廉阮君蔡文等同往撫至盡山花鳥得之並招餘黨百餘人而海波靖以總憲趙公申喬薦晉通政司參議奉 命賞賚湖廣綠

旗兵丁事竣由鴻臚寺卿遷大理寺少卿會陝甘荒歉 上命同
工部侍郎常公查勘行至乾州見途有殍抱疾日馳百里至平涼
出所貯倉穀及鎮原倉米如饑民口數給之六月二十五日晨興
呼衣被體瞑目而逝是時 上方注意公公感 知遇凡所經歷
留心繁訪其使於楚則以楚擾於苗深入山箐岔口等處窮苗窟
形勢相施州衛天樓山要地湖當日陸梁情狀及至秦下車親詢
疾苦於耕種畜牧地畱心劄記將以圖久安長治之策歸報吾
君而無負所學也未竟厥用年五十七以死勤事天下聞而悲之
公之學從劉念臺人譜入未嘗榜以道學之名而修己行政有本
末戊子冬世遠侍先君子主教龍峰書院公貽以書曰爲學要在

力行求實用若論派別則漳浦如高東溪陳贖夫周翠渠黃石齋亦各有宗旨也世遠心識之孝友純篤每念母楊太夫人中年早逝兄弟多天傷言及輒嗚咽流涕待從兄弟如手足培植俾各成立歷世祭產儉薄廓而增之好賢獎善勤懇如不及遇緩急悉心力謀之人見其樂善好施不知其宦橐蕭然至今尙未能營一椽也公令漳浦時世遠年方十五試童子隊未幾補諸生公課時藝古文皆第一以國士遇我序我詩文而刊之己丑余官翰林公以次年入補刑曹相聚都門重請舊業世遠隨以省覲假歸公竟使秦以卒與邑人哭於月湖書院月湖者公去任時所構也今置有祭田邑人士奉公如生云公初任漳浦 敕授文林郎五十二年

誥授中憲大夫娶張氏有賢行先公亡累 贈恭人子一曰本
醇邑庠生 恩蔭入監讀書博雅敦脩能世父學生男三人長雍
熙次雍綸雍縉孫女一人將以某月某日卜葬於某山之陽銘曰
乃筆筐篋吏之貽養交持祿非卿材我公家學播九垓烹鮮持斧
有餘恢未竟厥用心之摧魂歸魄藏天所培

右墓誌銘蔡世遠撰

公姓陳氏諱汝咸字莘學別字悔廬浙之甯波府鄞縣人也曾祖
某祖某父則翰林怡亭先生錫嘏也翰林於梨洲爲高弟而其論
格物之學不甚合故梨洲所作翰林墓銘有微辭然梨洲每屈指
門下必首推翰林之篤行公少隨父講學於證人社中心領神悟

多所自得梨洲嘗謂人曰此程門之楊迪朱門之蔡沈也目無流
視耳無妄聽和平端怒於星緯律厯方輿之說無所不究而尤得
力於慎獨之旨驗其功於修己治人之間然公未嘗以道學之名
自居成康熙辛未進士改庶常座主安溪相公方以講學招徠後
進同年江陰楊文定公名時最先服膺招公同往公曰梨洲黃子
之教人頗泛溢諸家然其意在乎博學詳說以集其成而其究歸
於蔽山慎獨之旨乍聽之似駁而實未嘗不醇相公步趨朱子其
言粹矣然未知其躬行若何也江陰爲之瞿然出知漳浦縣漳浦
最健訟胥吏能以一訟破中人產公下車著令凡戶婚田土皆委
家督宗親地保議之議成息訟於官其大者酌其地之遠近而定

其期被告人應拘者卽交原告人呼之被告人聞控卽具訴訴至
卽訊不令稽延時日胥吏無所施其奸縣民輕生每以小忿輒服
斷腸草及諸毒以自戕奸人因之煽訟公嚴禁之乃做古法令有
罪者貢此草以自贖又捐金募民致草以絕其種俗尙巫民有病
昇諸妖師狂祈謬祝費不貲藥食皆卜之食其吉者食而死則曰
神所不佑也公開陳曉諭巫風以息其爲漳浦立百世之利尤在
編審一事舊例世家有盈數千畝爲一戶者下姓有數十畝爲一
戶者每族置戶長地丁籍以徵納強後弱先小頑大黠乃定三百
畝爲一戶令民親供實產糧多者爲戶長以次輪雇丁亦如之催
科自此不擾以都鄙之民其分保有大小不一則奸匪易匿而公

務不均乃定二百家爲一保無所煩焉閩之丁口以明初戶籍爲據有遷居百年而原籍丁糧未除者官吏關移甚苦公援國制令入籍二十年以上者收之遷籍二十年以上者除之各縣皆以爲便又盡清屯產寺產鹽法則漳浦歲額六百餘舊例食鹽與曬鹽者皆得供課不盡歸商也其後派引配賣悉歸於商於是添設四場十六館巡丁四出顆粒盡徵給價短額頒發亦愆期公請復舊例有撤商銷引之議而大吏難之公曰法卽不可更不難行仁於法中卽革去場差免認保杜包納寬餘鹽之禁漳浦農商積弊皆爲之肅然一洗公恂文弱儒者氣體羸甚視日而行擇地而履顧其在海上方略四出令各鄉練鄉兵日則瞭望夜則巡邏壬午

夏有賊黨數百潛伏縣之七星洞公急檄官兵擊之賊遁去已而又聚於丹竈山中公發鄉兵擊之賊又遁去已而又聚於平和中公以計擒其魁會陸賊徒始散已而又以計擒海中大盜徐容六大頭目之一也公細訊之因并悉五賊巢穴及勦撫機宜請於督府願身任其事督府以公書生未敢遽付之兵但以事密聞於是 聖祖遣大臣自閩入粵卽攜徐容以往五賊之中勦撫者四則皆公發縱之功而賞弗及海上自鄭氏騷擾以後不復知有學術公下車見學宮有伽藍祠大賊立毀之東嶽行祠中有淫祀香火甚盛焚其像朔望爲諸生講明經史遡漳之學者自高公東溪陳公贍天周公翠渠而尤表章黃公石齋之學謂其貫義理象

數而一之如武庫之無不備乃重修朱子祠之在銅山者而以石齋侑食石齋故有明誠書院爲浮屠所據則理而出之又修朱子祠之在雲霄者與銅山皆贍以祭祀之田自東溪至石齋諸公書皆輯之何公元子有經學購之以示學者莆田鄭奚仲精於易并梓其書當時安溪以朱子之後一人自任欲學者皆尊其學不名他師而公以爲諸儒之躬行各有宗傳旁搜遠紹不徒爲雷同之口縣有無爲教又有天主教公至盡逐之而崇祀明殉難忠臣都御史陳公士奇巡道陳公瓊高尙遺臣御史張公若化長史張公若仲於學宮鄞故大學士錢忠介公墓在古田之黃蘗山公清蘆其墓田之爲人所據者繪圖以貽其後人不數年漳浦遂成鄒魯之

俗公知漳浦六年督撫已交章薦公輒爲部議所格及更一紀尙未調蓋公旣以講學不甚當於安溪而安溪子弟在家以吏事請託徧於閩中公爲安溪主試所得士其子弟益復旁午而前公致書安溪謂公方以講學居鈞輔當防閑子弟安溪以是大愠公旣無相門之援而選郎索公賂不可得遂共尼之會南靖山賊陸梁大吏以公在漳浦而境內無盜乃調之漳浦父老相率請畱於憲府不可得乃相與運糶鋤桔槔薪木橫陳縣門以塞路晨夕守之已而公束裝出父老繡涌而前奪輿人之擯而擯之以公還署公乃徒步出給父老曰吾今日飲酒於李秀才家未去也夜半變服呼守城卒開門而去父老及旦而知之追送數十里雨泣而別乃

衷公在縣時告約諭條文移輯爲漳浦政略一書梓之又建月湖書院以祀公月湖公所居也其治南靖如漳浦招降歐山逋盜有來而復叛者以計擒之大興境內河渠未幾內 召爲刑部福建司主事黜舞文之吏以正法紀尋遷廣西道御史巡視西城逐白蓮教之在道觀者尋疏言臺灣白糖之利遠及三江兩浙沿海居民多前往者日久不能保無奸人各縣給照不能辨其奸否泉廳於出口一驗更無從辨臣在海上未嘗輕給一照者此也宜嚴防詰之法又言駐防營伍例用內地兵更番迭換今當及瓜之際有私相冒襲者名存實亡恐兵以老而漸驕宜杜頂替之習次年聞海賊突燒營汎船隻流言歹船出海非挂號所能查而徒增其害

海上歹民其始皆坐小船竊出及出奪大船而行則大船之關牌
縣照盡已歸之原不必挂號也商船利走大洋無礁嶼以隔之風
迅帆急歹船難以攔劫今以挂號之故不得不沿澳迂行於礁嶼
之間而歹船乘之是挂號反爲商船之累也又言巡哨之船當以
南北風信爲準春夏多南哨船各聚本汛之南秋冬多北卽各聚
本汛之北船聚則兵強風順則船利若分汛各澳則力旣分而風
或阻雖見商船被劫而莫能前矣又言海賊雖終年波蕩入冬必
返其家故其旣下海之劫搶當責之巡哨官弁而未下海之蹤跡
當責之本籍縣令誠能力行各澳保甲何不可窮治之有疏上

聖祖嘉納 溫旨賞賚食物始有大用公之意而沿海遂罷挂號

之例商船至今感其德是年海賊陳尙義乞降尙義卽故盜徐容
等六人之一也前招撫時獨尙義不至橫行海上者多年公言當
因其來而亟納之乃自請行且薦江西舉人阮蔡文得 旨許攜
蔡文等前往金州衛鐵山之隍城島招撫 陛辭 聖祖謂公曰
汝乃近御之臣不可下海風濤不測所當懼也但令蔡文往足矣
又曰山海關外崎嶇汝不善騎當以肩輿往公感泣謝蔡文入海
舟果壞易其副以行卒撫尙義等復命 聖祖又謂公曰汝若同
入海不受驚耶公因頓首感泣謝因爲 上言隍城島在登州金
山之中宜撥登州汛兵駐之其筒子溝天橋廠亦宜巡哨又言金
州荒地宜闢遷通政參議會有閩中裨將請改易商船之制公力

爭以爲不可安溪雖不喜公然不能不主公議也尋奉使至湖廣祭告諸陵兼賚駐防士卒湖北之險峻莫如施州衛竹谿竹山等處湖南莫如九谿永定辰州等處或以爲可調官代領代給公不可由九谿之鎮筮歷鳳凰營至乾州進山箐岔口入楓木坪皆紅苗界也公熟視情形以籌撫苗久安之策施州登天樓山絕頂以溯當日伏莽故址徭崗長官有出迎者歌其土音公爲竹枝詞宣布太平威德之盛使習之返命遷鴻臚卿次年遷副大理而陝甘以荒告復奉使出公之爲學以萬物一體爲心而隨事周詳以求其中之所安顧素病喘洩不堪受勞瘁乃連年萬里力圖報荅不肖稍自暇逸其西行也聖祖謂曰窮邊恐不得食彼所出肉

從蓉土覆朕亦曾嘗之頗美可啖也公頓首謝入境野有餓孳卽不復御酒肉山路甚蹇下馬徒行一日而踰九嶺沿途撫慰饑民流涕沾襟甫抵固原疾動不以爲意猶日馳百里凡五日而卒其地曰海喇都棺衾皆率略饑民聚而哭之是時 聖祖方欲用公爲甘撫而公卒矣公之訃至閩漳浦人聚而哭之書院南靖人亦聚而哭之於社至京鄞人之在京者聚而哭之城西之都亭而漳浦農商置祀用以奉公焉公生於順治十五年八月初五日卒於康熙五十五年四月二十五日娶張氏 贈恭人子本醇蔭生公家庭之孝謹里黨之任卹均無間言而所以待其從弟汝登尤篤嘗語之曰古人大功同財吾尚與弟在同財之列所恐者曷世而

衰吾子與若子功服雖減而同財之限可展也又約以宦成之後
買宅合居汝登或介紹後輩以見公公推弟之愛以愛之訖今二
十餘年汝登亦老矣語及公未嘗不掩面而泣也方公謝安溪之
學或疑其以師傳之異不冝苟爲授受及當湖陸清獻公稼書所
著出公亟喜而梓之當湖亦與黎洲有異同者乃知公之非墨守
也公之學未見所止其見於世者亦僅僅小試其一二斯則可爲
太息者也所著有心齋集公之卒也蔡文勤公世遠志之汝登與
公子本醇更令予銘其麗牲之石予何敢辭其銘曰
南雷諸子大都早逝再傳有公始見行事亦復不年勵而小試東
西萬里弗辭盡瘁其施未竟可爲長喟但有棠陰闕疆蔽芾

右神道碑銘全祖望撰

先生姓陳名汝咸字莘學號梅廬浙江鄞縣人居月湖之濱學者因以名之也父錫嘏舉乙卯鄉薦第一丙辰進士官翰林編修有文名先生幼聰敏日讀書徑寸年十四通十三經廿一史諸子百家里中前輩以神童目之二十一登戊午賢書辛未魁禮闈選翰林庶吉士丙子夏出宰漳浦浦故閩南劇邑也多詞訟丁糧版籍歲久混淆胥役因緣爲奸弊官民胥困焉先生正己率物勸民親遞設紙皂懲訟師聽斷明決莫之能欺由是公庭肅然念編審爲賦役大政非精詳整頓不能使宿弊一清日夜焦心勞思躬自覈算編糧均戶人丁各歸見在之籍令民自具親供實計丁口產

業自立徵所自封投納除戶長承管之弊歲省民二千餘金均保
甲清屯糧併寺畝除根祖行滾單之法使糧戶自相催納不用圖
差方舉行時豪強不便吏胥陰撓至上官亦爲搖惑勸以勿事紛
更先生毅然不可回條分縷析三年而法立弊竇悉除差役袖手
胥吏無所施其技民歡樂稱便鼓舞輸將秋冬之交歲賦全完罔
有絲毫逋負者濱海習俗輕生諍語小故輒服斷腸草自盡圖賴
先生力懲其弊令當刑者掘草根贖罪或出俸錢以市積堂下燬
之革相驗花紅夫役飯食不避臭腐周屍上下反覆諦視以手指
按雖件作謝弗及也邑多山虎白晝常出攫人捐貲令鄉民多設
虎穴復募善射者伏強弩毒矢要之潔誠齋戒牒城隍默相驅除

自是虎悉入牢又多爲毒矢所殪值歲旱朝夕步禱夜宿壇登梁山絕頂觸龍湫備歷崔嵬紳士行四五十里多不能從先生葛袍芒屨不辭勞瘁甫下山而靈雨四郊霑足人以爲精誠所感丁亥夏霍雨溪流驟漲高及雉堞南郊廬舍爲巨浸民皆升屋而號先生力疾登城樓與錢數十緡募船拯救又多爲木筏懸賞格每渡一人給錢三十諸生蔡衍銀黃尙柔皆與錢以助男婦老幼蟻附登城者數千人分糜粥餉之次日復賑以米多方撫恤故民雖災而不害興文教設義學在邑中者一在雲霄銅山杜潯者三延諸生有學者爲之師月於初三十八日會邑中士大夫及鄉之俊彥集明倫堂講經史性理諸書繭絲牛毛終日論辨酬答娓娓

無倦朔望日課時文二詩古文各一浦人士濟濟奮興文章經濟
與海內相角先生之教也大修文廟造祭器樂器俎豆鐘鼓煥然
一新雲霄銅山向皆有朱子祠祀典久廢先生以漁船二十戶暨
公溪泥泊稅羨充祭祀及諸生鄉試之資東郊明誠書院故黃石
齋先生講學之所禿廝寄寓漸忘其故幾爲湯屠窟宅先生撤佛
像盡逐僧徒以黃氏子孫主之浦故有教堂四所男女羣聚茹蔬
禮佛名曰無爲教先生籍其居爲公所爲育嬰堂西洋天主教流
毒至浦將開堂以惑四方之人士先生峻拒之無敢容納有西洋
人奉 欽差道經浦邑以好言挽先生繼以威挾先生弗顧屬諸
上官爲先生言先生仍弗顧也城東東嶽廟廊廡立功曹祠旁有

鬼卒能作祟邑人無識者香燭酒牲晝夜不絕先生命毀其像隸
役皆悚惕不敢前先生怒令鞭而碎之村民信巫禱病者輒舁土
木神鳴鑼擊鼓採藥以療先生亦厲禁之有奸匪百餘人潛伏七
星洞招黨入海發兵追捕遁聚丹竈山掩擊之走平和山中樹旗
集眾謀再至浦先生遣鄉長黃利見密致賊黨林大札啖以重利
誘擒巨魁曾睦及其從蔣卿江貴等奸徒悉散復獲海賊徐容等
十餘人搜所剽搶白金二千八百八十兩珍珠四十六顆瑪瑙二
顆綺紵羅紗千餘匹洋燭洋簪杯竿之類不可勝數始知海上巨
賊有仁義禮智信興六號徐容卽信字號賊首也細詢行蹤直陳
不諱并賊中情形作何勦撫機宜言之甚悉先生以所獲金帛悉

歸藩庫因條陳撫捕以靖海氛利商舶請赦徐容以致其餘黨未
幾 當宁遣大臣巡海招撫諸賊皆歸誠惟禮字號賊目尙作海
上遊魂耳南靖宵小恣肆督撫大吏僉謂非先生莫能了此交章
調宰南靖浦人相率赴會城籲留不可歸取田器塞縣門晝夜環
守久之行有日矣民扶老攜幼數萬塞街巷環跪泣日父母去活
我百姓擁肩輿不得行先生下輿步入李太學家夜半假城守二
騎作巡邏者閒道從北門逸去士民追思不已卽於北門構月湖
書院塑先生像其中歲時瞻拜靖邑積年逋寇多伏深山旋勦旋
聚或始撫而復跳梁聞先生至相謂曰此漳浦陳公十三年矣善
治盜我等出沒彼皆知之將安所逃顧其人長者能自詣歸誠必

無患也於是前後數月悉受撫先生開示威信皆革面終不爲盜
頌聲大作己丑內 召庚寅補刑曹主事辛卯擢廣西道監察御
史巡視西城疏陳臺灣事宜及更定命案條例 旨嘉納之除西
門外白蓮教訪私雕假印偽造貢監照劄者徐德孚傅雲生等二
十四人皆執赴刑部置之法壬辰秋七月聞海賊焚燒營汛舟楫
因之熱河行宮上防海事宜一疏蓋先生在閩日久熟悉海上情
形又以商船被劫多由沿邊挂號水路屈曲礁嶼錯雜賊船遂得
截劫於必經之地而當事皆以挂號稽查爲良策商民苦不能自
達先生至是始痛切言之沿海數省利賴焉是日在熱河復陳弭
盜事宜一疏 旨皆嘉納 賜克食鹿條魚脯小菜慰勞之是冬

海賊陳尙義遣周錦赴兵部求撫先生謂尙義必係禮字號賊目
陳老大當年海賊徐容稱此賊久在海上肆劫今就其求撫請率
舉人候選知縣阮蔡文千總王三駱南左其彪等往鐵山鳳城島
入海撫之 諭旨慰勞以風濤不測但駐鳳城著蔡文等坐船前
往不必親自下海復以兵部郎中雅奇爲副未幾颶風大作駱南
等船飄失無蹤蔡文一船飄折大桅先生馳至天橋廠遣舟往會
文南等俱至盡山花鳥遇陳尙義并其黨百餘人皆招致詣京師
明年春正月擢通政司右參議尋遷左參議夏奉使入楚祭炎帝
神農帝舜有虞氏陵及頒賞楚省綠旗兵丁先生自裹行糧不擾
地方官一絲一粟入境卽頒 賞賚不忍擾騾遞隨至隨行湖南

山川險峻或請僻遠營汛可調官代領給發先生慨然曰 王命
屬我何敢憚勞披星蒙霧卽峭壁危崖馬不容騎輿不容肩者亦
必捫蘿附葛徒步而行且徧訪紅苗窟穴情景利弊以籌撫乂久
安之計祭二陵皆竭誠盡敬見虞帝寢廟傾圮捐貲屬令修葺陵
徧諸獠崗崗長率男婦百餘人拜謁男帕其首擊長腰鼓吹笙鳴
鳴舞跳而導婦女辮髮纏三小竹於髮爲椽繡紅絨布覆其上連
袂而歌爲靡曼聲譯其語乃蜜蜂飛來千丈高啓王子孫在山好
等句先生因改著竹枝詞四章備揚 天子萬年太平有道使之
習而歌焉楚使告竣遷鴻臚寺卿又遷大理寺少卿甲午春三月
奉 命赴甘肅勘視荒災見饑民襁負蜂擁皆鳩形鵠面鶉衣百

結餓殍縱橫先生目擊傷心不復茹葷飲酒會同陝甘督撫發倉賑恤尙慮窮鄉殘黎或未徧霑實惠徒步郊野汗淚交并時值癘疫炎蒸遂一病不復起以四月二十五日卒於固原之海都喇彌畱之際語不及私惟恨饑民情形不得上達地方有司檢視其囊衣一襲錢一緡而已年五十七所著兼山堂遺彙漳浦政略行於世

論曰先生出宰十四年入於人者最深一生事業此爲顯著宜漳人之尸而祝社而祀之也固原訃至自士大夫以及農工販豎莫不咨嗟太息刑牲設醴奔哭於月湖書院數十日不絕復醵金置田春秋饗祀事之若私親焉詩曰豈弟君子民之父母先生可無

愧也已立朝日淺措施未暢使天假歲月其經國遠猷必更大有可傳者惜夫

右傳藍鼎元撰

陳莘學名汝咸浙江鄞人父錫嘏以通經有名於時官翰林院編修莘學幼從父學康熙三十年會試第一成進士選庶吉士散館改知漳浦縣中賦役故責戶長爲主辦黠者緣爲姦利莘學定三百畝爲一戶令民計產爲親供自立徵戶糧多者爲戶長以次輪催由是吏無追呼民無逋稅均保甲以二百家爲一保第其口多寡籍以供役五年一編丁而役法平民有被訟者肖紙爲隸立期限令訟者自召之一訊卽決閩俗信鬼而賤醫病者占藥服之往

往致死莘學爲分別病證示以經驗方調諸藥以與病者全活甚
眾月以初三十八日莘諸生於明倫堂講五經性理綱目諸書試
以古今文詩賦擇其賢且才者爲義學師以教於鄉里屏天主及
無爲諸異教改其堂爲育嬰堂斥城東淫祀鞭其像而毀之漳浦
瀕海多盜莘學設方略擒獲甚眾上官以南靖盜未靖移莘學治
之縣民列狀請畱不得數十人者環而守乃夜以兩騎疾走出北
門縣民覺追送十里許號泣而歸歸則構祠城北門名曰月湖書
院歲時祀之治南靖一年擢刑部福建清吏司主事晉廣西道御
史諭防海事宜多見采納五十一年海賊陳尙義遣其黨赴兵部
請就撫莘學素知尙義爲賊魁請身入海撫之 廷議御史近臣

不宜輕入海乃令郎中雅奇率莘學所薦阮生蔡文同往遂降尙
義及其黨百餘人海患遂甯以左都御史趙恭毅薦擢通政司參
議累遷鴻臚寺少卿會奉 詔賑饑甘肅路見餓莩遂不御酒肉
散私錢數十千給饑民疾馳至平涼發倉以賑積勞卒年五十七

右述彭紹升撰

文志鯨

文志鯨字石濤湖南桃源人父鵠穎異博學早歲以試藝通五經
補諸生兩中副榜永興訓導課士首先德義士林則之祀鄉賢
志鯨康熙三十年辛未進士授檢討直南書房以督學浙江被蜚
語左遷知邠州改瀘州入 覲 特旨命仍入翰林晉侍講充子
史精華館總裁教習庶吉士晉鴻臚寺卿 召問河洛異同稱
旨擢奉天府丞時朱軾爲府尹 上命凡事當與志鯨議軾入閣
以志鯨代值瀋陽旱潦頻仍志鯨請賑忌者多浮議 上察其廉
不爲動志鯨能文章重節槩三典鄉試稱得士及卒於任朝論惜
之孫宗伊字尹孚由選貢任高唐州判有惠政

卷之二十四

七

國朝書目考卷之二十四

右述聞謔瑤錄

三

穆和倫

穆和倫滿洲鑲藍旗人姓喜塔臘氏由兵部筆帖式遷內閣中書
遷侍讀康熙三十二年授刑部郎中三十三年遷御史三十九年
遷禮科給事中四十一年十一月遷內閣侍讀學士十二月擢內
閣學士四十二年五月兼攝光祿寺卿七月山東水災 詔截漕
五十萬石貯沿河州縣備賑濟發庫銀三十萬兩派八旗官員往
賑以大臣巡查自泰安至鄭城爲中路濟南至登州爲東路德州
至濟甯爲西路 命穆和倫巡察中路四十二年三月遷工部右
侍郎五月穆和倫奏山東麥秋成熟請撤回賑濟官 諭獎其勤
勞 命俟秋成後回京四十四年轉左四十七年四月調吏部左

侍郎五月遷左都御史四十八年授禮部尚書明年調戶部尚書
五十年 上諭入旗及部院大臣各將灼知確見篤行孝義者著
名保奏如大學士溫達尚書穆和倫富甯安之孝朕深知之孝者
百行之原果有篤行孝義之人不可謂無由得知也時穆和倫母
年九十 御書北堂眉壽頌 賜之五十二年四月因戶部吏包
攬索銀穆和倫家人亦受賄部議降二級調用得 旨從寬畱任
時江蘇巡撫張伯行劾總督噶禮攬賣舉人多索賄賂噶禮亦劾
伯行誣陷船埠張元隆通盜及不能清理案件等事 上命俱解
任 遣尚書張鵬翮會同總漕赫壽察審尋奏噶禮攬賣事全虛
伯行不能清案屬實 上切責鵬翮赫壽掩飾 命穆和倫往鞫

如前議噶禮無罪伯行誣劾督臣應革職得旨張伯行居官清正但才不如守噶禮雖才有餘未聞清正之名此所議是非顛倒著革噶禮職巡撫張伯行復任五十三年穆和倫以老病乞休上慰留之五十四年再乞休詔允所請五十五年仍授戶部尚書五十七年四月因收平餘銀未奏降五級調用十月卒

右 國史館本傳

										...
--	--	--	--	--	--	--	--	--	--	-----

國朝耆獻類徵初編卷六十四補錄

卿貳二十四

陳汝咸

國家定鼎六十餘年令漳浦者以十數未有立生祠者有之自四
明陳公始公爲介眉先生令子本其家學由翰林出宰漳浦邑故
繁劇難治公廉以居身儉以養德法立令行邑人抵掌慶曰六十
年來無此矣邑賦役故偏累小民黠者往往相緣爲奸公旣至究
徵收法均保甲以二百家爲保家第其口多寡而籍之以供役五
年一編丁卽按而增損之令民各爲親供計其實產自封投權雖
至親無所波及其始也奸猾皆不便公公毅然行之至今公私利

賴課不懸籍吏不呼門是則公之良法美意大有造於吾邑者也
邑忝號名區自高東溪倡學於前陳贍夫黃石齋繼起於後彬雅
爲閩中最公益加鼓厲以文行交修勸多士月訂兩期講五經性
理綱目諸書兩期課古今文詩賦崇正學闢邪教十餘年開砥行
立名通經博古之士比肩接踵嗚呼公作興之功不可忘也康熙
戊子二月總督梁公巡撫張公以南靖地雜山澗溪谷萑苻時竊
發廉公才守上於朝調公南靖邑人相率列狀請畱不可則歸取
田器塞縣署門桔槔耰鋤山積公每出則號於道曰公毋去公感
百姓之厚也揭示通衢曰吾在邑十三年無善政以及爾民今又
煩苦我父老子弟心弗忍雖然此 上命也吾不行將獲譴吾雖

在靖心猶在浦也眾皆感泣會有金藩司公子令粵東者道過浦詣公至門問故眾跪伏曰吾儕以畱賢父母不得故如此公子曰吾爲百姓屈從角門入耳次日公子出北關數百人焚香遮送於道曰公子行幸爲百姓徧告當事還我使君六月十一日公將行窮鄉僻壤扶老幼至者及萬人共翼公輿環跪泣曰公母去公乃入太學李生家給眾曰吾爲若等暫居此若等請得命畱矣眾大喜比昏稍解以數十人臥李門度公之出必由東門也更以百人守東門夜過半公假城守二騎閒道由北門出臥李門者覺疾走東門問守者守者曰無之馳至北門公已出矣更相率追送十里許泣別而歸時六月十三日也嗚呼士君子束髮受書肆其譏訐

以古廉能自命一行作吏或迫於上司之供億或苦酬應之繁多
夙昔清操消歸何有親朋相規勸云見諒雖有小善甯足贖耶公
益漳浦十三年凡百艱辛皆備嘗之勁節凌霜久而不變其政事
又彰彰如是公可謂真讀書人不負家學者矣公爲政嚴明奸胥
豪猾動繩以法持之急至有造語以謗公者卒之萬喙同聲無賢
愚一出於謳禱余於是歎公道之在人心而廉吏之可爲也公去
後邑人斂金得二百有奇構祠城北門名曰月湖書院月湖者所
以表公之清且明又公鄉有月湖故也公諱汝咸字莘學號心齋
浙之鄞縣人辛未進士

右碑記蔡世遠撰

國朝書錄類微初編卷六十五目錄

卿貳二十五

石文焯

陳瓊

陶岱

張大有

高其倬

汪澹

呂履恆

弟謙恆
從子耀曾

舒蘭

郝玉麟

揆敘

瑪拉

補錄

呂謙恆

皇清宣統元年...

--	--	--	--	--	--	--	--	--	--	--

國朝耆獻類徵初編卷六十五

通奉大夫前署江西巡撫江西布政使司布政使湘陰李桓輯
卿貳二十五

石文焯

石文焯漢軍正白旗人康熙三十二年由監生授江南松江府同知三十八年遷蘇州府知府四十三年遷甘肅洮岷道五十三年調貴州貴東道五十五年丁母憂五十八年補江西饒九南道五十九年遷江西按察使六十一年五月署福建將軍六月署福建巡撫十一月授安徽布政使雍正元年三月擢河南巡撫六月疏報沁黃並漲黃河北岸馬營口等處隄壩多有塌陷桃園口支河

三道引濶北趨南岸蔣家寨水偏大隄工俱危險各飭河員搶修無虞得 旨南北岸隄工捍禦有方殊屬可嘉九月疏言黃河經行豫省千餘里自滎澤以下南北隄工均應加謹防守查江南臨河州縣有同知通判專司河務河南所設同知通判管轄數縣隄工而辦料募夫多責之州縣必得勤幹之員經理查祥符滎澤中牟鄭州陳畱蘭陽儀封商邱考城虞城武陟武原武封邱十四州縣皆有隄工應請定調補之例於本省見任官員內擇廉能調補三年內能盡心辦理工程平穩者題升以示鼓勵下部議行二年正月疏言豫省各案虧空追比年久無可變賠者自今年爲始將臣衙門所有司道規禮府州縣節禮及上下各衙門一切節壽

規禮盡行革除以杜州縣藉口之端以塞上司勒索之路遵例令
各知府遴委賢員將州縣銀櫃封驗眼同拆封將正項卽行起解
使經徵官絲毫不能侵那所有耗羨每兩約一錢三分通計全省
耗羨銀四十萬兩有奇除各官酌量給以養廉及各項雜用公費
悉於此支給外每年約餘耗羨銀十五六萬兩解貯司庫彌補虧
空及辦公之用至各官俱有養廉足資支應上司不至苛求屬吏州縣
不至那移庫項勒索之弊除而公帑亦長無虧缺矣疏入 上嘉
納之七月疏言開封府轄四州三十縣河南府轄一州十三縣汝
甯府轄二州十二縣地方遼闊請改設直隸州分轄將開封府屬
之西華商水項城沈邱分隸陳州臨潁襄城鄆城長葛分隸許州

密縣新鄭分隸禹州榮澤滎陽河陰汜水分隸鄭州其原武延津均在河北原武就近歸懷慶府管轄延津就近歸衛輝府管轄河南府屬之靈寶閿鄉分隸陝州汝甯府屬之光山息縣固始商城分隸光州 從之是時浙江海潮泛溢仁和等十六縣田廬被淹

命文焯署浙江巡撫撫恤災民九月疏言臣抵浙確勘災民戶口委員監賑查煮賑浮費甚多弊端不一且小民日赴廠食粥路有遠近扶老攜幼更多不便臣與布政使佟吉圖細加商酌每大口日給穀四合小口二合人給三月口糧無穀之處照時價折給各委大員以次賑完其平湖奉化定海嵎縣永嘉五縣海甯二衛所雖被災分數不符蠲賑之例然水淹之苦同一情形酌給兩月

口糧以廣 皇仁至衝決塘隄飭各地方官修築以禦鹹潮所有
舊築土塘應請改建石工其一切修砌善後事宜見在確查估計
奉 旨此事當再三斟酌若修砌石隄一勞即可永逸則速議改
建假如勢小土隄亦可堵遏勢大雖石隄亦不能抵敵何必曠日
持久多爲糜費也文焯又疏言臣親歷海塘查勘今年風潮原屬
僅見是以塘工不能捍禦隨分委大員將應修處丈估詳議土石
塘工俱仍舊制興修至原係土塘請改石工之處海潮勢大難保
無虞不敢輕議舉行 上以文焯前後奏互異毫無定見交新任
巡撫法海議奏十一月調西安巡撫三年調甘肅巡撫四年二月
疏言茶法原以裕課裕課必先便商臣查商人赴楚買茶之船票

必開載該商等引目茶數以爲沿途照驗俾無畱難再查舊例每引一道運茶百斤以五十斤交官貯庫易馬五十斤給商變賣價本外有附茶二三十斤以爲運費今商人運茶至潼關廳官盤驗每引祇許運茶百斤附茶不准入陝應請照會典每茶千斤准帶附茶四十斤又陝西向例洮州河州西甯等五司賣茶每年畧商闕定司分以杜避難就易之弊其地僻茶多不能盡售者請准呈改別司發賣接濟新引庶茶法得以疏通議如所請又言各省軍犯俱發河西及平慶臨鞏四府各衛充伍今各衛俱爲州縣祇有赤金靖迤大通三衛若充發太多恐致疎縱請照河東各衛歸併各府管轄之例令該州縣專管庶無疎虞 從之尋疏請裁平涼

固原慶陽臨洮河州蘭州岷州七衛西固一所各千總歸州縣管
理下所司議行五月以不能拘畱參員噶爾圖追帑完項部議革
文焯職又追議文焯前署浙江巡撫時蠲賑平湖五縣海甯二衛
所雖經奏明未具本題報應請革任奉 旨從寬革職畱任尋因
文焯子石禮哈爲廣州將軍勦平狝苗有功 上推恩文焯 賜
還原職五年六月以承審四川夔州府知府程如絲販私傷人一
案錯誤 命永停給俸十月疏言平涼府屬西路同知及鹽捕通
判俱駐劄甯夏從前甯夏未經改設郡縣是以挂平涼府銜今甯
夏已改衛設府其同知所管驛站錢糧通判所管鹽務俱由甯夏
道考覈應請改隸甯夏道府下以專考成 從之是月以柔懦耳

召回京六年二月授禮部右侍郎三月調吏部左侍郎五月
授兵部尙書十月調禮部尙書八年六月 諭曰石文焯原係無
知庸材自內升以來諸凡退縮毫無踊躍奮勉之心著革職以原
品在八旗井田督率效力行走九年署直隸馬蘭鎮總兵十年總
理 三陵事務十三年正月卒子石禮哈由直隸正定府同知捐
納道員雍正元年改授正定協副將二年遷貴州威甯鎮總兵三
年署貴州巡撫 上以其年少屢加 訓諭先是雲貴總督高其
倬奏准移大定協弁兵分駐廣順州所屬長寨遮貢羊城壘等處
四年四月長寨狃苗阿革阿紀等糾眾揚言不容安設營汛壘石
阻路總督鄂爾泰調兵勦撫石禮哈偕提督馬會伯親往督兵進

擊直搆長寨擒阿革阿紀及其黨阿擣阿撈七十餘人遮貢羊城
里五十七寨均乞降乃宣諭悉歸故業安營設汛而還事 聞
詔獎石禮哈臨時果敢交部議敘加三級並 賜還其父文焯巡
撫原職見前傳五月擢廣州將軍十一月抵任遣員採買廣西米
石接濟旗營自備銀一萬兩充運腳費部議敘加二級五年六月
以遵 旨會鞠道員李濱抹頸玷職一案誤聽供詞指稱巡撫楊
文乾偏勒索致奉 諭詰責六年三月楊文乾疏奏署羅定州知
州李達德因清查肇慶府知府楊以甯虧項至將軍署謁見石禮
哈不能以禮貌接待縱役陵辱 上原其過猶小免究七月 諭
曰石禮哈與楊文乾皆實心任事之大臣但恃才自用俱欠和平

二人不睦於地方無益石禮哈著調補福州將軍十二月欽差通政使雷保等至廣東疏劾石禮哈在廣州日於正白旗人戶壯丁小衛屢犯竊逃並不緝拏治罪又標兵朱國用等四名爲盜石禮哈既不將失察各官據實查察竟扶同倒提年月詳革名糧應治其徇情疏縱之罪 詔該部嚴察議奏尋議照溺職例革職 從之七年正月 特授鑲白旗漢軍都統七月以大軍分路進剿準噶爾 命石禮哈爲北路參贊大臣十三年還京補鑲紅旗漢軍都統乾隆二年奉 旨石禮哈每以不知爲知舉止乖張不勝其任著革去都統在散秩大臣上行走不必食俸四年以不勉力行 命革職發往軍臺效力贖罪七年釋還十二年卒

右 國史館本傳

國朝書林典故初編

卷六十五 卿貳二十五

六

國朝書目類編卷之三十一

一

陳瓚

陳瓚廣東海康人康熙三十三年進士三十九年授福建古田知縣四十一年調臺灣四十二年行取四十四年授刑部主事四十五年遷本部員外郎四十六年遷兵部郎中四十八年充會試同考官卽出任四川提學道四十九年三月 聖祖仁皇帝誠飭四川官員加派恣肆 諭及瓚任學道操守清廉十二月福建巡撫張伯行以臺灣廈門道乏員調補疏述瓚舊任古田臺灣二縣廉能著稱輿情悅服至今不忘 上遂授瓚臺灣廈門道五十二年十二月超擢偏沅巡撫五十四年九月以橫役累民劾罷湘潭知縣王爰溱徇庇不揭之長沙知府薛琳聲削三級十月疏言臣蒙

恩超擢重任數月以來諮詢利病探聽輿言敢敷陳愚慮一禁
加耗以甦民困有司徵收錢糧敢於正額外加取分毫者卽計贓
依律治罪一禁酷刑以重民命夾棍重刑也非命盜重情不得濫
用有司敢於戶婚田土細故夾訊者卽以酷刑論一糶積穀以濟
民食湖南倉穀有存七糶三例不若於青黃不接時盡數發糶至
秋收後買補還倉一置社倉以從民便社倉與常平倉不同常平
倉設於城內出納俱官吏典守止便於在城及離城一二十里之
民社倉分設村莊民間舉報殷實有德行老民掌管出納但止聽
民自捐必寥寥無幾若按畝斂穀又恐擾民應令通省大小各官
倡捐分貯出示勸諭紳衿及好義富民各量力捐入有捐至五十

石一二百石者分別給扁獎勵免其差徭歲終以貯粟數目報明縣官其斂其散聽民自便縣官無與則視常平倉爲利更薄一崇節儉以惜民財今人一入仕宦於飲食衣服器用及交際往來皆備極華侈多所費必多所取方面取之有司有司取之小民腴削無已應申嚴奢侈之禁凡爲民牧宜安儉樸庶幾寡求易足畱不盡於民間且有以端移風易俗之本一禁餽送以肅官箴每見下屬餽送上司至贓罪發覺開款抵銷應申禁自府道以下不許收受州縣官餽送使州縣官有所顧忌不敢橫徵科斂一先起運以清錢糧州縣額徵錢糧有起運存畱兩項定限四月完半九月全完先起運而後存畱槩以來歲五月奏銷前註明完欠分數爲考

成應通飭各州縣凡起運項下錢糧務於本年歲內起運全完庶
於解部及月支兵糧無誤而已徵在官錢糧不致久貯州縣庫內
得任侵那一隆書院以興文教湖南嶽麓書院初自宋時爲天下
四大書院之一見今柱朽瓦裂應卽修整容臣率同城各官量力
捐費宣布 皇仁雅化俾士子感激奮勵一飭武備以實營伍海
內承平之日久武備最易懈弛應通行申飭汰老弱補虛額整甲
械嚴汛防勤操演許臣於所屬地方出其不意察閱點驗如有虛
冒卽會同督提鎮劾奏一停開採以防民患湖南郴州有開採一
案抽稅無幾破冒工本招集遊手有廢農業應請永停俾小民專
力於農工商賈之業以謀生毋致匪徒嘯聚一隅亦爲未雨綢繆

防微杜漸以上十條皆臣職分內應行事宜敷陳請旨俾得懷
遵天語少違愆尤疏入上以條奏各款皆職分內事宜諭令
躬行實踐勿驚虛名先是瓊奏請入覲上允之十二月調瓊
福建巡撫諭廷臣曰朕昨召陳瓊入見細察其舉動言語實係
清官以海濱務農之人非世家大族又無門生故舊而天下之人
莫不知清非有實行豈能如此而其才尙能辦事國家得此等人
實爲祥瑞允宜從優表異以鼓勵清操五十五年四月疏言臣赴
任時至建陽縣有考亭書院爲先賢朱子晚年卜居故址城外朱
子祠曾奉御賜扁額對聯懸挂前堂而祠宇湫隘用木板爲牆
壁宜易以甄石與書院並改造軒爽謹同督臣滿保捐費委員鳩

工又疏言朱子生於尤溪縣郭外南溪之地向亦建有專祠請
賜扁額疏並報 可 賜文山毓哲扁額於南溪祠七月疏言防
海賊之法與防山賊不同山賊之嘯聚有所而海賊之出沒靡常
也臺灣廈門之防海賊又與沿海各邊不同沿海邊賊之患在突
犯內境而臺灣海賊之患在剽掠海中也夫嘯聚有所則在我或
攻之以出其不意或困之以待其自斃或招之以誘其出降而山
賊可平其在海中不必連踪結隊攻之無可攻以劫掠爲生三五
遊行遇見孤艇一口鯨吞又有數日之糧困之不能困非二三十
年前海賊有頭目有旗幟有巢穴可比招之無可招自廈門出港
自臺汛鹿耳門出港同爲商船迨至洋中而某商船忽被劫矣劫

商船者卽其同出港之商船某船有某客有某貨物並若干銀錢
港內探聽旣真本船引線有人一至洋中直如取諸其懷之易故
於臺廈防海賊必定會哨之期申護送之令取連環之保今提標
水師有五營澎湖水師有二營臺協水師有三營各設有經制哨
船莫若三處各立本船旗幟大書某營哨船字樣於其上每月會
哨一次彼此交旗爲驗如由西路而去者提標水哨至澎湖交旗
澎湖水哨至臺協交旗俱送臺灣鎮驗准由東路而來者臺協水
哨至澎湖交旗澎湖水哨至廈門交旗俱送提督驗准某月若無
哨旗交驗卽察取派定某營官職名某月海洋報有失事卽察取
巡哨官職名則會哨之法行矣由廈門至澎湖有七更水程由澎

湖至臺灣有四更水程載在輿志以五十里爲一更不過五百里之程餘故風信順利卽二三日可到今商船不宜零星放行無論自廈去者自臺來者候風信順利齊放二三十船出港臺廈兩汛各撥哨船三四護送至澎湖交代各取某日護送某商船自某汛出港至某汛出無疏虞甘結帶回原汛按月彙送督撫衙門如無印信甘結卽以官船職名申報則護送之法行矣商船二三十同出港時把口官逐一點明各船貨物搭客及器械填單取各船連環保結若洋中遇賊必首尾相救如不救卽以通同行劫究論則連環保之法行矣臣因商船被劫幾無虛日不勝慚惶俯竭愚慮疏下部議以防海已有定例璜所奏繁瑣難行議覆 上是璜所

奏下九卿再議俱如所請行是年冬總督滿保入 覲瑣暫兼攝
閩浙總督奏請以閩省收捐穀石應交巡撫公費銀一萬五千兩
撥充公餉部議如所請 上曰前督撫等奏以公費銀兩充撥兵
餉朕皆未允聞有諭令買穀預備散賑者因係伊等應用之銀非
正項錢糧若准其充餉恐日後竟同正項不肖之人又於此外侵
蝕索取矣下大學士會同九卿再議令瑣遇本省應用之處撥給
尋瑣又以巡撫任一年支取司庫餘平項下銀六千五百餘兩爲
賞兵給役公用列奏 諭以前旨甚明非動用正項錢糧例應奏
銷者毋瑣屑具題五十六年二月疏薦惠安知縣田廣運永春知
縣陳璘漳浦知縣汪紳文南平知縣李丕煜清流知縣林甲泰甯

知縣范廷諤南靖知縣靳樹晚平和知縣郭廷彩長汀知縣張文
煒大田知縣曹建標福安知縣嚴德泳武平知縣壽運焜等十二
員催科能寓撫字不用重戡不加火耗無那移虧空起解錢糧歲
內全完懇 恩破格獎勵 上曰此奏甚善徵收錢糧惟少加火
耗百姓易於輸納錢糧斷不至欠缺也田廣運等俱下部議敘五
十七年正月疏言前臣以廣東雷州府東洋塘隄岸每爲海潮泛
溢侵損民田奏請修築部行兩廣總督楊琳勘估需費五千三百
餘兩竊思東洋塘界連海康遂溪二縣隄岸遼闊工程浩大非五
千三百餘金可修築堅完臣生長斯地深知海潮之患仰請 聖
恩允以見貯司庫之臣衙門公費銀一萬五千餘兩內動支五千

兩解交粵省督臣轉發添買木料輒石則費多工固隄岸可得久
遠臣與桑梓小民均沐 聖恩浩蕩於無既矣得 旨如所請八
月以病劇乞回籍調理 上慰留之十月卒於官年六十有三遺
疏言閩省捐穀項下應交臣衙門公費及餘平銀二項除支用外
見存司庫銀一萬三千四百餘兩應令接印撫臣委員解京充西
師之費以盡臣未盡之心得 旨陳瑣將伊應得銀一萬三千餘
兩奏請充爲兵費內一萬兩可存藩庫以充兵餉其餘三千零卽
賞給陳瑣之子又 諭大學士等曰陳瑣居官甚優操守極清朕
亦見有清官然如伊者朕實未見卽從古清臣亦未必有如伊者
前在臺灣道任內所應得銀三萬兩俱於修理廠臺等公事動用

署總督印務應得銀兩亦未分毫入己來京陛見時曾奏稱貪取一錢卽與百千萬金無異人所以貪取者皆因艱於用度臣初任知縣便不至窮苦卽一錢不取衣食亦能充足等語今觀其居官實能踐所奏之言誠清廉中之卓絕者似此不加表揚賜卹何以示勸著追授禮部尙書凡祭葬立碑與諡皆照尙書例并廕一子入監讀書以示朕優禮清廉大臣之意尋 賜諡清端廣東巡撫楊宗仁以瑣長子居隆次子居誠並舉人候選請廕孫陳子温部議從之 世宗憲皇帝雍正八年入祀賢良祠 今上乾隆六年十月 恩賜其孫陳子良舉人十三年七月以原廕之陳子温未仕而故 允部議補廕瑣之孫陳子恭授刑部員外郎尋遷郎中

出任知府

右 國史館本傳

陳瓚字文煥廣東海康人康熙甲戌進士授福建古田令以才能
調臺灣有惠政擢刑部主事歷兵部郎中督學四川朱滿任卽調
臺廈道蓋閱撫張伯行廉其賢破格請之 聖祖特從所請也道
臣兼理學校瓚至則以興化易俗爲先鼎新學宮建朱子專祠於
學之右示諸生以正學海澨烝然向化性清介簡靜私居常御布
素食無兼味所屬憚之墨吏皆爲斂戢居五年超擢湖南巡撫尋
改福建益勵清節爲治舉大綱不尙煩苛瓚始爲張伯行所知其
後遂與齊名稱天下清官其撫閩與伯行相後先伯行清慎瓚更

簡易案無留牘閩人尤安之居三年卒於官 贈禮部尙書 賜
祭葬諡清端初雷郡之東有洋田萬頃隄岸水閘爲海潮衝激日
就圯壞瑣常憂之及官巡撫疏請修築海遂二邑皆蒙其利

右 國史賢良小傳

公諱瑣姓陳氏字文煥一字眉川海康人世族單寒祖父皆潛德
弗耀公始以進士起家歷官都察院右僉都御史巡撫湖南福建
追授禮部尙書 賜諡清端 詔入賢良祠公少貧茹苦力學年
十九補郡學生丁內外艱毀家庀喪葬生計日索餽粥時不繼然
試輒冠軍以故從學者眾得束脩羊稍贏輒分贍親故雖日不舉
火勿恤也迥翔諸生間久始以年例貢成均又四年登賢書明年

甲戌成進士初雷陽勅立義館當事延公掌其教多所成就釋褐歸諸生復邀公講學其中里居五年足跡未嘗及公門於人世苞苴無絲粟染每謂貪不在多得一二非分錢便如千百萬後嘗舉此人對實未仕時律身如此謁選得福之古田令古田穴山而居丁田消錯賦役輕重敲民逋逃轉徙黠悍者或嘯聚山林奸吏藁牙其間狙詐喜事挾持短長莅斯土者率坐累去公襪被之官卽條具八事請於大吏行之而賦平役均民以蘇息報最調臺灣復陳便宜十二事以興學廣教爲首務時臺邑歸化驍悍不馴公任事五年而民知禮讓已入爲刑曹郎轉兵曹分校禮闈稱得士尋奉命視四川學政以崇德厲學爲文章根本校課之餘畱心民

國朝典章考卷之二十一
癘作金川六要論上之行省未及代調巡臺廈臺故舊治卽請革
官莊除酷吏卹番民鼎新學宮而建紫陽祠於側示人以格致誠
正之學海外如鄒魯時撫閩者爲儀封張公相倚如左右手閩人
至今樂道之前後在臺八年遂巡撫湖南以監司膺節鉞蓋曠典
也明年移節福建三載報績稱治行第一事具史傳卒年六十有
三雷郡東有洋田萬頃爲海康遂溪錯壤隄岸一十七處海潮衝
齧幾盡潮水漫溢田廬民失業公嘗告諸當事倡議捐修無應者
及爲閩撫乃奏請興築焉公自筮仕古田至爲巡撫二十年子身
於外未嘗延致幕客父子曠隔數千里不能具舟車通往來儻從
一二人官廚惟進瓜蔬皆人情所萬不堪者而公恬然處之終其

身非卓有定力者能然歟 聖祖嘗目爲苦行老僧又謂從古清
官未有如瓚者亮哉 聖主之知人也公居家孝友在族黨閒恂
恂謹子弟率又似絕無奇特者其盛德君子也夫

右家傳顧鎮撰

陳瓚字文煥號眉川海康人幼穎異好學爲人清介簡重康熙癸
酉登賢書用成進士己卯授福建古田縣知縣殫心撫字一主
一僕相隨凡弊政陋規槩行革除而錢糧案件皆隻身經理未滿
三年調臺灣令禁葦水丁舊例渡海貧民感之內遷部曹己丑會
試分校稱得人遂授四川學政矢公矢慎凡生童試卷皆手自披
閱不二年調福建臺廈道以閩撫張伯行薦也臺雖居海外而

皇風遐暢文教日興瑣因鼎新學宮建宋儒朱子祠於學之右示
臺以格致誠正之學凡所甄拔蔚有文采恭刊 聖祖仁皇帝訓
飭士子文勤宣 聖諭海外烝烝向化矣居五年 命巡撫湖南
五十四年 陛見 聖祖日以苦行老僧稱爲國家祥瑞 寵錫
御製詩章及書籍貂裘等物 命巡撫福建閩人聞而踴躍瑣撫
閩三年一切章奏政務從無假手於人其自奉淡薄官廚惟進瓜
菜清風苦節視前彌勵整綱飭紀吏畏民懷頌聲溢於道路五十
七年卒於官 聖祖聞之稱獎惋惜追授禮部尙書 賜祭葬立
碑諡清端廕一子入監讀書雍正十一年 世宗憲皇帝追念舊
臣 特詔賜入京師賢良祠致祭其宣力封疆克致 主恩也若

此初雷郡之東有洋田萬頃計隄岸一十七處水閘一十三處俱偏大海鹹潮衝齧甚多傾圮海遂二邑民命攸關瑣常蒿目及官閩撫遂請築之 聖祖下其議於粵粵臣咸曰可因舉其事隄工鞏固此大有造於桑梓者也至其孝友性成篤親念故博綜今古宏獎後學嶺海之賢此爲矯矯矣

右廣東通志張維屏錄

康熙五十四年十二月初五日奉 旨調福建巡撫初六日公跪請 聖訓 上垂詢周詳又問福建有加耗麼公奏臺灣三縣徵收錢糧沒有火耗 上云加耗原不好若禁絕了恐州縣官又別生弊端取錢從前各州縣有存留一項銀兩公費尙有出處後議

將存留銀兩盡歸戶部州縣費用無所出若將加耗盡禁分毫不許恐行不去 上云作清官固是好但要替朝廷辦事纔好若止經經自守亦有何益初入早蒙傳進暢春園 上云汝請訓昨日都說過了汝照著行就是作清官固是好但恐清而刻人便不能相安要清而不刻爲好

右陳清端公年譜張維屏錄

明瓊山海忠介公以直聲清節震耀宇內後百餘年而 國朝海康陳清端公繼之人皆謂公之清足配忠介而吾以爲二公之清有同有不同其有守同也其有爲亦同也其接於人也忠介每有凌厲峭激之氣而清端則易直慈良之意爲多其發於言也忠介

之文勁爽而直達清端之文寬舒而有餘其施於政事也推忠介之意必欲事事復古而清端則相時度地惟期實政足以利民蓋忠介之清主乎肅清端之清兼乎溫清如冰霜足以殺物清如雨露足以生物故學忠介而不至其弊恐流於刻學清端而不至猶不失溫厚之意顧忠介當日目覩紀綱廢弛僉王橫行本其憤時嫉俗之心發爲凌厲峭激之氣而清端則遭遇盛時受特達之知際明良之會則二公之同而不同者時爲之也夫仁一而已乃有好仁者焉有惡不仁者焉忠介清而肅其近於惡不仁者與清端清而溫其近於好仁者與君子亦仁而已矣何必同

右記張維屏撰

陳清端公瑣任湖南巡撫單騎之官老僕三人負敝篋以從僚屬
逆境上莫知其爲瑣也旣莅事屏絕苞苴革除錢糧火耗民戴其
德

右述聞謔瑤錄

陳清端壁立千仞與張清恪之天下清官第一均邀 聖許斯真
泰華兩峰同標峻絕矣

右紀聞陳康祺撰

陶岱

陶岱滿洲正藍旗人姓瓜爾佳氏由主事歷遷戶部郎中康熙三十三年二月 上以積貯米穀有裨民食 命截畱山東漕米二萬石從天津海運至三岔口交盛京戶部收貯 命陶岱督運 諭曰此路易行但不可欲速船戶習知水性風勢必須相風勢而行毋堅執己見其一路水勢地形詳悉議之此路既開日後運米事可無難矣尋遷內閣侍讀學士六月擢內閣學士八月山東巡撫桑額疏請以登州等處米從天津運三岔口 諭曰前運米至盛京大有裨益學士陶岱見在天津著將天津見存之五萬石米由海口運至三岔口之處會同地方官議奏陶岱以天津見存米

四千石穀三萬六千石以穀易米不敷五萬石之數議將近河州縣見存捐輸米內撥足五萬石運往得 旨近河州縣糧米著停止起運俟明春河南山東兩省漕米到後截畱五萬石運送三十五年二月奉 命以海運至盛京之米給散科爾沁之貧乏者六月遷戶部右侍郎尋轉左三十六年調吏部右侍郎三十七年二月 上以朝鮮告饑額請於中江開市貿穀 命陶岱運米三萬石往朝鮮以萬石賚之二萬石平糶七月疏言臣於四月進中江將賞米萬石分賑其二萬石交戶部侍郎貝和諾監視貿易國王李焯具表謝章下所司 御製海運朝鮮詩以紀其事三十八年五月署兩江總督八月奏言 聖王南巡省視惟恐民貧艱食截

酉漕米十萬石照時價減糶之貯十萬石備緩急前因淮揚等處米貴請將畱貯米動用四萬石照前減糶荷蒙 俞允今淮揚等處小民仍艱粒食且督修河工人等羣聚需米甚多請將所餘米六萬石照前減價發糶疏入格於部議 特允所請三十九年正月疏免泗州盱眙地丁等項錢糧尋授倉場侍郎四十年以漕船由外河運至石壩致抵通遲誤陶岱不將經紀勒索旗丁事審奏部議降一級罰俸一年 諭曰陶岱向署兩江總督聲名甚劣既授倉場侍郎仍不改前轍非可任用之人著降五級隨帶行走尋卒

右 國史館本傳

四書考異卷之十

三

張大有

張大有陝西邵陽人康熙三十三年進士改庶吉士三十六年授編修四十一年以父病請假歸葬旋丁父憂服闋復任四十四年十月考選授禮科給事中十二月條奏科場彌封謄錄對讀分卷及濫薦潦草請託諸弊 上命場後如有情弊指出奏參及會試事畢大有無所指陳 命大學士等詰問大有奏今科考試謹慎無可指摘前奏實愚昧無知 上曰爾果實心爲科場事宜應早奏臨場具疏不過意圖紛更耳尙可謂之愚昧無知乎下部議降二級補國子監助教四十八年三月遷行人司司副五十年轉司正五十一年十月遷鴻臚寺少卿轉光祿寺少卿十一月遷通政

司左參議五十二年三月遷鴻臚寺正卿十一月遷順天府府丞
丁母憂五十六年補順天府府丞五十七年十月遷僉都御史未
踰月遷太常寺卿五十八年遷大理寺卿六十年遷左副都御史
六十一年三月擢兵部左侍郎五月 命署理漕運總督十月實
授 特加兵部尙書銜雍正元年九月入 覲疏上漕政八條一
漕白糧船過淮違限往例只參押運領運官弁及監兌職官不及
經徽州縣近日違限多由交兌遲滯請將州縣一併題參各畏處
分自心上緊徵兌一行月二糧爲軍丁雇募水手買備器物薪水
之需於糧船開行時隨糧全給各州縣往往遲延不給而行月既
發卽有奸弁扣剋頑丁花費之弊至抵通時難免挂欠向例半給

本色半係折色嗣後將米麥於丁船到次三日內給發其折色銀兩解送糧道驗明開船給半其半於過淮時給遲延者題參一領運千總交糧後繞道歸家皆以通倉稽畱爲辭請將無欠運弁坐糧廳立給完呈限單限一月到准驗銷逾限照規避例咨革一監兌漕糧每府例委廳官驗明米色交兌親押至淮盤驗近年各員巧行規避或委署州縣或別項差遣糧船將開則以不能分身詳委佐雜代理慢公莫甚請於開倉收兌時派定廳員不得推委別項公事一守備爲一衛統率千總分任幫次用得其人可以無虧正供請視其才具酌調繁簡以收實用一押運係千總專責請以抵通有無挂欠沿途有無生事爲千總考成一運全完加銜一次

二運加銜二次三運毫無事故從優議敘卽升不職者卽咨革一部發隨幫效力武舉向來領運事竣卽赴部考補沿途應處分各案無從歸結請於到通後各給限單仍令到淮投驗其無事故者咨回倉場送部推用一江西南昌衛前後幫九江前幫各派船百餘而廣信鉛山等五所祇各派船一二十多寡不均請於南昌等衛每幫派船五六十其餘分派廣信等幫庶運弁易於查察可免侵盜挂欠等弊均下部議行著爲例是年山東開河水淺奏豫行疏濬楊村一帶河道至秋河水大漲又奏相機開放湖口引水入湖將馬踴蜀山獨山微山等處截水土壩盡行加幫修築俾湖水涓滴不致旁洩以爲水櫃均得 旨優獎江南靈臺山東海營舊

經裁汰大有奏海船往來地最緊要請以海州營守備移駐並添設把總一員防守下部議從之二年九月奏山東運河入關得勝至張莊相距十二里河身徑直不能蓄水最易淺阻議於適中地方建築石壩水小則收蓄濟運不致淺澀水大則漫壩順流可免漲裂得旨允行三年六月同安徽巡撫李成龍等遵旨詳議稽察糧船夾帶私鹽之弊疏言長蘆兩淮產鹽處奸民串通竈丁私賣私販寄於沿河囤戶伺糧船經過搬運應令文武官弁晝夜催趨回空糧船不許託故逗遛仍嚴禁囤戶照例究處違者官弁運丁販賣人等俱照私鹽例治罪至糧船回空時向例酒標派參遊二員一在德州桑園鎮一在儀徵搜查今宜於瓜洲江口派

委瓜洲營協同廳緝搜緝則沿途既難裝載出江又有稽查私鹽
弊可斂戢再私鹽生奈既有處分拏獲私販亦應議敘除沿途文
武押運官照依專管兼轄官例議敘其運司拏獲竈丁餘鹽亦照
此例而隨幫官專管回空最爲切近應特加激勵能拏獲私鹽三
次及該幫船三次回空無私鹽者卽咨部以領運千總擢用又窮
丁每船量帶食鹽四十斤土宜六十石違者照私鹽及漏稅例治
罪下部議如所請是年 賜御製詩有無憂任土貢已得濟川人
之句四年奏江南山東諸省有丁船太多之衛所領運官不敷管
押請增設千總十四員隨幫八員分幫管轄蘇松等屬同知通判
俱有地方捕盜水利之責派委押運之員內請酌減二員蘇松揚

泗等十三衛爲漕運繁難之缺請揀員調換又江南漕白幫船坐
僉長運官丁蠹役表裏爲奸滋弊累民請以蘇松常鎮四府漕船
皆就本府各邑水次三年一調杜其久戀情熟盜賣鑽營之弊至
白糧運費多於漕糧於通省抽選殷丁掣定赴次交兌運滿五年
更替如有挂欠卽革換以示懲儆庶漕白二糧運丁不敢玩法營
私亦知鼓舞生勸均得 旨允行五年因濟甯左右幫漕米潮溼
經倉場侍郎托時奏參 諭責大有柔輒不能約束屬員旗下
部嚴議照罷輒無爲例革職 詔從寬降三級畱任七年二月奏
山東河南二省有輸運薊州遵化豐潤州縣官兵米石其沿途管
押以及回空催趲例責成於押運通判以一員而領數幫不能兼

顧請添設薊糧千總一員輪流領運抵薊日交糧守候責成千總
空船回次責成通判 從之尋遷工部右侍郎七月仍 命署理
漕運總督八年正月調刑部右侍郎旋轉左六月遷工部尙書以
七月押運抵通卽入莅任十年四月調禮部尙書兼署兵部尙書
十一年正月卒賜祭葬如例諡文敬

右 國史館本傳

高其倬

高其倬漢軍鑲黃旗人父廕爵任口北道其倬由康熙三十三年進士改庶吉士散館授檢討尋兼佐領四十一年充四川鄉試正考官四十五年遷右中允尋轉左四十六年遷侍講四十八年提督山西學政五十一年丁父憂服闋補侍講遷右庶子五十五年轉左五十六年二月遷侍講學士十一月遷內閣學士五十八年正月以河南南陽鎮標兵挾忿圍辱知府命其倬同刑部尙書張廷樞往鞫得實寘首犯於法總兵高成等論罪如律二月丁母憂五十九年授廣西巡撫六十一年二月署雲貴總督十二月實授雍正元年九月疏言雲貴兩省土司承襲向有陋規上下衙門

每因文結舛錯藉端需索苦累臣已嚴行禁革并請嗣後咨部文冊內數字舛錯無甚關係者免其駁換於疏內代爲聲明庶承襲事易結捐索弊除得 旨嘉獎十二月疏言雲貴魯魁山土目楊方普李四姓糾眾劫掠不聽約束本年十月內其酋方景明等率獮夷數百殺元江獮目施和尚焚其寨臣遣兵分剿擒景明及獮夷三百二十六名分別正法報 聞先是青海台吉羅卜藏丹津肆逆謀侵西藏定西將軍策旺諾爾布檄各路偵禦其倬以雲南邊外中甸阿敦子地方爲進藏要路檄遊擊劉宗魁劉國侯等嚴防並遵 旨令提督郝玉麟以兵二千由中甸進駐察木多副將孫宏本以兵五百赴中甸爲聲援二年二月羅卜藏丹津爲大軍

所敗竄準噶爾青海平中甸喇嘛營官番目等攜三千五百戶繳
偽劄納土歸誠其倬疏 聞 上嘉其妥協給騎都尉世職十月
貴州仲家苗酋阿近與弟阿臥倚險作亂其倬以仲家苗聚處定
番廣順二府境其附近苗寨多被迫脅遣人招撫阿近等勢窘爲
官兵所擒疏至 諭部優敘加三級尋請增雲南楚姚鎮兵六百
並增鎮屬景蒙營參將守備各一千總二把總四兵千卽以新裁
援剿左右兩營弁兵撥補部議 從之十一月條奏中甸善後事
宜一中甸開墾商民日增請設撫番清餉同知及經歷巡檢等官
管理一番目舊有營官神翁列賓名目聽堪布喇嘛指使請給外
委守備千把總劄付聽中甸文武官轄一中甸向行滇茶請照打

箭鑪例設引收課由麗江府收報一中甸沿江數百里及山谷曠
土甚多請給牛種房屋招佃開墾三年後起科供增駐官兵歲糈
一中甸僧眾千餘寺屋數百收藏軍械易於宿奸番人舊給喇嘛
費甚多應裁減除出身西藏之喇嘛外其本地喇嘛選誠實者三
百名咨給度牒餘以次選補器械入官每年量給青稞酥油並銀
三百兩爲口糧衣單資至番目授外委劄付亦分別歲給銀兩青
稞養贍又條奏魯魁山善後事宜一魯魁山內通哀牢外界異域
須重兵控壓請設普威營置參將一駐普洱守備二分駐威遠土
州及茶山千總四把總八分汛控禦一賊巢全在元江協與新營
營所轄地新營營隸臨元鎮不隸元江協兩界互相推卸誤事請

移新營及擬設之普威營均隸元江協以臨元鎮統轄一威遠
土州爲野賊逋逃藪請改土歸流設撫夷清餉同知及經歷并大
使巡檢等官分管鹽井地方事務一方姓普姓土職糾眾滋擾請
停襲一威遠新開之按板抱母二鹽井歲獲息銀二萬餘兩請充
新兵餉一獮目施和尚之姪賦勒等妻子請移駐元江府城威遠
土官刁光煥子弟家口移省城安置一九龍江口夷人出入處請
設汛照山海關例給印票客商兵役往來一例盤察毋得出境滋
事村寨各編里甲戶口以資稽察一設義塾數處夷人子弟有志
讀書者入塾誦習於元江府附考額外加取二名一勸誨夷人墾
田請照雍正元年定例旱田十年水田六年後升科又條奏貴州

苗疆事宜一定番廣順頑苗皆就擒請於西猛設汛調定廣營千
總駐防一定番廣順二州路通廣西泗城土府請於西藤斷杉樹
二處設汛衛行旅一請改大定鎮爲協裁中營遊擊以左營兼中
營仍守大定移中營守備一千總把總各一分防廣順州所屬長
寨遮貢安順府所屬十三枝普定縣所屬五枝等處移把總一防
羊城壘統歸定廣協轄至都勻府屬之獨山州接廣西南丹土州
苗性尤頑請移都勻守備駐防一黔省境連川楚奸人勾結掠販
人口爲害請定例地方官一年內分別拏獲人數議敘其不能查
緝他處拏獲者亦照人數議處客人有買貧民子女者報官用印
不得至四五人違者照興販例科斷一黔省與楚蜀滇粵接壤請

定例夷人越界擊逃本省滋事者卽於其地審辦又黔省有擊白放黑之習被人劫殺力不能報將無干之家奪其人畜暗插冤單令其轉爲報仇否則索贖請加應得罪一等一土司等貧困不支往往以有糧田詭稱無糧與紳衿商民買主收無糧之田土司納無糧之賦久之完納無資派令屬苗代完請徹底清查令執業者輸納又土司下設立權目人等報明有司後有事發併懲一黔地潮溼倉米易朽請覈計兵米存二年之蓄餘於春秋減糶著爲例一黎平府與楚省五開衛同城民苗雜處分隸兩省請改五開衛爲縣隸黎平銅鼓衛亦歸併五開古州八萬等苗疆均屬黔省事權歸一又言向來雲貴兩省拔補千總把總皆以本營補本營之

缺候思同爲兵丁一旦拔補難以約束卽同輩千總亦羣非笑其
不肖者則又護庇兵丁將備稽查不易爲力請嗣後拔補本營時卽於
外營對調不必仍畱本營 詔如所請三年二月加兵部尙書銜
五月疏言近聞策妄阿喇布坦萬里效順籌度經久之計正在此
時臣以爲兵宜酌減備禦未可全撤西路形勢臣所不知至阿爾
台一路臣曾運米二次自殺虎口出經蒙古各部落約三四千里
大兵駐劄極邊甚有關係似宜兵數量減米數微增則遠戍倍加
踊躍 上嘉納之六月晉太子少傅十月調福建浙江總督其倬
以雲南鶴慶府鄧川嵩明騰越三州太和浪穹二縣土軍丁賦係
明嘉靖萬歷間因夷人作亂暫撥民人協防隨立太和所鳳梧所

名目每丁徵銀一兩伊等既納民賦於本籍又輸軍賦於防所相
仍未革疏請豁除 允之四年抵閩浙總督任疏言福興漳泉汀
五府地狹人稠自平定臺灣以來生齒日繁山林斥鹵之地悉成
村落多無田可耕流爲盜賊勢所不免臣再四思維惟廣開其謀
生之路如開洋一途前經嚴禁但察富者爲船主商人貧者爲頭
舵水手一船幾及百人其本身既不食本地米糧又得需餘利歸
養家屬若慮盜米出洋則外洋皆產米地慮透消息則今廣東船
許出外國豈福建獨慮洩漏慮私販船料則中國船小不足資彼
之用以臣愚見開洋似於地方有益請弛其禁 詔下怡親王會
同大學士九卿議行五年四月疏言臺灣水沙連等社兇番自朱

一貴作亂後不納餉賦肆行焚劫臣令臺廈道吳昌祚同知王沂
參將何勉等率弁兵番壯分路裹糧進剿擒首惡骨宗等二十名
各社相繼歸誠報。聞十月以李衛爲浙江總督 命其倬專管
福建總督事六年二月條奏福建鹽政事宜一禁產地之收曬閩
省鹽場福清最大請做保甲法添設團長甲長查報日曬之鹽設
總倉封鎖以杜私賣且免雨水之患修砌莆田各團滴窟以資防
護一嚴銷地之售賣閩鹽向係商行後改官運近用水客商販請
暫令水客認銷而以官運接濟三年無誤報部充爲商人再發引
以立成法場鹽多產之時仍照官運例動課收積一定鹽課之額
數閩省鹽課有額徵公費二項請照定數作正數其溢行之鹽所

獲銀數作爲盈餘報查除支給鹽道各衙門公用外餘造冊報銷
解部水腳卽於長價等項內撥納一酌辦理之人員閩省舊設鹽
務各官雍正二年裁汰請嗣後於佐雜內遴辦毋庸另設下部議
行六月以原任山西道御史蕭震於康熙十三年遭耿逆之變與
原任邵武府知府張瑞午等合謀討賊事洩殉身妻妾媳婢同時
死節瑞午業蒙 卹典而震獨遺疏請入鄉賢祠致祭旌其門
詔如所請七年六月因與臺灣革職知縣周宗瑄濫致書札又未
審出加徵耗穀各實情部議革職 命降三級畱任尋疏言閩省
戰船多係平臺灣時所獲長闊不稱請酌定丈尺隨時更改閩安
協右營之船多鐵板沙線請改爲平底以適進哨之用又請改福

建同安泉州長福邵武四營遊擊爲參將增設灌口安海二汛守
備各一移泉州府糧捕通判駐安海汛連江縣守備駐東岱汛移
東岱汛千總駐筭門汛部議 從之閏七月來京 陛見 御製
詩 賜之有操凜冰霜功帶礪匡時重鎮眷良臣之句八年二月
晉太子太保四月回任先是 上以其倬通曉堪輿術 命詣
福陵恭視形勢工程其倬奏言 陵前左畔水法因夏口溢流稍
更故道弓抱之勢微覺外張必須順導河流方稱盡善至是大學
士等議如所奏濬修五月調江西總督復 命來京六月疏參巡
臺御史李元直任性滋事狀下部察議元直降三級調用九月以
其倬隨怡賢親王允祥相度 萬年吉地於易州境內泰甯山太

平峪 特授一等輕車都尉世職併前所得騎都尉爲三等男
論曰高其倬歷任封疆其樹績建勳揚名垂譽者不可悉數原不
以此爲宣力見長之地乃能悉心籌度務期萬全一毫無瞻顧推
諉實出於一片忠愛至誠之惻不僅才識超羣已也是月 命署
雲貴廣西總督九年疏言雲南昭通府四面環山請委員專辦墾
務定爲水旱生熟四項分給兵民課土各戶墾種按年收穀還本
後起科輸米以省兵米運費下部議行十一年正月 命仍回兩
江總督任會雲南普洱府屬思茅土把總刁國興句苦葱蠻煽元
江夷攻普洱府城通關大寨猯夷復附苦葱蠻過阿墨河犯他郎
城地方其倬檄提督蔡成貴等分路進剿擒其酋并賊屬五百餘

斬級甚眾疏至報 聞九月 命以總督銜管江蘇巡撫事十二年以瞻徇知縣趙崑程承修海塘工程賠項部議降調尋授江蘇巡撫十三年疏參准關監督年希堯庇縱玷職 詔嚴鞫削年希堯職乾隆元年正月以疾 召還京四月授湖北巡撫尋調湖南二年七月以湖南城步綏甯二縣徭糾黨焚劫其倬偕總督史貽直遣兵分剿賊黨悉平 諭部優敘加三級三年三月擢工部尙書尋調戶部十月卒於寶應舟次遺疏入 諭曰高其倬練達老成宣力年久今聞溘逝深爲悼愴著沿途官弁護送回旗尋 賜祭葬如例諡文良

右 國史館本傳

公諱其傳字章之先世自高密遷鐵嶺父澹庵累官口北道生五子公其仲也十八歲舉於鄉十九歲登進士入詞林 聖祖奇公狀貌欲試以外事會四川有獄未決 命公往訊歸 上問打箭鍾形勢公口陳手畫沈詳不煩 上器之命典試蜀中督學山西累遷內閣學士巡撫粵西鄧橫苗叛公單騎入寨曉以威德萬眾投刀乞降 世宗登極遷雲貴總督公奏西藏用兵中甸乃進藏咽喉請調鶴麗劍川兵鎮撫之開墾陸涼州屯穀儲侍改哀牢山土司爲流與苗大小戰三十有二所平魯魁茅洞諸寨所擒呼呼吸兒刀光煥等以功襲拜他拉布哈番福建饑民變調公督閩浙公道浙卽奏奸民不可不誅饑民不可不養請撥溫台倉穀七萬

石運閩寬臺灣米禁濟漳泉二府 上從之閩人大和閩自朱一
貴反後番不納餉小不順輒攻劫焚殺公立民夷界址碑移興泉
道駐廈門設哨船巡之苗夷警服生番阿密氏反公遣臺灣道吳
昌祚參將何勉從竹腳寮南投峙兩路進兵擒之 上聞喜曰卿
在閩朕無南顧憂矣會福建巡撫某不識字見人倨忌者欲傾之
密奏福建倉穀全虧而公又與所親山東按察使白映棠私言江
浙清查無益恐累民白奏之 上以公祖同官沽名罔上不道遣內
大臣史貽直等馳驛料簡閩穀而調公督兩江會雲南普思苗叛
貴州廣西猺獠應之乃 命公總督三省公到滇卽率提督蔡成
貴等討平之仍回兩江權巡撫事 今上登極公首劾漕關樞使

年希堯人以爲仁者之勇尋遷戶部尙書人都過寶應薨諡文良
年六十三公揚休玉色進止凝重目瞻焉不能遠視然長寸餘無
事輒映開則精光射人性端靜包涵蘊含一本於自然人相對如
臨山海光明之中廣大無所極每奏事 天語褒寵或忤 旨且
夕禍不測而公施施如平時雖家孥資僚欲窺公顏卜主眷盛衰
不可得也 世宗深知公性寬不能掖之使奮代人匿瑕藏疾至
累及終不悔然於 國憲民瘼大綱必舉且望重治行終長者故
雖 詔書追責而封疆重任十三年如一日西師大事必密與謀
阿喇布坦降 上問公公奏宜減兵不宜撤兵宜加成糧以彈壓
兀魯特喀爾喀兩部落降人和羅爾邁逃 上又問公公奏有之

不爲多無之不爲少宜撫其不逃者愧其逃者 上嘉納之孫文
定公嘉淦少時殺人報仇公督學時爲脫其罪故終身執弟子禮
惟敬李敏達公衛爲滇南布政使與安南爭鉛嶺河 上切責公
引咎絕不言李李慙感拚骨後李脊日隆 上疑公叢勝問李李
奏高其倬勤過臣太愼故少遲緩耳又短視終日胸摩文案生肉
胼起可驗也逾年公入 覲奏事畢 上命礮公衣公驚以爲將
刑侍衛摩公胸奏曰李衛不欺 上大笑補熙提督松江 上猶
慮公在江久不無裨政命補察劾 旨甚嚴補唯唯到江南聞人
人稱公賢乃以實奏 上喜曰熙不迎合朕樸誠可嘉卽遷總漕
嗚呼公與補俱不可及而 世宗之聖神誠何如也公於學歷不

窺天文地理皆洞悉而詩尤工所著奏疏十卷堪輿家言四卷味和堂詩集八卷行世繼配蔡夫人亦能詩公以定 萬年吉地功賜男爵葬大興縣秀才營之原子某銘曰

泰山之雲崇朝而互何卽之不高而探之莫竟扶桑之枝浴日而行何風吹似柔而雷焚不驚惟公秉夷姤之性行恢台之政抒端右之才慰閭左之懷始任戴冠來扶王風赤霄冒頂素手捫空導帝九阰罔弗棣通悅近來遠有睟其容辟邪星出白澤神通蚺豸丈八鼙鼓一中使獐村狗國區人隨封靡不書雲奉麻橫草成功徵衣旁旅其聲喁喁 帝曰汝將太牢而弗操刺宜淬其鋒以持劍臚公拜稽首黎收而荅臣持者心臣亭者法七年教民三日先

甲百辟欽之高山仰兮九乾竺之終德賞兮冢象所連高一丈兮
所謂大臣蓋置以爲像兮

右神道碑袁枚撰

本朝高文良公其倬詩爲勳業所掩實一代作手也嘗賦 恩賞
花翎黃馬褂詩云冠飄孔翠天風細衣染鷲黃御氣濃莊雅獨絕

右記余金撰

高其倬字章之由檢討官至戶部尙書諡文良館選後乞假歸閉
戶讀書數年然後就職生平學術政治俱有根本所爲詩其言有
物匪求工於聲律對仗之末也古體尤卓然而外閒所稱轉在近

體

右 國朝詩別裁集小傳沈德潛撰

國朝詩類初編 卷六十五 頁貳二十五

五

--	--	--	--	--	--	--	--	--	--

143-140

汪滢

汪滢安徽休甯人寄籍湖北江夏康熙三十三年進士改翰林院庶吉士三十六年散館授檢討三十九年充會試同考官累遷侍讀學士五十一年九月充會試副考官十二月充浙江鄉試正考官五十二年提督浙江學政五十三年留學政任五十六年再留學政任五十九年任滿回京雍正二年升詹事府少詹事尋升太常寺卿左僉都御史三年四月升內閣學士兼禮部侍郎銜十月授廣西巡撫四年二月奏言蒙 諭臣到廣西訪查左江鎮總兵梁永禧居官如何據實具奏臣到任後因左江鎮總兵駐劄南甯府與省城相距甚遠臣密加訪查梁永禧辦理營務尙去得在地

方亦不多事伏惟 皇上至聖至明無遠不燭凡臣下賢否之分
難逃日月之照臣履任日淺耳目未周不勝惶懼之至 諭曰既
云履任日淺耳目未周則辦理營伍去得在地方不多事之奏亦
屬荒唐桂林不過數日之程卽以爲相距甚遠京城去粵西數千
里之遙而謂朕之聖明無遠不燭其賢否之分難逃日月之照云
云何不體情理一至於此耶爾初次奏摺卽如此依違瞻顧居心
不純已見一斑殊大失朕之所望封疆大吏旣受國家知遇之恩
當思竭力致身之義切忌柔佞巧詐獨善己身而不乃心國計朕
披閱所奏甚憂汝不克勝此任也勉力爲之書生章句虛文非此
任所需之物苟不以實心行實政秉公甄別賢否據實入告動輒

瞻前顧後持首鼠兩端之見以圖自便則大負朕用人之意矣勉
之慎之五月調江西巡撫五年二月內閣九卿翰詹科道議奏江
西考試官查嗣庭俞鴻圖收受舉人牌坊銀兩除查嗣庭大逆不
道另案歸結外巡撫汪瀝副考官俞鴻圖應按律治罪 諭曰舉
人牌坊銀兩分送主考官向來亦相沿行之尙非贓銀之比但謂
主考應該收受亦非也汪瀝之過在於身爲封疆大吏而與欽差
主考爲房屋交易之事應加處分以儆將來但其爲人尙老成著
降四級以京員調用是月以江西地方舊有落地稅白潢爲巡撫
時將稅銀裁革不令商民完納而以巡撫司道公捐銀兩代完每
年假造花名冊籍報部其舊有收稅大使等官設立如前接任巡

撫王企靖裴粹度皆照白潢例行奏入 諭曰國家經制錢糧豈
臣子可以意爲增減若江西此項稅銀不應徵收則白潢應奏請
於 聖祖仁皇帝施恩豁免若係地方應徵之項則自應令商民
完納何得將公捐銀兩代商完課曲市私恩以博無知小人之稱
頌並不計及將來之可長行與否且此端一開他省督撫何以催
辦國賦似此沽名邀譽大奸大詐之行爲豈人臣事君之道汪漈
身爲巡撫凡事不能據理而行乃將白潢所行悖理之事奏聞於
朕冀朕批示朕若批令將稅銀豁免則是國家之經費 聖祖仁
皇帝六十餘年所未免者而朕安能任意輕免之耶若批令仍向
商民徵收則是白潢已免之項而朕復行徵收無知愚民豈不歸

怨於朕乎若批令照白潢之例以公捐銀兩代商完課則國體何在有此治天下之道乎尋補光祿寺少卿六年八月升光祿寺卿九月復授內閣學士兼禮部侍郎銜十月升工部左侍郎七年十一月命前往兩淮協同河臣孔毓珣修理高家堰隄工十二月調戶部右侍郎八年緣事革職十年起爲大理寺卿十一年以浙江海甯仁和海塘危險應行修築經總督程元章奏入命汪滢前往承辦工程十三年海塘衝決處甚多上以汪滢不得辭責下部議處尋議降一級調川上加恩寬免仍命督工效力照司道例聽大學士總理海塘工程嵇曾筠節制委用乾隆二年正月召來京五月奏考試新進士時應令其將本處當行之事各

據所見明白陳奏下王大臣等議尋議歷科考試進士具有成式
無庸更張 諭曰朕思古來帝王爲治不棄芻蕘况伊等旣成進
士皆係讀書之人於地方利弊或有確見亦未可定今年考試進
士仍照舊例出題若伊等有願將地方事件敷陳者准其據實條
奏閱卷大臣等擇其言有可採者進呈朕覽三年兩江總督那蘇
圖奏請於淮揚一帶開築河道閘壩 上以工程重大汪漈本籍
江南情形自能熟悉且曾監修浙江海塘於水利工程諒亦諳練
命往江南總辦此工會同督撫河臣妥議四年正月汪漈尙未
赴江南 上御乾清宮 賜廷臣等宴賦柏梁體詩汪漈與焉尋
命偕通政使德爾敏辦理江南水利工程三月奏言淮揚河道

請先將就近工程疏濬其餘挑挖引河修建閘壩俟遂段操勘陸
續估辦得 旨不可惜費亦不可冒費必期一勞永逸於民生有
益方爲善舉五年二月偕德爾敏奏稱鹹水東來之患惟天妃口
與白駒三閘爲甚天妃口向無閘座應建白駒三閘頽壞應并拆
建其沿范隄一帶之丁溪等閘內有上岡北草壩二閘俱頽壞更
在串場河裏口開閘則不免鹹水內灌閉閘則鹽艘不能通行應
移建串場河外口其餘各閘損壞者應修葺完密又鹽城之東塘
河及上岡北草壩二閘內外河道并阜甯山陽寶應興化泰州各
屬河道俱淤淺應一併疏濬高郵寶應見議添建三閘之處寬闊
散漫應將河頭略爲挑濬引入下游河道至串場河及溱潼河新

河舊河俱淺阻應一律挑濬其沿串場河之范隄及掛茶角斜三
場隄工俱近海濱殘缺處多應加寬厚堅築夯戩又揚州之芒稻
閘下抵通州河道淺澀應挑濬城東沙壩閘河淤墊應疏濬其閘
板損壞者應修築城南場子橋閘底過高不能通流應落低三尺
其閘牆坍卸底石衝動亦應收小修葺又九屬田畝毗近河渠地
方應於兩岸修築田圩各高四尺底寬八尺頂寬二尺以作隄防
該管地方官實力董勸居民每年於農隙時如式修築如有僑滿
應升之員准以升銜畱任俾得專力修築限於二月內一律告成
將各員勞績分別具題量加議敘 從之五月江南河道總督高
斌奏汪漕年逾七旬動履維艱辦事實屬老成諱令駐劄適中地

方就近察理以德爾敏各處履勘則兩有裨益 上允之八月奏
言上江地方濱臨江淮地多山岡其間河渠形勢變遷不一各項
工程自當量地制宜酌定緩急查有合肥縣城內之金斗河及洩
水越河虹縣之枯河頭亳州之乾溪溝俱久淤塞難資灌溉請急
爲挑濬和州之太洋河姥下河牛屯河含山之銅城閘河來安縣
之龍尾壩河亦俱淤墊百姓未便請急爲挑濬又滁州之孟石口
壩已經衝頽今卽原有石料改建石閘則蓄洩由人實於地方有
益再合肥縣城東原有石閘一座年久頽廢水無收束請照舊建
造又五河縣城南有蔣家土壩一道當滄淮二水頂衝歷年衝漫
爲害甚巨請建竹篾石壩一道長九十丈以資捍禦其餘各州縣

國朝通志卷之二
三
三
陂塘溝渠圩埂土壩共六十二處向係民修應令督撫轉飭地方
官隨時勸導次第辦理九月奏稱豫省地居上游其水總以江南
爲歸第入淮入渦稍有分別今賈魯河入淮之水既分洩入渦則
渦河之水亦當分洩入淮庶上下游兩得均平請將兩河南岸分
流之濬河並乾溪溝淤墊之處開濬寬深使渦河水大可洩又渦
河經由之亳州城北石橋有礙水道應改建木橋以暢河流均下
大學士九卿議行尋以下河沿海河道各關座向係鹽場及佐雜
官帶管勢難兼顧奏請添設關官天妃石礎二關設一員白駒南
北中三關設一員上岡北草堰二關各一員專司啟閉仍令鹽務
分司並該管州縣統轄稽柁下部議行六年二月 諭曰汪隆德

爾敏奉差江南辦理水利工程已經數年之久至今未竣從前尙將情形奏報自去秋以後並無陳奏之摺今又於泰州江都山陽等處奏請動帑興工其計六疏朕不知見在工程若何何時可以竣局通計需費若干豈有漫無起止徒事遷延虛糜國帑之理令明白回奏三月覆奏水利鹽河工程共需銀六十七萬兩前經奏請遵辦動工以來所用錢糧俱係於原奏項下支用並非數請動項興工各工亦將次告竣其題估題銷各案應俟彙齊會疏奏報諭曰卽前經題定之數亦豈可漫無覺察聽眾人之分肥冒銷乎近布政使薩哈諒學政喀爾欽皆以貪賦之故朕將置之重典以警其餘汝二人亦宜慎之卽已無所染指而毫無覺察將來水

落石出恐汝二人之身家不能抵眾人之欠項也速行整理察辦
爲是四月疏言秦州如臯下游等處因春雨連綿閘座未開以致
停工 諭曰觀此事汝等與督撫不和衷之處顯然何不明奏而
爲是隱語乎尋奏到工之日凡興濬修築等事俱會同督撫和衷
辦理惟秦州如臯鹽河係鹽運總匯之所行令通州知州王師旦
將下游之鹽倉唐家二閘開放洩水該州並未開放機宜坐失工
程未能及早完竣皆王師旦偏執所致 上以王師旦偏執何不
告之督撫 諭將所奏與兩江總督楊超曾閱看會汪隆等奏刁
頑商民因開鹽倉閘放水罷市尋楊超曾覆奏德爾敏等勘估開
挑淮揚運鹽河道議開通州之鹽倉唐家二閘洩水入江王師旦

請只將唐家開開放並於出水之地及該州迤北各築一壩攔截
鹽倉並各支河之水不使旁洩正在會同築壩乃鄉市愚民以播
種時資水灌溉同聲呼籲求免開閘以致居民罷市 命楊超曾
秉公查辦七月吏部侍郎楊嗣璟奏參汪滌德爾敏不諳地方情
形罔恤民間疾苦或短發夫價或任意放水或將挑河之土堆入
民田耗帑累民請交督撫查覈 命楊超曾會同河臣高斌歸案
奏結並詢問汪滌等是否別有不妥之處尋楊超曾覆奏汪滌等
在河工二年有餘頗爲安靜謹飭惟汪滌年老多病諸事不能專
主德爾敏未免矜才自用不能和衷共濟得 旨此公論也九月
上以汪滌等所辦江南水利大局俱已告竣 召回京七年正

國朝三朝英宗皇帝 卷之十一

月以原品休致八月卒

右 國史館本傳

臣

呂履恆 弟謙恆 從子耀曾

呂履恆字元素河南新安人康熙三十三年甲戌進士官至戶部侍郎著有夢月巖集時言詩者多欲尊宋祧唐而作者不但不落唐以下並斬追六代以上而從之即未必果能亦可云特立獨行者矣今其後人之詩尙能篤信家學

右 國朝詩別裁集小傳沈德潛撰 按呂公號坦庵 尙有治古堂集

呂謙恆 子耀曾

雍正五年冬 詔公卿舉賢才光祿卿呂公具劄不合儀式 天子夙知公謹慎年篤老許以原官歸休余與公子耀曾爲同年友而公於余尤志相得將行朝夕過從要言書問必時通俄而訃至

則至家之三日晨興沐浴飯罷而終公年四十有一始舉於鄉又十有七年成進士由翰林改御史轉給事中遷鴻臚大理至光祿寺卿所歷必張其職三主鄉試再充會試同考官士論翕然其爲御史巡城會南郊奏以薙草徵役胥吏因緣病民又奏夏秋之交洞庭瀧濤壯猛湖南士赴鄉試苦遭覆溺宜分設棘闈天子皆爲更舊制公名位非甚盛而以渾厚方直爲衆所推其歿也凡與交接者皆曰薦紳中典刑又失其一矣自容城孫徵君講學淇源湯司空耿詹事名節在天壤由是中州士大夫多好言理學而公兄弟則尙質行以文學知名公兄少司農坦菴公與吾亡友崑繩治古文而旁及於詩公則以詩名而兼治古文余嘗以古文義

法絕班史柳文尙多瑕疵世士駭詫雖安溪李文貞不能無疑惟公篤信焉公至性過人喪父母壹稟禮經自少至老未嘗與司農久離戊戌春司農罷歸次年五月公忽搏膺而呼曰不得與兄見矣數日訃果至司農之歸也思公爲樂府一章時命耀曾之子肅高相和而歌歌竟而哭厥後公展視輒掩涕吞聲耀曾乃竊而藏之公貌端嚴生平坐立無偏倚讀書青要山凡數十年所居特室臨窗設几坐下一足跡深寸許幾穿其額呂氏系出宋丞相文穆公第六子居簡其後自洪洞遷新安至明季大司馬忠節公始光顯自是五世衣冠甚盛家法爲士大夫宗耀曾嘗臥病內寢余入視帷帳茵褥爲寒士所不堪肅高捧盤承飲而進叩之則已舉於

鄉矣雖呂氏家法抑亦公之身教也余許序公青要集久而未就公欲爲古詩數章贈余曰吾歸以詩來則子之序毋更遲之又久矣肅高告終稱公在途諄諄及此擢曾至自西川來乞銘余於公既負諾責矣今忍不銘公諱謙恆字澗樵以雍正六年四月二十一日卒於孝慈莊年七十有六考諱兆琳福建道監察御史以司農贈都察院僉都御史妣王氏孟津王文安公女 敕封孺人 誥贈蒸人妻王氏太常寺少卿諱無咎女文安公女孫子三人承曾雍正甲辰舉人揀選知縣光曾康熙戊子舉人陳畱縣儒學教諭耀曾康熙丙戌科進士四川按察使孫五人女孫九人以某年月日葬於某鄉某原其世系具忠節公傳誌故不著銘曰

望其貌而心可知敦於行而文副之祖德克儀以爲世裔師

右墓誌銘方苞撰

呂謙恆字天益河南新安人康熙四十八年己丑進士官至光祿寺卿著有青要集光祿詩與難兄元素司農並名司農以古樸勝光祿以烹鍊勝而司農古體尤不易到

右 國朝詩別裁集小傳沈德潛撰

呂耀曾

呂耀曾河南新安人康熙四十五年進士考授內閣中書六十年升禮部主事雍正元年充順天鄉試同考官二年遷員外郎充順天鄉試同考官四年遷戶部郎中五年三月授江西袁州府知府

七月升湖北武昌道九月遷四川按察使六年四月丁父憂 命
在任守制七年署布政使旋丁母憂回籍十年服闋 命以京堂
用補鴻臚寺少卿十一年五月升大理寺少卿六月遷都察院右
僉都御史七月授奉天府尹五月疏言升任府尹楊超曾條奏
復州應設學正一員業經准行今請照直省小學之例復州文武童
生各取進八名設立廩增生各五名三年出貢一次金州新設之
甯海縣請增教諭一員義州既設立州治請增設學正一員取進
文武童生各四名設立廩增生各二名五年出貢一次永吉州長
甯縣向俱隸奉天府學查永吉州去府入百餘里長甯縣較永吉
州更遠府學教官鞭長莫及永吉州請增設學正一員長甯縣生

員不過數名請歸永吉州學正帶管 從之旋擢吏部右侍郎先是耀曾在奉天府尹任奏奉天地方旗民雜處人命案件州縣會同旗員辦理旗員自城守尉以下土著者多每多瞻徇州縣號令不行而理事通判一員更難兼顧請增設一員一駐奉天府之蓋平縣分管海蓋復金四州縣一駐錦州府之錦縣分管錦甯廣義四州縣如旗民官員有會審不公等事卽稽察揭報至是議行九月以貴州古州等處苗疆奠定 命偕大理寺卿德福宣諭苗民獎賚之並協辦苗疆事務旋調倉場侍郎十三年兼管順天府尹事乾隆二年四月充殿試讀卷官十一月調戶部左侍郎三年復調倉場侍郎四年正月 上御乾清宮 賜諸王大臣以下及

督撫學政之在京者九十九人寔賦柏梁體詩耀曾與焉八年卒
子肅高湖南長沙府知府翼高二品廕生

右 國史館本傳

乾隆八年倉場侍郎呂公奉 天子命運米四十餘萬石賑饑公
以既老年勤動勞勩至於形神將離而猶惓惓於拯救災民則平
日之焦勞政事可知也公樸誠端厚不務赫赫名而事關民社及
軍國利弊之重者鉅細井井期於得當而後已有古大臣風乃歛
焉祖謝以死勤事朝野爭歎息云公會祖忠節公諱維祺河南新
安人前明南兵部尚書遭流寇難不屈死爭光日月學者稱明德
先生祖侍御公諱光琳以直節顯光祿公諱謙恆文章政事載在

史乘其考也呂氏自忠節後代以忠孝文學聞公諱耀曾字宗華號樸巖生而器宇端重均推國器康熙乙酉舉於鄉丙戌成進士光祿公己丑成進士轉在公後癸巳公官中書舍人既遷禮部主事歷員外郎戶部郎中雍正丁未出爲江西袁州知府不一歲遷湖北武昌道又遷四川按察使越歲署布政使以丁艱歸服闋內補鴻臚寺少卿轉大理寺少卿旋晉左僉都御史授奉天府尹明年晉左副都御史又晉吏部右侍郎旋改總督倉場戶部右侍郎奉 詔宣諭貴州苗疆正使此甲寅九月也明年還京兼仕順天府尹 今上御極轉戶部右侍郎又轉左侍郎未幾仍總督倉場前後歷倉場任凡七年中外共推老臣公刺袁州時有瘍醫唐

姓者誣服殺人罪覆盆十年公禱於神得眞殺人者抵法凡遇聽斷爲兩造開陳義理民多感悟淚下秉臬四川有婦犯姦斃夫命牽連多人以緩其獄公閱實立置之法而釋其無辜者署方伯時清苦自矢府州縣惟正供取足解部無贏餘有不便官民者密疏罷除之任奉天府尹時奏請添設義州復州州官以專牧民責裁九關臺同知以汰冗員任吏部侍郎時補奏奉天事宜有由海運以救穀賤傷農一疏有請改折色以免島民輓運之艱一疏其宜諭苗疆也使車所經老幼駢集公備言 天子神武慈惠不忍置苗民於化外苟能革心嚮化卽我赤子令副使者譯作苗語再三諄復苗民感泣公於率先歸順者破格賞賚一時稽拜恩澤歡呼

富勒善恩山谷兼任順天府尹監乙卯科鄉試者再閱會試迴避
卷矢公愷多得眞士公任內外官前後三十餘年而律己儉約衣
必澹澹食不兼味無媵侍音樂古玩諸好而并其力於治官嘗曰
忠孝之外無品行廉潔之外無節操仁恕之外無居心誠敬之外
無工夫展其底蘊擴其才力而又當 聖君良臣明明穆穆之會
卽畢公之道治政治澤被生民胥於公是望而不獲大究其設施
此當世成爲公深致惜也公卒於乾隆癸亥七月十八日距生康
熙己未九月十七日享年六十有五 誥授資政大夫 贈祖妣
考妣如其官配 誥封夫人孟夫人連山縣知縣諱文乾公女有
淑德子男子二長肅高康熙庚子科舉人江西吉安府知府娶董

氏繼娶胡氏次異高二品廕生特用主事娶程氏繼聘顧氏子女
子二長字壬子科舉人王貽穀殤次續適王貽穀亦早歿孫男四
燕徵燕應燕喜燕標孫女三俱配名族乾隆十年四月十八日將
葬公於新安縣北原光祿公塋之次次君翼高以狀來乞銘潛先
得交於公從弟松坪方伯後因方伯得交於公每晤語如止水靜
如春風和令人矜平躁釋忽忽十餘年重歎逝者而今乃爲公草
志石也可悲也夫銘曰

明德之後有達人忠節世澤君紹聞積蘊而顯光煙煜歷安中外
廉而勤震蕩刮昧苗頑馴輓漕百萬通倉困創懲貪吏安軍民鳩
宅鴻雁輸津門民則活矣公殞身一棺歸里蕭然貧幽幽者邸返

其真博哉清德遺子孫百世以後公長存

右墓誌銘沈德潛撰

明倫彙編家範典

卷五

The image shows a large rectangular frame with a thick black border. Inside the frame, there are several vertical lines that divide the space into columns. The lines are evenly spaced and extend from the top to the bottom of the frame. The overall appearance is that of a book cover or a blank page with a grid.

四
十
三
一
六
八

舒蘭

舒蘭滿洲正紅旗人姓納喇氏父敦多哩官至刑部侍郎兼佐領康熙二十六年六月以審理盜案失實革侍郎任復以審理革職總督蔡毓榮罪案附和尙書希福從輕擬罪由佐領降二級發黑龍江效力舒蘭初任理藩院筆帖式三十四年遷主事三十八年隨侍郎滿丕及都統烏達禪等招降巴爾瑚三千餘人安駐察哈爾游牧地編隸佐領九月巴爾瑚佐領額克圖叛害察哈爾副總管阿必達驍騎校班第掠馬駝以遁 聖祖仁皇帝命喀爾喀公錫卜推哈坦等領蒙古兵追勦舒蘭率諳察哈爾路徑者四人持檄傳示蒙古諸貝勒台吉并派撥察哈爾厄魯特兵隨烏達禪會

諸蒙古兵勦獲賊渠三十九年遷內閣侍讀四十三年三月命
河侍衛拉錫往窮黃河源諭曰河源雖名古爾班索里嗎勒其
實發源之處人跡罕到爾等務直窮其源察視河流從何處入雪
山邊內凡經流諸處宜詳閱之九月還奏臣等於四月初四日就
道五月十三日抵青海十四日至庫庫布拉克有貝勒色卜騰札
勒行六月七日至鄂稜諾爾周二百餘里明日西行至札稜諾爾
周三百餘里二諾爾相去可三十里許明日至星宿海蒙古名鄂
敦塔拉星宿海之源小泉萬億歷歷如星眾山環之南有山曰古
爾班圖勒哈西南有山曰布瑚珠勒赫西有山曰巴爾布哈北有
山曰阿克塔齊勒東北有山曰烏蘭部什蒙古總名曰庫爾坤卽

崑崙也山東出自古爾班圖勒哈者西番名爲噶爾瑪塘出自巴爾布哈者名噶爾瑪楚木朗出自阿克塔齊勒者名噶爾瑪沁尼三山之泉溢爲三支河卽古爾班索里瑪勒也三河東流入札稜諾爾札稜一支入鄂稜諾爾黃河自鄂稜出其他山泉與平地水泉淵淪縈繞不可勝數悉歸黃河東下臣等於六月十一日自星宿海回程舍故道尋河流東南行二日登哈爾吉山見黃河折而東至庫庫陀羅海山又南繞薩楚克山復北流經巴爾陀羅海山之南明日達阿木尼瑪勒占穆遜山其山最高雲霧蔽之不可端倪蒙古人言長三百餘里有九高峰積冰終古不消常雨雪一月得晴僅三四日臣等自此回行又二日至錫喇庫特勒又南過僧

庫爾高嶺更百餘里至黃河岸見黃河自巴爾陀羅海山東北流
經歸德堡之北達喀山之南兩山峽中流入蘭州自京至星宿海
計七千六百餘里甯夏之西由松山至星宿海天氣漸低地勢漸
高人氣閉塞故多喘息謹繪圖復 命疏入報 聞是年擢內閣
侍讀學士尋 諭大學士九卿等曰朕於古今山川名號雖在邊
徼遐荒必詳考圖籍廣詢方言務得其正故遣使至崑崙諸處目
擊詳求載入輿圖卽如黃河之源出西塞外庫爾坤山之東眾泉
渙散不可勝數望之燦如列星蒙古謂之鄂敦塔拉西番謂之索
里瑪勒中華謂之星宿海是爲河源匯爲札稜鄂稜二澤東南行
近北復東行由歸德堡積石關入蘭州其原委可得而縷析也四

十四年擢舒蘭內閣學士明年 命往西藏封拉藏爲翊法恭順
汗回京得風疾 賜藥診視并 賜藥飲兩閱月始痊四十七年
閏三月疾復發乞休 命解任調理五十二年正月病痊補原官
三月遇 萬壽慶典復其父敏多里侍郎原品十一月 命舒蘭
兼管光祿寺卿十二月遷工部侍郎明年 諭責舒蘭人甚糊塗
事多差錯降三級調用五十九年卒年六十有八

右 國史館本傳

郝玉麟

郝玉麟漢軍鑲白旗人由驍騎校於康熙三十四年投門干總四十四年遷守備累遷雲南援剿協副將六十一年擢鶴麗鎮總兵雍正元年八月授雲南提督九月青海羅卜藏丹津督眾台吉叛劫親王察罕丹津掠青海諸部官兵進剿 詔玉麟率兵赴中甸駐劄揚威塞外中甸故屬麗江後爲青海番所據受羅卜藏丹津僞劄玉麟至宣布 恩威皆畏服上所受僞劄率眾三千五百戶男婦萬千餘投誠納土玉麟安撫夷民清釐戶口請於中甸駐兵千阿墩子爲扼吭地駐遊擊一兵五百 詔嘉其料理合宜頗著勞績俟青海事竣後下部議敘二年正月奉 命自中甸進駐察

木多招撫夷七百餘戶四月青海平敘功授雲騎尉世職五年三月鎮沅夷不法焚署竄因玉麟同總督鄂爾泰發兵分剿擒首惡等置之法夷民漸復業事 聞 諭嘉玉麟公忠爲國能鼓勵弁兵奮勇報效六年二月茶山所屬夷民劫客商拒捕傷官玉麟同鄂爾泰調兵進剿擒首逆安撫餘黨後以車里土舍刀正彥狡詐煽惑夷民欲擒治正彥聞風潛逃玉麟於猛臘生擒之由猛崙慢林至思茅普洱元江一帶親勘以茶山袤延千餘里普洱思茅爲咽喉九龍江橄欖壩爲藩籬與交趾莽子老撾毘連更有慢達等五渡口緊要且幅員遼闊宣慰司刀金寶不能兼顧土產普茶外有鹽井廠務必畫明界址設文武官彈壓列疏入奏得 旨嘉獎

五月部議茶山功授玉麟都督同知九月烏蒙所屬大關米貼土
婦陸氏作亂玉麟遣兵勦獲陸氏及賊黨設塘汛十二刀正彥餘
黨作亂玉麟領兵二千進攻追擊至橄欖壩渡整哈江奪渡口又
率遊擊郭佑民余成貞等夾擊賊大敗擒治逆黨招撫夷民百餘
戶上嘉其辦理妥協七年正月以雲南慶雲見聞特旨授
玉麟騎都尉世職三月授廣東總督九月奏言廣州府屬香山廣
海新會交界傍海依山多巨盜嚴飭水師巡哨於香山三虎海面
戮盜犯及傷溺者二十餘見賊船七追至廣海獨岸清水灣海面
生擒首盜李奕揚夥盜楊亞干等二十六人訊供積盜有陳大樂
王亞七梁國柱見搜捕務獲諭曰此案非尋常獲盜可比所有

將弁照軍功例議敘又奏言查出粵東官運官銷之埠羨並各商請按引增課每年六萬兩請帶銷舊引以三年爲滿諸疏入 諭曰觀汝所奏無非以清楚錢糧爲要務不特輕重本末失宜粵東民情惟利是趨似此亦不甚相協果能令吏治潔清民情淳樸自漸臻弊絕風清若不於根本處著力而逐末辦理豈但不勝其煩亦何有吏畏民懷之期耶八年正月奏移廣東定海縣青崖司巡檢駐太平汛儋州安海司巡檢駐北沙汛崖州抱歲司巡檢駐安樂汛添設瓊山縣水尾司巡檢一萬州寶府司巡檢一裁儋州倉大使一瓊州府司獄一 從之三月奏訪得逸盜王亞七陳大樂潛聚新會縣北峰黃陽各山梁國柱匿新會縣古兜山已檄弁兵

分獲其夥黨李亞三張亞八余文禮等亦就擒查新會縣北峰南峰二山向有柴場一汛於香山新會廣海三營每年輪撥官兵駐防今久廢請照向例防守 上嘉允之五月奏言廣東肇高廉羅道駐肇慶府控制千里外之高廉二府雷瓊道所轄雷州府在海北瓊州府在海南俱鞭長莫及請增設巡道一駐高州分轄高雷廉三府改肇高廉羅道爲肇羅道雷瓊道爲海南道並請將高雷廉道海南道及舊惠潮道俱加兵備銜六月又奏改廣東營制事宜一移左翼鎮標右營遊擊駐蘆包口汛一改新會營遊擊爲參將增守備千總各一把總四兵六百七十七與原設者分左右二營隸參將管轄一增河頭汛千總一把總二兵四百兼防甕崗右

寓龍遙各汛歸羅定協統轄一龍門營改隸增城管轄改增城營
遊擊爲參將一抽調廉州營把總一兵九十再募兵三十歸化右
營一改崖州營遊擊爲參將增千總外委各一兵百十八一移原
防市橋之虎門協都司駐南村並移番禺縣縣丞同駐一廣州春
江二協以副將專管毋庸隸左翼鎮標並增廣州協千總外委各
一兵一百四十五一左右翼鎮標五營及增城營俱無守糧應改
戰糧爲守與通省畫一並增右營鎮標兵三百四十五一增香山
縣縣丞駐前山寨調原駐之守備於縣城八月請增吳川縣硃洲
巡檢九月請復設潮陽縣縣丞一十一月請增潮州鹽知事一俱
如所請行九年四月奏言海豐縣之甲子捷勝二所應改置一縣

於東海濬建縣治設知縣典史各一移海豐縣訓導爲新設縣訓
導改原駐東海濬千總爲新設縣城守營千總東海濬巡檢爲甲
子城巡檢汕尾巡檢爲黃沙坑巡檢俱隸新設縣轄又奏言新會
開平兩縣界地名大官田距縣治遠請增置一縣設知縣訓導典
史各一分新會藥經司巡檢隸新設縣轄俱下部議行尋定東海
濬新設縣曰陸豐大官田縣曰鶴山又奏裁澄海縣河泊所大使
改設彰林鎮巡檢一裁平海大城海安大鵬雙魚五所改設平海
所巡檢一增新安陽江二縣縣丞各一駐大鵬雙魚二所城裁陽
江縣太平驛陽春縣樂安驛驛丞於太平地方設巡檢一十月請
改化石營守備爲都司瓊州興甯和平兩洲東莞三水四會那扶

等營守備爲都司十二月奏言長甯縣之老虎坳及錫場山翁源縣之際下鄉各設汛一設外委把總駐防又請增撥下鄉巡檢一俱下部議行又奏言瓊州鎮孤懸海外產米少又龍門香山虎門廣海等處兵民稠集商販罕到均應預籌積貯請將鹽政積省銀買穀萬六百石分貯各營春借秋收免加息部議從之十年二月命署福建總督時臺灣大甲溪等社兇番不法王麟赴廈門料理同提督王郡遣官兵進剿旋撲滅上嘉其悉心籌畫調度有方下部優敘加三級十一年三月奏言福清縣依山傍海當孔道其地駐長福營額兵不敷調遣請於通省各營撥防八月奏臺灣營制事宜一府治增城守營參將一設守備千總各二把總四

兵千一南路原設參將一守備一千總二把總四兵千不敷分防
請改山豬毛口守備爲下淡水營都司增千總一把總二兵五百
合原設弁兵分駐山豬毛口及觀音山石井等處一北路原設參
將一守備一千總二把總四兵千一百二十亦不敷分防請改參
將爲副將增都司一守備一千總四把總八兵千二百八十分中
左右三營以都司爲中營守備爲左右二營分駐諸羅縣治彰化
縣治及斗六門淡水等汛一安平地方外控海洋內扼臺郡請設
礮臺七并造倉貯粟三萬石資兵餉一臺屬田畝丁口漸增請將
莊民編保甲并設社學教導一臺屬流寓有從前隨征效力者請
給外委功加劄付卽委爲社長約束居民三年無過准以內地營

把總相閒用一臺灣總兵有統馭民番之責請照山陝沿邊例改爲挂印總兵官十一月奏言福州屬南臺居民輻輳舊設巡檢千總各一不敷彈壓請移福州海防同知及福州協都司往駐十二月奏改督標水師遊擊爲參將十二年二月奏改建甯協副將爲總兵轄延平一協楓嶺一營三月又請移漳州鎮標守備駐南勝五月奏酌覈海江情形增改府州縣各事宜一福甯地衝要直隸州不足彈壓請改爲福甯府設知府通判經歷教授各一增置附郭縣設知縣訓導典史各一同原轄之福安甯德二縣併建甯府屬之壽甯縣統歸管轄一福州府屬古田縣地寥闊請於雙溪建城增置縣設知縣訓導典史各一仍隸福州府管轄一泉州漳州

二府俗悍地廣請改泉屬永春縣爲直隸永春州隸以德化大田
二縣漳州屬龍巖縣爲直隸龍巖州隸以漳平甯安二縣增直隸
州知州州同吏目各一改教諭爲學正部議均如所請尋定福甯
府新設附郭縣曰霞浦古田分設縣曰屏南六月奏改南安仙遊
甯化三縣驛丞爲巡檢仍管轄永春仙遊各增巡檢一裁順昌縣
仁壽巡檢改設縣丞又改福甯糧儲道爲分巡糧驛道鹽驛道爲
鹽法道專管鹽政兼理福廠船工諸疏俱下部議行七月 命來
京陸見奉 旨入鑲黃旗十月 上以玉麟才具精神足以貫注
浙閩二省仍照舊總制爲閩浙總督十三年三月奏請於臺灣府
大東門小南門各設營防南水門北水門各建大廠臺并增鼓樓

南路之荊藤港北路之蛟港等處各設廠臺府西南一帶廠臺空
隙處各設水柵資捍禦六月奏南澳洋面島嶼歧雜歸海壇金門
兩鎮分巡鞭長莫及請以南澳右營銅山洋汛俱改歸南澳鎮巡
查並撥金門鎮巡船二歸南澳如所請行七月奏言臣徧歷海甯
等縣東西塘並至尖山勘石壩工見塊石塘及草塘均宜急修卽
飭員估奏適風潮坍卸者十之八九照舊例用塊石柴草搶修但
欲垂久遠應照內大臣法海等所估改建石塘奈諸臣意見不合
每事齟齬將來興舉大工自必更致參差臣受 恩深重何敢顧
避嫌怨知而不言除堵築尖山石壩工程已三分之二其見議海
塘工程請 旨另簡賢能大員總理 詔嘉所奏爽直九月奏言

浙省山海交錯凡要衝處居民稠雜當增員料理請於常山之草萍鎮西安之全旺臨海之前所天台之平頭壇太平之松門衛瑞安之大岳衛平陽之蒲門會稽之曹娥壩仁之和之唐棲鎮俱增巡檢一仁和錢塘縣各增主簿一又增專管江塘水利同知一乾隆元年二月諭郝玉麟以閩浙總督銜專管福建事先是臺灣彰化縣勦平牛馬等三社田畝奉旨仍歸番民管業部議以番人界內賣與漢人之地畝若民人往耕兩界錯綜難免侵擾應令該督議仍歸給使民番兩界畫然至是玉麟以臺地向係番民雜處漢民耕種之地半係番黎契賣而流寓不下數十萬人見耕番地數十萬畝若令歸還不但原價難追且番黎無力拋荒熟地而漢

民無田可耕請將見所耕地查明四至註冊存案嗣後永不許民
買番業部議從之三年五月奏言閩省人多田少民食不敷上
年福州等府被災奏請截留浙漕十萬石并委赴江南等省買米
接濟柰未及月餘浙漕糶完兵民日食仍不敷請於江南買回米
內酌糶再撥藩庫銀十萬兩赴江廣等省採買並請 敕撥江西
倉穀二十萬石湖南十萬石運閩以濟窮黎得 旨允行九月
諭郝玉麟仍兼管閩浙兩省事四年三月奏言閩省偶遇歉收兵
丁每虞艱食沿海各鎮已有儲穀其餘各銀計兵一名貯穀二石
共六萬一千六百石請以節省生息銀採貯於兵食有濟六月又
奏閩省沿海鹽場離郡縣甚遠曬丁待食常平倉穀每艱挽運查

閩省辦課有匿報鹽斤等弊按所犯酌罰陸續買穀萬石檄鹽道於曬丁最多離城最遠之福清場貯穀五千石莆山場貯三千石餘各場視可以建倉處次第經理諸疏入俱得 旨嘉獎七月擢吏部尙書十一月 命署兩廣總督先是 上聞福建漳州府知府王德純居官劣跡 敕革職令署福建巡撫王士任秉公嚴審至是御史朱續暉奏言風聞見審未結事如王德純一案有與督撫關涉處 上命續暉馳驛赴閩會同總督德沛及士任查審尋會鞠德純貪婪不職屬實合疏具題續暉又以會鞠時士任袒護玉麟欲出其罪心多欺詐具摺另奏 詔革士任職並以玉麟身爲總督於貪婪不法之王德純不行糾參且題升知府又以才情

敏練辦事實心保薦 敕部嚴加議處部議降五級調用 諭曰
朕命德沛確查郝玉麟曾否收受王德純賄賂今據奏郝玉麟於
每年收受王德純禮物並未受賄賂郝玉麟係 皇考簡用之大
員久歷外任人亦諳練若照部議降調尙屬可惜著從寬降二級
調用五年補刑部右侍郎六年二月因病乞休 上命允之九月
署閩撫策楞奏參延建邵道鄂善交結玉麟家人郭姓各款 上
命革鄂善職並將玉麟家人嚴審得實玉麟革職十年三月卒

右 國史館本傳

揆敘

揆敘字愷功滿洲人官至都御史諡文端有益戒堂集

康熙壬午十月二十八日 召試南書房是日同試十二人 欽

定揆敘第一查慎行第二奉 旨每日入直 敬業堂集

右詩人徵略張維屏錄 按揆公尚著
有雞肋集

L. I. I. I. I.									

瑪拉

瑪拉滿洲正黃旗人姓富察康熙三十六年襲佐領四十三年遷
護軍參領雍正元年授鑲藍旗蒙古副都統十一月調鑲藍旗滿
洲副都統二年擢刑部侍郎十一月以本內誤絞爲斬降三等侍
衛兼佐領四年授正紅旗滿洲副都統五年正月副都統宗室鄂
齊疏報查西藏情形達賴喇嘛私其父索諾木達爾札固山貝子
噶卜倫康濟鼐恃其勳績輕視諸噶卜倫眾恨之固山貝子阿爾
布巴乘隙與隆布鼐札爾鼐爲黨煽搆事端致達賴喇嘛與康濟
鼐不和請子隆布鼐札爾鼐噶卜倫原銜罷其職掌以鼐阿爾布
巴羽翼 上命瑪拉偕侍讀學士僧格往 諭達賴喇嘛康濟鼐

和衷共事 賞銀一千兩總理西藏事務十月阿爾布巴戕康濟
筋以兵圍頗羅鼐至阿里頗羅鼐截殺其眾遂領兵往勦阿爾布
巴 上以瑪拉在藏恐爲阿爾布巴所惑從中講和以致頗羅鼐
受害爰 遣學士班第密諭機宜六年七月頗羅鼐自藩玉口至
喀巴先擊喀木卡倫與隆布鼐遇是夜斥候兵集遂抵西藏瑪拉
等趣布達拉護達賴喇嘛還藏各廟喇嘛擒阿爾布巴隆布鼐札
爾鼐以獻頗羅鼐繫送瑪拉所瑪拉等鞠謀殺康濟鼐狀得實磔
阿爾布巴斬隆布鼐札爾鼐逆孛緣坐十月瑪拉等以達賴喇嘛
入隊中率西安滿洲兵四百固原兵五百四川兵百駐察木多應
搜疏入報 聞七年二月調鑲藍旗滿洲副都統六月 賞銀二

千兩八年擢正黃旗護軍統領九月 上念瑪拉在藏年久以副
都統青保代之 賞銀一千兩 命將防禦兵丁酌量帶回十月
瑪拉偕額外內閣學士僧格疏報班禪額爾德尼貝勒頗羅鼐遣
使齎牛羊酥麪餉大軍 諭曰瑪拉僧格將所送之物覈價充裕
給與銀兩並傳諭伊等朕遣兵在藏駐劄特爲厭唐古忒防守使
之甯謐豈有絲毫遺累之理今所送諸物勢必在伊屬下攤取未
免滋擾且我兵糧餉並不缺乏此番給還銀兩並非外視爾等也
可傳諭唐古忒咸悉朕意十一月瑪拉請給貝勒頗羅鼐印 詔
廷議如所請十二月擢工部尙書兼正紅旗滿洲都統十年三月
由藏回京因言番子等仰賴 皇恩各安生理得爾格特部向皆

恭順自隸內地差務勤慎 上命給得爾格特宣慰司銜七月

上以瑪拉不曉部務該旗事件亦多昏愼率意著革職以佐領在軍機處章京行走十一年正月 諭曰原任都統瑪拉在藏辦事

熟諳彼處情形著以副都統銜前往西藏辦事三月 上諭軍機

大臣曰西藏駐劄弁兵本爲防護唐古忒以防準噶爾賊夷侵犯

邇來賊夷大敗徒步奔逃力蹙勢窮不能遠涉且頗羅爾輸誠效

力唐古忒兵亦較前氣壯今藏地無事兵丁多集米穀錢糧雖給

自內地而唐古忒人等不免解送之勞朕意畱兵數百餘盡撤回

青保瑪拉苗壽著總理藏務應撤兵丁詳議具奏瑪拉等台疏旨

駐藏四川兵二千應畱五百餘撤回三年後仍撥四川兵更代

南兵一千本爲援。蘇設今亦量撤五百三年更代如四川例。上從之。乾隆元年瑪拉等疏言統轄喀喇烏蘇兵札薩克頭等台吉那顏和碩齊卒臣與貝勒頗羅彌議請以其次子頭等台吉珠密納木札爾兼轄以其弟塞臣哈什哈襲札薩克頭等台吉廷議允行八月卒賜祭葬如例

右 國史館本傳

143-198

國朝耆獻類徵初編卷六十五補錄

卿貳二十五

呂謙恆

國家典祀有名宦鄉賢從祀 聖廟衡文欽使惟學政之賢者得
人名宦而典鄉試者不與蓋既無地治之責而感恩知己門下士
外無人焉然采風之餘果能畱心地方利病入告 天廷得如所
請是卽有功是鄉而可援典禮以祔食於先賢先儒之後如康熙
庚子典試湖廣編修呂公謙恆是也方大湖南北未分闈以前湖
南士子阻於洞庭應試者少先後以分闈題請者中丞趙公申喬
潘公宗洛李公發甲屢格部議迨雍正甲辰始克舉行一時士林

感 聖天子嘉惠之德而頌三公之功不變而不知呂公之有力
於是舉尤當沒世不忘也方公主試湖廣時既以湖南文風日盛
遠隔洞庭不無遺珠亟宜分闈密奏繼由編修轉御史適當雍正
初元復申請焉事詳志乘及方望溪侍郎所爲公墓誌以是知分
闈之舉三公始之公實成之崇德報功理宜一致今三公祔祀名
宦且均有專祠惟公祀典闕如雖公一代名臣不以一祠增重而
德施宏遠湘人士世世賴之烏可忽視爰集同人議於府學潘公
祠增入公位薦香肅奉揚烈頌芬釋菜分儀垂思儲祉擴懷舊之
蒲念發潛德之幽光縷列事由用誌諸石後之覽者應有感於斯
文公字淵樵河南新安人官至光祿寺卿今會城別祠祀前長沙

太守呂公肅高卽公孫也例得附書

右祔祀碑記闕撰人名氏

按碑在長沙府學潘大中丞祠壁呂公肅高見是編守令二十

二

三十一

一

國朝書畧類徵初編卷六十六目錄

卿貳二十六

嚴虞惇

李周望

李鳳翥

單疇書

蔡珽

法敏

齊世武

德明

楊秘

謝珉

國朝耆獻類徵初編卷六十六

通奉大夫前署江西巡撫江西布政使司布政使湘陰李桓輯
卿貳二十六

嚴虞惇

虞山嚴太僕思庵先生之歿二十餘年矣昨歲其嗣君塗卜葬先生既得前少宰崑圃黃公爲之誌而復以墓門之碑屬之余余於先生固通門也自先大父忠文先生與先生祖髻珠先生爲同譜而余年十二卽得拜尊甫白雲先生於牀下以詩爲贄深荷獎許後余至京師先生以詞林宿老爲文章總持負天下望天下奉其言論風旨以爲輕重雖素知名士苟不當意不輕許也而余獨受

知於先生最深歲癸巳先生出典楚試余方應京兆舉不獲隨先生行先生乃與太倉顧孝廉玉停偕既撤棘先生病甚然每對玉停言輒惓惓念余一日字余曰文叔若售吾無憾矣玉停慰解之曰必如先生言迨彌留握玉停手太息曰吾病亟矣而京兆試錄不至恐不及見也至得文叔捷音必焚香告宋玉停如其言因寓書於余余乃得聞狀痛哭不能止古今來知己之感世多有之然未有當生死之交纏絲篤摯如先生於余者今日表先生之墓雖愧不文其敢以辭先生諱虞惇字寶成一字思庵裔出唐給事中諱穴後累遷常熟明世宗朝文靖公諱訥起嘉靖辛丑進士歷官太子太保吏部尙書武英殿大學士贈少保爲名相是先生高祖

也魯祖諱澤中書舍人祖諱杖崇禎甲戌進士官兵部職方司員外郎卽髻珠先生也父諱熊明諸生鼎革後不復出人稱白雲先生以先生貴累 贈太僕寺少卿母袁氏 贈恭人先生生有異稟讀書目數行下九經三史幼卽成誦長益探其闕奧每家塾課藝及里中文酒之社先生年尙少文輒冠其曹某歲入籍華亭補博士弟子時吳中承同聲慎交之後珠榮玉敦之會望走絡繹無不願交於先生先生實爲之職志癸丑食餼丁卯中副車 廷試入都應大司寇崑山徐公之招預修明史庚午登京兆賢書時聖祖皇帝慎重科場座主太倉相國王公時爲學士乃 聖祖特簡公正廉慎甄拔多名流而先生尤爲宿望丁丑隸南宮 殿試

日京江相國張文貞公讀卷以第三人進呈而長洲太宗伯韓公復奏先生家世籍貫上亦素聞先生名遂以第一甲第二人及第釋褐授職編修院長阿公山深相引重館閣文字多出先生手己卯先生次子密從子亨裔並捷北闈會科場議起兩主司與先生皆同年忌者用是周內先生遂鑄二級先生亦不深置辨也甲申歸里門乙酉 聖祖南巡閱河先生迎 駕毘陵獻詩十章 溫旨召問賜御書一幅是歲冬起補國子監監丞明年轉寺副寺副故廷尉屬廷尉天下之平也而寺副權輕位下畫諾紙尾奉行文書謹守故事而已用法輕重人命死生無留意者先生獨毅然不敢輕其官論讞奏當必折衷至是務求其生或事有掣肘不得

行其志輒義形於色雖陷之以利怵之以威不能奪也九門提督
陶和氣勢倣人意旨所向無敢逆者嘗有所怨檀張三欲置之
死用通倉盜米案鋟入之先生執奏以爲罪不應死法卒從未減
有徐天榮者館內務府二格家二格殺人而欲蔽其罪於徐徐力
不能脫又口吃無以自明已定讞矣先生獨心疑其冤時方移疾
且秩滿或勸先生稍緩卽量移此事可勿與也先生不聽力疾起
視事密擒二格訊之二格服辜天榮得釋京師內外咸驚歎以爲
神辛卯典四川鄉試士皆拔其尤余嘗從王宮詹拙園先生視學
於蜀蜀士之雋多所稔悉今入轂者過半以是知先生得士之盛
也復命升鴻臚寺少卿月餘轉通政使右參議未幾復遷太僕

寺少卿先生自己卯後位頗淹滯至是不兩月三遷厥官 聖祖
嘗問掌院及九卿外廷諸臣誰工古文之學者咸舉先生名以對
又問誰可比似皆曰故相國張某之亞也蓋京江相國之文最爲
聖祖所契故援以爲比 聖祖深領之當是時咸謂先生且駸
駸嚮用矣癸巳復爲湖廣鄉試正主考先生念湖廣文獻之地如
國初熊劉諸公文章開闢爲一代風氣所宗主而後或不免於陵
夷此主持文柄者之責也因誓志挽回黜浮矯陋入闈三十餘日
盡萬二千餘卷焚膏繼晷目擊手披摘其菁英落其蕪蔓榜發之
日登進者既感知遇之奇被放者亦服衡鑑之當咸以爲數十年
來制科所未有也然先生精神心血亦耗且盡矣在闈中已病出

闕而病增劇十餘日竟以不起祭法以死勤事則祀之先生勤王
事以死正與祭法相應開府劉公殿衡徇士大夫之請祀先生於
名宦至今全楚之士談及先生無不歎息泣下者也先生手掇大
魁起家禁近備位卿貳兩典試事俱有起衰之功卽前爲廷尉屬
時清節直道亦卓卓表見於世矣然以先生之學誼齒未衰耄又
當 聖祖皇帝眷注方殷儻更天假之年必大被枋用經綸黼黻
當復何如而中道淹逝未竟厥施人以此惜之著有詩經質疑數
十卷文獻通考詳節二十四卷其所輯五經及通鑑提要惜未成
帙先生制義旣已風行海內衣被後學其古文詞尤度越於俗卓
然名其家昔崑山歸震川先生爲有明一代作者而官止於太僕

今先生名位適與之相符居相近世相接文章學問先後輝映從學之士欲爲先生刊嚴太僕集繼歸太僕後論者咸以爲不愧云先生生於順治庚寅五月二日卒於康熙癸巳三月二十一日年六十有四配戴氏 誥封恭人子三鑿教習貢生候選知縣次密己卯舉人次偃侄蔭生孫二人長繩德雍正甲辰進士東昌府知府次繩業女三孫女二以雍正十三年乙卯葬於吳縣之穹窿山下嗚呼先生之歿也余畱滯京師不獲效古人之誼千里赴唁及先生卜葬余復大病僵臥五六月不能起又不獲親送先生於墓憑棺一哭以誌知己之恩且先生平日所以惓惓於余者豈直以一第相期望哉良以先大父大節與日月爭光名德之後冀勿墜

其世故欲拯而起之謂孺子可教也又先生與余俱出太倉相國之門相國待先生以國士而余受相國知亦至深且厚師門之誼波及下走聲名未立因其獎成而余自登第後浮沈金馬歷有歲年蹉跎偃蹇碌碌無所建樹今復以貧病之故杜門里居不能自振將終爲廢人然則余之負先生知者甚矣今復援筆而表先生之墓能無感愧並集涕泗橫流不能自己也哉乃爲之銘銘曰
先生之學賈茂董醇鼓吹六籍陶鑄羣言大魁廷對渠祿高騫人尊北斗世奉龍門量移國子師嚴道尊一佐廷尉出入平反法無訛弊人自不冤羣公推轂喜動 楓宸敷歷卿寺一歲三遷星輅再遣玉鑑重懸楚材蜀士選並青錢蠶叢闢路江漢遡源鞠躬盡

瘁身殞於官嗟余薄劣早荷陶鈞車過伯樂氣識延津邱山華屋
知己感恩羊曇有淚郭泰無慚九原可作視此貞珉

右墓表楊繩武撰

嚴虞惇江蘇常熟人生有異稟九經三史幼卽成誦長益探闕奧
既及第授編修館閣文字多出其手己卯科場獄興虞惇子姪連
售而姜宸英與李蟠皆其同年友用是罍吏議鐫級聞居數年補
大理寺副通倉盜米案有以私怨鍛入人罪者虞惇持不可而止
俄有內務府殺人移獄事虞惇先上書本寺少卿邵觀歷指疑狀
復出不意執其人訊之吐實讞始定累遷太僕寺少卿典試楚蜀
皆稱得人卒於官虞惇著述甚富其讀詩質疑三十一卷亦入四

庫書意在玩味研求於毛朱兩家擇長棄短不存門戶之心并不涉調停之見殊有功詩學爲文鼓吹六籍陶鑄羣言與歐曾爲近詩思沈力厚不苟同於人江南人士刻其集以繼明歸有光蓋本同郡而有光官止太僕名位又適相符也議者咸以爲允

右傳朱珩撰

嚴虞惇字寶成一字思庵常熟人生有異稟九經三史幼卽成誦長益探其闕奧每里社會文及歲科試於學使者往往屈其曹偶康熙庚午舉於鄉丁丑捷南宮遂以一甲第二人及第一時館閣文字多出其手己卯科場獄興適先生子姪連售兩主司皆其同年友用是望吏議蓋鐫級閒居者數年晚乃益振曾以兩月三遷

官累主文柄勤王事以歿門人陳祖范題贊所謂亦稍展其生平
然未登九列而遽已者是已先生著述甚富其爲文鼓吹六籍陶
鑄羣言奧衍宏深大致與歐曾爲近詩不一格大或千餘言小或
數十字力厚思沈動與古合昔歸震川先生爲有明一代作者而
官止於太僕今先生之名位適與相符居相近世相接學術文章
後先輝映江南人士爲先生刻嚴太僕集繼歸太僕後接軫連茵
識者咸以爲不媿云

右小傳鄭方坤撰

常熟嚴先生諱虞惇字寶成進士歷官太僕少卿著讀詩質疑三
十一卷附錄十五卷首爲列國世譜次國風世表次詩指舉要次

讀詩綱領次刪次次六藝次大小序次詩樂次章句音韻次訓詁
傳授次經傳逸詩次三家遺說次經傳雜說次詩韻正音次經文
考異每一類爲一卷皆附錄編首不入卷次其正經爲十五卷小
雅爲八卷大雅三卷而每卷析一子卷頌爲五卷大旨以小序爲
宗而參以集傳其從序者十之七八從集傳者十之二三亦有二
家皆不從而先生自爲說者每篇之首自爲序文及諸家論序之
說每章之下各疏字義篇末乃總論其大旨與去取諸說之故皆
以推求詩意爲主頗略於名物訓詁故不免失於考證之處然大
致皆平心靜氣玩味研求於毛朱兩家擇長棄短非惟不存門戶
之心亦并不涉調停之見覈其所得乃較諸家爲多焉

右學案唐鑑輯

張虞惇字寶成由編修官至太僕寺少卿著有嚴太僕集太僕六經皆有述作而讀詩質疑三十卷尤有功詩學古今體詩略爲寄興然亦不苟同於人

右 國朝詩別裁集小傳沈德潛撰

李周望

李周望直隸蔚州人父旭升康熙二十一年進士由中書科中書
游歷工部侍郎四十九年福建漳泉旱截畱江浙漕米賑卹上
命旭升偕戶部侍郎塔進泰往監之雍正元年以吏部侍郎加尙
書銜致仕瀕行 賜銜平耆碩額周望其長子也康熙三十六年
進士改庶吉士三十九年授檢討五十一年充會試同考官五十
三年二月遷國子監司業四月授翰林院侍講九月提督湖廣學
政五十六年差竣督臣滿丕以周望操守清廉衡文公慎保畱時
已 命繆沅視學湖廣周望回京供職五十七年遷國子監祭酒
五十八年三月奉 命祭告北獄中鎮西海河濱等處十一月遷

詹事府詹事仍兼祭酒事五十九年充江西鄉試正考官尋擢內閣學士六十年督運西路軍餉六十一年十二月遷戶部左侍郎雍正元年充經筵講官二年七月奉命清查兩淮鹽務九月疏言兩淮行鹽一百五十九萬八千五百餘引舊例每引行鹽二百二十七斤後遞增至二百九十四斤但行鹽有地廣而鹽不敷用者如湖廣江西上江是也有偏近場竈鹽不易售者如邳州及淮安府之山陽清河桃源宿遷睢甯沭陽贛榆揚州府之江都是也若每引概加鹽五十斤恐鹽多難銷勢必至引積而課虧請於湖廣江西上江等處每引加鹽五十斤邳州山陽等不必加鹽至行鹽各有一定地方若令通融銷售易開私販之漸應仍舊下部議

如所請十一月疏言兩淮積欠銀一百二十餘萬前經工部尙書
李先復奏准自壬寅綱起至甲辰綱止分爲三年扣存江南督撫
各官鹽規及匣費雜銀抵完今壬寅綱帶徵銀數雖完而各官規
禮仍舊饋送且在官有抵補之名而在商有重用之累且副都御
史謝錫履奏請將鹽規銀抵補江安無著虧空自雍正四年起分
作四年輪補是商人既有帶徵積欠又有應納規禮若再令填補
江安虧空則有限之資本安能應無窮之追求惟以各官應得規
禮自行解送江安藩庫填補虧空庶不致重累商人得 旨如議
行時有條陳鹽政者 諭令周望等議奏周望偕內閣學士塞楞
額巡鹽御史噶爾泰副都御史謝賜履覆稱兩淮總商三十人又

有四五人主名管事者號爲大總往往借端私派刻剝眾商宜除
去商人有官於朝者爲官商引課歸於名下挾以免費取利宜禁
革得旨依議速行三年擢禮部尙書四年因病乞罷 溫旨慰
卹六年父旭升卒丁憂八年六月卒於家 賜祭葬如例

右 國史館本傳

李鳳翥

李鳳翥江西建昌人康熙三十六年進士改翰林院庶吉士三十九年散館授編修四十二年充會試同考官四十九年充日講起居注官尋升司經局洗馬五十一年提督順天學政旋丁父憂五十四年服闋補原官雍正元年正月擢鴻臚寺卿時直隸災命鳳翥往查賑務上嘉賚之七月署兵部左侍郎九月升內閣學士兼禮部侍郎銜尋署工部右侍郎十一月上御乾清門聽政大學士等題覆衍聖公孔毓圻因追封孔子五世王爵謝恩一疏上命蔣廷錫李鳳翥近前諭曰校閱本章乃內閣職掌本內重道二字誤寫爾等並未看出勿謂此等本章無甚緊要朕

不詳覽嗣後當慎之十二月充武殿試讀卷官旋充浙江鄉試正
考官二年三月實授工部右侍郎十一月以陵寢應用紅土議
在木處購買又議准山東巡撫陳世倌捐修闕里銀兩均有不合
下部議處部議降二級調用上加恩改爲畱任三年以祭奠理
密親王遲誤應用蓬廠將工部尙書李永紹侍郎薩爾納李鳳翥
等下部議處部議降三級調用諭曰李永紹薩爾納降調書寬
免李鳳翥係專爲此事派出之人著降三級調用尋授通政使司
右參議四年七月提督浙江學政十月調安徽學政復授鴻臚寺
卿七年諭曰李鳳翥奏賀瑞芝本內自稱蓬華陋儒此本奏賀
慶雲又稱擲地才疏敢含毫而賦五色李鳳翥旣以儒者自居則

陳奏本章自應加意慎重不當作遊戲之詞若未曾作賦而云作賦則所奏盡屬虛文若寶曾作賦便當進呈朕覽若自知不能作賦而引此浮詞湊成自謙之語陳於君上之前豈儒者之道乎李鳳翥受朕深恩由翰林超擢至工部侍郎而在工部時瞻徇苟且聽阿其那之指揮不能卓然自立尙得以儒者自命乎更可異者貼黃內大賚賚字譌寫賞字莫非有意譏朕不應賚而賚乎似此輕慢疏忽狂詐姦偽儒者固當如是乎尋降調告假回籍十三年命赴部引見乾隆元年二月授鴻臚寺少卿三月升闕子監祭酒六月充浙江鄉試正考官三年上臨雍釋奠禮成鳳翥以講經書蒙恩賞賚四年正月上御乾清宮賜廷臣宴賦柏梁

體詩鳳翥與馬八月復授內閣學士兼禮部侍郎銜七年以原品
休致十年卒子家駒舉人志沆翰林院編修

右 國史館本傳

單疇書

單疇書山東高密人康熙三十六年進士歷任江南靖江陝西延川江南贛榆等縣知縣六十一年行取遷湖廣道監察御史尋巡視中城雍正元年三月疏言自康熙五十七年至六十年安徽湖廣銅斤欠數甚多有久報起程尙未到部者有承辦日久尙未清完者恐有借詞故延之弊請 敕戶工二部清查各省累年所欠銅斤勒限全完嚴其逾限處分又查解官欠銅未交者俱係典史巡檢等員職小任重易至誤公嗣後起運銅斤宜遴委府佐家道殷實者下部議行七月授陝西甯夏道仍御史銜二年八月調洮岷道三年三月奉 旨去年年羹堯陛見時奏單疇書才力不及

操守不廉脫視其人老成端謹必係不能迎合年羹堯所致單曠
書才或不及斷非操守不廉之人著調回以卿員用七月補鴻臚
寺少卿曠書以羹堯任用私人濫竊名器甯夏僚屬或倚勢殃民
或假權市恩疏參四款一西路同知常璽羹堯倚爲心腹令於中
衛買米三千石運至甘肅每石短價五錢派撥民車又虧其腳價
並驛馬草豆短價派買經市民倪任重等訐告羹堯不行糾參止
以記過銷案一惠安堡鹽捕通判閻甫世羹堯借差遣爲名調赴
西安委其表姪周仲舉署篆甫世坐困半年無端嚴押解回仍不
令理事又逾年仲舉始行交印一原任四川通判郎廷槐發陝西
軍前備用羹堯委署甯夏同知兼中路印務以漁稅課之利嗣題

補四川遵義通判不卽令赴任畱作甯夏用人一甯夏同知趙健
父爲羹堯幕賓健由知縣捐升逗遛西安希圖善地羹堯委用甯
夏亦令兼中路印務以飽慾壑疏入得 旨該部嚴察議奏部議
降年羹堯三等公爲一等子十二月遷太僕寺卿四年正月轉大
理寺卿五月 上命疇書同兵部侍郎通智往甯夏管理察罕托
輝渠工五年七月擢刑部右侍郎六年三月疏言察罕托輝地方
遼闊止設新渠一縣鞭長莫及請沿賀蘭山直抵石嘴子爲界於
省東營左近增置一縣設知縣典史各一員又漢唐二渠舊設水
利同知一員令新開大渠六羊渠隄岸甚大請暫置水利通判一
員專司渠務又招徠人民已四千餘戶其子弟多讀書者宜於兩

縣各設訓導照中學例考取又石嘴子舊設弁兵衛署營房請分
移兩縣增置之縣城內駐守備把總官各一員兵一百五十名新
渠縣城內駐把總一員兵一百名至石嘴子止建墩臺撥兵十名
守望又平羅營以閘門爲邊鄂爾多斯與內地交易向俱在閘門
外今自石嘴子西抵閘門百餘里旣開渠築隄招集民人請將市
口移石嘴子墩臺按期貿易仍令駐防將弁稽查彈壓疏入得
旨詳移督撫斟酌並下部議尋暫停立學餘俱如所請奉 旨
招徠人民已有四千餘戶若必俟人文蔚起始行考試恐阻其目
前上進之階兩縣中見有情願就試者應許其附入鄰近州縣考
試酌量加額收錄入學俟後建學及試官按臨之日仍卽撥入本

學庶爲妥協嗣定新設縣名曰寶豐七月調戶部右侍郎七年五月卒於工所奉 旨單疇書謹慎老成操守廉潔辦理甯夏渠工實心效力今聞溘逝深爲憫惻著賞銀一千兩爲歸途之用 子祭葬如例

右 國史館本傳

The image shows a table with 10 vertical columns. The rightmost column contains a header row with text that is mostly illegible due to the high contrast and grain of the scan. The rest of the table is empty.

									Header text (illegible)

蔡珽

蔡珽字若璞號禹功漢軍人康熙三十六年進士官吏部尙書直隸總督降奉天府府尹有守素堂集

禹功由庶吉士授檢討遷中允康熙五十一年提督貴州學政遷侍讀學士五十九年充河南鄉試正考官六十一年由禮部侍郎擢四川巡撫雍正二年川陝總督年羹堯劾珽部議擬斬三年解珽至都特授都察院左都御史珽奏請設安徽學政從之大臣傳節鈔

右詩人徵略張維屏錄

陸心集卷之六十一

五

法敏

法敏伊拉哩氏滿洲鑲藍旗人父阿山官至兩江總督自有傳法敏由監生於康熙三十六年考授內閣中書五十七年遷內閣侍讀雍正元年正月授禮科給事中二月授直隸巡道八月擢倉場侍郎奏請於朝陽門外建設萬安倉並設滿漢監督各一員二年條奏漕務事宜禁止運丁包丁代運挑淺添夫按日給錢不得如前索給食米以致借端盜賣請飭令漕臣通行曉諭各倉監督俟一年差滿請遣大臣一員會同倉場侍郎稽察米好足數者議敘升用短少泡爛者從重治罪以示勸懲均如所請行三年五月授湖北巡撫疏報漢川等四縣開墾田地二百七十五頃有奇十二

月調四川巡撫四年四月奏川省邊界番夷干犯法紀者請相機擒拏正罪并請嚴飭督撫提鎮約束沿邊員弁務以安戢邊境爲主不得一毫需索以致開釁生事 諭曰治內地當先寬而濟之以嚴治邊夷宜先威而繼之以恩方克有濟朕非好大喜功偏於殘忍之主此數處番夷咸沐 聖祖數十年寬仁厚德自應傾心向化總緣地方官不實心任事苛求見小激出事端復隱匿養奸致令伊等恩不知感威不知畏所以大不法之案重見疊出今若照爾迂見而行爾能令所屬各員盡皆一塵不染乎儻再有不法事出將不肖員弁正法以謝罪於番夷乎抑別有料理之法乎若漫然不料事之始終亦並無深謀遠慮只據無稽之迂談奉爲指

歸信而不疑是豈封疆大臣之識見耶今爾所見亦不可謂全無用處但尙非其時俟將此歷來不法之積習極力整頓一番使伊等凜然知法當遵威可畏然後再行爾此奏嚴飭將弁屬員遵守弗違彼時可保地方百姓永遠享昇平之福也七月奏進剿冕山賊蠻金格等添調漢土官兵深入梁山搜捕請暫照松潘戍守兵丁之例支給口糧 諭曰向來官兵凡在內地行走者例不給與口糧今建昌官兵因進剿賊蠻深入梁山非內地可比而賊徒金格等潛匿荒僻之區尙未授首見在官兵各處搜剿奮勇效力甚屬可嘉著照南坪之例一體支給十月調陝西巡撫五年七月諭曰法敏從司官之職朕加恩特用倉場侍郎歷任巡撫乃伊深

負朕恩一味沽名釣譽苟且因循朕屢加訓誨而伊全然不知悛改卽如南坪冕山之苗蠻等肆行不法騷擾居民搶奪行旅爲地方之患久矣岳鍾琪方議用兵勦撫以爲除暴安民之計而法敏密摺奏稱近邊員弁僥倖軍功議敘遂生喜功好事之心或致激成事端等語彼時朕見其奏猶以爲此庸人迂闊之見或道聽塗說之言而不識安邊經國之遠圖是以詳悉批示冀其醒悟今岳鍾琪料理南坪冕山等處苗蠻之事迅速成功永除地方之累而法敏與佛喜程如絲喬鐸等通同作弊之處一一敗露可知法敏從前之奏實與蔡珉佛喜程如絲暗結黨援欲以傾陷岳鍾琪而阻撓我國家之政事並非迂闊之見出於無心者也其護庇屬下

貪官隱匿夔關稅課乃伊營私作弊之一節耳負國負恩莫此爲甚法敏著革職擊問尋釋罪 命往歸化城與都統音丹等辦理錢糧事務十三年十月 召法敏赴部引 見授刑部侍郎乾隆元年十月授山東巡撫二年正月奏登州府知府員缺懇將見任刑部滿郎中富爾遜補授得 旨此奏大非矣豈有一省之大不能得一好知府而以滿郎中外補之理若出於無心則識見庸陋之極若出於有意則朋比爲私之漸將自此起矣殊失朕望四月請將清查地畝案內德州臨淄高唐郟城沙鹹地畝除科甯陽臨清沙瘠地畝減等起科五月疏稱東原滕陽新橋三驛丞久經裁汰馬匹併歸州縣管理而中火等事尙係吏目典史代辦事不盡

一請將三驛中火等事併歸於東平滕縣汶上等各州縣管理均從之是月條奏賑卹事宜一被災州縣派委郡守丞倅等官會同地方官履畝躡勘將被災幾分親註門牌儻假手鄉保吏胥卽行參處一查造戶口分別極貧次貧豫給印票交該戶收執以免移換添改等弊一散賑宜運穀四鄉先期出示至期照票給發如老弱疾病許親族鄰友代爲保領一借給籽種恐民人到手花銷徵還時或少延緩勢必徵比須確查實係極貧方准借給一查造賑濟冊票及監查員役盤費於存公項內支給事竣歸賑案報銷一司賑各官宜委道員督率稽察實心辦事之員保題優敘辦理不能妥協嚴參治罪下部議行六月御史馮起元奏山東直隸兩

省運河水泉近多湮塞開壩亦已傾圮 命侍郎趙殿最侍衛安
甯會同法敏等詳晰勘查辦理又疏報德州等六州縣衛黃運二
河隄歷那占地畝及東平陽穀等六州縣所隄歷地畝礙難耕種
請豁除舊徵銀米得 旨允行八月疏陳酌增律例全書條款一
諱竊律無正法若照諱盜革職未免輕重無分若照應申不申僅
予罰俸亦非以警官邪應以降調處分附諱盜條例下一殺一家
非死罪二人及非一家而殺三人者定以斬決但謀故鬪毆概擬
斬決似無分別應改爲擬斬監候庶於故殺法有比合一律載軍
民相姦者姦夫姦婦各枷號一個月杖一百等語應將原律加和
姦一等杖九十者改爲枷號三十五日原律加和姦二等杖一百

者改爲枷號四十日並杖一百增入本例下一律載姦夫自殺其夫姦婦雖不知情絞監候此指已殺者而言若傷而不死應將姦婦照已殺律減一等杖一百流三千里照例准贖給與本夫聽其去畱一負罪潛逃加倍之例旣蒙停止其知情藏匿罪人者原係因人連累應照本例減罪人一等問擬其犯罪事發在逃律後之定例並畫一刪正一定例在京問擬徒罪人犯滿日交原籍地方官管束儻私自出境及在本處生事者卽擬流遠省等語但例內未經分別原犯情由應除強竊盜並光棍案內之犯仍照定例外其餘徒犯限滿回籍如因不能度日謀生出外者免其管束儻仍舊爲匪照例擬流或見犯之罪重於流者從重科斷得 旨下部

知之又奏請青州添設駐防官兵二千餘名應支粟米酌給一半其餘折給銀兩九月奏河撫兩標賞兵生息銀兩敷用有餘請各撥出銀三千兩添給兗登二鎮十一月奏商河縣官莊鹹鹵不毛下地應徵銀米併請豁免又濟南等府屬應徵各項稅銀其糧鋤箕帚等細小物件請免徵收三年正月請將蘭山縣羅滕鎮巡檢移駐青駝寺鑄給印信均從之又奏常平糶賣事宜所有平糶倉穀遵旨動用存公銀兩買運四鄉適中處所設廠平糶俾遠近貧民不致往返守候並委員嚴密稽查實無別項情弊惟發銀富戶令其交穀運倉向所不免請嗣後嚴飭各屬務選妥役於遠近市集購買自行還倉得旨既經詳悉妥議卽如此辦理可也四

月 諭曰山東運糧以濟直隸民食一事法敏請撥動倉儲李衛
意主委員收麥所見各有不同其應如何妥協辦理之處著該部
速行定擬具奏尋據部議法敏意在協濟李衛意在採買爲地方
籌畫未爲非是應令法敏遴選賢員將潔淨好穀十萬石交直屬
委員應用得 旨依議速行六月因南米重運糧船較上年遲延
一月有餘恐回空凍阻有誤冬兌借河東總河白鍾山請將東省
本年停運及已經回次之糧船通融接運卽令南船自東回次受
兌以免遲誤 上以法敏等籌畫通融接運之法於漕務甚有神
益卽照所請行又遵 旨議覆收穀捐監各事宜俟捐足一百一
十萬石卽行停止八月奏運河南高於臺莊北高於臨清惟賴疏

澄諸泉豫爲蓄儲以利漕運請將東省開河遇雨水調勻山泉旺發之時責令運河各官加意收蓄如值雨澤愆期河水淺澀卽設法疏導毋致糧艘膠阻均從之十二月疏稱東平州屬之清河窪南通濟甯北達臨清東昌爲往來要道三十餘里並無村落集場請於適中地方建營房十間於附近營內撥兵防守得旨允行四年六月兵部侍郎班第奏遵旨察審參革山東按察使白映棠貪酷縱刑並參革鹽法道楊宏俊勒派營私得旨白映棠劣蹟種種法敏身在地方不能覺察於前又不題參於後且自用爲巡撫以來全無整飭地方察吏安民之效而一味粉飾務外甚負朕倚任之恩著來京候旨八月授盛京工部侍郎十月命赴準

鳴爾北路軍營管理糧餉七年十月 命來京是年卒

右 國史館本傳



齊世武

齊世武滿洲正白旗人姓佟佳氏由廕生授內院主事遷戶部郎中康熙三十六年授山西布政使三十八年三月以太原府知府孫毓麟大同府知府鄭潤中倉庫虧空具詳巡撫倭倫兩經批駁轉令接任知府李成龍代毓麟捐補潤中亦不題參齊世武揭報部科請遣官察審上令倭倫明白回奏倭倫奏世武欺罔巧避處分命尚書馬齊往審倭倫復奏汾陽縣知縣李聯虧空庫銀萬九千餘兩並無分釐民欠署縣韓開藩代爲科派里民私徵銀四千兩有餘齊世武朦隱革審部議併案究擬七月馬齊審齊世武揭報屬實至開藩徵解民欠倭倫指爲科派題參布政使

議將優倫陞三級調用齊世武未聲明民欠降一級調用 從之
尋 命署四川巡撫三十九年因病回京四十年授陝西巡撫尋
調甘肅四十二年正月 上諭大學士等曰齊世武自授甘肅巡
撫屬官多被參劾署事竟至乏人其中有初任者亦有他官調用
者果有不法自當參處若祇小過則懲戒可耳三月又 諭曰甘
肅巡撫齊世武賦性褊急好行參劾凡爲大吏者當寬大和平正
己率屬宥其小過以漸訓勵使各勉爲循良豈可恣意以參劾爲
事時臨洮道王永義揭奏齊世武殘刻自用不恤民間疾苦奏入
齊世武已將永義不查屬官虧空糾參永義母朱氏隨以世武捏
害仇參叩 閹經川陝總督華顯奏將永義另案審結至蘭州一

路荒歉藩司六次詳請齊世武不奏致饑民逃亡屬實部議革職
因事在 赦前免議得 旨齊世武著降五級畱任四十七年擢
川陝總督四十八年授刑部尙書五十年正月 上命領侍衛內
大臣公鄂倫岱捕延慶州盜賊逃人令齊世武率賢能司官往審
尋審得李得功陳大額楚等分別擬罪七月刑部議山西民陳四
等聚眾搶劫其妻子各回原籍安置得 旨此案部議甚謬刑部
事件廢弛皆由齊世武等所致似此草率議覆溺職極矣著再議
具奏十月因陳四等曾經行陝西湖廣貴州等省有 旨召三省
原任督撫齊世武等 詰以縱容滋蔓各免冠引罪部議革職得
旨著降五級畱任是月 上諭諸王貝勒貝子公文武大臣等

曰今國家大臣有爲皇太子而援結朋黨者意將何爲也 問齊世武及都統鄂善尙書耿額並 示以都圖所具奏摺齊世武奏臣性不能取悅於人素無朋友不知都圖何仇誣臣此事臣並不知惟鄂善之母係佟氏以舅呼臣曾彼此延請 上曰齊世武乃最無用之人犬豕不如伊等如此齷齪之人援入黨內有何益處著鎖拏五十一年四月九卿議戶部書吏沈天生等勾通本部司員包攬呼坦和碩事例額外多索並受賄之原任刑部尙書齊世武等分別處分 上曰閱此本齊世武口供並未取入前曾奏云不與人往來不取一錢今於呼坦和碩事例受賄矣伊等見拘禁宗人府著王貝子會同刑部詳審嗣審明具奏得 旨齊世武自

幼與光棍結黨好爲爭訟行事粗鄙殊非人類見在別案審擬卽於別案完結五月大學士等覆訊沈天生一案齊世武受賄三千兩取供得實應絞監候得旨發遣伯都納九月刑部議覆左都御史趙申喬審明陝西知府陳宏道知縣姚宏烈互訐案內原任巡撫齊世武得受布政使伍實火耗銀三千餘兩屬實已另案擬罪應免置議從之雍正二年卒

右 國史館本傳

--	--	--	--	--	--	--	--	--	--

德明

德明滿洲鑲黃旗人姓卦爾察氏康熙三十七年由閒散考授兵部督捕司司務三十九年遷光祿寺署正五十五年遷戶部主事雍正元年晉本部員外郎三年晉郎中四年二月遷直隸布政使十一月擢山西巡撫 賜孔雀翎五年六月遷刑部尚書充律例館總裁官八年二月疏言外任各官交代錢糧皆戶部專司查覈以杜侵虧惟管理驛傳道交盤錢糧動撥款項雖案存戶部而交盤向不報覈因各省驛站供應夫馬糧料兵牌勘合均在兵部每年奏銷例由兵部覈覆止將餘銀數目知照戶部不無兩相影射請嗣後各省奏銷仍在兵部覈銷外其升轉離任交盤錢糧造具

四柱清冊送戶部覈對不符者卽行文駁查則錢糧得以歸一不
有官吏不得乘機舞弊又疏言臣部爲刑名總匯設立南北監羈
禁罪犯司獄係微員責成綦重今雖設滿漢司獄八員僅供收發
管束誠難一日虛懸凡司獄缺出部選遠省人員到任需時以致
員缺久懸請嗣後漢司獄缺出俱以人文到部之員掣補 命下
之日卽可到任至升遷之法滿司獄舊經臣部題定三年無過卽
升惟漢司獄必俸滿方准應升請漢司獄亦照滿司獄例三年無
過以應升之缺用俱下部議行五月調戶部尙書十年六月卒遺
疏入得 旨德明老成練達謹慎和平簡任司農正資倚任忽聞
溘逝深爲憫惻著加太子少保銜應得卹典察例具奏 尋 賜祭

葬如例諡端勤

右 國史館本傳

梨丹雪次頁改ノ所
卷ノ下ノ脚貳一十六

三

皇朝通志卷之二十一

三

楊秘

公諱秘楊姓字靜山奉天正黃旗人生有至性侍繼祖母疾衣不解帶至蠲緣領遊益敬十九歲知陝西兩當縣丁父憂再補直隸固安故事修永定河秋汛畢工興永定道黃某役不平價遲延及冬朝涉者跋瘞公憐之許日出後下纜黃巡工遲民之來將笞督公力爭不得乃直前牽其馬至凍漚處曰公能往民亦能往此時日高春陽光熏人公重裘尚縮瑟乃責袒肩者戴星來耶黃大悲適館張牒將劾公會撫軍安溪李文貞公過柳家口聞之召謂曰汝年少能然古之任延也勞以酒解裘衣之事得釋調宛平固安民以爲大戚聞宛平吏來迎驚聚而送之 聖祖獵水圍過固安

老幼爭畱公 上曰別與汝固安一好官何如一女子奏曰何不
別以好官與宛平耶 上大笑以爲誠許食知州俸知固安縣事
旋權柳平壽光諸城數縣有夏姓民競產餉銀五千公卻之諭卽
以此金遺若弟夏昆季泣於庭睦如初遷雲南曲靖府調麗江麗
江故苗地中甸外控鶴劍內鄰娼徒羯羶狼屯雜一旦隸爲編
氓如開洪濛守土者噤齟不旨往公到爬梳捐瘠俯順荒遵令日
樹一本榆畝畜一溝水召土官爲典吏諸里魁以頭目充除奴籍
建文廟定婚葬禮頒尺籍伍符期年俗化風雨和甘俟錢寶布大
行民祀公於廟號第一太守祠先是民間有遇木則易禾必見日
之謠土官土人皆禾木兩姓而公名姓恰合亦異數也遷湖南糧

道西安布政使署湖北巡撫河陽地濱湖淤沈無常田與糧離稅
法抗敝公手弓尺丈之按畝輸賦數無譌調撫四川奏減火耗改
馬廠爲普濟堂墾田千四百畝登租貯穀養鰥寡老癯乾隆二年
請撤河西七兒堡城垣忤旨罷官七年起用甘肅涼莊道尋遷
光祿寺少卿以老休於家公豐碩善騎射用弓至十石 聖祖時
東宮侍衛德齡以廢太子故逃恃其勇泛海至青州官拘者擁役
數十持械無敢前公往剡刺起屢忽抱其背磨之德抽刀公叱之
刀落於手 聖祖以爲日樞縛莽何羅不是過也涿州夜下鄉遇
響馬盜方洶洶劫人公射之殺二人獲一人督糧湖南秦際禽李
鐵背刺魚大王公偵知竄入旗丁故園岳州捕禽之案下至老神

明不衰長孫魁官江甯公來就養騎上下山如飛年已八十四矣
甲申十二月某日跌坐而逝公先娶李氏再娶黃氏俱 誥封夫
人子國棟官廣東韶州知府銘曰

仁之徵壽也福之集厚也清畏人知指屋漏也勇向好禮伏不圖
也雲之油油楚蜀覆也大臺南游神彌茂也望夏琬殷璜而增周
邦之舊也厥聲隆隆孫將父也天其以是鍾美於後也

右墓誌銘袁枚撰

被楊公東照三十
八年知向甯縣

謝珉

謝珉江南武進人康熙三十八年由監生選授陝西安塞縣知縣嗣遷貴州普安州知州五十四年卓異遷刑部員外郎五十七年轉戶部郎中雍正元年二月授江西贛州府知府六月遷湖南督糧道三年遷湖南按察使丁父憂六年服闋署河南布政使七年七月擢太常寺卿仍署布政使時田文鏡爲河東總督奏稱珉實心任事 諭曰謝珉乃聰明人但嫌其欠篤實耳以卿爲其上官而又見被朕恩眷最隆伊思己之優劣臧否定於卿之一言因此而暫勉一實字與卿看則離卿獨任時必不能堅持初志毫無改移當不時勸誠以成全之閏七月 命署江西巡撫十一月疏言

謝珉 欽定四庫全書 卷六十七 謝珉二十六

臣

前任撫臣張坦麟請以鹽規及浮韻二關平餘銀爲各官養廉州
縣官於加一耗羨內扣畱查各州縣糧額不一耗羨隨之今令照
糧坐扣多者至千八百金少者至四百餘未免懸絕應分大中小
三等糧多地衝者爲大縣給養廉千二百糧多地僻及糧少地衝
者爲中縣養廉千糧少地僻者爲小縣養廉八百道府各員酌照
增減佐雜等官每員六十於司庫公費內支給疏入 上嘉納之
十二月疏言九江府界江南安徽湖北最易藏奸請以駐饒州之
饒九南道移九江專司稽查 從之八年六月遷大理寺卿仍署
巡撫事疏言進賢永甯永豐定南各縣倉廩不敷積貯請動正額
錢糧增建如所請十一月 諭曰向觀謝珉爲人聰明見事明白

但恐不肖實心任事祇圖自潔其身今見伊署理巡撫以來所奏陳辦理之事俱屬妥協著實授江西巡撫九年二月疏言江西十三府向各有道員兼轄嗣經裁併祇畱督糧驛鹽贛南饒九南四缺其無本管道員者八府守令無所稽查請以南昌建昌撫州三府歸督糧道瑞州袁州臨江三府歸驛鹽道廣信府歸饒九南道吉安府歸贛南道各令就近兼轄換給關防以專責成又言江西棚民前奉 恩旨入籍二十年以上有田糧廬墓者准應試年來讀書者愈眾年例符者亦多應准一體應試文武童生滿五十人額外取一名以次遞加率不過四名若人滿五十令與本籍童生同考俱下部議行三月疏言吉安廣信二府屬皆有永豐縣文移

易混請以一另改嘉名部議改廣信之永豐縣曰廣豐先是珉以江西地溼米難久貯奏言截畱積貯漕米十萬石已糶者照一米二穀買補還倉如價有餘一併買穀未糶者亦易穀分貯各府州縣至是請於臨江廣信南安撫州等府增建倉廩下部議行十一年二月疏言江西銅少從前收買銅器鼓鑄已完請暫停從之三月疏言江浙米價騰貴商販絡繹至江南米價日增貧民艱食請以常平食穀並易漕穀石無拘糶三之例令各屬糶賣十之四五統於秋成買補得旨因時制宜酌量爲之六月大庾南康峽江清江等縣水災珉支贛關義倉穀賑濟並委員撥銀接賑疏入得旨加意撫恤不可有名無實十二月授工部右侍郎十二年

九月接任巡撫常安以吏治廢弛官糧逋欠營伍曠廢竊賊眾多
疏劾珉 諭曰謝珉本一司官之職朕思其有辦理諳練之名不
次擢用簡授江西巡撫乃伊到任以來一切辦理及奏請事件瞻
徇模稜虛偽不實是以降旨內用侍郎再加試看今據常安奏稱
伊在江西任內種種玩愒之狀不可枚舉著革職嚴審定擬具奏
十三年法司會鞫得實依律擬斬又以常安續劾珉侵蝕關稅資
緣餽送及先侵後吐等款堅不承認請將珉解交總督趙宏恩質
審後解部監候 從之乾隆元年 恩釋回籍十六年卒

右 國史館本傳

The image shows a large, empty table with 10 vertical columns and a header row. The table is oriented vertically on the page. The header row contains Japanese text: 一ノ宮 (Iinomiya), 二ノ宮 (Ninomiya), 三ノ宮 (Sannomiya), 四ノ宮 (Yononomiya), 五ノ宮 (Gonomiya), 六ノ宮 (Ronnomiya), 七ノ宮 (Shichinomiya), 八ノ宮 (Yachinomiya), 九ノ宮 (Kunomiya), and 十ノ宮 (Jūnomiya). The rest of the table is empty.

一ノ宮	二ノ宮	三ノ宮	四ノ宮	五ノ宮	六ノ宮	七ノ宮	八ノ宮	九ノ宮	十ノ宮

國朝音獻類徵初編卷六十七目錄

卿貳二十七

楊永斌

牛鈕

馬會伯

魏方泰

子定國

楊汝毅

沈近思

卞永譽

補錄

楊永斌

國朝音獻類徵初編 卷六十七 卿貳二十七 目錄

國朝耋獻類徵初編卷六十七

通奉大夫前署江西巡撫江西布政使司布政使湘陰李桓輯

卿貳二十七

楊永斌

楊永斌雲南昆明人由舉人於康熙四十五年授廣西臨桂縣知縣丁憂服闋補直隸阜平縣知縣六十年調大城縣六十一年因緝犯不力革職雍正元年二月 詔復職七月遷涿州知州三年奉 旨楊永斌才守俱優著授貴州威甯府知府六年遷貴東道七年擢湖南布政使九年四月調廣東布政使七月以前威甯府任內隨征米貼逆苗議敘軍功加一級十月疏言律禁鐵器出洋

近因廢鐵可鎔製兵械一體嚴禁惟鐵鍋尚准洋船貨賣臣查出
口船少者百連多者千連每連二十斤一經鎔鍊器械無不可爲
請照廢鐵例禁 諭曰此奏甚是足見留心地方庶務十年三月
署廣東巡撫五月疏言水師戰船全賴旋纜維繫聞浙省每船設
旋三門遇風浪三門並拋船藉安穩又簾纜易脆裂不若櫻之懸
固粵省外洋船艍拖風各船旋纜多不畫一請增旋三門盡改櫻
纜又言粵東不乏可墾之土而民間不勤稼穡致米價昂貴臣仰
體 皇上重農至意飭屬勸墾其高亢不宜禾稻者令樹藝豆麥
山麓偏坡亦酌栽所宜木植至惠潮兩府向多獷徒見招墾大官
田荒地免蹈法網所墾田成熟後歲可得官租千餘石歸粵秀書

院爲膏火均得 旨嘉允九月實授十一年疏言粵東省城商船雲集俱在南海縣屬之佛山鎮貿易距縣治五十餘里鞭長莫及向設五斗口巡司一員職微不足彈壓請改設同知其巡檢移駐平洲堡巡緝 詔如所議行十二年五月疏言教官與諸生最切近平時不加訓迪徒以無優劣具結塞責遇生監有違犯經府州縣審出則補苴劣行巧爲掩飾請嗣後有似此者以濶職糾參如三年內能使生監並無過犯或隨卽據實詳報准予題升九月疏言臣遵 旨勘明可墾地六千八百餘頃此外或山深箐密或夾沙帶鹵體察民情不但懼費工本兼恐磽地薄收糧賦無出臣思瘠田產穀雖少若多墾數十萬畝年豐可得數十萬石卽年歉亦

國朝通志卷之二十一
必稍獲於民生實有裨益宜多方勸導以盡地利查廣東省惟新甯縣糧額內有斥鹵輕則一畝徵銀四釐六毫四絲米四合二勺六鈔仰懇 聖恩凡承墾磽瘠之地樂准以斥鹵輕則輸糧卽給照爲業十年起科混冒按律治罪庶沃壤不致冒承輕則而磽地亦知田糧易輸阡陌自廣均下部議行乾隆元年六月疏言揀選題補人員例限一月查取印結不能於一月內辦理或具題後補取印結送部又徒爲具文請刷後揀選升調人員卽於該管上司季報冊內摘取政績考語入奏毋庸展轉取結致逾定限至題報丁憂病故亦請以題咨開缺之日起限一月揀選調補九月疏言大清會典開載凡買田地房產例用布政使契尾後改用契紙

今契紙已革而契尾未復臣思契尾係投契時官爲印給不同契紙另需民間價買滋擾請仍舊例由布政使編發各地方官黏民契後鈐印給發每歲奏銷時將用過契尾數目申報藩司查考其稅銀如有盈餘仍令儘收儘解庶民無觀望而官吏侵收與奸民捏契之弊可杜部議如所請行二年三月調湖北巡撫九月調江蘇巡撫三年四月疏辦松江太倉所屬塘工五款一奉賢南匯上海寶山四縣因築塘取土成渠雨積既漫民田又易浸損塘根臣親勘形勢開河一道南接華亭運河北達寶山高橋卽以所起之上培築塘身並設木橋利濟一華亭金山嘴地方偏臨洋面外有金勝三山脊峙海中潮勢直射塘腳雖於內築排椿石壩不足以

資捍衛請從外廢塘缺口處增築石壩南接舊塘爲重門保障一
華亭縣外護土塘內倪家路一帶形勢灣兜納潮受衝亦屬險要
舊塘宜加寬厚一寶山縣西浦見加築土塘自姚家墳至城東一
帶雖係險要然塘腳日漸漲沙可保護毋庸興築石坦坡惟楊家
嘴礮臺處正當東北海洋潮勢衝險請將礮臺移築百丈內卽舊
基改石塘三百丈一江南沿海最險之工莫如寶山請建海神廟
虔祀恭請 皇上御製碑文扁額垂永久部議 從之五月 諭
曰楊永斌久膺外任聲名素優是以用爲江蘇巡撫近聞伊年將
七旬精力不逮難勝繁劇之任著來京醫禮部侍郎事務十月授
吏部右侍郎四年因病乞休 命以原品休致五年卒孫瑾官浙

江按察使

右 國史館本傳

滇南山水崎嶇甲天下余嘗有事於其閒意必生閒世偉人出其
才華以黼黻上理否則建非常之業以翊佐乎休明前此未之聞
也風塵中得一人曰陟山楊公公守黔中與余論開疆撫夷諸事
輒多奇中自時厥後公且建牙東南入爲卿貳曾日月幾何而公
已下世余亦忽忽將老矣其遺孤萬里上書於余曰先王父旦夕
窀穸懼生平行實不傳也然先王父受知於公二十稔矣願得一
言以納諸窆余揣無以張公也惟敘所知以傳焉公諱永斌字壽
廷陟山其別號也先世江西贛州府甯都縣人自始祖辛明初南

製明書狀類聚初編

卷六十七 卿貳二十七

四

征授武略將軍遂家昆明世襲千戶六傳之秉元歙縣令八傳之
崇德定遠縣學博崇德生文學順成順成生文學寓乾是爲公考
後以公貴三世皆 贈資政大夫公考故遂學滇亂隱於岐黃術
活人無算以孝行崇祀三綱祠生子二次景斌邑廩生長卽公也
誕彌厥月有奇瑞生四歲太夫人陳卒鞠於祖母姚年十八補博
士弟子員丙子食餼己卯登乙榜兩赴春官不第就四省效力例
授廣西臨桂縣令以艱歸再起直隸阜平令宰阜七年調大城令
以吏議落職當 世宗憲皇帝卽位復公大城令旋擢涿州牧不
一載擢守貴州威甯府方余之節度南中也與公相遇軍書旁午
閒余初未有奇公及臨事周諮有司雜選諸郡訥訥然無所建白

公亦未嘗標異於眾退而陳是非辨利病若燭照數計而龜卜也若鶴輕車就熟路也然後知公寓精明於渾厚之中者殆瀕黔第
一人歟余深爲地方慶亟薦公於上而上已嚮用公遂進公
貴東道糧驛副使權責西道及按察使更進湖南布政使調任廣
東遷巡撫撫粵六年今上龍飛命兼攝兩廣總督入覲改撫
湖北兼攝湖廣總督移撫江蘇旋召入都署禮部侍郎更授吏
部右侍郎以年老請於朝致仕嗚呼以一縣令歷三十年而位
列少宰不可謂不貴矣吾見賢士大夫自有司而起莫不身歷民
閒備悉閭閻疾苦而其身亦幾經盤錯可任矣當艱鉅之投斷未
有隨眾苟容而不拔於風塵之表者也況公之才智有大過人者

始公宰臨桂宰阜平宰大城皆有神君之號後以捕內監陳進忠
爲居奇搜之吏議遂罷職公弗爲辨也卒邀 上知而得白及將
赴威甯 召見養心殿 溫語移時 賜賚無已威甯與烏蒙鎮
雄鄰土司不靖余檄公與武弁行視邊疆公單騎馳入撫慰而出
烏蒙米貼之役以公贊軍務多所咨畫卒定兩府比在楚南六里
頑苗爲患公建議請撫果不煩一矢而定其因地制宜如此初粵
東文武羣僚相牴牾黨援門戶之風未能盡滌故 上特以公自
藩進撫公一洗從前之陋坦衷共事人無不盡其情而宦習爲之
易粵之爲地山海環焉土不加闢而生齒日繁商賈輳集逐利如
鶩無業者挈妻子入蜀就食狡者則流而爲盜出沒海澨捕者莫

誰何也公行察疆土勸種植獨墾大官田歲入官租資粵秀書院
膏火定程訓士文行交修鶴山恩平諸屬覈墾至數千頃復以斤
鹵之餘猶堪藝稻乃請於 上出示境土招集流民績得百一十
餘萬畝給牛種禁豪右侵漁俾有恆產輕賦而緩其徵無業者樂
就近地以自給曲江乳源向盜藪也公檄監司親入山中宣化愚
蒙眾悉引首待命招之使降又從而撫字焉其梗者捕而置之法
盜遂息先是粵洋地接洋人在粵開天主堂習述爲奸洋舟來泊
會城粵民爲之煽惑各廢本業公奏 聞而驅之澳門洋人遠而
粵民安肇自公始也嘗上積貯墾田捕盜安民十餘疏皆采 世
宗硃批諭旨書中攝制府則舉落地漁船埠稅與海關之耗規分

擔諸羨餘以數萬計悉奏汰之及自粵入都 今上召見 南書
房 賜坐 賜茶 賜克什 賜宴 賜御書三十卷 賜御馬
鞍轡各一乘自 午門而出 榮寵之賁皆以公老成練達故也
洎撫楚嚴保甲繕城堡課農桑增社粟除巨猾興學校井然有法
其治吳也賑治淮修隄漁民豁高洄馬場賦躬履松江太倉塘工
濬河增壩爲經久計凡實利於民者以次興舉後官其地者多所
取法而民用大和 上方倚公爲重欲使公待漏巖廊修顧問密
勿之參指日可卜而公以貳卿求退疏再上乃 給假還里 陛
辭日 諭畱再四不獲 命盤道經藩庫閱滇省兵亟專奏余時
奉 命查勘運河舟次淮上與余相見述往昔相得之歡未嘗不

歎羨公功成身退容與自如也乃歸未二年而公卒嗚呼公殆近世任事之臣歟方 朝廷講求治安得公輩數人擔負封疆之責 天子獲端拱穆清而成化跡公生平所爲豈復齷齪齷齪行故事而已哉公少事祖母與父及繼母最孝兩叔父寓坤寓泰失怙而幼公爲之畢婚媾籌家計弟早逝鞠育其二子文賜文河成名性甘淡素圖書之外他無所嗜其在林下也猶冀其出以經濟翊佐休明不謂拙簪林壑忽抱春相之哀而余尙戀笏紳無由結九老之社則余感慨係之矣公生康熙九年庚戌七月初七日亥時卒乾隆五年庚申十一月十八日亥時壽七十有一階資政大夫配夏袁皆 封夫人子二長文錫歲貢生候選府通判先公卒

次疇錫孫四長潮以廕將爲京朝官未分部卒次瀆廕生候補主
事次清國學生次浩以乾隆十年十二月初九日將葬公於黑龍
潭五老山之陽乃繫銘曰

井鬼之區萬峯萃輝應有偉人峻嶒鐵骨爰降我公筮官西粵報
績在燕于涿于黔明明 天子畀爾藩宣華轂闐闐大旆翩翩尹
茲東土千里幅員溫而春煦肅則秋虔洞庭之浦胥江之澗持節
而前于時處處乃作司徒乃作卿輔 天子曰來計弊羣吏公曰
臣襄滯詞求致終不可爾竟成厥志天外菟裘巨源所憩杳邈林
泉高人條逝文采在天事功在世蔥鬱佳城尙利爾嗣松柏丸丸
幽扁長閭悼更苦徵斯人不易

右墓誌銘鄂爾泰撰

公姓楊氏諱永斌字壽廷雲南昆明縣人康熙三十八年舉人四
十一年援例發廣西補臨桂縣知縣以廉能愛民稱遭喪去職百
姓送者號泣塞路服闋補直隸阜平署平山改大城六十一年用
捕內監陳進忠事落職民泣額巡撫保畱疏上雍正元年二月
詔復官先是一日 上顧內侍籍大城者問曰縣令楊某居官善
否對曰不善其爲政嚴有犯必懲人皆自危 上於是知公果賢
遂有是 命七月遷涿州知州居二年 上問公於總督李維鈞
維鈞以迂執對 上問故對曰鹽典商規不受斃盜不以聞 上
曰信如是良吏也數日擢貴州威甯府知府 召見 溫語嘉獎

威甯介滇蜀與烏蒙鎮雄鄰二土府夷人不靖公至以奉檄分界
單騎入烏蒙夷巢撫慰之而密遣人僞市賈分道圖其地形歸鄂
爾泰公總督雲貴公進謁鄂公曰 上任君威甯責望重君知之
乎公因言二土酋不懲終爲邊患出懷中圖進鄂公喜問計公曰
烏蒙祿萬鍾年幼諸土司未附圖之此其時矣請毋曠日勞師但
發威甯畢節兵壓境馳書諭以川督劾萬鍾不職奉 命質審萬
鍾出他不問否則兵疾臨之烏蒙平鎮雄勢孤必乞降不一月二
府定矣鄂公從之召萬鍾不至令遊擊哈元生及公進討萬鍾遁
烏蒙遂降鎮雄隴慶侯亦請納土凡三十三日而兵罷六年米貼
土婦陸氏叛官軍四集公語總統哈元生日賊以冕山巴補爲後

路事急則渡金沙江而逸當以重兵扼其前奇兵越江攻之迺可殲也元生從之克獲如其策鄂公疏薦公可大用遷貴東道改糧驛道署按察使朝臣有爲畝稅軍田議者部檄下公上書鄂公言議者以天下軍田皆官田給屯軍耕非民業比且畝稅銀五錢不爲苛不知軍田糧以屯租爲準已數倍於民田民轉相授受與交易民田無異又畝稅之是重科也民必不服且前代設軍田邊方尤多黔省軍田稅以數十萬計有司徵比踰正供當多事之秋更爲民增剝膚之患驅之爲亂耳鄂公卽以其議聞而黔滇軍田並得免七年擢湖南布政使始至湖南方以軍田計畝丈未定胥吏四出公援例請皆獲免焉九年改廣東十年署巡撫旋實授粵

地多山雖瘠可耕濱海斥鹵可藝稻民俗逐末趨網罟利公徽州
縣覈曠土得六千八百餘頃因疏言瘠田雖產穀少若多墾數十
萬畝即可獲數十萬石歲歉穫薄亦資養人免飢驅爲盜宜多方
勸導以盡地利 上嘉納焉於是墾田百十八萬餘畝以贍無業
者方公 陸辭時 上以粵中文武大吏牴牾門戶黨援未絕
諄諭及之公坦懷接人虛己集事僚屬翕服宦習遂變獲劇盜余
猊陳美倫數十輩寘之法諭曲江乳源諸崗猺歸化而劫竊之患
絕以西洋天主堂習爲奸驅之澳門令番船不得泊省城下煽愚
民西人數十年不近廣東省城自公始也乾隆元年兼署兩廣總
督值 上命除落地稅因請併免漁課埠稅除粵海關贏餘兩例

未盡汰者 詔皆從之二年三月調湖北巡撫兼署湖廣總督九月調江蘇三年五月 上以公自陳衰老召署禮部右侍郎十月授吏部右侍郎四年三月因病乞休 命原品致仕五年卒年七十一公受 知兩朝平時 寵賚不可勝紀自粵入 覲 召對 賜坐及茶宴 御書 御馬鞍轡各一乘自 午門出時人榮之孫滢官浙江按察使後裔以文學科第世其家勿絕其六世從孫基善以祖徙湖南爲黔陽拔貢與余友善乞爲其家傳

前史官王先謙曰方公以鴻漸之翼沈抑下僚內侍不足道彼總督者迺不知潔身除暴爲良吏非 天子聖明烏能伸其志乎公卒鄂公志墓推爲滇黔第一人其事久知公深也烏蒙今爲雲南

昭通府鎮雄爲州米貼今永善縣云

右家傳王先謙撰

牛鈕

牛鈕滿洲正白旗人姓他塔喇氏由官學生補工部筆帖式康熙三十九年二月武清縣筐兒港水決工部尙書薩穆哈遵 旨派賢能司員筆帖式監修以牛鈕監築減水壩六月補本部主事五十年二月 上自和韶乘舟閱工 諭於引河前岸及減水壩前各增壩一於三里淺挑水壩下各增壩一俱長三四丈 上至河西務登岸步行二里許 諭牛鈕曰濟河不礙村落方善復 指示曰此沙地作濟河寬十丈長四百七十餘丈平坦處深四五尺高阜處或七八九尺不等其河灣處著建小挑水壩二瀆河之土卽置兩邊對新河上口舊河下流著建挑水壩二高與岸等於是

取儀器置地 親視方向 命諸皇子大臣分釘椿木紀丈量處
交牛鈕監修三月遷本部郎中五十九年擢左副都御史尋 命
總督北運河事務六十年九月河南武陟縣馬營口河決 上以
牛鈕請練河工 面授方略偕侍講齊蘇勒往堵築十月以巡撫
楊宗義與河督趙世顯互諉不亟備料奏 敕宗義專其事牛鈕
恪遵 聖訓在釘船幫興工十一月工竣奉 旨詳勘河工自孟
津起至清口止以儀封縣白家樓虞城縣黃垆壩徐州以上碭山
縣定國寺及胡家樓徐州以下長樊大壩五處應挑引河邳州董
家堂宿遷縣太古城桃源縣七里溝三處應建挑水壩奏交署河
督陳鵬年督辦六十一年二月直隸長垣縣常村集隄南水勢暴

漲趨山東濮州等處 遣牛鈕順道往勘會黃河積凌水發馬營
口復決牛鈕馳還武陟同宗義於秦家廠堵築六月奏言秦家廠
攔河壩自三月興工擇於本月初五日合龍初三日大雨水漲所
留水口稍狹兩邊壩臺蝕陷二十七丈幸埽固未動已屬楊宗義
備料趙修臣以大雨時行通州運河亦屬緊要卽避 旨回京
諭宗義速行堵築先是牛鈕議於黃河北岸自沁河隄至詹家店
十八里無隄處接築遙隄以資捍禦宗義以沁黃並漲時水無所
洩恐致衝決不若仍留空隙備宣洩雍正元年正月河督陳鵬年
奏見在河勢飛趨較前情形不同無隄攔束亦屬可虞請如牛鈕
議 從之七月遷兵部右侍郎八月疏禁官兵人等服用五爪龍

下部議行二年七月疏言江甯杭州荊州京口廣州福州等處駐防兵請令習水師部議江甯等處俱係防守地方並無戰船未便學習惟京口見設戰船應如所請令將軍選兵二千操演得旨允行十二月調禮部右侍郎三年二月因遲延應奏事件降三級調用七年三月覺羅巴哈布首牛鈕監修筐兒港隄工時索其金三百銀一千四百兩宗人府傳詢牛鈕抗不赴諭曰牛鈕貪婪無恥其嚇詐之處甚著人所共知乃宗人府傳喚數次抗不前往甚屬可惡著革職拏交刑部治罪尋議照枉法婪贓擬絞監候從之八年正月北運漕書韓濤議築減水壩以待郎何國宗督修諭曰原任侍郎牛鈕在北運河管工年久於地方情形甚爲熟

練爾等可會議料理斗鈕卽借何國宗抵海口湖引河而上估計
工料條議以聞得旨作速料理少有遲誤疏虞惟何國宗是
問一應動用錢糧與斗鈕無涉著何國宗一人察覈工竣回京乾
隆二年七月卒

右 國史館本傳

馬會伯

馬會伯甘肅甯夏人康熙三十九年一甲一名武進士授頭等待衛四十五年授直隸昌平營參將四十八年遷通州副將五十年調湖南衡州協副將五十三年調雲南督標中軍副將五十七年擢永北鎮總兵五十九年大軍赴西藏進剿策零敦多卜 詔會伯與總兵趙坤統綠旗兵往會都統法喇軍十月西藏平敘功加十等予左都督銜雍正元年十一月入 覲 賜御書有儒將風扁並貂冠花翎時其從弟覲伯任山西大同鎮總兵統兵駐甘肅命會伯往署鎮事 賜白金五百兩二年正月回永北任三年三月擢貴州提督十月疏言黔省土瘠兵貧臣捐穀千石四營將

備捐千石貯俟青黃不接時濟兵食秋後還倉來歲秋收臣等再捐二千石 上善之先是廣順州屬長寨等處狃苗性獷悍川販李奇等爲主謀焚掠無忌總督高其倬奏移大定協弁兵於長寨等處設汛公防至是建營房狃苗糾眾抗阻會伯偕總兵石禮哈搜剿擒首惡阿革阿紀李奇等誅之脅從苗詣軍前乞命諸寨平會伯復馳赴長寨宗角者貢谷隆關羊城壘查勘督建營房得旨嘉獎優敘加三級四年三月調甘肅提督未至 命署四川提督旋授四川巡撫五年正月疏參按察使程如絲營私網利 命侍郎黃炳往審得實治罪如律四川巡撫衙門向有稅規耗銀三萬九千五百餘兩會伯飭令稅口儘收儘解併入正項富順縣向

發墨票販賣私鹽巡撫歲收規銀一萬四百兩會伯革除請增引課以布政使繳條鞭耗規銀六千六百餘兩按察使繳鹽茶耗規銀六千五百餘兩榮經縣茶規射洪遂甯蓬溪南部雲陽五縣鹽規銀五千六百餘兩畱爲巡撫養廉及犒賞用奏入報 聞又言清查隱糧八條一朋名納糧之田宜分界立戶一紳衿大戶宜令倡首增糧一糧戶令認墾荒田一爭控田地按名丈量一土棍挾眾阻撓從重治罪一道府不善董率嚴加處分一州縣衙所優劣分別勸懲一委員協理以期成效五月調湖北巡撫十一月疏陳刑名四條一盜賊宜勒限追贖償事主直省盜賊賊起獲甚少徒有追贖之名地方官任意耽延請嗣後獲盜審實卽籍家產變價

代賠有窩家者照例將窩家財產一併賠補取具事主領狀報部
一捕役帶盜投首不准寬減查盜犯聞捕自首審無爲首殺傷例
得減罪二等而捕役帶同投首焉知非捕役畏比將平日豢養之
賊教供抵數或正盜獲後賄求捕役捏爲自首請嗣後槩不准寬
減仍將捕役治罪一誣告人命不得輕准和息凡刁惡之徒挾嫌
索詐每借人命捏告被誣人畏累議和得遂所欲具呈求息請嗣
後地方官立即審明照誣告人死罪未決擬罪不得聽其和息一
洗冤錄宜重加校閱人命全憑檢驗傷痕而傷痕常有疑難定例
州縣額許件作名給洗冤錄一本令其學習今洗冤錄翻刻多誤
請 敕部將原本校訂刊頒令臬司轉發州縣詳覈定擬以成信

謙下九卿議行六年十二月疏言沔陽州幅員遼闊州南鍋底灣外連大江距城百三十餘里稽查難周州屬新隄鎮見設守備一把總一分防通判一巡檢一共駐一處請將巡檢移駐鍋底灣以資巡緝下部議行七年四月 命往肅州辦理西路軍需代理肅州總兵印務 諭曰此任朕屢經斟酌委用滿員恐與岳鍾琪掣肘委用文吏則能諳軍機實心任事者甚少再四躊躇然後委託於汝慎勿有辜任用十一月擢兵部尙書仍辦理軍需兼管肅州總兵事八年六月 諭曰馬會伯辦理軍需以來諸凡推諉貽誤措置顛倒著革職仍令署理甘肅總兵事務效力贖罪乾隆元年卒

右 國史館本傳

魏方泰子定國

公姓魏氏諱方泰字曰乾江西廣昌人也康熙甲子舉於鄉爲選
首庚辰成進士選庶常韓公慕廬掌院事數爲余道公學行時諸
翰林以韓公故多索交於余間與公相見稠人中未嘗以言語顏
色相親因是心重公及乙未西事興領軍餉者四人而公與焉眾
皆詫公文儒沙場萬里行宿鮮人煙數攻剽言者皆爲色懼而公
恬然及出塞結隊安營號令明肅撫循徒旅人忘其勞反役人畜
鮮傷耗什器無遺亡自是以後領運者六事集而人皆便之蓋公
自散館後卽召入南書房旋命侍瀆親王講誦聖祖已審
知公之爲人故自翰林改官通政司蓋信公可屬以事久矣於是

天下士始謂公之底蘊不可窺尋而歎 聖祖之知人善任使也
公爲檢討主山東鄉試觀學滇南擢侍讀改通政司參議復主試
閩中教習壬辰科進士士聞公誨諭多勵學自檢於躬行其在滇
南與撫軍劉公蔭樞善還中朝大農趙公申喬數稱其廉公 世
宗憲皇帝登極擢太常卿遷正詹事乙巳夏以本職攝內閣學士
尋遷禮部右侍郎嘗 正告廷臣曰如朱軾張廷玉沈近思魏方
泰朕保其終無二心人皆意公將繼武於朱公而公以年滿七十
力陳衰疾重聽秩宗典禮雖虔恭將事終憂隕越 溫旨許之嗚
呼公之不敢賴寵 先帝之篤信忠良又能曲體其情而不強以
仕皆可以感人心砥維風教使奕世聞而興起者也公襁褓失母

終身哀慕序譜牒建宗祠置祭田恤族屬孤貧延及朋友鄉人式
之好讀書造次不釋往還絕漠每至挈轡令舍馬瘖僕吁公部署
既定卽端坐吟誦神氣灑然同行者皆心服焉公得告時子定國
爲直隸按察使就養於保定其歿也會定國以同官罣誤繫獄尋
謫黑龍江窀穸猶未營及 今皇帝嗣位特召還京起署陝西
安按察使而夫人李氏亦歿矣請歸葬然後之官 詔許之乾隆
三年冬以狀來請銘余與定國同年友也謫而歸始相見於旅舍
然以道義相許有素矣乃爲譜其世家魏氏蓋了翁後也元初卜
居南城之魏坊繼遷於廣昌支分爲三長居其竹季居甯都次居
株橋公其裔孫也累世素豐鼎革初鄉里山賊數起邑中善良避

賊保水斗山守將利其有將屠之公之父明之素與相識馳見之
給令箭曰保爾家無虞泣曰某居別山非爲吾家來也此砦中皆
良善不忍其荼毒耳守將拒以強詞色甚厲乃括家財持千金爲
壽曰砦中父老所有盡此矣必破砦勿淫勿殺又以五百金賂其
左右於是兵入眾皆安堵及公旣貴定國繼之子姓繩繩鄉人皆
曰此乃祖乃父積善之慶也曾祖諱沈國學生鄉飲大賓承嗣祖
諱復禮父諱菁 誥贈通議大夫祖妣孫氏妣何氏生妣陳氏俱
贈淑人本生祖諱復禮妣李氏以定國及妻 封妣贈如其官
階公卒於雍正六年四月年七十有二配李氏卒於雍正十一年
三月年七十有九 誥封淑人以乾隆二年 贈夫人庚午公在

京師贈公卒於家夫人備禮致哀族姍皆爲感動以乾隆元年四月二十六日合葬於南城魏坊子三人長定國康熙丙戌進士次寶國康熙甲午舉人雲南永平縣知縣次安國早殤女四人皆適士族孫七人舉於鄉者三銘曰

美仕榮祿遭遇適然惟賢惟德其兆必先魏宗三支甯都學頌公務質行身依文典望比於鄉勤施於國眾信其誠士馨其德象賢有人忠貞世宣是父是子 帝有明言明之澤近華父光遠於萬子孫先型毋覲

右墓誌銘方苞撰

魏定國

魏定國江西廣昌人父原任禮部侍郎方泰定國康熙四十五年進士五十二年選授湖北應城縣知縣五十八年升直隸冀州知州雍正二年升浙江杭州府知府三年浙江巡撫福敏奏稱定國操守好辦事勤敏詢之合屬官民皆無異論臣所深信不敢隱蔽報聞四年三月超擢河南按察使十月調直隸按察使五年六月諭曰各省所報雨澤俱各調勻惟直隸雨水不時此必因刑獄不得其平之故按察使魏定國操守朕所深悉恐其於案件或有不明之處嗣後凡有關係民命重大案件著布政使張迺協同辦理十月大名府知府會逢聖以虧缺庫帑被劾上以逢聖任畿輔有年賦款必多命總督藩臬等轉諭所屬被屈受害者許

據實控告時吳橋縣生員竇相可控逢聖在吳橋時貪劣各款布
政使張适和護逢聖夾斃相可與定國詐稱監斃六年 上察知
之 命吏部尙書福敏戶部侍郎史貽直往訊 諭曰魏定國專
司一省刑名乃任張适恣意妄行全不置問及朕面加詰責則將
顛倒是非草菅人命數案全推於張适而置身事外若然則直隸
之設立臬司者何爲朕之簡用魏定國又何取乎尋福敏等鞫實
适定國擬斬 諭曰張适係原任大學士張玉書之孫旣負朕恩
並不念其祖父肆意妄行本應置之重典但朕念張玉書一生謹
慎效力多年著將張适從寬免死發回原籍令地方官嚴加管束
不許出境生事令其出銀一千兩給竇相可之家魏定國身爲臬

司專掌刑名乃將人命重案推卸他人而置己身於局外及朕面
加詰問則以未曾許其奏摺爲辭奸險狡獪莫此爲甚朕屢降諭
旨凡大小臣工於職分當爲之事推諉觀望者法難寬貸魏定國
係州縣微員朕不次加恩擢用臬司伊一味瞻徇並無報效之處
而奏對時亦並無感激之心其罪本無可逭但張迺旣已寬免魏
定國亦著從寬免死發往黑龍江當差十三年九月 命來京引
見十二月 命署西安按察使定國以前成黑龍江時丁父憂未
得躬親治喪乾隆元年正月奏請回籍終制 上以魏定國服制
已滿與在任守制者不同給假四月回籍以盡人子之心再赴西
安按察使任二年疏稱孤貧口糧一項請 敕下直省督撫嚴飭

各州縣遇外來流丐察其聲音詢其住址卽移送本籍收養令各保甲將實在孤苦無依者呈報州縣官除驗補足額外有浮於額數者亦收養院內動支公項散給口糧部議如所請十月實授五年正月升山東布政使閏六月以山東疊遭歲歉民力未紓倉儲亦多未足前經巡撫碩色奏請令外省在山東貿易者聽其納穀捐監俟五年十一月一年限滿停止定國疏稱奉文以來並未報捐一人請展限一年從之六年十月以山東地方被旱成災奏請將從前運往直隸碾米補漕等項應買倉穀三十萬餘石停俟明歲採買上是之七年三月署山東巡撫四月奏請行令直隸等省分別查明恩旨以前到配徒犯放回原籍軍流三年無過

請 旨釋放 上飭其甫護撫篆卽欲以弛刑博寬大之名四月
調安徽布政使六月以前署山東巡撫任內奏登萊青三府倉穀
過多霉變堪虞請分撥府屬各州縣收管至是得 旨允行七月
命署山東巡撫包括查定國任內公事有無沈閣並一切關稅
有無私弊尋奏定國實無營私誤公情弊報 聞十年四月升安
徽巡撫七月奏言上江所屬鳳潁廬六泗滁等府州盜劫時聞請
嚴定功過酌立賞格令廬鳳道爲總緝並選幹練州縣官數員分
辦除獲本境盜犯毋庸記功外有獲鄰境盜首一名者記大功一
次從盜記功一次積匪搶奪等賊犯兩名記功一次如有玩縱卽
行題參至安慶沿江一帶亦照此辦理得 旨觀汝所辦尙屬過

於賞而薄於罰賞重而罰輕將來反致不賞則不緝盜此不通方之政也十一年二月 上以安徽宿州等處多盜定國未必能辦理此事 諭兩江總督尹繼善加意緝捕時安徽按察使都隆額奏請酌借社穀修濟陂塘下兩江總督安徽巡撫議奏定國偕尹繼善覆奏社穀藉以補助向不移爲別用陂塘應民力自修如槩許按畝指借則穀少處旣難徧給充裕處亦滋冒濫陂塘未收利益倉儲先致空虛臣等酌議應令州縣官躬巡境內凡陂塘疏濬寬深增修隄埵勸民廣爲興舉儻遇旱澇或窮民自爲耕作並無業戶資其工本者准借倉穀成熟後免息歸倉 上是之五月遷刑部右侍郎八月調吏部右侍郎十三年以年老休致十五年定

國子內閣侍讀允迪告病回籍因受賄請託經江西巡撫奏參革職充徒十八年奏請將允迪釋放 上加恩准令回籍侍養二十一年卒子涵暉貴州貴東道允迪內閣侍讀淵映河南確山縣知縣

右 國史館本傳

枚幼時見里巷坐八九十翁說賢太守必曰魏公或新太守甫莅里魁過必問得如魏公否枚問公政何若曰公至海不波旱必雨浮糧捐盜賊竄野無停柩寺無少尼嘗過市有旗廝強勾毀器拆屋拘之不服曰我固山子也公怒命縛輿後吾將訴於將軍輿夫急馳牽烈日中公肅竇謁廟故紆其道固山子不能堪叩頭曰願受公責毋訴將軍公曰公子安可責哉且公子世家知禮義當不

爾必家奴教之耳杖其奴四十徇於市自後八旗肅然撫軍黃叔琳獲罪有蜚語稱其弟叔璫爲御史巡臺灣過杭擾民罷市世宗命將軍總督會訊訊日觀者如堵牆黃公囚服喋齟將軍呼三木脅之公率錢塘楊令歷階上抗聲大言曰府縣司地方地方罷市而府縣不知請先劾府縣再訊叔璫且天子惟不信風聞故命大臣窮竟若奏不實而周內之是欺天子也竊以爲不可今孩兒老母萬千在庭下辱將軍玉聲一開則叔璫與府縣俱無所逃罪將軍目外望諸百姓匍伏呼曰如魏公言黃竟得釋公所行此其犖犖大者枚聞而識之後十餘年枚知江甯公爲安徽布政使得朝夕見矜寵甚盛公時年六十餘樸而和疑不稱其風力

者益公之爵已尊年已高養愈粹也今年公薨將葬其次子內閣侍讀允迪來日子先君竹馬兒童也長又受先君知然則銘先君惟子是屬枚惶恐辭讓懼文不稱德爲顛履羞繼又思銘公可無愧詞而枚文或將藉公增重乃按其狀而書之曰公諱定國字步于號慎齋大父諱菁官中書舍人居江西廣昌之水斗砦鼎革時守將欲屠砦素善舍人給令箭一枝曰保而家舍人不可曰願與全砦同死將誼而許之活者千餘家子方泰官禮部侍郎生公公舉康熙丙戌科登進士寧應城得民和他郡訟者走應城如鷲大府知之遇民必憐公往雲夢孝感皆以守令故閉城罷市他官徘徊不得人望見應城縣旗幟呼曰魏青天至矣皆解散羅拜事

闔擢知冀州 世宗登極遷守杭州再遷河南按察使嘗是時督
臣田文鏡政尙猛上蔡令某怙田勢俯張公首劾之田怒力未有
以傷會調直隸與布政使張适拷人致死謫戍黑龍江先是兵部
尙書傅鼎謫焉公到之前夕傅夢魏徵來翌日公至傅心敬之而
未言亡何同步江上一丈夫來汲熟視公曰公毋姓魏乎曰然丈
夫跪叩頭泣曰民冀州人也公刑我公不記耶公曰然則應恨我
而何以泣曰民從人爲盜法當死公爲減流雖遣發公意猶若其
不欲遣發者然故感公語畢再泣再叩頭傅亦愴然不自禁直前
握手曰殺之不怨公孔明耳豈僅魏元成哉乃述前夢大歡笑
今上元年公與楊名時魏廷珍等同 召見授西安按察使大將

軍查郎阿從蘭州歸眾官郊迎日已暮查下馬問誰是魏廉訪公趨而前查手燭照示眾官曰此傅閣峯爲我言八年塞外有刑人而人感者容顏尙未老也再升山東布政使調安徽先是司胥居奇苛馭各屬冊籍公命代造檄發乃相視閣手州縣奏銷輒以尾數被部議公代解而催還之遷安徽巡撫入爲刑部侍郎再轉吏部以老乞休歸七年薨壽七十有八公在浙時浙有南北關南關課贏南司請撫臣入奏公在坐曰不可若以稅贏爲殿最則今年南勝北明年北勝南如物力何汪景祺以大逆誅子女坐流一女許配中表大府以無媒故欲坐之公不可曰中表爲婚何事於媒爲除其名其持大體如此夫人曾氏再娶蕭氏長子涵暉知鎮遠

府孫若千以某月日葬某銘曰

一檄禽斬四十賊一歲殺虎七百隻公之吏術廉且傑赴道若渴
義若熱卽之温温如不克巽之委順震之決西江之西巖巖石其
生也榮爲公碣

右神道碑袁枚撰

Vertical text on the right side of the page, likely a list or index, is present but illegible due to high contrast and blurring. The text appears to be arranged in a single column.

143-318

楊汝毅

楊汝毅江南懷甯人康熙三十九年進士授浙江浦江縣知縣四十八年行取 特恩以主事用五十二年補禮部主事累遷本部郎中五十三年遷四川道監察御史巡視東城五十七年五月河南南陽鎮標兵因地方官查拏賭博挾忿入府署擁知府沈淵至教場守之三日汝毅聞其事劾總兵高成縱兵毆官 上是之命刑部尚書張廷樞內閣學士高其倬往按得實置首犯於法總兵以下論如律閏八月汝毅疏言康熙三十八年知縣行取 特恩以六部主事用每主事四缺補行取三人捐納一人五十四年行取 特恩授額外主事遇缺卽補惟五十一年行取之員與捐

員閒補至今未補尙十餘人恐行取日多壅滯益甚請照四十八年五十四年之例酌量疏通又五城司坊官巡盜安民責任匪輕請照外省計典俸滿三年清廉才幹者五城御史呈明都察院覈薦有干八法者亦照例處分庶微員知所勸懲又外任官親老戀缺臨選輒以出繼爲辭偶掣遠缺託名治喪回家希圖另掣請嗣後赴選文結敘明三代履歷如已選後假稱過繼託名治喪以不孝論出結官議處俱下部議行五十八年擢太常寺少卿提督四譯館六十年調奉天府府丞六十一年轉右通政雍正元年正月奉命祭少昊金天氏等陵七月擢通政使九月遷左副都御史充癸卯科文武殿試讀卷官二年四月升兵部右侍郎四年疏言

直隸去年被水州縣存倉民穀盡數發賑畿輔積貯宜預請運東
關米十萬石至天津截畱南漕米十萬石存河閒保定適中地分
貯部議從之五年二月奉命往清口致祭河神三月轉左侍
郎十二月兼管吏部侍郎事七年八月充順天鄉試副考官十月
賜汝穀子綏舉人九年四月奏言舊例俸深人員俱雙月擢升
其知縣升缺在京則主事中行評博在外則同知知州通判先儘
京升缺用是以俸深者擢升部寺淺者每得府佐州牧雖均屬應
升而繁簡各異嗣後不論京外缺將論俸應升之人一體代爲掣
補下部議行六月兼署副都御史十一年二月充會試副考官三
月疏言鄉會試頭場有初十夜宿場之例時刻太寬恐倩人代作

請嗣後宿場舉子除習五經者篇數繁多仍照原號其專習一經者令監試提調官傳於至公堂謄寫並令背誦以別真偽再硃卷彌封後例用不全字號印卷面如天大水木等字缺筆難辨易淆請嗣後紅號仍用全字庶官易稽查下部議行十二年奏言向例軍功紀錄一次與加一級俱作尋常一級抵降未爲平允請嗣後軍功紀錄二次抵降一級軍功加一級抵降二級其抵降以軍功紀錄一次抵罰俸一年從之十三年八月 皇上御極奉 命祭告南嶽乾隆元年四月奏言奉使齋 詔書旗仗例用馬兵捧尋每站更換惟湖廣自武昌至岳州計九站岳州至長沙六站始得更換路長役瘁請於兩郡每臺增馬兵一名沿途更直營馬不

至傷損部議 從之又言河南滎澤縣地臨黃河康熙三十六年河勢南侵地畝漸次坍塌雖有新漲灘地抵補但新地大半沙多土少並有隨漲隨塌者花戶年賠懸糧力不能支棄而遠徙徼比徒勞官民俱累請 諭令清查量子豁免 上命河南巡撫富德確查覆奏到部議如所請豁坍地額銀千三百餘兩先是汝穀奏直省驛馬倒斃俱定分數惟陝西甘肅山西三省向有茶馬領補不需帑項迨康熙四十五年停止茶馬無可領補亦未給馬價今沿爲例臣思驛馬應一例開報管驛官方免賠累但此三省俱產馬之區不便照各省例請定以二分補銷所需銀卽用該省驛站裁存之項俾有司不得藉口誤差至是議行六月調戶部右侍

郎十一月擢左都御史三年六月以老病求罷准以原官致仕並
諭在本省藩庫給俸以養餘年五年正月卒遺疏入 諭曰楊
汝穀敬慎老成宣力年久今聞溘逝深爲軫惻應得卹典該部察
例具奏尋 賜祭葬如例諡勤恪

右 國史館本傳

沈近思

沈近思浙江錢塘人康熙三十九年進士四十五年遷授河南臨潁知縣五十二年巡撫鹿祐以卓異薦遷廣西南甯同知旋以病告歸五十九年五月浙江巡撫朱軾奏稱近思初任河南縣令循績特著以卓異升補同知因不服水土告休歸家足不出戶鄉里欽敬臣於宣講上諭處見其年力尙壯精神強健乞 敕部調取引 見破格擢用得 旨以緊要缺用六十年二月監督本裕倉四月浙閩總督覺羅滿保奏請揀發福建候補知府雍正元年 特用吏部文選司郎中 予加二級 賜第一所帑金四百兩 九月充會試同考官十一月授太僕寺卿仍兼理文選司事二年

正月充山東鄉試正考官二月擢吏部右侍郎 賜詩有操比賽
灑潔心同皎月明之句七月奉 命同尙書阿爾松阿往河南審
理生員王遜等糾眾罷考一案論如律十月充武會試正考官三
年六月吏部議年羹堯誣參道員金南瑛等不實罪尙書隆科多
擅會同兵部僅議革年羹堯將軍職 上以吏部應議事含混會
奏巧爲徇庇下都察院議隆科多削太保近思等坐附和降調得
旨寬免四年三月轉左七年充江南鄉試正考官十月 諭曰
閱江南鄉試錄見主考官沈近思出題正大不尙詭僻三場策問
內發揮性理具有本源以此試士實有裨於人品學問甚屬可嘉
著卽交部議敘加二級時查嗣庭汪景祺俱以悖逆伏誅近思與

同籍因流言浙省遠處海濱奢靡澆薄以詭詐爲能以忠厚爲拙以勢利爲重以廉恥爲輕以逢迎奔競爲有才以安分守己爲無用以請託徇私爲多情以孤介剛方爲刻薄以健訟打降爲豪傑以退讓辭遜爲怯懦以捏詞造謗爲智謀以謹言慎行爲迂闊人心之壞風俗之頹淪胥已極如查嗣庭汪景祺者大逆不道罪不容誅是浙江一省逆種並生越水爲之增羞吳山盡皆蒙恥荷皇上至聖至明至慈至斷明正其罪 特簡儒臣爲觀風整俗使滌除邪穢咸與維新臣受 恩深重無可報效敬陳浙省舊弊十事一士人修身立品全在初學乃浙省童生初應縣府試卽請託勢要求開公捐府縣官憑以錄取最爲惡習請懲責以端始進一

生員初得青衿便思鑽營當事不得則編造浮言得則通謁顯貴
求通關節請將本人治罪外其私書關通者依律治罪一在籍鄉
紳多在各衙門關說公事顛倒是非最爲民害請分別斥革治罪
一不法生員妄借條陳名色向各衙門呈告地方公事藉以欺壓
愚民武斷鄉曲并結聯匪類連名具控名曰公呈請褫革治罪一
浙省凡兩造結訟未見曲直輒請訟師造作揭帖攻發隱私污人
名節或捏貪酷款蹟誣訐官長或編德政歌謠聳動聽聞以致上
司誤信賢否混淆請照光棍治罪一士人刊刻詩詞並一切誨淫
誨盜之書甚爲心術之害請毀版重懲一訟師爲害最甚浙江省
會士農工商而外游手好閒之徒鮮衣美食遨遊城市伺察鄉里

偶有口角是非教唆興訟或代作呈詞或鑽求書吏卽欲具公呈一呼而集甚者挾持官府串通衙役保官告官閉城塞署皆此輩爲之請於保甲內將無籍之徒嚴加查察至放告時先查代書審問如係訟師嚴加懲治一衙役作弊各省皆然浙省尤甚劣紳訟棍皆以衙役爲線索此輩侵盜錢糧魚肉小民本官一有覺察則句引閭堂塞門冀圖挾制皆由白役人多每衙門動皆數百請飭浙省大小衙門遵照經制役定數一切白役幫差盡行革退如有書役勾通罷市抗官立寘重典一士子讀書當以聖賢爲法一切博戲最易放心喪志士紳犯賭法所必懲而豪家暗養打降之人船埠橋埠各有棍徒雄霸欺弱陵寡威嚇鄉里請嚴治首從一民

閱演戲原屬豐年報賽之常浙省有坐方地棍借端科斂糾黨勒索應予重懲又如雲林天竺各寺廟每至春二三月婦女遊觀輕薄士子呼朋引類混雜訕笑毫無忌憚宜嚴申禁得 旨據奏二逆並生越水增羞吳山蒙恥等語浙省有沈近思一人不爲習俗所染可稱上智不移實足盡洗越水吳山之羞恥矣所陳風俗十事切中情弊委曲詳盡甚屬可嘉著發與巡撫李衛觀風整俗使王國棟照所請嚴行禁約五年正月擢左都御史仍兼管吏部事三月充會試正考官六月教習庶吉士十二月卒於官 命平郡王福彭往奠 諭曰沈近思人品端方持躬廉潔凡所委用悉心辦理正資倚任忽聞溘逝深爲悼惜著加禮部尙書太子少傅銜

廕一子入監讀書其子尙幼著該地方官加意照看撫養待成立時送來引見錫銀五百兩吏部派一謹慎司官爲伊料理後事賜祭葬如例謚端恪子玉璉於乾隆十一年十月授廣西桂林府同知

右 國史館本傳

性情正而後學術明學術明而後事業著朱子以來五百餘年聞而知之克符名世之寶者在 本朝則睢陽湯文正當湖陸清獻若吾師端恪公抑又庶幾焉者乎公諱近思字位山世爲仁和五杭邨人家木力農世孝友醇謹鄉黨稱之公生九歲而孤家貧隨仲兄遊學靈隱有借巢老人者資之讀儒書負笈虞山錢園沙嚴

寶成之門既歸家補諸生讀宋儒書刻苦勵志書程子涵養須用敬進學在致知二語於座隅嘗自言其得力曰吾由周程張朱之書上溯孔顏曾孟之心怡然渙然若合符契不自知其手舞足蹈也康熙三十八年舉於鄉明年成進士亟返里門理故業選期已過顧以學未成不出也頃之仕爲河南臨潁令單車就官謝請託卻饋遺謹號令禁科派四十八年大水請發粟以賑全活無算明年大熟建社倉七所設義冢收埋枯骨捐俸葺潁城築孔家口於鄰州潁民自是鮮水患建岳忠武于忠肅祠修宋統制楊再興墓莅潁七年膺卓薦以去士民攀車灑泣不得行推廣西南甯府同知引疾歸教授生徒布衣疏食泊如也今相國高安朱公撫浙特

疏薦公 聖祖召入京監督本裕倉會臺灣甫定總督滿公請諸朝乃 命公往公作遠慮論四篇大指以臺灣宜析爲縣每縣各分都鄙保甲易於稽察又取民壯拔置行伍以充各標其餘流民必審籍授田勿使游食當時采用之雍正元年 召授吏部文選司郎中時銓法久敝胥吏多假手爲奸公夙夜勤慎有奸輒發吏不敢欺旋晉太僕寺卿明年典山東鄉試超授吏部右侍郎雍正五年 特擢都御史公自縣令起家洞悉閭閻疾苦凡事關枘革必熟籌其利弊期有濟民生而後已當 廷議耗羨歸公時公力爭以爲此加賦之漸不可眾皆愕 聖主鑒其誠不之舉也雍正五年十二月十三日無疾而終 上聞震悼賜帑金遣平郡王散

秩大臣奠爵官爲治喪予祭葬如禮謚端恪加 贈禮部尙書太
子少傅蔭一子公立心坦易純於踐履非道義一介不取窮達夷
險不以二其心爲文樸實說理類南宋大家所編夙興錄誦法稼
書先生出而臨民動以嘉定靈壽之政爲師晚年蒐輯當湖遺書
爲十四卷其他所著書又數十卷高安相國雅重公哭其喪爲表
墓曰理學名臣蓋深知公者也公生康熙十年正月十四日距卒
之年年五十有七曾祖諱學顏祖諱時吉父諱大震皆以公貴
贈資政大夫妻項氏繼徐氏皆 贈夫人又繼宋氏吳氏子三長
玉麟監生早卒次遷戶部主事三玉璉蔭生女一適舉人趙溶雍
正六年葬公於湖州歸安縣埭谿之陽啟豐鄉會試兩出公門下

服公之教既久哲人云亡不勝哀慟謹按公年譜誌之墓而爲銘

曰

斯文未墜天挺哲賢斗杓所建四氣回旋有紛其學異說晦蒙闢
邪衛正公探厥宗有墮厥守猷猷畏蕙公謹厥趨道直砥矢起自
循吏擢之卿貳篤柴靖其臣道具備爲孔顏樂爲禹稷憂綽然進
退清任兼修 天子曰咨失我良弼制詞褒榮典積優卹岷山巍
巍蒼水洋洋有斐君子沒世弗忘

右墓誌銘彭啟豐撰

雍正五年冬都御史錢唐沈公以疾薨於位 上聞震悼身後之
典有加 命王大臣致奠 賜帑金敕吏部官爲經紀喪事加

贈禮部尚書太子少傅 賜諡端恪給祭葬如例 御製碑文榮
哀兼至其仲子遷奉公喪歸卜葬於歸安縣埭谿之新阡徧乞墓
銘誌傳於鉅人長者以光顯先人之行業駿於公爲鄉里後進少
嘗以文字見知於公知公之行誼最悉非其又足以致公不朽公
有其不朽者文或藉以傳焉謹按事狀公諱近思字閻齋號位山
又號俟軒世爲仁和之五杭村人曾祖學顏祖時吉父大震皆以
公貴 贈資政大夫吏部右侍郎妣皆 贈夫人曾祖母尤矢節
撫孤孫避兵禍艱瘁彌厲以故贈君終身無笑容公少而夙成年
七歲請於父曰仁爲何物贈君大奇之九歲喪父哀毀若成人少
長從虞山錢燦嚴虞惇學補錢唐學官弟子公之以錢唐著望自

此也假學舍授諸生經厲志求聖賢之學曰人欲窮理必自六經
孔孟始讀六經孔孟自集注始欲修行自敦倫始敦倫自力行小
學始坐右書伊川涵養須用敬進學在致知語自警康熙己卯領
鄉薦明年成進士時巡主孝感相國將致政歸公上書論孔廟前
此從祀於道統正傳有未當者其略云孔子之道至朱子而大明
朱子爲繼述孔子之大宗同乎朱子者卽同乎孔子也異乎朱子
者卽異乎孔子也及明嘉靖以後與朱子歧途異軌者亦並從祀
其時因功業之高聲名之盛又以門人徧滿附和者多遂至謬誤
相沿習焉不察使于聖相傳心法如精一之旨博約之訓知行之
序誠敬之功若有不由其途而可入聖者此大惑也因極論當湖

陸稼書侍御學術純正官膺祀典孝感深躋其言後侍御竟列從祀其論自公發之家故貧惟一僮執役謁選授河南臨潁令不改素操單車莅職修倉建社豐凶有備役夫築孔家口隄潁人至今無水患立岳忠武于忠肅雙忠祠修宋統制楊再興墓自爲碑記以率勵廉恥敦厚風俗爲本務膺循卓薦去潁之日士吏攀車灑泣道不得行擢廣西南甯府同知執法不避權貴豪吏斂手未幾以病乞歸集生徒教授如初豫章數文兩書院來聘主講皆辭不就相國高安公撫浙時以賢能薦監督清河本裕倉嚴立規條搜剔奸蠹積弊一清未兩月浙閩督臣來請以公攝臺灣府事 聖祖仁皇帝可其奏卽命公往時臺灣逆亂初平方資撫輯因作遠

慮四論略云臺灣爲沿海諸省保障鹿耳天險澎湖孤懸非若內地之可以臂指使也以二千里之幅員止設三縣聚一二百萬無家室妻子剽悍復戾之徒肆行其輕詆任俠之習地方之敝由此而起莫若取臺灣析爲數縣俾各治其地每縣中各分都鄙保甲統領約束絲連繩貫易於稽察一道一鎮彈壓府治駐兵三千游守千把分防各縣又取民壯之材勇過人者拔置行伍嚴加操練迨兵多之後潛移內地以充各標其餘流雜之民必審其籍貫稽其家口方許授田土否則悉驅過洋自可化頑暴爲淳良變海裔爲禮義矣當時採其議行之 憲皇帝初卽位向聞公名 召授吏部文選司郎中時銓法久歇胥吏多假手爲奸公密察輿論盡

得其隱吏不敢欺由是宿弊頓絕旋晉職太僕寺卿明年典山東鄉試未竣事超授吏部右侍郎山西撫臣方上耗羨歸公之議上將從其請公力爭殿陛間同列皆爲失色 上嘉其誠剴不之責也方是時公直諫聲震天下丙午主江南試 陛辭之日 御賜詩有操比寒潭潔心同皎月明之句明年春晉都察院左都御史總裁禮闈得士稱盛公受 聖主知遇至深不五年閒自散吏擢至九卿日夜淬厲殫竭思慮凡 國家大計知無不言言無不盡前後封事十餘上皆剴切明白不爲苟應故事每封疏將入必先期宿戒鍵戶沈思繕橐竟北嚮叩首而後行雖家人莫知所陳何事海內識與不識朝夕顯望希公枋用卓然大有爲於天下而

天靳其年不得竟其所用是冬邁疾卒於位年五十有七公慎交
游寡言笑學以程朱爲準的與儀封張清恪公講性命之學清恪
公所著學庸講義皆與公往復辨論而後成生平敬李梅崖之道
義蔡梁村之理學晚歲篤好稼書文集與閩人雷鉉王道考訂其
業夜分不休所著述數十卷曰學易學詩讀論語注偶見錄小學
詠勵志雜錄眞味詩錄天鑒堂詩文集皆理道之言銘曰

元氣垓圮坤厚甯曲江迴折清濶生嶢嶢大儒天挺英樹立匪祇
一世名蚤從小邑流惠聲力振傲劫扶孱備築隄捍患潁水澄東
人泣送西歡迎旄頭夜墮赤嵌城卓然遠慮推用兵坐可危論起
卽行 帝憂銓法俾掌衡從事聽詞莫敢竄逆鱗不憚徑寸攫竝

靜侃侃殿薈 帝原其薈嘉乃誠南牀獨坐望匪輕圓首躋足
跂治平胡不憇遺末疾嬰翩騎箕尾遊太清苔水鳴咽繞 賜塋
羊馬躑躅樂石貞維公孔思兼周情氣奪暗啞驚聲盲執朱之奧
挾陸精繼宋五子張周程儒術彪炳辭銅鏗銘詩徵實不可更

右神道碑銘杭世駿撰

端恪神道碑文出於靜海勵尚書然其於公之學術節槩有未盡
者端恪少時嘗在靈隱寺中爲僧碑文諱之不知不必諱且更有
不可諱者 世宗憲皇帝夙耽禪悅其在朱邸徧讀三車經籍直
見性宗及登極遂絕口不道然而熟處未忘也兵部侍郎臨川李
公嘗以燕閒獨對 上問之曰聞汝於書無所不見則二氏諒所

盡通李公對曰主臣向於藏經亦諦觀之然甚無補於天下國家
上笑而頷之又數年端恪以吏部侍郎亦獨對 上問之曰汝
固嘗爲僧其於宗門必多精詣之言試陳之而端恪曰臣少年潦
倒時逃於此及幸得通籍方畱心經世事以報 國家日懼不給
不復更念及此亦知 皇上聖明天縱早悟大乘然萬幾爲重臣
願 陛下爲堯舜不願 陛下爲釋迦臣卽有記安敢妄言以分
睿慮 上改容頷之曰良是時臨川已罷官聞而歎曰君子哉
聞齋也說者以爲雍正十年前 內廷不舉法會者二公力也端
恪前此爲選君尙書隆科多密勿重臣最專斷曹郎莫敢仰視端
恪獨侃侃持正議一日畫諾尙書曰可端恪曰不可尙書怒端恪

持之益力良久尚書忽曰沈選君諍友也改而從之且曰竅友當如此矣入告於世宗遂不次加太僕卿仍領選司自此得大用予嘗謂古今儒佛二家多由儒而佛者未有由佛而儒者有之自端恪始端恪既爲儒私淑應潛齋先生之學故最醇潛齋在日端恪尙少及自靈隱歸得見潛齋之高弟沈君士則凌君嘉印從之求得其遺書乃知正學有在發明宗旨已而於潛齋語聞有未安皆反覆以求其通論者以爲應氏功臣碑文極闡明端恪之學而不知其淵源所自出余故特表之晉撫田文鏡請以耗羨歸於公用世宗已許行而猶召九卿議之眾以上意所向不敢爭公獨爭之力言今日則正項之外更添正項他日必至耗羨之外更

添耗羨他人或不知臣起家縣令故知其必不可行 世宗曰汝
爲令亦私耗羨乎公曰非私也非是且無以養妻子 世宗曰汝
學道乃私妻子乎公曰臣不敢私妻子但不能不養妻子若廢之
則人倫絕矣 世宗笑曰朕今日乃爲沈近思所難是日眾皆爲
公懼然 上雖不用公言而亦不怒也碑文微及此事而不悉端
恪之卒其二子皆少故事跡不能盡詳其獨對語世所不知予從
臨川李公得之當記之以登 國史仲君遷今爲戶部語次因乞
子序其事

右題神道碑後全祖望撰

天下之治起於縣縣宰之視民若子弟然縣治而天下無不治人

之言曰子弟之舒戚賢不肖係吾家者也宰傳舍也何治爲其自好者又曰吾嘗教之而不知從吾嘗利之而反以爲病己民何以若子弟嗚呼使在上者誠爲其父兄也民又何憚而不子弟若耶仁和沈端恪公爲康熙雍正間名臣彭尙書杭編修撰碑誌稱公爲臨潁令築隄建社而不詳其設施本末予幸攷得之愈以思公之爲人潁水之自許州東入於臨潁又南東而至西華也當水之南衝者曰融壑口隄善崩水歲入臨潁害禾稼無算公請於州願之隄完而孔家口隄善崩水歲入臨潁害禾稼無算公請於州願築隄而臨潁任夫之七或尼之曰方饑興大役是厲民也公曰吾前以隄許故不早治而害吾歲今更不爲水復出厲孰甚焉乃出

穀二百五十石召夫而士民皆樂輸日役千三百人入給穀二升
二十日隄成水至不爲患歲大熟公旣立紫陽書院爲學規教士
以立心誠敬治經務專一精熟而禁妄交士皆從公教無侷縣西
之葛岡村其俗惡一旦循行至其地或告曰此鄉鄙僿請爲之義
學何如公欣然曰諾休於僧寺見巨榆官物也伐之以爲梁遂立
學延師課童子其中別冊使手實所課於下曰書程簿爲期使之
來自覈其課及期村之童子八歲以上十六以下亡慮數十人父
母皆爲製衣冠坐牛車到縣廨聯縣入公閱皆出書程簿按所課
書次第奉公閱誦皆不誤更勞之紙若筆而責其惰者逾旬日復
來逾年村之子弟多識字扈扈然其長者日馴遜早納租稅恥爭

訟公又買田歲取以給師膳薪使久而無廢及公去臨穎師皆率其弟子長幼雍容坐牛車偕來送公脊脊然其效於民者如此人之令不行於境內而公能築隄於境外人之教士不能止其身過而公乃化行於其鄉無他誠與不誠而已矣將以條教興作市吾名或未嘗精求其利害而雜投之取適時會而已民何以信而政何以成若人者不爲之則弛爲之則擾爲之而省其成則愈擾觀於其家雖子弟亦頑不可使蓋得其道則國人如子弟失其道則子弟且爲國人嗚呼此爲治之所以必誠己也夫

右書神道碑後錢儀吉撰

錢塘沈先生諱近思字位山號閻齋進士官至都察院左都御史

翠庭雷先生序其文集曰 國朝真儒輩出平正切實一以朱子爲宗推平湖陸先生爲最錢塘沈端恪公則篤信平湖以上宗朱子者也公少習禪旣乃沈潛反覆乎六經先儒之旨以體驗於躬行踐履之實其令臨頽也修城築隄積穀勸學務爲百年利賴之計與陸先生之宰嘉定靈壽同其立朝也端方耿介表率百僚遇事多所建白與陸先生爲御史之直言讜論同顧陸先生在臺垣僅一歲罷歸再召已不及待公由銓司驟擢卿貳陟總憲年未及耆而捐寶客嗚呼使公永其年所建樹詎止是哉公在朝與吾師蔡文勤公投契最深閒以事至海淀則宿文勤公所鉉因得廂座隅聆緒論或聯牀講析過夜分竊幸所得於公者實多公性靜默

不妄言笑至其辨學術陽儒陰釋之歧途世道人心義利公私忠奸賢佞之分界則如決百川而東注洋洋灑灑而不能自止公嘗出所纂陸子遺書屬鈔校訂蓋總平湖陸先生諸書薈萃而類編之以裨後學者也既又得讀論語隅見錄其他著述祕而未宣今與令嗣君同官於朝乃得盡讀公之詩文劄記其研理窮事根心而出平正切實與平湖陸先生如出一轍學者由此而得梯航宗平湖以上宗朱子如公之持躬覺世卓然爲一代醇儒視夫恟恟於空寂馳騁於功利炫驚於詞章者其得失奚啻霄壤哉鉉不自揣敢識一言於簡端與天下用心正學者質焉又陸子遺書序曰平湖陸子學子朱子之學能真知實踐者也其治身居官立朝之

梗槩海內宗仰之余於年譜序中亦既言之矣其生平著述如困
勉錄及點定四書大全皆其初年未定之書其問學錄讀朱隨筆
讀禮志疑松陽講義衛濱日鈔及門人所編輯文集及三魚堂四
書講義四方學者或未之見或見其一二而莫覩其全卽全覩之
而莫得指歸雍正五年余在都門總憲沈端恪公折節下士以陸
子遺書屬校訂益公學陸子以上學朱子故於陸子之書沈潛反
覆之久因倣近思錄之例以類相從而次第之以便讀者之尋求
自道體性命之精蘊學問切實之實功異端之歧途聖賢之造詣
莫不瞭然分明由此而上溯近思錄濂洛關閩之正脈無復有掘
泥而揚波者矣是書公就橐而薨於位其門人李氏兄弟收藏之

余視浙學喜其完好如初欲爲梓行而力未逮今荷 聖恩侍母歸養爰識此意以諭後之學者厥後是書梓行與否無可考而沈先生之天璽堂集亦不可得姑錄其重刻陸宣公奏議序曰天地倫理之經莫大於君父儒者性命之學莫先於忠孝昔孔子作孝經而無忠經後儒於是補不知忠孝原無二理故曰夫孝始於事親中於事君又曰以孝事君則忠四教之垂要之以忠信一貫之唯守之以忠恕六經四子無一非忠經至理特不以專名云爾唐陸宣公奏議一書實可謂之忠經也孔顏曾孟而後周程張朱以前此千餘年間道統幾絕所謂名臣大儒者勳業文章非無燦然類皆雜於功名之私其粹然一出於正而能以道事君者唯公

其庶幾乎今取其書而讀之其告君之大者如推誠接下聽言用人改過罪己散財絕賄貯粟定稅馭將治邊天德王道體備用周見古大臣格心正君之學焉總之義利二者辨之至明一切雜霸曲學不敢陳於君前當時導利而害義者莫甚於裴延齡故公有奸蠹一疏直言不諱九死不辭其忠誠激烈已足碎奸邪之膽而百世之下聞公之風者尙可激濁揚清嗚呼豈不盛哉恨公生不逢時不能盡其所學以究其用使以堯舜之道遇堯舜之君責難陳善言聽計從恢宏至理展布經綸雖接踵臬夔比肩稷契可也近思來治潁川建社學於北城簿書之暇與項子性存宋子之選稍爲校定公書點讀付梓以授社學諸生自十五入太學讀孝經

小學四書本經後卽令讀奏議使君父忠孝大倫早明於天性未
漓之日而正誼明道堯舜君民之志不誤於蒙養先入之言則稟
夔稷契本領卽成童初學而根基已定有以跳脫乎習俗之橫流
掃除乎物欲之鋼蔽從此而擴其識鍊其才充其學厚其養而暢
發事業其或可以備 聖世耳目股肱之一數爲當今第一流之
人物乎刻旣竣遂書此語於篇端使有志讀公之書者日就月將
精思力踐飲食起居時與公對心神智慮默與公通精粹潔白之
操正大光明之業體之則爲眞儒用之則爲純臣庶乎無負讀公
之書焉耳

右學案唐鑑輯

錢唐沈閣齋近思幼孤貧依靈隱寺諦輝和尚延師課讀遂成通儒有項姓者識其非常人以女妻之後登庚辰進士由知縣行取爲吏曹官至侍郎以清介稱項姓之爲女相攸物色寒賤猶是恆情若諦輝之獨具慧眼可謂大善知識矣

右記余金撰

沈端恪公近思以在籍紳士而被巡撫之薦以告病同知而特用京員以五品司官而 賜第 賜帑以本部郎中一年而卽擢堂官皆自來未有之曠典夫公之清廉忠謹固足當之而我 世宗任賢勿貳破格甄勸若此想一時百寮仰望莫不感泣奮興矣今循例遷除且似河清之難俟因循泄沓弊實由茲經國者盍思變

計乎

錢塘沈端恪公近思性格謹每上封事先期簡閱衣冠鍵戶密書
書畢蒲伏再拜而起家人問何事輒荅以他語敬慎不泄如此雍
正朝耗羨歸公之議自山西大吏發之 諭旨令九卿會議公廷
諍諤諤同列震悚 世宗嘉其誠剴不以爲非遇事敢言又如此
公初論陸清獻當從祀孔廟康祺亦謂公所學之正立朝之忠雖
配享兩廡亦無愧云

右紀聞陳康祺撰

卞永譽

式古堂書畫彙考卞永譽撰是書書畫各三十卷先綱後目先總後分先本文而後題跋先本卷題跋而後引據他書條理秩然朱彝尊論畫詩有妙鑒誰能別苗髮一時難得兩中丞之句蓋永譽及宋犖皆精於賞鑒

右

四庫提要張維屏錄

按康熙三十九年卞公由福建巡撫遷刑部右侍郎

日本書紀卷之二十一

四

國朝耆獻類徵初編卷六十七補錄

卿貳二十七

楊永斌

楊永斌昆明縣人康熙己卯科舉人歷官廣東巡撫入為吏部右侍郎器量宏偉講求經濟拔莊協揆有恭於諸生後於讀卷日置之前十本遂得殿撰孫澐以公蔭知蒲州府知府和其衷之案獨無餽遺 純皇帝嘉之擢至浙臬卒於任

右滇繫小傳師範撰

按揚公撫粵時振興文教刊粵東黎獻集莊公有恭暨弟有信均為粵秀

書院高才生山西巡撫和其衷之案在乾隆三十一年見續東華錄

--	--	--	--	--	--	--	--	--	--

143-360

國朝耆獻類徵初編卷六十八目錄

卿貳二十八

涂天相

趙殿最

唐執玉

吳士玉

性桂

俞兆晟

李鍾峩

陳時夏

國朝耆獻類徵初編卷六十八目錄一

A table with 10 columns and 1 row. The table is mostly empty, with some faint markings in the top right corner. The columns are of equal width and are separated by vertical lines. The top row is a header row, and the remaining rows are empty.

143-362

國朝耆獻類徵初編卷六十八

通奉大夫前者江西巡撫江西布政使司布政使湘陰李桓輯
卿貳二十八

涂天相

涂天相湖北孝感人康熙四十二年進士改庶吉士四十五年散
館 諭曰選拔庶常原以教養人才儲備任用庶吉士王誥等教
習日久今加考試滿漢書俱未精通掌院學士揆敘等督課不嚴
交都察院議處是年天相未授職奉 旨再教習三年四十八年
授職編修五十年充陝西鄉試副考官五十九年遷國子監司業
六十年遷翰林院侍講尋擢侍講學士十二月 命祭告南海雍

正元年回京充日講起居注官六月遷詹事府詹事七月擢內閣
學士兼禮部侍郎銜九月遷刑部左侍郎二年六月緣李元璽等
新犯之罪刑部審擬具奏將步軍統領衙門拏送舊案及遇赦寬
免處一併敘入本內奉 旨交部嚴加議處尋議降調授太僕寺
卿六年 命充八旗志書館纂修七年八月署倉場侍郎十月
諭內閣大學士尙書侍郎都御史副都御史各大員有子孫在京
關及本省鄉試未經中式年二十以上者著各舉文理通順可以
取中者一人開送內閣得 旨署倉場侍郎涂天相之子士炳
賞賜舉人八年實授倉場侍郎十一年二月遷都察院左都御史
仍兼理倉場事務四月遷刑部尙書旋以回籍葬親請假 上允

之十二月還京轉兵部尙書十二年正月充經筵講官四月兼署
都察院左都御史十一月奏兵部稽俸廳請酌派本部事簡司員
兼管廳務 上從之十三年調工部尙書乾隆元年恭辦 世宗
憲皇帝山陵事二年事竣回京旋以病請開缺回籍四年卒子士
煜順天西路同知士烜雍正十年舉人士炳江蘇邳睢同知

右 國史館本傳

皇朝通志卷之六十五

七

趙殿最

趙殿最浙江仁和人康熙四十二年進士由內閣中書游授禮部主事員外郎五十七年遷刑部郎中六十年授刑科給事中雍正元年七月 欽派巡查吉林二年十月差滿回京四年擢湖南按察使五年八月 詔來京以對品京堂用六年 遣往打箭鑪外噶達地方監造達賴喇嘛廟八年七月補少詹事八月擢內閣學士兼禮部侍郎先是御史吳濤奉 命偕給事中馬維翰等清丈四川地畝巡撫憲德與濤分勘川東不問地畝多寡按戶勒增并令加倍投首民怨沸騰具疏題參部議革濤職至是濤疏辨 命殿最會鞠得實濤擬杖徒如律九年四月授工部侍郎六月奉

命往山東辦理賑務十一年十二月調戶部右侍郎十二年正月
充經筵講官乾隆元年轉左侍郎二年六月 上以御史馬起元
條奏山東直隸兩省運道尙書來保復請勘河南衛水情形 命
殿最同侍衛安甯會同各督撫逐一履勘事竣後便道閱看通州
河道一帶妥協料理七月殿最等至河南輝縣疏言衛河發源蘇
門山百泉經新鄉縣汲縣淇縣滑縣湯陰內黃及直隸之大
名元城至山東館陶入臨清州名曰漕衛交會計長九百二十三
里經流雖遠其間漕農交賴者祇三處一曰百泉卽衛河發源正
派一曰洹河爲衛河迤北支源一曰小丹河爲衛河迤西支源自
雍正四年內閣學士何國宗副總河嵇曾筠等於此三處建閘定

立官渠民渠濟運灌田至今稱便毋庸再更惟查漕船入運例有一定尺寸宜量水勢盈縮以定啟板之高下請於館陶臨清各立一水則於漕船將抵臨清時驗看運河水勢將百泉等處渠閘隨時啟閉庶蓄洩得宜於漕運民田均有裨益 詔下部議尋以總漕補熙奏停立水則餘如殿最所請先是殿最 陛辭 上面諭畱心地方民事至是奏豫省便民四條一河工料物向例每斤定價一釐河員自行採買雍正五年十二月兩次減爲七毫歸州縣官代辦遂按地畝勻攤民情苦累請 敕部量增一豫省錢糧有田一畝而輸二畝三畝之糧者有田三畝而輸一畝二畝之糧者名曰折中行糧法或係富戶田多自相模糊或係買賣收除暗行

增減總由未定賦役全書易滋弊竇請釐定上中下科則另造清冊並前總督王士俊開墾案內未盡豁除者亦秉公確查准民自首刊定全書永爲遵守一倉穀推陳易新原爲接濟貧民查豫省州縣惟按富戶強行派借責令買補乃至貧民則多方刁難不肖給與種種情弊請令該撫嚴行參處一河北三府泉眼甚多或蒙驕荆榛或掩藏沙礫請照總河白鍾山奏准之例應汛各員有能開泉若干者題請議敘土人指報者量行賞給疏下總理事務王大臣議行其採買河工物料定價九毫八月殿最等由濟甯至臨清查勘山東運河疏奏利漕便民六條一運河東岸蜀山馬蹕馬場獨山四湖西岸微山一湖爲瀦水濟運要區除獨山微山地勢

高阜向無圍隄無溝築外其蜀山馬蹕馬場從前修築圍隄年久殘缺且有原未修築處請悉行補築仍酌建涵洞石閘於坡水灌注之時開放入湖不惟有益漕運且免淹民田一泉水距湖遠近不等必由泉河始達於湖其達蜀山馬蹕者曰匯河汶河達馬場獨山者曰泗河府河明臣常居敬疏曰河廣沙深屈曲之流不足以潤久渴之物必擇其積沙淤漫者濬爲河泓深五尺闊一尺則水得所歸而趨壑亦易請於每年水落時令該管官挑濬淤淺使泉河深通以資灌輸一挑河定以每年一小挑開年一大挑均於十月十五日築壩至次年二月初一日開壩相沿日久竟有遲至十一月二十日以後築壩者壩一日不閉則河水多洩一日請

定於十一月初一日築壩其開壩日期則以漕船頂臺莊開爲準如遲築早開卽將該管官查參一查東省運河與他省不同南旺分水口北高於臨清九十尺南高於臺莊一百十六尺高下相懸恃有石閘四十八座重重收束得以權衡節宣如糧船到閘下閘未閉上閘已開則建瓴直下一瀉無餘請令治河員弁當春夏惜水如金之時務遵漕規啟閉不得兩閘齊開過洩水勢一汶河自戴村壩壩下分水口以上有邱家口地方舊建滾水石壩壩外支河二道前河臣朱藻於二支河口門築二土牆重重堵塞不使汶水涓滴旁洩但查此處河形上寬下窄春夏水勢浩瀚無路宣洩未免盈溢民田請於土壩內建涵洞一座視水大小啟閉以免淹

溢一東昌府屬武城縣城在運河之南其東北一隅迎濶頂衝城根日漸坍塌雍正四年何國宗議於北岸開挑引河朱藻慮水分勢緩且中有河埂一經刷平兩河合一水愈汪洋恐阻漕運另議做南岸修建甄工以護城垣查該處地方流沙秋汛汕刷上竇下虛甄工業已墊陷斷難經久若止議挑引河又不免如朱藻所慮請於北岸另開運河一段竟將舊河築壩斷流庶城垣可免衝刷九月由天津至通州疏言臣等自運河潮流而上詳勘沿途河道查通州之通惠河源出塞外一自古北口入一自石塘路入會密雲縣之南至天津直沽合漳衛諸水入海水勢散漫河底率多流沙朝潛夕淤東遷西改自有漕運以來並無挑濬深通一勞永逸

之計惟於糧船到時坐糧廳飭各汛官弁多募人夫隨淤隨刮使
剝船通行不致阻滯伏思河道縣長工程煩雜滿漢坐糧官二員
公務填委勢難兼顧請於外河添設通判一駐張家灣專疏濬
歸坐糧廳管轄并設把總二外委四聽通判調遣再裏河向設開
官二但司啟閉不能兼顧隄岸請於通州設吏目一大興設主簿
一遇有修濬等事報明糧廳覈實辦理其添設各官酌給廉俸二
疏均下部議行殿最以經過地方知府以下出境迎送餽遺禮物
甚至公服長跪過於屈褻奏請 敕部嚴禁 允之閏九月疏請
推崇孟母封號以光祀典下九卿議行十月調吏部右侍郎三年
十月授工部尙書四年因本部司員承辦 太廟慶成鐙冒銷工

價殿最等不據實覈減 旨詢又奏不以實部議銷去加三級仍降一級調用 諭曰近來工部諸事廢弛趙殿最任事以來一切毫不盡心有負朕簡用之恩著照部議降調尋以失察主事永福詐索民人財物再降二級是年告病回籍九年卒

右 國史館本傳

嗚呼讀吾師錢巖先生之狀而不禁涕淚流落也今歲春王三月侍先生於湖莊先生從容問曰弟子志師之墓禮與曾煜謹對曰檀弓云孔子之喪公西赤爲志焉或謂卽志銘之始先生領之踰兩月先生薨又踰三月其孤孝廉君世玉以先生之弟徵士功干公所纂行狀來督誌銘曾煜悚慚流汗謂門下士學最劣無能任

排積之役況敢銘隧石與旣孝廉君復以書來曾煜深念先生之
隱若有命也遂誌曰先生諱殿最字奏功又字鐵巖系出宋宗室
後其遷紹興上虞之五夫里由祥三始十餘傳衣冠不息其遷杭
州仁和之平安坊由燮英始先生曾祖也前明授武德將軍其諱
鶴者先生祖也歸安縣學生員績學能文先生幼承祖訓軌範秩
然諱汝楫者先生父也考授州司馬以先生貴三世俱累 贈光
祿大夫妣皆累 贈一品夫人司馬公有淑配曰王太夫人實產
先生此則先生之世系也先生體貌豐碩幼穎朗屬文敏贍康熙
壬午舉於鄉癸未成進士授內閣中書旋授禮部精膳司主事歷
儀制祠祭員外郎兩丁內外艱旋晉刑部江南司郎中辛丑充會

試同考官擢刑科給事中 憲廟登極 命巡視甯古塔督理船
廠授湖南按察使又 命巡視打箭鑪授詹事府少詹事晉內閣
學士兼禮部侍郎又授工部侍郎覈賑山東癸丑充殿試讀卷官
調戶部右侍郎充經筵講官 今上御極轉左 命巡視河南山
東河道改吏部右侍郎擢工部尚書以失察鐫級凡三遇 覃恩
初授奉政大夫累授光祿大夫此則先生之官階也先生出入
三朝位極六官之長勳至穹業至廣橫目之民並受其福海內歌
頌之而其隱微含孕力持乾坤大局雖親炙之久亦茫然莫測其
涯涘也方仕 仁廟時浮沈郎署幾二十年其風采凜然蚤繫天
下治安之望擢補諫垣康熙之末也其受知於 憲廟甚深 植

飛御宇應 詔上言一請停富民之爵一請長官毋抑屬吏受代
一請轉漕條例宜大書深刻毋令陰持兩端 上察先生可大用
於是 命巡視大政者二一則雍正元年船廠之使試盤錯也先
生彈劾貪汙吏之墨者率望風解印綬去特請陪京戶兵刑工四
部章程一視京師而規撫整肅矣兼治盜贓之奸先生謂好不在
私而在官不在民而在兵皆言人之所不敢言權貴人深忌之一
則雍正六年噶達之使覘壁畫也噶達者打箭鑪之外戶打箭鑪
者四川之胸喉控扼西陲形勢便利 廟算增置兵壘以固圍建
寺徙居西藏達賴喇嘛以祝釐此事重大匪藉智諳其必弗蕪先
生相度陰陽作廟翼翼西僧安堵忘遷噶達之西南曰靈雀寺南

曰押納溝下八義二口東曰榮果拉西曰燒巫石二口北曰榮若
撮牙阿玉拉保二口皆藏道衝要先生部署營汛首尾犄角有勢
事訖驛聞舉朝爲懿先生兩銜 天憲克壯其猶 憲廟愈益奇
之 今上卽位素知先生卽有巡視竟豫河道之役豫之北河沁
爲大以浮漕衛河爲大以灌田萬金渠爲大其源以百泉爲大竟
之河水樞爲大水樞以泉源爲大引汶絕濟玲瓏壩爲大先生斥
儀從駕輕舟手探淺深目窮窪突不差圭黍是役也曾煜實往從
焉益歎先生之道無不貫而其言亦無不及也嗚呼先生可謂
三朝之社稷臣矣蓋先生以培士氣爲國脈以恤民命爲邦本以
親君子遠小人爲忠愛之切務故其居言路也請闡題復用孝經

又請省試分校官不避重克監臨官鑣試之其使山東也請封孟母仇氏其充庶吉士閱卷官察舉博學鴻詞俱極精嚴公正其官西曹慮囚多平反官刑垣特上疏曰刑者民命所關不得已而用之者也古稱疑獄汎與眾共之眾疑赦之今刑部未得其實輒用揆此兩字鍛鍊周內其謂之何又曰流人僉妻乃閱其罪未至死不欲絕其夫婦之倫非罪及妻孥也今罪人自稱無妻刑官必求得之辱其身殞其命殊戾欽恤臣愚以爲宜分別罪之輕重而聽之可也疏入 上嘉諭之蓋先生每治爰書輒反覆歎息若有隱傷而惜乎楚梟之不三月而報罷也至其爲郎時卽能叱侍衛之不法者其使船廠劾驍騎校某及東廠管站官某固山大某筆帖

式某其使打箭鑰劾權關某劾四川巡撫某布政使某蓋先生深惡鷹擊毛摯之治而亦不冒媵嬰徇俗混淆黑白遭逢 聖明得行其志嗚呼盛矣先生既屢請急雍正三年歸葬復起乾隆四年以病乞身廬墓南峯三載徙居湖莊日攜一筇徜徉山水閒與田父漁子講釣禮浙之貴官數求典謁者輒不得曾煜辛丑幸出生門既告養違先生廬一江避人索居先生獨賞其迂拙提命無倦容嗚呼曾煜其何以自策哉今先生逝矣曾煜弔影湖山其誰適從哉先生所著詩文如千卷藏於家嗚呼先生之學敬以宅心誠以制行澹泊甯靜有諸葛武侯之操節儉正直有羔羊大夫之風有程正叔之理學而不列門戶有范忠宣之氣節而不樹黨援

有富韓之功名而不爲異同有元白之文章而不事聲氣先生之
養極其粹而其詣亦底於純矣豈曾煜之所能窺其藩而挾其奧
歟惟就志行之落落大者條件繫之其他例弗入先生以乾隆甲
子年五月十二日亥時薨距其生春秋七十有七配陳氏封夫人
子五次世玉卽孝廉君也孫六曾孫六以是年十月某日祔葬於
南峯之麓銘曰

西湖之秀甲於天下篤生大儒錫錫烈烈奮乎東南以佐唐虞爲
朝廷老爲鄉國望爲山澤癘勳業炳麟如湖之澤晴歟雨歟襟
懷朗潔如湖之澄水平乎月乎公生於湖而卒於湖而葬於湖何以
銘之兩峯之石摩厲以須何以薦之六一之泉冰心玉壺誰其鄰

者西山之林北山之于誰其友者快雪之堂春風之廬千秋萬禩
魂魄戀此永那其居

右墓誌銘魯曾煜撰

乾隆四年工部尚書仁和趙公以祀 太廟慶成鐘不當 上意
左遷計公所應降之階猶得回翔宗正奉常之間以需休復而公
不告於寮屬不謀於戚友蹇驢一乘竟出國門公卿聞之追送莫
有及者既抵浙西小舟竟向湖上謁先墓遂居丙舍不入城子弟
固請勵一造影堂絕不與當路達人相還往有來見者盡以疾辭
已而竟入山幽居五年而薨遺命不用赴狀不備儀物聞者以爲
近世大臣所未有也公之諸從弟於予爲文字交最篤公嘗薦予

應詞科屬在門下諸從弟以埏道之文爲屬義不敢辭公由康熙
癸未進士授禮部膳曹郎遷儀曹郎再遷刑部郎三遷爲刑科給
事中四遷爲湖南按察使五遷爲少詹事六遷而至內閣學士其
在掌科也奉 命使盛京甯古塔督視船廠其在詹尹也奉 命
使四川打箭鑪之鳴達督視廟工兼塘汛東西車馬萬里口不言
勞東行則劾奏勲衛駐防之爲士卒害者積年盤根錯節之巨蠹
一旦拔去三軍如挾纊焉西行則直陳撫臣徇蔽私人阻撓興築
之失而後大工以集諸番以之大和於是 世宗憲皇帝始有意
大用公貳工部遷貳戶部其時政事尙綜覈和碩果親王尤凜不
可犯百寮習爲駿厲公以樸誠自矢循分守職在班行中粥粥斷

斷不求赫赫名又孤立無津援退食杜門委蛇時對一尊自澗酌
雖有附熱之徒不得至前或未能無望焉 世宗憲皇帝獨深知
之嘗有薦公足任銓衡者則曰三司重地朕方倚之蓋日三接恩
寵日渥然公之自守泊如也一日燕見九卿侍坐競進談禪 世
宗顧而問曰汝亦能之否對曰臣未之學也 世宗笑曰曷試之
卽拈一語公以儒言對 世宗顧謂諸臣曰真鈍根也臨川李公
早貴不甚悉公之爲人已而 今上特起之與公同官因問子曰
右農何如人也子曰其人厚重如漢丙吉如唐婁師德如宋杜衍
蓋庶幾焉臨川訝曰其然豈其然乎不數日謂子曰子之言然則
年由吏部侍郎長工部故事內務府有營造率資經費於工部然

府員濫支冒銷以爲習慣工部莫敢誰何也公獨正色裁抑之會
重築郊壇馳道公庀材數工覈減府員所估之十九而事集內務
府諸郎羣聚而謀所以去公者始有慶成鐘之譏又以舊尙書註
誤之案加公而并罪之故工部大小官吏俱被議乃獨解公任方
公之被眷也 上嘗問公年以七十對公齒髮甚豐而澤望之神
明盎然甚且有以爲未及艾者 上亦意以爲避事而故增之以
冀引年之澤於是忌者得中之或勸公自白於 上公曰七十若
翁又何所求吾歸已夫且吾昔官湖棗總藩徐聚倫百方排我而
不克及官戶部亦累見厄於長沙陳侍郎而無恙命也今日之羅
亦命也蓋未嘗有幾微之見於辭色焉子雖與公諸弟善然在京

時未始一通謁及詞科之役公枉車騎見過予皇恐謝曰昔伊川入汴呂申公爲中丞先過之伊川報箋以爲後世絕無之禮願未學不足充伊川灑掃之役何以副公之盛意乎公曰士有因舉主而重者舉主亦有因士而重者予何讓焉予爲之悚不自安者久之然予疎慢性成雖銜知己之感而過從甚簡旣免官歸甬上更不能時通候問而公之惓惓於予者無閒焉嗚呼冲襟雅度其可及哉凡公服官之詳其事甚繁具詳行狀墓志不能盡錄但取其大者著之於篇公諱殿最字奏功一字鐵巖先世故宋宗子居紹興之上虞遷杭之仁和者三世曾祖某祖某父某皆以公貴累贈光祿大夫經筵講官吏部侍郎其三世妣 贈如階夫人陳氏

公之喪偶蓋三十年而旁無媵侍其清靜乃天性也嘗渡江展先
墓小肩輿行蕭山道中與縣尉遇訶之避道從者怒公遽下輿避
之頗似魏文靖公故事子二長清國子生次世玉丁酉舉人孫六
長復元以任子恩補工部主事公生於康熙某年某月某日卒於
乾隆某年某月某日春秋七十有七葬於西湖五老峯之陽所著
詩集如干卷奏議如干卷其銘曰

三朝之完人歷試之勞臣知足知止翩然引身他年 國史視予
此文

右神道碑銘全祖望撰

仁和趙大司空殿最乾隆四年以祀 太廟慶成鐘不當 上意

左遷故事內務府有營造率資經費於工部而府員冒濫支銷以爲習慣工部莫敢誰何也會重築郊壇馳道公庀材數工覈減府員所估之什九而事集內務府諸郎羣聚而謀所以去之故有是譴見鮎埼亭集趙公神道碑敬按 本朝 列聖躬行節儉 宮闈日用之數視前代不過什二三而內務府堂郎中皆視爲脂膏窟澤相沿積習幾無一洗手奉公之人有心國計者儻能奏請裁汰內府冗員凡 宮中歲費定爲常經按季由戶部承應則亦儉重度支之一法也

右紀聞陳康祺撰

唐執玉

唐執玉江南武進人康熙四十二年進士授浙江德清縣知縣五
十三年擢工部主事五十四年考選授戶科給事中五十七年轉
本科掌印五十八年奏戶部爲錢糧總匯款項紛繁作弊尤易必
須驅除作弊之人方可清釐乃有盤踞衙門或一人獨霸一司事
或數人共管一省事號爲缺主占爲世業一切案卷在其掌握句
通內外書吏弄法舞文當嚴行查禁以儆將來因劾候補知縣加
捐員外郎向珣與山西司缺主沈天生包攬捐馬事例下九卿議
革向珣捐職缺主城司嚴緝六十年遷鴻臚寺卿尋調奉天府府
丞雍正元年遷大理寺少卿二年遷太僕寺卿調宗人府府丞遷

禮部左侍郎五年三月知貢舉十二月擢都察院左都御史七年
六月 命署理直隸總督時執玉方抱病力疾視事 諭曰卿自
履任以來辦理諸務公勤不懈一切奏對咸出於誠敬兼且明悉
無遺朕甚嘉之當節省無益之勞於瑣細案件不必過費精神百
凡惟總持大綱其餘委之兩司各屬員以責其成毋庸一一躬親
料理也今特遣太醫冀棟診視調治其加意攝養就痊以慰廬念
嗣 賜人蔭二斤仍 命遵旨加意調攝八年二月疏言永平府
屬喜峯口倉存貯灤州盧龍遷安撫甯昌黎樂亭等州縣米石年
久蒸變減價糶賣累任官應賠虧折米二千五百餘石請照通州
中西二倉減價例免賠部議令接受官賠補得 旨喜峯口倉糧

積貯年久難免蒸變折耗況歷任各官更換多人更難責令賠補所有未完米石從寬豁免三月奏密雲城外白河夏秋水暴漲直偏西城沿河一帶舊築土木隄壩不能捍禦近年衝刷殆盡所存僅石隄一道詳察河形上有土嘴下有隄壩逆遏水勢是以泛溢瀾漫驟難洩瀉請挑去土嘴使水暢流直趨南下並近河另築堅厚土隄以幫石隄隄根用榆圍載石以固其基使石隄完好城垣鞏固舊壩亦無庸更議修築得 旨覽所議甚屬妥協作速興工務令於夏月發水以前告竣六月遷兵部尙書仍署總督事務七月奏設直隸易州同一員 從之時直隸被水災執玉奏報上卽命侍郎牧可登副都統阿魯等分往蠲賑兼施執玉又奏

查各處被水情形消長不一有 上諭所及之處而水勢實已消
落可免成災者有 上諭所未及而田廬被淹急須拯卹者乞
敕諭查賑諸臣據實踴勘通融辦理 特旨允行十二月奏天津
直隸州係水陸通衢鹽漕聚泊旗民混淆一切巡查防捕及承辦
水師營各項軍需差繁事冗請升州爲府附郭置天津縣專理地
方事務再寶坻縣廣有六百餘里其毗連之梁城所距邑甚遠一
切公務不能兼顧請將寶坻縣南路一帶割歸梁城並改所爲縣
從之尋定天津新升府曰天津梁城所新改縣曰甯河九年九
月奏督標中軍有操練兵丁之責必須大員協理今副將中軍乃
守備職小未稱請改爲都司凡營中兵馬錢糧應辦公務令都司

辦理於營務有裨部議如所請旋以病乞解任 從之十年 命
管理刑部尙書事十一年正月復 命署直隸總督三月卒於官
賜祭葬如例

右 國史館本傳

雍正七年六月都察院左都御史唐公執玉以疾請告謂其戚友
楊椿曰余病矣將乞休於朝 上其允我乎椿曰 上方嚮用公
公雖病未必允公去古之人有請至十四五卒不許且命之臥理
者矣公其可得歸耶疏上 上命公署直隸總督印直隸治畿輔
兼轄口外旗民事比他督撫尤劇 仁皇帝末年官吏怠於久安
多失職 上欲振新之比七歲督撫七八易皆不稱故 命公公

固辭 上命公速莅事公爲人精明練達於直隸民生利病吏治
臧否靡不悉旣爲總督益以厚民生澄吏治爲己任其弛張舉錯
大小緩急務各得其宜九月大理寺少卿張璨自保定入見 上
問公璨以公政事對 上喜璨復言公病甚 上惻然遣宗人府
府丞冀棟診治公 諭公曰張璨頃言卿病朕深軫念自今卿當
節無益之勞凡事總持大綱無庸一一躬親爲也朕一時不能得
人故畀卿劇任明春史貽直來京朕卽命之代卿也十一月公疾
有聞 上諭公愛養精神量力辦事公接 諭悚感不敢復言疾
矣公事 上不欺 上有問及事入告者言皆洞悉無隱情見流
屬必詢民疾苦所興革宜若何言可採奏行之曰此某屬吏所言

也其有過誨之誨之不可而後糾之情不能上達必曲爲達之
上覽公疏章未嘗不嘉公辦事妥協奏對出於誠敬也或以益賦
覈減語公公言爲政在於節用非二者謂也吾於經費奉行故事
而已他何知耶原任熱河同知明亮請增熱河稅銀并請於榜什
營三岔徵之 上命公查覆公言稅銀原無一定年豐或額外盈
餘歲歉則正額尙虞不足豈宜復有增加榜什營卽巴克什營
去熱河一百六十餘里熱河旣收其落地稅此又收其過路鈔銀
不可長蘆巡鹽御史鄭禪寶以商人虧帑請增鹽價以爲商本
上問公公言爲商爲民 陛下原無歧視眾商不謹身節用先公
後私而乃議增鹽價以厲貧民臣竊以爲非是雍正三年 廷議

耗羨歸公而元年二年之後納者州縣移爲他用前督已允之矣
至是部議追還公言元二兩年耗羨民納雖在三年而歸公之令
實自三年耗羨始且前督允其他用部臣今欲追之是爲小費而
失大信於微員非 陛下體卹臣工之意又言畿南州縣倉穀實
皆民欠今歷年已久部臣責償於州縣官則此數十年中一二百
故官子孫槩行追比於情實爲可憫 上皆從之公持大體不詭
隨 上之信任公皆此類也準噶爾犯約抄邊西北二路用兵官
發帑以備軍需惟公在直隸事集而民不擾八年五月晉兵部尙
書九年九月病篤三上書請退 上以今吏部尙書協辦大學士
劉公代公而 命公還京養病明年八月少瘳命管理刑部尙書

辭不獲十一年正月仍命署直隸總督再三辭上曰朕固知卿病然此任非卿不可卿其爲朕強行朕當令顧琮佐卿也二月病益革自是不穀食者一月然猶日理公事不少輟三月十六日薨於保定官舍年六十有五上聞痛悼命有司給銀供葬事

上在藩邸久知州縣水旱多不報卽位後申諭督撫毋匿災而督撫慮州縣冒賑且虞謂災之由己致也固匿不以聞聞有州縣報者沮之甚則以他事斥逐之如是者十蓋八九惟公所屬州縣有水旱必報報卽以聞上獨賑動以數十萬計而公之辦賑尤詳且善嗚呼上之勤卹民隱公之仰體上心者可謂至哉

迨公歿遺奏云西師未復直隸兩澤愆期臣死不能瞑目則豈非

古之鞠躬盡瘁憂國忘身者乎嗚呼忠矣公康熙四十二年進士
浙江德清縣知縣升工部屯田司主事充五十四年會試同考官
升戶科給事中掌登聞鼓轉戶科掌印給事中累遷鴻臚寺正卿
奉天府府丞大理寺少卿太僕寺正卿擢禮部左侍郎知雍正五
年貢舉充五年武會試總裁官升都察院左都御史德清多巨族
恃其家貴官爲不法令少儒卽縱肆無所忌貴官亦無如何公始
至師門有以事逮者匿不出公奉印至師家曰有官守者不得其
官則去某今令不行請從此去矣其師索其人急出之縣中驚相
告曰公於某族尙如此他可飲法哉將編審吏以五千金餽公公
卻之而罪其吏召縣民集堂下親勘之察其有田無糧者令自首

無田有糧者除之富無隱糧貧無賠課 國初以近京地給八旗
將士別撥他縣地還民謂之代徵往往地居於此而糧在於彼相
隔或百餘里或五六百里寄莊寄糧之名以起公在直隸請歸其
糧於所撥州縣官免追呼之擾民無跋涉之勞在戶科猾惡吏肆
奸於戶部戶部堂司官不問朝臣亦莫敢言者公廉賞劾之 仁
皇帝命置於理官吏肅然在都察院糾察不避權貴然未嘗訐人
之私亦未嘗小過傷人人故憚公嚴正而服公之仁恕公精於律
例在刑部未嘗輕入人死罪在大理平反爲多而聽訟時尤能以
德感人方公自德清北行縣民送者數千人有老嫗伏舟側桑下
叩頭慟不已詢之乃其婦以不孝爲公所格而今孝事姑故也公

好讀宋人語錄取其切於日用者書之門闌戶扉皆宋儒語也嘗
自言吾才拙政事不如人可自力者勤耳勤必先由儉始書其於
聯曰將勤補拙以儉養廉曰吾以銘吾座右也及爲總督 上褒
公曰公勤不懈又 賜扁曰恪恭首牧而 上所賜養廉銀歲止
用十之三四餘悉歸之布政司遺訓子孫無受賻儀公其克勤克
儉不負所志所學者矣公字益功一字薊門江南常州府武進縣
人七世祖襄文公以文章經濟爲明嘉靖中名臣曾祖諱猷可祖
諱宇全父諱于相皆 贈如公官公少孤貧家多難母夫人伯兒
姊妹咸失所公年十八至京訪得之迎母夫人伯兒養於家而嫁
其姊於華亭錢氏妹於平山崔氏兄性剛使氣公事之如父終身

未嘗有違言兄卒撫從子如己子公長身玉立望之儼然而與人
溫溫久而未嘗有忤權勢人避之若浼知舊之賢者雖寒窶尤樂
與之親平居闔戶靜坐闔若無人客至羹豆食蔬質疑問事歡如
也夫人楊氏浙江衢州府知府諱廷望女椿從姑也先公三十七
年卒子三孝本康熙庚子舉人江西撫州府知府少游雍正己酉
舉人候選知縣後公三月卒行健早殤女三壻黃多錫莊模正其
一未字孫男四人女二人曾孫男一人女一人墓在陽湖縣永豐
西鄉黃塘里祖塋之側銘曰

惟聖有訓國治家齊齊有未至治乃斯乖慨自春秋世風不古以
妾爲妻禁之罔顧彼子叔疑使子爲卿有私壟斷爲世所輕自茲

以還波流益濫有美唐公不溺不慍公有數妾其帶是執子復生子仍焉侍立豈無綺縠衣布而已豈無梁肉脫粟而已公之兩子邦家之彥誨以詩書勸以敦善長膺 帝命出宰甯洋公力辭之 帝不公從其次在側有舉之者掣其薦剡曰此不可人有私愛公則無之人有鄙念公則祛之公於今日類軼羣超用施有政其績彥彥爰溯筮仕不比於權介然特立受知 一人威不爲慳利不爲悞清獻之清孝肅之肅刻銘於石納諸幽室直而不華舊史之筆

右墓誌銘楊椿撰

國家恭膺明命式敘海寓欽惟 聖祖仁皇帝久道化成重熙業

洽 世宗憲皇帝宵旰勵精百度咸秩一時翊贊大臣環拱璇極
埒於惇庸奮庸而綱紀之司兵刑之筦行臺行省之樞會其裁機
釐務實克俾吏帖民恬威燁德溢銘彝貞而紀旂常殊非散散賈
銜之所克逮者時則有若薊門唐公謹按狀公名執玉字益功薊
門其號世以國氏至晉陽晉昌而望彌顯元季伯成公繇高郵徙
武進公八世祖貴戶科給事中遞傳至永州知府寶石僉都御史
提督軍務巡撫淮陽順之理學文章政事爲一代之名臣學者稱荆
川先生特典全賜祭葬崇諡襄文太常寺少卿鶴徵翰林院庶吉
士傲純胥爲學者宗峻科世纘經籍紛綸所傳江南第一家也公
曾祖獻可籍六館書法米海嶽畫法董北苑倪蕭閑著詩文七集

祖字全序貢工書畫父子相胥 贈光祿大夫兵刑兩部尚書曾
祖妣某氏祖妣某氏妣某氏胥 贈一品夫人公少穎異目五行
下祖指示父曰大吾宗者是兒也九歲工文十三而父歿十九僑
畿螿補大興博士弟子尋食餼滇南孫學使邀衡文其母閒窺屏
外客獨曰公當大貴時署有狐袂獨不敢溷公幕眾胥異之康熙
三十八年己卯中府丞試式 御試五名癸未成進士庚寅銓注
知潮之德清縣德清多貴官又游潦前令率以逋賦譴公先飭貴
游子弟無得憑勢通謁迺受事減耗五之一時漕耗至三斗多饋
貴官餘率飽吏橐公設監收揭示斛輸耗二升偕僚屬耆正封議
圭撮無得持出吏愕懾而貴官家亦罔敢異議公座右姜公邑少

宗伯徐公門下士也徐族子逋賦又坐它事公捕之急斬走匿公
手印詣宗伯第抗言有官守者不得其官今日請棄官歸宗伯亟
誠族子出于巨杖迺止邑胥曰公於徐氏且爾它豈有歆法哉民
訟率五日蘇訊無少淹編審吏密啟前例里斂銀五千兩官擇吏
分局書故冊貯銀什八它瑣細勿與知公曰是又以前令餌我也
按里徧召糧戶序立堂下覈有田無糧者准自首無田有糧者覈
結免浹四十晝夜冊胥具稔然罔杪忽譌舛邑東蠡山茅山麓水
激田陷糧如故公倣均賦均徭法槩免之邑胥頌曰百年來令君
不愛錢者閒有之未見有明決無毫芒滯實克便民如唐公者而
公之政聲遂繇凋劫邑起矣壬辰六月陟主事有姬偕數千人走

送獨伏桑下慟不輟迺嘗訟婦而婦被公諄戒訖以孝聞者也甲午二月銓注工部屯田司辦西師裘帽暨輓糧駝鞍屈工輒集監督兩窯免商肆娼氓浚溝又免官基增稅乙未分考禮部試中式十有七人偕辛卯湖分考胥稱允是年十月遴選戶科給事中丙申站班 賜松花硯丁酉掌登聞鼓尋陟掌印甄別選郎等五人時議開馬例戶曹缺主勢張甚山西司沈天生偕銓銓知縣向珣謀珣糾黨呈請捐胥窶人子調言家畜馬贏甚富而有力者反被卻贏珣欲迺許改馬又必珣辦迺收評價一匹至銀七十五兩駝倍之而珣輸馬價實未克逮什二三也己亥三月珣憚公居言路遣客乘閒利啗公公正色叱之會河南司金秀章潛詣山西司署

攘捐馬檔案公借珣天生等疊疏參胥論如律巨猾震懾而公之
整齊憲紀董督軍民遂繇此基矣是秋九月恭謁回 鑾 温旨
慰勛甚至尋 特旨內升辛丑春授鴻臚卿勅教習序班聽鏡碑
以紀壬寅六月轉奉天府丞學政克飭疏增滿洲蒙古額四名漢
軍二名十二月 聖祖上賓向 闕哀慟嗣 世宗御極十二月
陟大理寺少卿雍正元年癸卯二月選益寺公初知縣事雅諳刑
律至是彌研繹例比覈漢廷尉決事駁事唐式本統類之精義條
奏胥發律例館多議行甲辰二月 命從耕藉田尋以奏事 賜
文貂二鏡墨二又以奏事 賜荔支而公之祇承殊簪獲班八座
大臣右者始此矣七月陟太僕寺卿寺址隘不容騎疏請移署又

主簿裁缺文案罔轄請授筆帖式爲主簿庶馬政掌故無至放失
是日獲 兪旨旋撥玉河橋東城官屋改建寺署焉乙巳九月陟
宗人府丞丙午正月 命偕選司馬公運通州倉米十七萬五千
石詣津門賑濟五月又 命往盛京偕少宰查公讞副都御史永
福部私濫暨那丹珠案色聽辭析律擬有差是時察典自陳獲供
職 命洎九月九日做柏梁體聯句用纘 聖祖壬戌極盛事而以
公之不列班行也 特命大學士張公代賦焉十月陟禮部左侍
郎 特賜乘馬入朝是日奏移經版庫獲 允除日 賜福字暨鹿
冕鯉嘉蔬丁未二月知貢舉十月總裁武會試合校內外場藝中
式百有八人時川撫請都江堰口二郎神封號公議並及其父李

冰獲 允廷臣議帽頂式十月七日公彙奏 召進面承 俞旨並
賜內府緞十二月遂拜都察院左都御史保舉李君紹膺東粵試
用偕丁未葉君洪韜試縣事繆君興選館職胥 允公初官戶垣鋒
稜礪發洎長南臺總持憲綱絲特疏糾參外它非區頑不可洗濯
者雅不欲以摺摭恣彈射而百寮稔公威望亦胥不禁而肅嘗言
正已率物吾所聞於端肅馬公忠介鄒公者憲臣之道宜爾也儻
雷霆日擊則魑魅訖不可窮而威不已褻乎識者謂公真得副相
體已酉六月以足疾寢劇不良於行疏乞歸奉 旨署直隸總督
印務並賜人蔭二斤公雅負朝堂望而尤諳吏事事至輒迎刃解
縷析節剖凡山陬海濼氓疾苦胥鉤校悉之而賑州縣災傷尤亟

大清文獻通考卷一百一十八

牒未上先覈酌勤卹繕摺立奏雖不成災亦必率僚屬捐貲給糧
附報秋成摺彙奏它若雨雪陰霽斂穫贏歉或河流衝激地多積
水亦必纖悉奏聞以故惠賑亟頒而窮氓無至失業者胥公力也
隆平縣藉田產瑞禾三十三本公停進獻飭貯先農壇俟八月秋
成摺附奏 硃批曰深慰朕懷並賜鮮荔支一盞齋到乃十有五
日也爰分給文武僚屬俾胥識嶠南珍味焉公雅習勞勩事巨細
擘畫不少輟九月二十九日摺奏直隸墩汛 硃批曰好又奉
硃批曰昨張燦到京備奏朕深爲惻然於衷卿自履任以來一切
事辦理公勤凡有奏對甚屬誠敬明悉朕甚嘉之但當節無益之
勞精神不必施於瑣屑案件當就綱領辦理朕因不得其人用卿

與此繁任今特遣冀棟來商酌藥餌可加意養攝以慰朕念尋
特賜次子少游舉人偕試禮部十月九日宗丞冀公至宣諭並
齋賜人蔘二斤公伏讀感泣不能起謝摺上又硃批曰覽卿奏
謝矣遵旨竭力撙節調攝可也洎冀公歸摺謝賜三奉硃批
曰覽卿奏謝矣遵前旨愛養精神量力辦理事務加意調攝若有
用冀棟斟酌方藥處即便奏聞保定咫尺可再命來也此雖家人
父子尚不克護息丁寧若此而實符於古之所謂明良相遇千載
一時者也永平理事同知明亮啟熱河稅務詞及司憲三公命
公密覈並覈同知陳肇奎公覆奏曰此項稅銀向牌頭陳國瑞等
私收侵蝕經前任同知葛森始請設立牙行酌定歲課暨接任洪

通明亮等俱解銀一千六百五十一兩有奇至陳肇奎請以四千兩爲定額又給八溝街等七所帖以五百兩爲贏餘今明亮奏稱若熱河稅銀儘收儘解實可收銀五六千兩又稱若榜什營三營等一並徵收可媿張家口二萬兩然商稅原無一定如年歲豐稔糧食絡繹進口則四千五百兩外實有贏餘如遇歉收則貨物稀少正額尙恐不足故止以四千五百兩爲折中定額其所稱榜什營卽巴克什營也是往來出入之區原貿易地況距熱河止一百八十餘里熱河旣已收其落地稅而榜什營又抽其進路抄銀恐商賈裹足不前或致正稅缺額非經久計也至所稱牙行陳金玉卽私侵稅務陳國瑞改名充認尙爲陳肇奎斥革恐被逐不甘故

飾張大之詞以遂報復之計但熱河旗民雜處商賈貿易俱爲蒙古往來陳肇奎闖入於蒙古語清字文茫然不解人地實不相宜熱河稅務似應仍徵四千五百兩調陳肇奎內地遴選滿洲誠實人員令儘收儘解竅一二年內權其多寡以爲定額 硃批甚爲得當稅不增而司憲事亦寢歲杪懇請 陛見 硃批允初春御園候 旨尋復賜福字庚戌正月三日 特遣提塘迎又三日公接 駕圓明園外蒙垂問仍給二小內侍扶進宮門 賜坐慰問良久奏對胥稱 旨至十七日始蘇京邸回密雲城外白河夏秋水漲猝偏西城昔築石子表廣隄以護城復築土隄沙隄木壩以護石隄而河流湍駛衝刷寢盡知縣事吳君璟詳請修築前霸

昌道張公慶會議曰築壩堵河非一勞永逸計請於河西繇李家莊至師家莊別疏新河一道繇北口直趨南口水勢獲洩可無泛濫奉 諭古壩支河不可畸廢令公覈奏公檄霸昌道李公如梓知大名府章公培基往勘詳曰李家莊師家莊地勢高河身三丈有奇若開它新河重費工力更須多築隄壩堵塞舊河東口方可引順流之水歸入新河而應築隄壩地又直迎正衝勢難樹立即舊築土隄沙隄木壩俱橫擋急湍山水奔騰直下與壩相激旋築旋衝徒糜厚費詳察河形上有土觜以迎水性下有隄壩以遏水勢是以泛濫瀾漫驟難洩議請挑去土觜寬讓河身使水暢流直趨南下並請貼近河身築堅厚土隄一道以幫石隄隄根用

榆園載石以固基址務使石隄堅好則城垣鞏固近歲被衝堤壩亦無庸更議修築矣公曰順水之性事易功倍如梓培基議是也具奏上 硃批甚屬協當且令水發前蔽工檀城獲完而順鵲備易間役不告勞焉公又以密雲城浸塌令如梓確估並奏亦獲俞旨公少懼閔凶雅習襄文公耐清苦訓嘗曰輟木扉作榻寒不赴熱暑不揮箑雨不張蓋此襄文公之遺範也勤儉則能節用節用則不妄取此襄文公羣從雞澤公之遺訓也是歲四月例給養廉銀二萬兩公會計公用暨院署羸服糲食費少支券它閤貯承宣庫先後摺報凡一萬五千兩有奇七月詣易州周閱泰甯山天平峪尋晉秩兵部尚書漳永定滹沱溢洺諸河時積雨驟漲鼓澤

胥溢公檄諸屬亟相地勢堵捍議疏鑿而先給銀勤卹苗氓摺上
命刑部侍郎收公可登等四人齎帑並發倉穀協賑口給三月
糧公覈諸州縣有論及而水業寔消者有開載不克盡而田廬實
涇者請 敕賑使勘實通辦又慮愚氓飢則亟食飽則恣費至互
寒且質劑稱貸酌先給其半餘埃冬春散給摺胥 允行九月十
五日部檄畿輔暨齊晉豫雇廩五百解肅州輓軍糧公覈雇費厚
酌議不若買廩五百擇幹辦人循塗牧養解詣肅其費既減於雇
而淹速惟我贏回肅卽畱充巴爾坤輸輓用又可不需購買後訖
從公議十二月 賜柑橘 上諭直隸寄莊寄糧之弊公奏曰任
土作貢必須按地徵糧則經界可清而賦役始無滄混使地居此

處糧寄彼處則相附既遠稽察誠難今查除宣化府屬之懷安宣化萬全順天府屬之寶坻豐潤三河等縣寄莊寄糧業已欽奉上諭指示外它如晉州之武邱村孔目莊趙州之馬圈村有地畝坐落晉趙二州而完糧俱在眞定府贊皇縣又宣化蔚縣之夾道溝細賢莊有地畝坐落蔚縣而完糧仍在宣化縣又宣化縣之井頭莊地畝坐落宣化而完糧仍在西甯官有追呼之勞民多跋涉之苦所當欽遵 諭旨亟爲更除改正復細體 上諭推廣思維 國朝定開之初將畿輔五百里內民地圈給從龍將士而撥別邑地畝補給被圈之民每年被圈州縣將該戶應完之糧應收之租造冊關送受撥州縣催徵移解散給戶民完糧贍家名曰代徵

其始非不甚善迨因收租不便有將地畝轉賣原撥州縣者亦有移居就耕者其被圈州縣固已難於催徵卽地畝未賣地戶未移糧額在圈地之區而佃租戶在撥補之境拘比則隔屬不便關催則往返徒勞積欠未清官民交累是亦地寄此處糧寄彼處均宜亟爲釐剔請將遵奉 上諭州縣及見今查出州縣並通飭各屬詳查續有查出凡地在此處而糧寄彼處者均飭令地方坐落州縣照其應納之糧編入本邑此增彼除務令糧隨產轉不使彼此交錯其代徵地畝除被圈士民已將撥補之地賣與原撥州縣並移居就耕則是人地皆不在於本境虛懸戶糧徵比爲難今將此項糧額悉編入撥地州縣此收彼除無庸復存代徵之名其有地

未賣出並不移居就耕者查近今地方多有入官田畝應請飭令各州縣按租銀多寡如數撥補被圈之民令其就近耕佃收租完糧如無入官田畝及雖有而不足抵給者應將見田抵給竣復有入官地畝陸續抵補惟是未經抵補以前徵糧者有路遠之難寄地者有抗頑之弊被圈地方官以催徵未免參處情實屈抑應請先將此項錢糧竟歸撥地州縣編入糧額就近徵租扣除完糧外餘則移解受補州縣散給本戶竣有入官地畝抵補再行改額則責成既專催徵亦易但恐州縣或以餘租非比糧銀不復上緊徵解則受補士民不需實惠相應照依地丁錢糧之法考覈奏銷儘有怠徵照例處分再民間饒裕之家每有置買別邑地畝亦屬寄

註此則地糧俱在一處無庸更正改隸請嗣後令經徽州縣於開
徵之始將此等寄莊人戶開明地糧確額移送見居州縣出示催
輸或有抗欠該州縣移提查比儻徇庇不發許經徽州縣詳報該
管上司轉揭嚴參如此則經界各正田賦悉清舉凡寄莊寄糧之
弊可以剔除矣時部檄覈直省議久未上公以代徵緣圜地直隸
官民積年彙滋甚辛亥二月三日奏上亟牒咨先議行而部未覆
此公寢病危憊之所尤拳拳者也直隸驛站馬額設雜支歲開銷
銀以錢計以兩計有差大率浮多至十兩蓋驛站衝僻前後殊勢
而奸胥占悛故額不肯改公懲詭辭吏覈實疏請馬一匹歲銷雜
支銀三兩六錢著經制額諸屬協濟馬康熙癸酉撥僻地馬百二

十匹協濟昌平延慶宣化至乙未正站中又設腰站撥僻遞馬八
百一十四分隸正站腰站牧養費不克贍胥檄責轄驛遞州縣公
請改隸昌平延慶宣化新增馬令受協州縣牧養又覈雍正丙午
裁汰夫馬工料暨裁僻遞馬工料銀凡二千八十兩有奇以償協
濟費俾受協者無至誤差出協者無至賠墊部覆獲 允直隸耗羨
至雍正乙巳籍公用而癸卯甲辰耗羨州縣亟請免院司嘗批抵
批免後多勒賠至庚戌著例查奏無敢上請者公疏請獲 宥先是
疏具稟眾多難之公曰此甚易曉清查嚴限批免著賠胥在查奏
恩旨前況批免追賠直隸事也查奏且匝直省今請追者在直
言直斷恩出自上爾果獲如公言直隸民貸米穀霸州文安七州

縣通米二萬一千六百九十五石有奇穀一萬六千四百三十石有
 奇三十載不克償公曰此人產胥絕者也若按限參處承追官恐
 多株連況實民欠非侵那虧空也若按怠徵律勒追賠則數百家
 子孫胥當羈比矣疏請豁獲 予免徵二月二十日 欽賜御書恪
 恭首牧扁恭設聽事紀鎮定范陽盧龍橫海山後數千里會府
 恩榮而自書鏡石於左隅以識警勸焉是時亟承褒錫而體日益
 羸固乞骸骨奉 旨以兵部尚書畱京養病九月杪謝事壬子正
 月扶服入 見 賜歸第調攝二月復 諭冀公棟勤視疾七月
 疾少瘳 賜鮮荔一盃八月二日 特旨曰刑部尚書事著唐執
 玉管理伊步履維艱不必勉強入朝或在衙門或在寓所悉心看

彙指示司官務期刑名妥協欽此會秋審公力疾視事又奉旨
於本衙門定案凡大臣意見異同欲商推者令司官送閣不必至
端門會審此惟古之師傅元臣暨平章軍國重事者閒獲優賢佚
老命而公繇始迄終之恩遇何其盛也公時業病劇猶日昧爽
詣署晡始歸或昏暮手疑難巨案歸然燭研定而迄冬臘十二日
遂不克復詣署矣癸丑正月 命再署督篆協辦顧公送題奏彙
巨案目猶數行下閤奉 旨詰問顧公暨承宣王公初不逮公也
公感咤兩泣九叩寢榻謝而病繇此彌棘矣遺命治棺無越三十
金喪葬胥從儉薄而泣敘少孤寡迫狀口授仲子少游書之又口
授遺本錄彙釋定以殫垂歿無忘忠敬之義又命無受賻至三月

十六日卯薨於位距生康熙己酉三月十三日年六十五顧公偕僚屬入哭檢篋無一物曰是且不克斂吾儕奚忍坐視偕王公少伙佐之乃斂克歸里 欽賜祭葬復允支承宣庫銀乃克治窀穸具以甲寅二月十二日葬於陽湖黃塘祖塋側之阡蓋嘗謂戶版至廣職員綦繁惟公裁機釐務傑才邁軼以前代名臣論則馬中令之會文切理岑中令之籌不費手戴參預之律意豪析姚紫微之須臾裁決以唐氏系牒論則唐民部之才優符檄唐吏部之囚不言冤唐質肅之奏劄鯁峭唐襄文之執正大猗公實克兼具之而膺畢公大名之封綜蘇公南陽之秩以建牧作伯首列藩維威重臣良有以也公克順父母指事兄無閒言收族戚俾散而復克

聚病且革諄命襄文公賜塋擴飲福楹宇而語不少及私昔襄文
泛黃田海汛渡劉河口抵蛟門外洋一晝夜且行千里革猶巡
行瀕海執管放賑然則武選署考工署司諫署工文禹門之所講
肄固非專在文章太常公輔世編亦克闡文武左右儒紳編惟公
上續祖武以樹偉望於泰交極盛世異數曠典超越今古議者恆
推公翊贊首庸而彌以頌 聖祖 世宗知人善任之明也公官
大理 誥授中憲大夫洎以兵部尙書署直督晉秩一紀錄二
特贈光祿大夫配楊氏有婦德歸公一歲生子孝本而歿 贈恭
人竣貤 贈一品夫人子三孝本庚子舉人知福建同安縣擢同
知漳州府事轄南勝克續公政績少游已酉 欽賜舉人竣銓知

縣事扶公匱以毀卒於德州行健早卒女三媿銓同知州事黃多錫六館生莊模正其僭也孫敦懷敦仁敦化敦裕曾孫超曾昔漢陽內閣學士張公嘗狀公行子爰文其神道之麗牲碑而系之銘曰

顯允唐公百僚之則銓宰澗右祖訓是式屯曹迺陟左掖迺升臚句迺掌留轄迺膺棘寺迺依罔寺迺試宗正迺倅宗伯迺貳帝曰俞哉南臺汝諧 帝曰俞哉畿輔汝諧迺晉司馬載枋邦政迺兼司寇載典邦禁再莅畿輔載綏兆民墓道載懷 二聖克明

右神道碑儲大文撰

吳士玉

吳士玉江南吳縣人康熙四十五年進士改庶吉士散館授編修
充宋金元明四朝詩集纂修五十三年遷右贊善五十四年遷侍
講尋轉侍讀五十六年提督順天學政五十八年二月 上巡幸
畿甸士玉扈 駕至玻璃口 召試律詩十二韻 賜御纂周易
折中及周易本義四書一部 諭獎其詩文俱好考校秉公五十
九年遷侍講學士充武會試正考官六十一年轉侍讀學士雍正
元年正月奉 命祭南嶽未還擢內閣學士充經筵講官入直南
書房二年二月充江西鄉試正考官十月充武會試副考官十二
月 命教習庶吉士三年遷戶部右侍郎仍兼內閣學士四年五

月陝西按察使許容密參布政使兼河東鹽政馬喀與咸陽商人
高俊通同作弊以已變價之鹽妄請分年帶銷請旨審訊命
士玉赴陝同巡撫圖理琛察審革馬喀職會馬喀供容仇誣而圖
理琛復以馬喀布政使任內虧空庫項奏諭曰許容善解任交
總督岳鍾琪同吳士玉圖理琛復審吳士玉係特差審事之大臣
乃一切不能主持甚屬無能著嚴飭行九月士玉等復奏言查年
羹堯案內入官鹽原估銀十九萬八千八十一兩有奇除潞安澤
州等十七處存店並在池未運之鹽作價十五萬七千四百八十
一兩未發賣所請分年帶銷尚非虛捏至咸陽長安鎮安鄠縣潼
關華陰解州南陽八處俱陸續賣完馬喀身任鹽政將已賣價銀

混請帶銷難與商人高俊無迎賄情弊依奏事不實應杖徒其虧
空庫銀萬二千餘兩應追給咸長等八處鹽既變價容尚非挾仇
誣參但潞澤等處積鹽尙多遽稱賣完所奏亦不實應革職疏下
部議馬喀如所擬調容浙江布政使五年士玉調工部左侍郎時
宣化總兵李如柏劾懷來參將呂尙儒於飭將空糧製辦軍器火
藥抗玩不遵 命士玉往審得實革尙儒職六年以進黃冊玩忽
部議革職 命以內閣學士效力八年七月補禮部右侍郎仍兼
內閣行走八月轉左九年正月轉吏部右侍郎兼署刑部侍郎十
二月轉左十年五月士玉患病 命在家辦事並 遣御醫診視
十月擢都察院左都御史十一年二月遷禮部尙書卒遺疏入

諭曰吳士玉和平謹慎學問素優簡任秩宗正資料理今聞溘逝深為憫惻著散秩大臣一員帶領侍衛十員往奠茶酒禮部堂司官及各部漢堂官俱著前往弔奠柩起程之日亦著往送沿途經過地方著官弁等差人護送應得卹典該部察例具奏尋賜祭葬如例諡文恪

右 國史館本傳

吳士玉字荆山吳縣人為諸生操數寸不律丹鉛海內舉業之名諫一時時義門遺喜諸選本盛行而篋中一集與相驂驛故海內佔畢士無不知有荆山先生者商邱宋公撫吳日延致之為經師其子弟經指授者所為文章皆溫醇雅正循循然守先民矩矱

不少軼公雅重之然固未識其能詩也一日首夏集吳下諸名士
賞芍藥爲婪尾會偕五言古體一章諸賓客皆屬和公乃酌先生
酒強之詩先生亦欣然詩輒工四座大驚又和公延熹華嶽廟
碑歌益縱橫排昇奇氣不可方物眾愈駭乃垂首殿牖太息於通
才之無不可也毘陵邵青門客幕府久與處論詩最合爲敘其集
以行中丞公評其詩則曰氣清格穩唐人正派又曰原本昌黎而
沈鬱頓挫直入少陵之室錄入十五子詩選中其欣賞之也如此
既成進士第入史館二十餘年歷官至大宗伯卒於位 賜謚文
恪說者謂詩人多窮若斯之身名俱泰者見亦罕矣先生溫潤縝
密比德於玉最好獎勵後進嘗於興勝僧院見余所作梅花詩入

首大加擊節亟命鈔胥錄去時溧陽師偕遊既詢得其人則曰俊
逸清新具有傲睨不羣之槩樓村可作應歎不虞君之涉吾地也
因津津不置口子方怱怱捧檄未遑修謁比以薦舉入都而先生
已赴玉樓召矣青冥送吹噓強箭射魯縞循覽遺編曷勝知己之
感

右小傳鄭方坤撰

性桂

性桂滿洲正藍旗人姓王氏先世居義州 國初來歸康熙四十五年性桂由天文生補欽天監博士洊授靈臺郎五十九年遷五官正六十年補刑部主事六十一年二月遷禮部員外郎五月授監察御史巡視福建鹽政雍正五年遷大理寺卿六年三月命查浙江倉庫錢糧九月奏言臣清查黃巖縣倉庫後就近察看鎮標之海門汛弁對岸台協之前所汛原設將弁駐防陸路並無哨船二處外卽重洋內有支港請增小快船數隻又海門至黃巖前所至台邇每數里應增礮臺營房撥兵駐查凡沿河營汛均照台州寺前橋例設哨船巡緝得 旨嘉允十一月授都察院左副都

御史七年二月擢漕運總督三月署浙江總督七月兼署杭州將軍八年赴總漕任九年上命將倉場侍郎岳爾岱總漕張大有議覆巡漕御史苗壽等條奏漕船過淮陋規及敬陳管見兩摺交性桂議奏尋議漕船陋規等款一幫船到淮原有津貼費儻例外苛索私相授受經承計贓論罪旗丁同究處一旗丁倩人造冊奸徒自名冊房串同派費應禁革令本幫字識繕寫一過淮時運官應赴盤糧廳投文吏役上號不許畱難一漕臣盤驗米色攙雜短少卽應摺責領運官稽察杖人役作弊一江浙幫出鎮江口暨梳從前催漕之員就便查看未免多事應俟過淮日漕臣親驗揚州三岔口係各幫總匯選幹弁彈壓禁止恃強爭先一汛地員弁

不顧風色水勢混漕船過黃者議處疏虞加等治罪一委宿遷營遊擊駐白洋河徐州營副將駐邳州八閘稽查弁兵於逆流添夫挽運不得勒索又議敬陳管見等款一旗丁造船每板薄釘稀六七運便朽腐嗣後嚴飭糧道給足料價其監造之衛守備及經胥等不得希圖陋規違式仍督該丁賠造至漕臣親驗回空歸次領銀速修接運旗丁以朽腐漕艘橫觸民船勒索者革治一各衛僉定正副二丁赴次交兌如革丁生監等竄入卽究運官失察容隱分別參處疏入均如所請行十年四月授刑部尚書七月調兵部九月復署漕運總督十二月奏請截畱漕糧四十萬石於蘇松等處被災州縣平糶又疏稱廬禹幫船雖隸江北較之江甯等處

更遠三百餘里又有大江之險原定十二月過淮每致違限情實
可原請改限正月庶不遲誤領押弁兵亦免參處俱下部議從
之十一年正月回兵部尙書任六月 命同內閣學士雙喜往北
路軍營協理軍需十三年七月辦鄂爾坤糧餉事務八月調補吏
部尙書乾隆元年仍畱鄂爾坤尋患病來京調理 遣御醫診視
三年十一月疏請休致得 旨卿才品優長簡任銓衡正資料理
覽奏以老病求罷情辭懇切著以原官休致十二年八月卒 賜
祭葬如例諡恭簡

右 國史館本傳

俞兆晟

俞兆晟字叔穎浙江海鹽人康熙丙戌進士官內閣學士公視學江左時諸生進謁相接如先生弟子論文行外兼及詩品畫理以二者皆公所長也清風和氣至今猶想慕之

右 國朝詩別裁集小傳沈德潛撰

國學字用表卷之六

三

李鍾義

向例館選不分省以致邊省多缺通江李雪原鍾義官太常寺少卿雍正四年疏言康熙四十五年至六十七年科不分大小省俱有庶吉士至元年癸卯漢軍及河南四川進士無館選者二年甲辰蒙古及山西南河陝西湖南四川廣東廣西雲南貴州諸省進士俱無館選之人請廣儲才之路 上交部議准行今各省皆有館選自鍾義疏奏始

右記余金撰

李鍾義字雪原通江人康熙丙戌進士授翰林院檢討官至太常寺少卿雪原有保甯志一書文獻獨備經史賦人多傳誦詩不多

見雨村詩話載其佳句如野水浮於漢遙峰劃彼蒼是
能得唐賢
三昧者吉光片羽亦足珍矣

右 國朝全蜀詩鈔小傳孫桐生撰

陳時夏

陳時夏雲南元謀人康熙四十五年進士五十一年考授內閣中書五十七年遷刑部主事五十八年正月遷員外郎三月遷工部郎中六十年遷廣西道監察御史巡視南城雍正元年正月授河南開歸道仍帶御史銜尋奏河北兩年歉收種來甚稀民多乞食臣會同署巡撫牟欽元設法捐賑恐未能徧給請 旨或發帑賑濟或蠲免錢糧使災黎均霑不致失所 上嘉允之二年晉湖北按察使嗣以開歸道任內封邱縣生員罷考時夏不能彈壓查拏巡撫石文俸題參革職三年授直隸正定府知府四年遷長蘆鹽運使尋加布政使銜署江蘇巡撫五年正月疏陳蘇松水利請動

洛興修命副都統李淑德原任山東巡撫陳世倌會同勘議尋
合疏奏婁江急宜修濬常熟之福山塘昭文之白茆河太倉之七
浦河上海嘉定之吳淞江武進之孟瀆德勝之新河丹陽之九曲
河皆淤淺應濬從之先是上敕時夏改收江安二屬漕糧十
萬石爲穀二十萬石運貯閩省至是時夏奏言江省儲穀因雨多
不堅恐舂碓折耗不敷二穀一米之數且運穀較運米費多請卽
以漕米運閩省今年有收以所運米於本處易穀貯倉似爲兩
便得旨允行三月疏言江南錢糧正耗請照直隸河南例統解
布政使縣之大小分上中下三等酌留養廉數用地方一應公事
所司料理動用耗銀報銷至督撫司道及府佐貳等亦各給養廉

通計支用並應存之數歲底奏明留司庫充公疏入報 聞先是
上念時夏母老家居以道遠未迎養 特命雲南督撫贈資斧
送至蘇州復 賜人蔭六年五月江蘇布政使張坦麟調任山東
時夏奏坦麟任內錢糧不清請停赴新任坦麟亦奏時夏囑接任
藩司趙向奎勒措交代 上命時夏覆奏六月奏言雍正五年分
解司庫飯食添平銀三萬七千餘兩張坦麟未交趙向奎以遲延
揭報臣因 國帑攸關不敢徇隱並非吹求勒措今遵 旨令速
交代起行庶兩省公事無誤得 旨汝識見卑鄙褊淺實非巡撫
之才經朕屢加訓諭而不能奮勉改革才智限於此亦無可如何
也汝自莅任以來盜不能緝吏不能察承追二百五十萬錢糧不

能完二十分之一蘇郡城大開銅鋪而不能禁止河工遲誤而不能勸懲於刑名案件則一味姑息其餘不職處不可枚舉惟能令戲班減少大半緞鋪關閉數十座僧道數千百人還俗祠廟數處改爲書院在汝意以爲王道變化風俗但不知實有益於民生處何在對人時感恩泣下而不能仰體朕意辦理一事似此報德於朕又復何益是月解時夏巡撫任往署山東布政使張坦麟卽署江蘇巡撫尋命時夏仍留蘇會辦各案虧空十二月諭曰蘇撫所屬未完地丁錢糧積至八百一十三萬八千餘兩陳時夏到任後將從前分年帶徵之項一併催追以致小民艱於輸納日事嚴比朕心深爲軫念乃陳時夏又奏稱蘇松積欠難於清結從前

既蒙聖恩蠲免浮糧今請以舊欠之糧派於新糧戶內分年徵收
抵補積欠夫蘇松浮糧朕仰承 皇考聖心每歲額免四十五萬
兩煌煌明旨布告億兆豈有既蠲正額而復借此抵補積欠之理
且舊欠自有本人卽非本人亦自另有著落若舍此不追而均派
新糧是刁民因積欠而得利良民因先輸而倍徵從此人人效尤
誰復輸供正賦況以舊欠派入新糧舊欠未必全完而新糧又致
欠缺此等狂悖之論不過因朕畱伊在蘇州清理未完一時不能
脫身藉此草率完結耳今尹繼善見在清查歷年帶徵錢糧著一
槩暫停徵比俟朕派員前往與該地方官協理清查七年二月因
所舉知縣蔡益仁貪蹟不職經總督尹繼善奏參部議降二級調

用八月丁母憂回籍十二月服闋來京加僉都御史銜授霸州營田觀察使尋奏文安大成兩縣界內修築橫隄千五百餘丈本年營田四十八頃俱獲豐收但恐水涸卽旱請於大隄東南尙家村建石閘隄內挑引河子牙河灌溉仍於北岸多建涵洞小閘以資宣洩 從之乾隆二年六月疏言農政全書載營治區田之法近又見聊城知縣蔣尙恩刊教民區田法清河同知方鳴夏刊區田錄要四面鑿井澆灌備旱莫善於此北省更有益畝費工本銀三兩百姓無力舉行請派員租民地試種俟有成效推廣 從之七月授內閣學士三年十一月卒

右 國史館本傳

陳時夏昆明縣人康熙丙戌科進士官江蘇巡撫世宗時有田
陳李鄂之稱謂田公文鏡李公衛鄂公爾泰及公也

右滇繫小傳師範撰

國朝耆獻類徵初編卷六十九目錄

卿貳二十九

方苞

余甸

通智

張璠

繆沅

蔡世遠
子長溪

卷之十九

國朝耆獻類徵初編卷六十九

通奉大夫前署江西巡撫江西布政使司布政使湘陰李桓輯
卿貳二十九

方苞

方苞江南桐城人寄籍上元康熙四十五年由舉人會試中式以
母病未與殿試五十年十月副都御史趙申喬劾編修戴名世
所著南山集子遺錄有大逆語下刑部擬名世凌遲詞連苞從祖
孝標曾降吳逆所著滇黔紀聞亦不法應戮屍子登嶧雲旅孫世
禎緣坐苞爲名世作序論斬命九卿詳議五十二年二月諭
曰戴名世從寬免凌遲著卽處斬方登嶧方雲旅方世禎俱從寬

免死並伊妻子充發黑龍江此案內干連人犯俱從寬免治罪著
入旗是月苞隸旗籍三月 上知苞文學 特命入直南書房八
月直 蒙養齋編校 御製樂律算法諸書六十一年六月 命
爲武英殿修書總裁十一月 世宗憲皇帝嗣位頒 恩詔其一
以族人犯罪牽連入旗者赦歸籍時入旗合 詔條者惟戴名世
案而原讞例不得援赦刑部特請 上肆赦苞及其族人雍正元
年苞既承 恩宥二年請假歸葬三年還京 召見有 先帝持
法朕原情汝老學當知此義之 諭九年 特授左中允十年五
月遷侍講七月遷侍講學士十一年四月擢內閣學士苞以足疾
辭 命仍在修書處行走不必辦理內閣事務六月教習庶吉士

八月充一統志館總裁十三年正月充 皇清文穎館副總裁十
一月疏言常平倉穀定例存七糶三有司奉行失宜必穀既貴始
詳上司定價示期開糶未奉批不敢擅開請嗣後各州縣遇穀偶
貴卽酌定官價一面開糶一面詳報又穀之存倉則有鼠耗盤量
則有折減移動則有腳價糶糶守局則有人工食用春糶價稍有
餘卽畱充諸費庶中材可守若廉能之吏遇秋糶價賤盈餘較多
聽據實詳明別貯一倉備歉歲發賑用下部議行乾隆元年三月
疏言救荒之政宜豫周官保章氏以星土之法五雲之物先期知
水旱降豐荒之祲象以修救政雖其法無傳然夏末秋初則水旱
豐歉情形十得八九舊例報荒必待八九月後災民朝不待夕而

臣又思古者城必有池故易曰王公設險以守其國周公立司險
掌固二官以通守政所恃惟溝樹耳凡國都暨近郊遠郊必設溝
樹三重鄙邑三重詩曰築城伊瀆池與瀆卽周官所謂溝也本無
城而掘作則起土而溝形已具本有城以築外垣使附城民得保
焉卽春秋所稱郭與郊保也不獨通川之地濬溝卽可爲池卽地
不通川而溝深三丈則行潦所匯可納城市流澌春秋戰國時雖
彈丸小邑莫不有溝以爲限有樹以爲蔽秦漢以降古法不講故
盜賊滋多請將城堡溝樹之政及時修舉又吳楚蜀越嶺徼皆賴
川流塘堰以灌秔稻不專恃雨澤請飭各省凡通川之地可開

支河及沮洳可與大圩與大塘大堰宜勸作修復者詳報覈估造冊具題北五省塘堰圩隄可興者少則查千家數百家之鎮集宜開溝渠築垣堡者亦造冊具題遇歉歲及時興作以工代賑至溝樹之地不能無廢民田而歉歲官給原價買之民亦樂從部議五六月報災恐滋捏飾浮冒所請不可行至溝樹塘堰諸事應令各督撫因時地熟籌而行得旨如議六月 上憐苞老病 命太醫時往診視尋 諭曰國家以經義取士將使士子沈潛於四子五經之書含英咀華發摠文采因以覘學力之淺深與器識之淳薄而風會所趨卽有關於氣運誠以人心士習之端倪呈露者甚微而徵應甚鉅也顧時文之風尙屢變不一苟非明示以準的使

海內士子於從違去取之介曉然知所別擇專意揣摩則大比之期主司無以操繩尺而度羣才士子豈能合矩矱以應搜羅乎有明制舉之業體備各種如王唐歸胡金陳章黃諸大家卓然可傳本朝文運昌明英才輩出劉子壯熊伯龍以後作者接踵莫不根柢經史各抒杼軸此皆足爲後學之津梁制藝之科則者自坊選之禁垂諸功令而大家名作不得通行士子無由著斯文之炳蔚率多因陋就簡剽竊陳言襲取腐語間或以此倖獲科名又輾轉流布私相做效馴至先正名家之風味杳乎難尋所係非淺鮮也今朕欲裒集有明及本朝諸大家時藝精選數百篇彙爲一集頒布天下以爲舉業指南學士方苞工於時文著司選文之事務將

入選之文逐一批抉其精微奧窔之處俾學者了然心目間用以
拳服摹擬嗣後並弛坊間刻文之禁儻果有學問淹博手眼明快
者不拘鄉會墨卷房行試牘准其照前選刻但不得徇情濫觴及
狂言橫議致釀惡俗苞遵 旨選錄有明制義四百八十六 國
朝制義二百九十七以清真雅正爲宗呈 欽定頒行天下尋充
三禮義疏館副總裁 命再入南書房二年六月擢禮部右侍郎
苞仍以足疾辭 詔免隨班行走七月教習庶吉士九月疏陳九
卿會議二事一九卿中有異議者宜並列上 聞以俟 聖裁一
詹事科道宜仍與九卿一體會議所議不符亦隨九卿並議奏疏
下總理事務王大臣等議駁 諭曰廷臣會議其秉公建白與否

皆發於其人中心非立之章程可迫之使然者若如方苞所奏不但事有難行卽定以爲例而不肯視國事如己事之人其緘默仍如故也嗣後九卿等當思受朕簡畀之恩凡遇廷議事件胸有所見卽據理直陳互相參酌以歸於至當毋得推諉主橐衙門隨班畫題以了故事負朕博採眾論之至意十二月苞復以老病請解侍郎任 許之仍帶原銜食俸教習庶吉士四年二月 命武英殿重刊十三經廿一史苞疏言庫貯書籍並無監版經史而見今監版更剝蝕無憑校對請 敕內府及內閣藏書處徧查舊本諭在京諸王大臣及有列於朝者如家藏明泰昌以前舊本奏明交館並敕江南浙江江西湖廣福建五省督撫購送舊版經史彼

此互證再孔穎達賈公彥等所引十三經及傳註並周秦間諸子
多譌誤請詳校開列呈覽酌改又前侍講學士何焯曾博訪宋
版校正前後漢書三國志遺譌應就其家索原書照式改註別本
其原本仍行給還從之五月諭曰方苞在皇祖時因南山
集一案身罹重罪蒙恩曲加寬宥令其入旗在修書處行走效
力及皇考卽位特沛殊恩准其出旗仍還本籍又漸次錄用授
職翰林晉階內閣學士朕嗣位之初念其稍有文名諭令侍直南
書房且升授禮部侍郎之職伊若具有良心定當痛改前愆矢慎
矢公力圖報效乃伊在九卿班內假公濟私黨同伐異其不安靜
之錮疾到老不改眾所共知適值伊以衰病請解侍郎職任朕愈

允之仍帶原銜食俸上年冬月因伊條奏事件偶爾召見一次伊
出外卽私告於人曾在朕前薦魏廷珍而參任蘭枝以致外間人
言藉藉經朕訪聞令大學士傳旨訓飭伊奏對支吾朕復加寬容
未曾深究近訪聞得伊住魏廷珍之屋魏廷珍未奉旨起用之先
伊卽移居城外將屋讓還以示魏廷珍卽日被召之意又庶吉士
散館屆期伊已將人數奏聞內閣定期考試矣伊復於前一日將
新到吳喬齡一名補請一體考試朕心卽疑之今訪聞得伊所居
之屋卽吳喬齡之產甚覺華煥伊受託爲之代請似此數事則其
平日之營私可以槩見方苞深負國恩著將侍郎職銜及一切行
走之處悉行革去專在三禮館修書效力贖罪苞以年近八旬時

患疾痛懇回籍調理大學士等代奏 恩賞侍講銜准其回籍十
六年卒

右 國史館本傳

古今宿儒有經術者或未必兼文章有文章者或未必本經術所
以申毛服鄭之於遷固各有溝渚唯是經術文章之兼固難而其
用之足爲斯世斯民之重則難之尤難前侍郎桐城方公庶幾不
媿於此然世稱公之文章萬口無異辭而於經術已不過皮相之
若其惓惓惟斯世斯民之故而不得一遂其志者則非惟不足以
知之且從而培擊之其亦悽矣公成進士七年以奉母未釋褐已
有盛名會遭奇禍論死安溪方傾倒於公力救之幸荷 聖祖如

天之仁宥死隸旗下以白衣直 禁廷其豫校讎令與諸 皇子
遊自和碩誠親王下皆呼之曰先生事出破格固無復用世之望
矣然公雖朝不坐燕不與而密勿機務多得聞之當是時安溪在
閣徐文靖公元夢以總憲兼院長公時時以所見敷陳某事當行
某事害於民當去其說多見施行雖或未能盡得之諸老而能察
之故公之苦口不一而足不自知其數也或欲薦公則曰僕本罪
臣不死已爲非望公休矣但有所見必爲公言之儻得行拜賜多
矣 世宗卽位首免公旗籍尋欲用公爲司業以老病力辭九年
竟以爲中允許扶杖上殿以優之再遷爲侍讀學士孫公嘉淦以
刑部侍郎尹京兆兼祭酒勁挺不爲和碩果親王所喜有客自朱

邸來傳王意授公急奏令劾之當卽以公代之公拒不可其人以禍怵之公以死力辭不數日竟有應募上劾者孫公下獄公謂大學士鄂公曰孫侍郎以非罪死公亦何顏坐中書矣於是孫公卒得免人多爲公危之而王亦不以是有加於公也尋遷內閣學士公以不任行走爲辭 詔許免上直有大議得卽家上之公感激流涕以爲不世之恩當思所以爲不世之報然日益不諧於眾矣今上卽位有意大用公時方議行三年之喪禮部尙書魏公廷珍公石交也以諮公公平日最講喪禮以此乃人倫之本喪禮不行世道人心所以日趨苟簡諄諄爲學者言之而是時 皇上大孝方欲追踐古禮公因欲復古人以次變除之制隨時降殺定爲

程度內外臣工亦各分等差以爲除服之制

此說本之梓亭陸氏最爲有見

魏公上之聞者大駭其格其議魏公亦以此不安其位尋遷禮部侍郎

公又辭 詔許數日一赴部平決大事公雖不甚入部而時奉獨

對一切大除授并大政往往諮公多所密陳盈庭側目於公初公

管董蒙養齋河督高君方在齋中公頗言其必貴故河督最向往

公及其違眾議開毛城鋪舉朝爭之不能得外而督撫爭之亦不

能得而臺省二臣以是下獄公言於徐公元夢令爲 上言不應

以言罪諫官 上卽日出之於是公獨具疏力陳河督之愆 上

頗心動河督自請入面對 上以其平日素向往公也以疏示之

河督大恨亦思傾公禮部共議薦一貲卽入曹和碩履親王莅部

已許之矣公以故事禮部必用甲科不冝平署王亦怒會新拜秦
安爲輔臣而召河間魏尙書爲總憲 朝廷爭相告曰是皆方侍
郎所爲若不其排之將吾輩無地可置身矣是後凡公有疏下部
九列皆合口梗之雖以睢州湯文正公天下之人皆以爲當從祀
者以其議出於公亦阻之公嘗陳酒誥之戒欲禁酒而復古人大
酺之制以爲民節用又言淡巴菝出外番近日中原徧種之耗沃
土以資無益之產宜禁之其言頗近於迂闊益爲九列中口實於
是河督言公有門生在河上嘗以書託之 上稍不直公而禮部
中遂有挺身爲公難者公自知孤立密陳其狀且以病爲請 許
以原官致仕仍葺書局眾以 上意未置公也適庶常散館又以

公有所私發之遂被削奪仍在書局行走而荆谿人吳紱者公所
卵翼以入書局至是遂與公爲抗盡竄改公之所述力加排詆聞
者駭之然 上終思公一日吏部推用祭酒 上沈吟曰是官應
使方苞爲之方稱其任旁無應者嗚呼温公退居畱臺神宗方改
官制以爲御史大夫非光不可其亦古今所同慨也夫於是公自
以精力倍衰求解書局 許之 特賜侍講銜歸里杜門不接賓
客江督尹公踵門求見三至以病辭乾隆十有四年八月十有八
日卒春秋八十有二公諱苞字靈臬學者稱爲望溪先生江南安
慶之桐城人桐城方氏爲右族自明初先斷事公以遜志高弟與
於革除之難三百年中世濟其美明季密之先生尤以博學稱近

始多居江甯者公亦家焉三世皆以公貴 贈閣學公之成進士也宗人方孝標者故翰林失職遊滇中陷賊而歸怨望語多不遜里人藪名世日記多采其言姓而不名事發吏遂以爲公也及訊得知爲孝標吏議以其已死取其五服宗人將行房誅之刑長繫公以待命賴安溪而免難故公自謂宦情素絕非有心於仕進每得一推擇必固辭而 三朝之遭遇實爲殊絕不得不求報稱豈知勢有所不能也伯兄舟以高才而不壽公傷之推恩其子道永得官順天府通判而道永之罷官頗遭羅織亦以公故公又於故相爲同籍公子道章亦得罪於故相之子故累上計車卒不得一售公少而讀書能見其大及遊京師吾鄉萬徵君季野最奇之因

告之曰勿讀無益之書勿爲無益之文公終身誦以爲名言自是
一意窮經其於通志堂徐氏所雕九經凡三度芟蕪之取其粹言
而會通之不喜觀雜書以爲徒費目力玩物喪志而無所得其文
尤峻潔未第時吾鄉姜編修湛園見之曰此人吾輩當讓之出一
頭地者也然公論文最不喜班史柳集嘗條舉其所短而力詆之
世之人或以爲過而公守其說彌篤諸經之中尤精者爲三禮晚
年七治儀禮已登八秩而日坐城北湄園中屹屹不置次之爲春
秋皆有成書閒讀諸子於荀管二家別有刪定本皆行於世其在
京師後進之士挾溫卷以求見者戶外之履昕夕恆滿然公必叩
以所治何經所得何說所學者誰氏之文蓋有虛名甚盛而答問

之下舌橋口噤汗流盈頰不能對一詞者公輒愀然不樂戒其徒
事於馳騫故不特同列惡公卽館閣年少以及場屋之徒多不得
志於公百口謗之是則古道所以不行於今日也公享名最早立
朝最晚生平心知之契自徐文靖公後曰江陰楊文定公曰漳浦
蔡文勤公曰西林鄂文端公曰河閒魏公曰今相國海甯陳公曰
前直督臨川李公曰今總憲宣城梅公曰今河督顧公共與臨川
每以議論不合有所爭然退而未嘗不交相許也雅稱太原孫尙
書曰殆今世第一流也及太原進冢臣而公稍疑之嘗歎曰知人
之難諒哉履邸雖惡公而知公未嘗不深一日鄂文端公侍坐論
近世人物文端歎曰以陳尙書之賢也而自閩撫入京聞其進羨

餘金六萬人固未易知也王曰其方侍郎乎其強聒令人厭然其
堯舜君民之志殊可原也而前此力扼睢州從祀之尙書垂死悔
恨自以爲疚心嗚呼大江以南近日老成凋謝經術文章之望公
與臨川寶尸之雖高臥江鄉猶爲天下之望去年公卒今年臨川
繼之蓋無復懋遺矣豈不悲夫予之受知於公猶公之受知於萬
姜二先生也其後又與道章爲同年且重之以婚媼予之罷官也
公豫見其兆諷予以早去及予歸而公又以爲惜欲畱予而不
公亦從此被撼矣公之密章祕牘世所未見唯道章知之而道章
先公卒故予亦不能舉其十一也西州之痛言不敢私亦不敢諱
安得以銘爲辭其銘曰

經說在簡文編在笥雖登九列依然齋志強聒而言何補於事適
招多口成茲顛寔懸知取耿百年長視老成凋喪嗣子又逝孰知
公者青蠅僅至墓門片石秦淮之淚

右神道碑銘全祖望撰

方先生諱苞字靈皋其先桐城人也曾祖某官副使以避寇遷上
元祖職官教授父仲舒用遺逸名江南北先生生四歲父嘗雞鳴
起值大霧以雞聲隔霧命對卽應曰龍氣成雲稍長從兄舟學博
究六經百氏之書更相勸以孝弟弱冠游太學安溪李文貞公見
其文歎曰韓歐復出北宋後無此作也時天下士集京師投謁無
虛日公卿爭相汲引先生非先焉不往益見重諸公閒中康熙丙

戊會試未殿試母疾速歸適丁外艱緣序南山集下詔獄獄具

聖祖命以戴名世案牽連者免罪編旗籍方爰書上時同繫皆惶

懼先生閱儀禮自若人咸服其定力俄 召入南書房試文者三

每奏御輒 嘉歎會修樂律麻算書移 蒙養齋監修爲誠親王

王性巖承事者多獲訶責先生偏偏不阿遇事持正王敬之延爲

王子師旋充武英殿總裁 世宗卽位放先生暨族人還 詔曰

朕以方苞故宥其全宗苞功德不細矣先生聞 詔泣以母卒未

得請假歸既事還朝 召見因足弱不任行 世宗命二內侍翼

于殿陛順視嗟歎久之雍正九年 特授中允期月閏三遷至內

閣學上教習庶吉士督修一統志乾隆元年入直南書房擢禮部

右侍郎二年復教習庶吉士兼文穎館經史館三禮館總裁先生
自惟受 三朝恩厚起罪疾餘游列卿貳皆僅以文學報既在部
得與 廷議乃言田文鏡所定地丁錢糧四月完半之害請復舊
制河以南祥符等五十州縣應徵糧十三萬六千七百有奇中隔
黃河厥土壤壤牛車淖陷逢陰雨雇夫盤運價且十倍宜永定遠
水州縣折銀交部請禁燒酒種煙以裕民食又言賑荒當令地治
者視民眾寡得擅發倉粟勿拘存七糶三常制請因荒歲聚民修
城濬溝池謹封樹以制盜賊之遁藏又言 國家大事宜博稽於
眾集思廣益請令詹事科道皆與九卿議各抒己見得專達又請
以湯斌從祀孔庭熊賜履祀賢良祠章數十上俱蒙 批報而同

列多厭苦之遂以足疾辭部務供館職四年以譴落職仍修三禮
越三年進周禮義疏 上畱覽兼旬 命發刻一無所更卽以衰
病乞休 賜侍講銜歸歸八年卒年八十有二先生平生言動必
準禮法初告歸以先世未遷葬不遑家居寄僧舍中葬乃返痛兄
舟之不遇得任子 恩請授兄子嘗建宗祠顏以教忠置祭田以
歲時合族生徒餽遺悉予嫻族之喪者耄期嗜學猶日有課程治
儀禮十易彙云所著周官集注儀禮注禮記析疑喪禮或問春秋
通論文集等書晚號望溪學者稱望溪先生

沈廷芳曰先生其今之古人歟廷芳昔受經邸第見先生著緇布
小冠衣縕袍憑白木几箋經不稍休與門弟子講論肫肫以六經

之言質諸行弟子若侍侯生申公側穆然起忠敬也及立朝嘗諤
多與時牴牾然天子獨鑒其心無欺非先生之碩學忠誠惡能
得此哉

右傳沈廷芳撰

嘉慶癸亥余自潛山移家上元與靈皋先生孫厚堂交因謁先生
祠堂於龍盤里卽沈椒園臬使廷芳爲先生作傳中之教忠祠也
祠二舊祠先生所葺自一世至始遷上元之太僕凡十二世新祠
百川先生長子師范徵君希文所葺自十三世徵君曾祖以下而
百川舟靈皋苞椒塗林三先生共一室蓋先生兄弟葬亦合墓在
沙墻余亦曾展視也子孫祀祖立祠堂非古禮然相沿已久所謂

禮從俗耳少時聞鄉先生言百川先生肥白如瓠壽三十七先生
體瘦身長面微有痘斑目光視人如電臆弱人當之輒心悸不能
語壽八十二而文名之盛則讀書人自束髮就外傳卽知有桐城
二方先生者余生晚不獲親炙容儀展拜之餘悚敬與忻慕之意
交至焉余嘗考南山之獄沈傳及先生文集俱不詳載南山集者
桐城戴憂庵名世集名宿松朱杜溪書序比之南嶽故名南山余
最不喜人作文以其地之名山川比人今人爲壽序詩文序者往
往如是杜溪有文名南山集已禁序不可得而見觀其名固已知
其落尋常結習矣宛平人尤雲鵬雲鶚寄居江甯從憂庵學文富
於貲遂刻之雲鶚爲隆都蔡氏壻與先生爲僚壻先生又故與憂

庵相善因亦爲之作序流傳都下集中有與余生書引方樓岡學士孝標滇黔紀聞語有違悖憂庵與武進趙恭毅公申喬次子侯赤侍讀能詔爲同年生尙書發其事時康熙辛卯先生以中式舉人家居奉母部遺筆帖式王祿全蘇巡撫張清恪公伯行令臬司焦映壽蘇州知府孟光宗江甯知府劉涵密逮先生及尤氏兄弟見清恪年譜其日則爲十月二十六日見高澗張彝歎自超送先生詩註其詩曰古有文章禍今傷離別神神韻亦絕佳也先生赦歸後歷官卿貳文章事業海內共知惟被逮事迄今九十餘年鮮有知者厚堂年且七十不及知況後生於厚堂者哉余是以詳記之雖然先生居土街子孫能世守其宅祠堂則傾頽已甚矣厚堂

力不能修相與太息久之而出

右祠堂記熊寶泰撰

桐城方先生諱苞字靈臬號望溪進士官至禮部侍郎窮究經史而於三禮考覈尤精通千古盛衰得失之故辨歷代離合異同之言以蘊蓄鬱積而宣之於文其爲文也簡而中乎理精而盡乎事隱約而曲當乎人情大抵根柢於史氏而游泳乎韓歐者也今錄其言學者亦可知先生之所自來矣其原過曰君子之過值人事之變而無以自解免者十之七覲理而不審者十之三眾人之過無心而蹈之者十之三自知而不能勝其欲者十之七故君子之過誠所謂過也蓋仁義之過中者爾眾人之過非所謂過也其惡

之小者爾上乎君子而爲聖人者其得過也必以人事之變觀理而不審者則鮮矣下乎眾人而爲小人者皆不勝其欲而動於惡其無心而蹈之者亦鮮矣眾人之於大惡常畏而不敢爲小者則不勝其欲而姑息自恕焉聖賢視過之小猶眾人視過之大也故懷然而不敢犯小人視過之大猶眾人視過之小也故悍然而不能顧服物之初御也常恐其污且毀也旣污且毀則不復惜之矣苟以細過自恕而輕蹈之則不至於大惡不止故斷一樹殺一獸不以其時孔子以爲非孝微矣哉亦危矣哉其通蔽曰譽乎己則以爲喜毀乎己則以爲怒者心術之公患也同乎己則以爲是異乎己則以爲非者學術之公患也君子則不然譽乎己則懼焉懼

無其實而掠美也毀乎己則幸焉幸吾得知而改之也同乎己則
疑焉疑有所蔽而因是以自堅也異乎己則思焉去其所私以觀
異術然後與道大適也蓋稱吾之善者或諛佞之虛言也非然則
未嘗知吾之深也吾行之所由吾心之所安吾自知之而已若攻
吾之惡則不當者鮮矣雖與吾有憎怨吾無其十或實有四三焉
與吾言如響必中無定識者也非然則所見之偶同也若辨吾之
惑則不當者鮮矣理之至者必合於人心之不言而同然好獨而
不厭乎人心則其爲偏惑也審矣吾友劉君古塘行直而清其爲
學常自信而不疑心所不可雖古人之書不苟爲同也而好人之
同乎己夫古人之說不能強吾以苟同而欲人之同乎己非心術

之蔽乎知君者猶以爲自信之過也不知者將以爲有爭氣也君
與吾離羣而索居久矣會有所聞書以質之其學案序曰昔先王
以道明民範其耳目百體以養所受之中故精之可至於命而粗
亦不失爲寡過又使人漸而致之積久而通焉故入德也易而造
道深程朱之學所祖述者蓋此也白陽明王氏出天下聰明秀傑
之士無慮皆棄程朱之說而從之蓋苦其內之嚴且密而樂王氏
之疎也苦其外之拘且詳而樂王氏之簡也凡世所稱奇節偉行
非常之功皆可勉強奮發一旦而成之若夫自事其心自有生之
日以至於死無一息不依乎天理而無或少便其私非聖者不能
也而程朱必以是爲宗由是耳目百體一式於儀則而無須臾之

縱焉豈好爲苟難哉不如此終不足以踐吾形而復其性也自功
利辭章之習成學者之身心蕩然而無所守也久矣而驟欲從事
於此則其心轉若顛馳而不安其耳目百體轉若崎嶇而無措而
或招之曰由吾之說塗之人可一旦而有悟焉任其所爲而與道
大適惡用是菱菱者哉則其決而趨之也不待頃矣然由其道醇
者可以蹈道之大體而不能盡其精微而駁者遂至於猖狂而無
忌憚此朱子與象山辨難時卽深用爲憂而預料其末流之至於
斯極也金沙王無量輯學案以白鹿洞規爲宗而溯源於洙泗下
逮饒仲元眞西山所定之條目以及高顧東林之會約蓋無量生
明之季世王氏之颯流方盛故發憤而爲此也此所謂信道篤而

自待厚者歎惜乎其學不顯於時無或能從之而果有立也今其
孫澍將表而出之學者果由是而之焉則知吾之心必依於理而
後實耳目百體必式於儀則而後安而馴而致之亦非強人以所
難既志於學胡復樂其疎且簡以爲自欺之術哉先生尙節槩表
幽隱喜交天下士而於學術則獨守程朱有友王源崑繩恢奇人
也所慕惟漢諸葛武侯明王文成而目程朱爲迂闊謂使百世以
下聰明魁傑之士沈溺於無用之學而不返是卽程朱之罪也先
生作而言子毋視程朱爲氣息奄奄人觀朱子上孝宗書雖晚明
楊左之直節無以過也其備荒浙東安撫荆湖西漢趙張之吏治
無以過也而世不以此稱者以道德崇闕稱此轉渺乎其小耳吾

姑以淺事喻子非其義也雖三公之貴避之若浼子之所能信於程朱也今中朝如某某子夙所賤惡儻一旦揚子於朝以學士或御史中丞徵子將亡命山海而義不反顧乎抑猶躊躇不能自決也吾願子歸視妻孥流行坎止歸潔其身而已矣崑繩自是終其身口未嘗非程朱先生以此語載之李剛主墓誌並云余出刑部獄剛主來唁以語崑繩者語之剛主立起自責取不滿程朱語載經說中已鐫版者削之過半因舉習齋存治存學二編未愜余心者告之隨更定曰吾師始教卽以改過爲大子之言然吾敢畱之爲口實哉

右學案唐鑑輯

桐城方氏苞主宋學儀徵阮氏元主漢學望溪侍郎好詆康成雲
臺宮保篤信鄭氏是以宮保刻 皇清經解凡方氏之書槩不錄
焉愚謂聖道如天經義若海春秋冬夏天無不該河漢江淮海無
不納與其存町畦之見何如廓天海之觀乎

右松心日錄張維屏撰

李文貞公光地以直撫入相桐城方侍郎苞叩之曰自入 國朝
以科目躋茲位者凡幾公曰屈指得五十餘人侍郎曰甫六十年
而已得五十餘人則其不足重也明矣望公更求其可重者見望
溪集以文貞名儒名相媲美舉夔侍郎猶勉之如此後之人儻經
綸理學不逮文貞萬萬者復以諛言日至讜論無聞或純任權術

或曲謹小廉依恃寬大自命賢相恐鼎折覆餗之譏不待終日矣
可不危與

右紀聞陳康祺撰

余旬

君姓余氏諱旬字田生福建福州府福清縣人也自爲諸生卽以名義爲己任好面折人於善類操之尤切用此修飭之君子亦不樂與之居同俗趨勢利者聞其風豫懷疾心康熙丙戌成進士初試江津令時西事起澤望破藏連青海諸番謀窺川陝年羹堯巡撫四川加正賦通私茶猶不足以奉戰士多額外急徵檄再三至君不應乃遣內丁持印文告諭自朝至日晡君不出使者譁乃開門坐正堂命反接眾相視不敢動君憑怒乃共推曳伏之地投六籤丞簿皆曲踈爲請須臾士民集堂下者數百千人耆老數十升堂以身蔽使者告哀曰公何難棄官但我民自今無怙恃矣望哀

赤子無依寬使者法久之乃命釋縛羈候越日使者因弁吏索原文君曰還報大人我無子閉門待劾原文已閒道付二三執友矣遠近驚駭旬月聲震京師羹堯曰此民所戴也斥之傷眾心不去百城玩令會行取逐以君應入爲吏部主事時冢宰張鵬翮久爲督撫入掌諸部號爲剛直少宰湯右曾聰明辨察吏不能欺不惟官中無能異同九卿廷議多取決焉及君至屢與齟齬固植不移凡會議直前爭辨盈廷愕然終不能屈也主選二年權要富人子求速化者多爲所格長官喜得君以有辭而亦陰患其黷聞絀其議君怒求退甚力吏胥大喜私語求進者曰毋躁此君將去必可得也君聞之條列文書達部及已駁議而未奏者十餘事曰凡此

皆作奸巧法易爲所蒙必上 聞吾乃去長官許諾乃探懷中出
告歸牒旋丁父艱旣免喪猶廬墓側不歸集古金石法書作隸篆
行草徧考諸史與知故盤旋若將終焉湘潭陳滄洲每歎並世無
豪傑並少趨死不顧利害人余以君告曰斯文其次矣其忼直大
類吾子及滄洲督河首薦君爲兗甯道士民間聞君至訟獄者爭赴
焉幾奪廉使之政久之廉使及巡撫所已弊亦赴愬於君君刺得
其情反覆申列必大當乃止滄洲歿齊蘇勒以工事劾君士民相
隨聽勘者數百千人蘇勒巡工至君所部父老結綵手炷香檣首
於舫前請登岸受萬民瞻拜擁肩輿至廣原升高坐聚者萬餘人
四面環拜投香於地高如邱陵齊呼還我余公吾民萬世尸祝河

督大驚慰以寬言眾皆涕泣曰吾民愚非得實據不敢退河督許
拜疏出矢言眾乃散 世宗憲皇帝聞之立召君入見退語執政
曰吾又得一直臣矣擢山東按察使政聲少減於爲監司時以君
自始任意主以善感人又謂近聖人之居宜崇禮教輕刑罰不知
頑梗不可遽化故民未見德也逾年入爲少京兆君歷官皆盡革
陋規其陳臬憐囚徒不能自衣食者酌取商人歲饋三之一以資
給之兼完囹圄修學宮書院聚教羣士委有司公用注籍會繆沅
句察山東鹽政列參君解官出質讞成回籍追補而閩人或私相
訐摘怨家題楹詩句以爲怨望乃君所書也

唐張籍詩有官止作
山林老平地能開洞

整幽有司欲假此自爲功復致君於獄事未白而卒君爲人辭色雖

厲而虛中樂善出於至誠巡撫某嘗疏薦海豐令湯豫誠擢知兗州府事謁謝曰此 上意也子見兗甯道自知之及見君叩曰子與吾友望溪何交也豫誠曰某知世有方子方子未必知世有豫誠君曰吾蒙 詔入覲及郊方以書來曰恐不得與子相見山東廉吏無如海豐子何道與相知豫誠曰某不知也君甚喜已而相視泫然君既歿豫誠每流涕爲人道之聞者感傷歷官之地父老子弟皆羣聚哭奠丙戌會試榜發余以母病遄歸未與殿試同榜生俱未面君入爲吏部始造余出所刻四書文則序之者余也作而曰旬之文子宜知之然子知吾文未若吾之自知故代子言遂相與爲友其再入爲京兆僦屋近吾廬要言公事畢必相過余退

直少暮輒曰何爲是栖栖者與及出就理執余袂而啼噓曰吾平生臨大難不懼此行自忖不宜有大咎而心搖搖豈吾氣衰死期將至耶余曰 聖天子在上子何憂君曰中外信信吾恐思見君而不再得矣又曰古之君子達可行於天下而後行之吾輕用吾身以困於羣愚終無以報 君父悔其可追子慎毋再誤哉君晚而有子方四歲君出質余閒日必往攜持叩之聞人今長成將冠矣索君之行狀久不可得乃略舉人所共聞知及與余爲交之始末譜而銘之以歸其孤銘曰

有虎負隅或編其鬚甘爲攫糲而得烹衢旣結 主知謂宜遠施
張辟四設歿志長齋斯民則直士論惟公令名無隕是亦有終

右墓誌銘方苞撰

余宗丞甸剛方清簡精於吏治仕宦三十年屢起屢蹟直聲震天下初張清恪公撫閩時開鼇峯書院延公主之每事諮焉郡守周某將登白簡以丁艱免疑公排己後公知江津縣周適爲郡守欲下石焉公不爲動攜一僕之任每早起坐堂皇民有投牒者據情事輕重卽命之檄召所訴人不以屬吏片言立決遣訟爲之簡惟日據案與諸生誦說文藝所徵賦卽貯庫中纖毫不入私室守廉其實亦加敬焉及人爲吏部主事每事必親不假手胥吏出入封緘其室自佩鐻鑰屢擢至山東按察使攜二僕買驢之官人競傳曰此三閭大夫也其文章書法亦冠一時

恒通老幼委務不給
卷之二

右事略李元度撰

三

通智

通智馬佳氏滿洲正黃旗人康熙四十六年由監生考授理藩院筆帖式五十七年擢主事五十八年遷員外郎雍正元年升郎中三年擢內閣侍讀學士四年正月遷大理寺卿二月甘肅巡撫石文焯議於甯夏察罕托輝地方開渠建閘灌溉民田 命通智往勘修五年擢盛京工部侍郎六年二月調禮部左侍郎六月調兵部右侍郎俱仍畱察罕托輝督工七年疏報新鑿大渠及重濬六羊渠工竣請 錫嘉名以垂永久 賜大渠名曰惠農改六羊渠名曰昌潤八年復 命勘視大清漢唐三渠尋奏言三渠俱應疏濬而唐渠尤甚請於今冬備料明春興工其大清渠漢渠俟採辦

物料完備於十年春興修 從之十一年兼正紅旗蒙古副都統
十二年用兵準噶爾 命往歸化城協理都統事十三年遷兵部
尚書乾隆元年二月以定邊大將軍平郡王福彭請於歸化城至
鄂爾坤附近臺站設立馬廠 命通智董其事五月奏殺虎口外
清水河田畝前經喀爾喀固倫額駙端多普多爾濟奏准墾種後
經停止繳回京部票而屬人仍行占據理應撤出但額駙耕種多
年已成熟地計四萬八千三百七十五畝請照蒙古賣田例價每
畝償銀二錢得旨允行先是奏由歸化城運糧二萬石於鄂爾
坤預將半價發商嗣因撤兵停運勒限嚴追六月諭曰歸化城
商人軍營貿易全藉駝隻牛馬爲營運資本今聞以運價無償盡

行變抵營運既屬艱難所欠愈難清繳通智辦理此事甚不妥協
大非朕恤商之意著寬其限期徐徐還清庶貿易有資帑項亦不
致終於無著十月以辦事紛更又將土默特官員濫刑拷掠革職
二十二年卒

右 國史館本傳

匡助者屬須得志蘇

卷六十九

四

張璨

張璨字豈石湘潭人由舉人於康熙五十九年令無錫邑俗善訟
璨刺決如流蒞而赤髭坐堂皇上貌若神老吏滑胥率斂手畏避
而憐才下士於邑中之有文行者輒先過訪旋丁內艱去士民奔
走呼額如失父母

右傳秦瀛撰

張公諱璨字豈石號湘門少負異才客遊江南所與交多知名士
康熙戊子鄉舉知無錫縣以潔清休養爲治方數月丁母憂縣人
皆走哭服闋奉 特旨赴京 賜內府物授河閒知府值水災亟
請上官賑卹弗聽尋晉副使銜赴陝西籌辦軍需未行改長蘆鹽

運使入謝繪災民圖以進 上爲動色時方議興營田水利晉按
察使銜督辦工程內擢大理少卿以事鐫秩歸杜門不出自顏所
居曰相在室璨工古文辭及書法子之濼廣西通判

右述聞謔瑤錄

張公諱璨字豈石號湘門湖南湘潭縣人年四十七鄉薦康熙五
十九年出知無錫縣歷知河間府長蘆鹽運使加按察使銜內擢
大理寺少卿前後在官凡七年故有七年盤帶濫吹竽之句知無
錫如鄉過山埡風搖其輿下輿步山深處風如故左右落梧葉遽
呼役兩人拘吳八來役問何事曰風故曰吳八安在曰我初來官
詎知之往不獲杖汝役晒之訪一日不獲受杖三日不獲杖如前

役置不訪日逐嬉觀劇偶晨過屠所一人叱屠者曰而割何不正
讓我吳八割役聞駭拘之見於梧下訊曰汝吳八乎曰然拘何爲
曰汝罪發直供不汝刑吳八固曰無罪杖亦無供乃命伐梧吳狀
驚愕不可強而伐之命再掘強亦不可乃命役掘五尺得女屍頸
有傷而面如生吳八對屍戰慄於是且杖且供蓋鄰邑夫婦行乞
吳八逐其夫強好不從手拉之斃云事在十三年前梧爲吳八手
栽已拱矣葉左右落如八字故機觸而拘吳八吳八供實置之法
守河閒查獄一犯呼張公救我而曰某故秀才某官誣我以強姦
斃命惟公救我初某官無子攜妾之任婦與女居城女日繡於後
樓會官戚婚禮婦往賀秀才偕友人亦往賀且行且語過樓下女

適唾落秀才帽彼此不覺樓下有屠門一屠過適見之夜衣冠來
門役詢問詭稱官表姪頃晤婦戚家故來此徑入女室則稱我秀
才某日中過樓下小姐唾我帽其有意乎言已解衣強姦女怒且
羞呼婢役逐之出投繯死宦憤告秀才秀才稱冤守令無能得犯
屈秀才獄中有年矣公故疑乃索得女之婢細詰強暴狀婢曰燈
光中貌髣髴但身軀修短不同然猶記解衣時胸露黑毛一團公
驗秀才無之於是信秀才誣思所以得強暴而脫秀才一日示稱
地方多盜蓋厲鬼出世城隍之役縱之也某日訊城隍之役士民
莫不啞然夏五月果訊於聽事觀者擁塞大譁奇公曰人無譁移
後院訊可容萬人然由聽事至院必數 曲室室中預伏兵役而

女之婢在焉令願觀者男入女否入室則令各租徐行以驗驗八
百人得胸有黑毛者屠人也先是示凡三易距訊之日久絕不言
秀才事而來觀者初不意爲是故屠人亦來既得屠人出秀才於
獄一日坐堂上決事忽四役拘兩人至曰盜也公注視良久怒而
杖役曰若良民曷誣爲盜兩人亦叩頭頌青天青天遂賞酒食去
夜分進所杖之役曰日中所拘果盜然小卒也拘小卒大盜必去
爲鄰境害縱之若必謂我不識盜也杖爾則謂我無意於盜也乃
今而後可得盜矣盜每夜飲乘輿劫掠我給汝貲坐肆偏處飲有
盜入肆報我越夜役飲果十數大漢偕昨所拘者入酌酒相慶曰
久聞本府名故不知某官也俄又有入者或數人羣或十數人羣

約六七十矣役既報公會營弁圍肆盜譁起將出走也兵役畏盜無敢入公乃當先入入於門頂門一刀下公乃舉手拉持刀者腕而刀與人齊仆地役前縛之羣盜赤手又見縛持刀者皆戰慄就擒於是河間無盜在大理寺某王重其才然以事與王牴牾不少屈同僚病之嘗入白事王辭以病因求見闈者不可大叱之卒白事於寢久之世宗廷諭曰汝有才而無量公頓首謝後歸建學草齋公多讀古人書熟經國濟時之略魯亮儕觀察之裕出其門下余以邑人鮮知其遺事謹採所聞書之而見於縣志及他書者不贅

右書事唐祖价撰

繆沆

繆沆江南泰州人康熙四十八年一甲第三名進士授編修五十年充會試同考官五十四年召試乾清宮拔置一等五十六年命視學湖廣六十年歷工科禮科給事中雍正元年三月疏請兩湖苗疆土司令諸子分襲并移安襄鄖道員駐鄖陽經湖廣總督楊宗仁議荒服土司非內地可比父子承襲相沿已久若遽令分襲恐啟疆弱兼并欺陵之慮至襄陽五方雜處亟需道員彈壓未便移動紛更上以楊宗仁所奏甚明晰六月諭曰京師人民聚集食指浩繁糧儲不可不裕湖廣江南產米最廣盛京年豐米價亦賤此三處酌動正項錢糧採買數十萬石雇募民船運

京實大有裨益。命沅赴江西糴米十萬石嗣沅至江西採買得米六萬一千石未能足數又以民船難雇。敕沅停運卽交該撫收貯二年授太僕寺少卿時江浙沿海州縣潮溢成災。特諭兩省督撫發倉賑濟又因杭嘉蘇松人稠地狹產米無多。詔鄰省動庫銀買米運送沅疏言昨年臣赴江西採買之米見貯本處請。敕將此項米石運送浙江庶官米無涸爛之虞而江西不待另行採買有需時日得。旨如所請速行又疏稱直隸州有錢糧刑名之責與知府無異請遇缺一體保舉引。見分別調補。從之。三年轉因驛館少卿四年遷通政使六年三月擢內閣學士時原任山東蒲臺知縣朱成元家人叩。閤許後任王僧慧將民欠捏

揭虧空及僧慧前任新泰縣預徵錢糧事 命沅往鞠成元質虧
庫銀二萬六千餘兩捏稱民欠僧慧並無預徵成元因被揭仇誣
籍成元資產論如律 諭著沅折獄公明詳細七月 命清查山
東鹽弊疏言密訪運使書吏康福盛等向有隱匿殘引事卽親往
搜查堂西號房搜出殘引一箱康福盛家搜殘引四萬書吏盧鼎
倚家碾盤下搜殘引萬餘其以私作弊僉供屬實 諭曰如此搜
查嚴急此外再有藏匿者必至於燒燬滅迹然亦不得不如此也
又疏請以運使分司羨餘銀一萬三千九百餘兩歸公解赴內務
府交納並酌增引票得 旨此項銀兩不必解內務府仍應咨請
部示遵行八月遷工部左侍郎尋調刑部左侍郎十二月疏陳山

東鹽政事宜一官坨宜設永阜永利濤雒三場攤廣鹽豐率皆露積不特私梟盜扒窺戶偷賣卽奸商重複影射等弊俱難稽查請設官鹽坨收貯場大使註冊派窺丁管守並編保甲互相稽察如有匪餘句私者治罪一水程單宜設商人分執引票每多重複透運請設水程驗單將引目封貯司庫該商告運若干隨運隨領不許二季統領務於單內填明引數州縣卽按引查點鹽包截角申報一繳引宜定處分商人認引行鹽賣完日殘引應按期繳銷奸商匿引行私由該州縣督催不力所致請嗣後過期不繳者將州縣揭參照失察例議處一營汛勒索宜禁商人影射行私鹽梟私販皆緣巡查官役通賄賣放請責成專司之運使分司大使及督

銷之州縣律以失察如有收受規禮者以枉法婪贓論兵丁嚴加治罪一分司運判宜復設康熙五十八年裁膠萊分司缺統歸濱樂運同督徵查東省十場地方遼闊運同一員鞭長莫及請復膠萊運判一員分割並令運同運判春秋二季親至所屬各場清查引鹽出入數目竈丁竈地錢糧造冊以憑查覈下部議如所請七年十月 特旨大學士尙書侍郎都御史副都御史諸大臣子孫鄉試未經中式年二十以上者各舉文理通順可取中者一人入奏尋以大學士蔣廷錫子溥尙書嵇曾筠子璜及沅少子樞等列名上並 特賜舉人一體會試十二月沅卒疏入 賞銀五百兩治喪 賜祭葬如例

右 國史館本傳

繆沅字湘芷由編修官至刑部侍郎著有餘園詩鈔司寇視學楚中延四方名流校閱所得人文極一時之盛楚人爲子稱道之詩舊入江左十五子選中子曾評點後披全彙見半屬朱墨改易所云老去漸於詩律細者耶

右 國朝詩別裁集小傳沈德潛撰

蔡世遠 子長漢

蔡世遠福建漳浦人康熙四十八年進士改庶吉士四十九年請假省親五十年丁父憂服闋赴京以假滿逾期休致時方纂性理精義大學士李光地請以世遠分修 上允之書成回籍掌教龍峯書院雍正元年六月 特召來京授編修入直南書房十一月遷侍講二年充日講起居注官四年五月授右庶子十一月遷侍講學士五年二月授少詹事五月擢內閣學士七月充經筵講官六年授禮部右侍郎七年 上以福建宜設觀風整俗使 詔世遠偕同籍京員會議合疏言自海疆平定後泉漳文武官員有因功驟擢通顯者子弟驕悍無所懍畏如藍理身爲大員縱容子弟

害民 聖祖仁皇帝將監理革職治罪人心咸知懲創我 皇上
澄敘官方振興民俗上年學臣程元章奏准泉漳風俗未醇責成
巡道加意整飭自此益加儆戒但人有賢愚或鄙劣薄行致玷士
類其鄉民又多因忿互爭種種惡習雖畏戢一時未必洗心滌慮
茲奉 旨會議斷不敢隱庇使稂莠不除貽患鄉里應請設觀風
整俗使一員防範化導於風俗人心有益得 旨允行八年七月
轉左八月福建總督高其倬奏參世遠長子舉人蔡長漢違例私
給船照 上以原疏發世遠閱世遠疏言臣家屬八載在京長子
長漢去冬來京會試見在京邸此所給照係本年五月日期不知
何人所爲但有臣官銜圖書非臣族姓卽臣戚屬請 敕督撫盡

法懲治並請交部嚴鞠部議以失察族姓家人降二級調用十年
十二月 特旨復原職十二年正月卒十三年九月 皇上御極
諭曰原任侍郎蔡世遠學問素優自雍正元年在內廷行走勤
勞敬慎於經義文詞悉心講究多所裨益應加恩以示篤念舊勞
之意部議加 贈禮部尚書致祭諡文勤乾隆四年 詔入祀賢
良祠所著二希堂集 御製序弁其簡端四十四年 御製懷舊
詩稱爲聞之蔡先生詩曰先生長麓峯陶淑學者眾奉 命訓吾
曹風吟而月弄雖未預懋勤八載寒暑共常云三不朽德功言並
重立言亦豈易昌黎語堪誦氣乃欲其盛理乃欲其洞是實爲學
力虛車徒駕聖因以書諸紳未敢妄操縱德功吾何有言則企該

綜嗚呼於先生吾得學之用次子長灑由廩生保舉優行引見
特授知縣歷遷松江府知府江南驛鹽道乾隆二十六年授四
川按察使二十七年特擢兵部右侍郎二十八年卒第三子觀
瀾乾隆六年恩賜舉人歷江西道監察御史以陳奏乖方降二
級調用二十八年諭曰蔡觀瀾係原任禮部侍郎蔡世遠之子
部議降調需次無期著加恩以刑部員外郎用尋補刑部浙江司
員外郎三十一年告病回籍五十年卒第六子長泐乾隆三十年
恩賜舉人孫本崇乾隆四十九年恩賜舉人

右 國史館本傳

雍正十一年正月九日禮部侍郎漳浦蔡公卒於京師邸第 天

子軫悼 賜白金五百兩治喪 卹贈如典禮給與全葬 皇子
親王郡王咸致賻贈公卿相與弔哭賢士大夫塗咨巷歎咸謂公
繫天下之重不宜遽至於斯也逾二月諸孤長漢等將以公之喪
南歸以所爲行狀屬公弟子雷鉉請余文銘神道之碑余放廢無
似不足以光阡隴顧自念交公久知公獨深則請爲誌且銘以納
諸幽宮公諱世遠字間之福建漳浦縣人家梁山之麓曰梁村學
者稱爲梁村先生自其始祖諱元鼎以理學著子孫守其教成進
士者三人並有學行公會祖舉人 贈文林郎諱一橙祖庠生諱
而煜考以拔貢生任羅源教諭諱璧並以公貴 贈通奉大夫內閣
學士兼禮部侍郎妣皆 贈夫人公生而英偉不凡早承家學年

十二三卽卓然自命爲古人敦踐履分別義利博覽經史爲有用之學十八歲補弟子員先後學使者以國士待之或引以自助巡歷校課出所刻捫齋初集古文示士子咸賦歎以擬賈長沙乙酉歲舉於鄉明年儀封張清恪公來撫福建修復鼇峯共學二書院聘公考教諭公爲師又廣延文學士校刊儒先書公以英年主其局綴文序述多屬筆焉己丑禮部試受知大學士安溪李文貞公尙書韓城張公中式第八名同考官編修劉君巖得公文疑爲宿學不知年甫二十有八也既廷對賜進士出身改授翰林院庶吉士是時李文貞公以程朱之學教後進公故熟宋儒書旣見文貞公志益定卓然以聖賢爲必可學庚寅歲急請歸省覲文貞公

出游楊立雪圖贈行謂吾道南也既抵家侍親色養誠摯辛卯秋
丁外艱癸巳服闋赴都值 朝廷以翰林科道官乞假者多並
詔冠帶閒住或謂公以憂服淹留宜得自白則謝曰吾實以假歸
焉可誣也文貞公奏請公分修性理精義始暫留一歲書成徑歸
巡撫海康陳清端公走幣敦請仍主鼇峯書院手定學約躬行率
先儒風大振父子相繼爲全閩士子師前此未有也丁酉內艱家
居辛丑夏臺灣奸民煽亂漳泉震動公集鄉勇團練保伍齊肅閩
井恃以無恐事平始解散壬寅巡撫呂公猶龍至仍延主書院明
年雍正改元新政旁求俊乂 特召公還朝授編修 命入內廷
侍諸皇子講讀是冬遷侍講權日講起居注官二年實授分校鄉

會兩試得人甚盛四年五月遷右春坊右庶子十一月遷侍講學
士五年遷詹事府少詹事旋晉內閣學士兼禮部侍郎充經筵講
官 特恩追贈三代遷禮部右侍郎未幾轉左公自蒙 恩起用
數歲閒游躋卿貳委任備至經筵進講藉田從耕文武 殿試讀
卷校閱中外文藝咸在其列侍直 內廷十年卯入而酉出未嘗
一日輟 皇子親王並加敬禮郡王就學者至署受業可謂遭逢
聖明極儒者之榮矣傾朝注望臺省設施封疆敷歷用勩相我
國家天不憇遺遽捐賓客豈不惜哉公生平孝友忠信胸臆光
明若青天白日爲善如不及敬愛賢者眎貴勢蔑如也嘗語學者
當爲第一等人俗儒溺時文希富貴不自計樹立若何此鄙陋之

至無足與論卽讀書止供作文講學不務躬行皆可恥也嘗修復古禮行於其鄉農人販夫皆知向化環所居數十里無博筭者二十餘年矣邑令延至學宮講學聽者恆千百人閩士經明行修者彊半出其門嗚呼盛矣 今聖主益崇儒術令天下立書院厚廩旣以訓士子誠得如公者數輩主持於上順風而呼其爲功海宇又當何如若之何而遽逝也公生於康熙壬戌三月十一日得年僅五十有二著述雖富未竟所志其已成書者二希堂古文十一卷詩四卷家規學約及家禮節要各一卷編輯歷代名臣言行錄評選古文雅正六朝四唐詩各若干卷又嘗與大學士高安朱公同編歷代名臣名儒循吏諸傳皆有益於後學娶劉氏 誥封夫

人有淑行先公卒子男六人長卽長漢己酉舉人次長漢郡學生
觀瀾長湫並國學生長浩幼長注慧而殤女三人孫男女各二人
公之疾也長漢奉母夫人之喪以歸長湫不脫冠帶而養者五十
日湫之婦吳氏刲股肉以進以求愈公疾益公之教行於家者如
此銘曰

以道得民周官儒日月繼照尼與輿秦灰漢馬忽以蕪區區章句
聊紛拏維閩古稱東南騶游楊羅李下逮朱蔡氏家學相鋪舒西
山九峯如衡廬別子散出漳浦隅維公奮起尤魁殊爲王者師一
卷書下貳代履上貳舉國家根氏古所儲陳經引義十載餘山川
出雲大澤需胡不百年神遽徂朝歆野歎同夢紆我銘幽石深鐫

鏤千秋耿耿貞弗渝

右墓誌銘李紱撰

雍正十年冬十有一月禮部侍郎蔡公病不能興 皇子日使人
問視 天子賜醫士大夫羣聚必詢公壽增減云何踰年正月朔
後八日薨 天子震悼自賢公卿以及鷹庠之士重志節者無知
與不知皆惘然若失其所倚余屢困於衰疾嘗屬公必銘余及公
疾篤執余手而愴然曰子年先於吾吾亦自謂終當銘子而子今
銘余其喪之歸子弟生徒合辭以請嗚呼余安忍銘公雖然義不
可讓也始余與公相見於相國安溪李文貞公所文貞引公之袂
以屬余曰是吾閩所謂蔡世遠聞之者也遂定交及癸巳春余出

刑部獄而公以是冬服闋至京師會新令翰林科道在假者並休致而公之請假也旋丁父艱或謂宜自列於吏部公曰吾聞古者受爵而讓未聞投牒以自申也時文貞公承編 御纂性理精義薦公分校踰歲書成造余謀所處余曰天果不廢子之學何患無周行坦步而出以編書復官去牒請一聞耳遂固請於相國以歸先是儀封張清恪公撫閩延公父主鼇峯書院而招公入使院共訂先儒遺書至是大府復以鼇峯屬公公夙尚氣節敦行孝弟好語經濟而一本於誠信由是閩士慨然感興於正學而知記誦辭章之爲末也其家居設族規置大小宗祭田孤嫠老疾月有餼鄉人化焉環所居三百餘家二十年無博戲者 今皇帝嗣位特召

入都 命侍皇子講讀授編修五轉而至禮部侍郎公侍 皇子
凡進講四書五經及宋五子之書必近而引之身心發言處事所
宜設誠而致行者觀諸史及歷代文士所述造則於興亡治亂君
子小人消長心迹異同反覆陳列三致意焉當是時兼保傅之任
者皆執政大臣政事方殷不得朝夕在側惟公奉事十年晨入夜
歸無風雨之閒諸公背面多語余曰聞之忠信正直學足以達其
言誠足以致其志或過於闊疏而無近慮洵書所謂惟其人者也
公議論慷慨自爲諸生卽以民物爲己任及從清恪公遊吏庀民
病言無不盡政行眾服而莫知其自公辛丑夏臺灣蠢動公大會
鄉人聯伍團練助官兵聲勢平生好善樂施出於天性故人皆信

嚮旣貴士有志行及文藝之優必躬禮先焉知其賢則思隨地而
開通之汲汲如有所負然余每以公事至 圓明園必宿公池館
公薄暮歸常挽余步空林坐石磯至昏暝或達夜中雖子弟莫知
云何而所誣度皆民生之利病吏治之得失百物之息耗士類之
邪正無一語及身家淺事者嗚呼以公之志在竭忠 天子知人善
任使得竟其志業未知所就於古人何似而阨以無年嗚呼惜哉
公性淡泊所得祿賜半索之族嫻知舊妻子僅免寒飢敝衣粗食
視襄人或甚焉其居外寢設一榻一帷余至則以讓余而臥後夾
室方夏秋蚊蟲嗜膚竟夕不安而惟恐余之不淹畱信宿也嗚呼
此公之志氣所以愾乎海內之士君子歟雍正四年公列爲九卿

以侍 皇子廷議多不與八年秋以族人事牽連吏議降一級調補及 上特命復故職而公疾已不可振矣卒年五十有二所著二希堂文集十五卷鼇峯學約朱子家禮輯要合族家規各一卷所編性理精義歷代名臣言行錄論定古文雅正漢魏六朝四唐詩各若干卷惟學約家禮古文雅正及與高安朱相國共訂歷代名臣名儒循吏傳已刻行於世蔡氏世居漳浦之梁山故學者稱梁村先生始祖元鼎以講學名鄉里五世祖宗禹登明萬歷辛丑甲科益著稱行蹟見道南原委會祖諱一橙萬歷丙午舉人祖諱煜郡庠生父諱璧以拔貢生爲羅源教諭皆 誥贈如公官曾祖母某氏祖母某氏前母某氏母吳氏並 贈夫人妻劉氏有賢聲

先公一年卒喪歸踰嶺士友弔祭數百里不絕子六人長長漢已
酉舉人次長澧郡庠生次觀瀾太學士次長澍太學生次長洁次
長注長注夙孝慧先劉夫人半月而殤方十齡女三人孫男二人
以雍正某年某月某日葬於某鄉某原銘曰

其材天植其學不迷其志不欺其數非奇而不竟其所施匪予之
私眾心所懷

右墓誌銘方苞撰

蔡世遠字聞之福建漳浦縣人康熙四十八年進士世遠故熟宋
儒書及見安溪李光地以程朱之學牖啟後進相得甚歡次年請
假省其親光地出游楊立雪圖贈行謂道南也抵家三載丁外艱

服闋赴京值 朝議以科道翰林乞假者多並 詔原官休致或
謂世遠以守制久淹宜得自白則謝曰吾實以假歸焉可誣也時
方纂集性理精義總裁官奏請世遠分修始暫畱一歲書成歸閩
中主簡峯書院世遠父璧曾以教諭居此席父子相繼爲全閩士
子師前此未有也旋以內艱家居六十年夏臺灣奸民煽亂漳泉
震動世遠集鄉勇團練自守閩井恃以無恐次年復主書院事雍
正元年 特召世遠授編修 命入內廷是冬遷侍講充日講官
起居注四年遷右春坊右庶子隨晉侍講學士五年升詹事府少
詹事旋擢內閣學士兼禮部侍郎充經筵講官 特恩追贈三世
遷禮部右侍郎七年二月設福建觀風整俗使一員從世遠請也

未幾轉禮部左侍郎緣族人事牽連奪級及溫諭復職而世遠已屬疾以雍正十有一年正月卒遺疏聞上軫悼賜金治喪卹贈如典禮給與全葬令沿途官員護其喪以歸世遠自庶吉士家居起用數歲閒游躋卿貳經筵進講藉田從耕文武殿試讀卷校閱中外文藝咸在其列侍內廷十年卯入而西出風雨寒暑未嘗一日少輟嘗修復古禮行於其鄉農人販夫皆知嚮化所居數十里無博塞者每語學者當爲第一等人俗儒溺時文希富貴不自計樹立若何此鄙陋之至無足與論卽讀書而止供作文講學而已不務躬行皆可恥也家於梁山之麓學者稱梁村先生

右傳饒學曙撰

蔡先生諱世遠字聞之號梁村翰林歷官宗伯幼稟家學篤志程朱以聖人爲必可學而至適儀封張清恪公撫閩立龍峯書院徵召各郡縣士子肄業其中爲之講明正學宣示儒宗先生應時而出升堂入室得儀封之真傳其與鄭魚門侍講書曰在京師時朝夕過從俛有孜孜志相同道相合分袂時先生獨有所不忍於中者迴出於交情聚處之外不可不謂之知我也前歲附張次修信有江南閱卷之命心怦怦欲往以兩弟公車外出又繼以臺灣之變不如所願嗣聞先生清望日隆公明之譽溢於近遠然世遠竊謂此不足爲先生譽也我輩誦法古人安肯以文衡作商賈之行

辱名喪心自好者不爲況先生道力素定哉明則比公爲難然以理真辭雅二者律之空疏者不錄浮雜者不錄驗其心得審其學力昭昭然若揭其衷也此亦不足爲先生難者竊謂學使之官在有以振士風而變士習下車伊始行一令於令長學官曰有能敦孝弟重廉隅者以名聞並上所實行有能通經學古奇才異能者以名聞並上所論著行之各屬揭之通衢雖所薦者未必皆賢而賢者未必薦然本之以誠心加之以詢訪擇其真者而獎勵之或譽之於發落諸生之時或薦之於督撫或表宅以優之試竣或延而面叩之從容講論以驗其所長有行檢不飭者摘其尤而重黜責之如是而士習不變者未之有也且夫士子荒經久矣勦襲撮

摘以塗有司之目侮聖人之言莫此爲甚今於歲科未試之先通行於各學曰書藝二篇之外不出經題但依所限鈔錄本經多不過五行少不過三行不者文雖佳歲試降等科試不錄科舉至期牌示曰某經自某處起至某處止各書於卷後夫勒寫數行本經非刻也先期示之使知成誦非慢令也有能兼通者場中又牌示曰能成誦四經五經者生員給餼廩童子青其衿如是而不自勵於經學者未之有也昔兩漢之選博士弟子員也以好文學尊長上順鄉里出入不悖所聞者爲稱選送之太常太常籍秀才異等者以爲郎又有孝廉一科得人最盛今縱不能薦之於朝私自褒揚亦學政之大者唐時有帖經墨義之科今亦倣此意施之使士

子無荒經之患於學者大有裨益先生歲試若未暇及科試行之未晚也且小學一書爲飭己敦倫之要修身齊家之本士子少小先入以養正之言虛憍鄙陋之習悉去內聖外王之學畢基於此昔嘗以此作次藝論題取士矣後又移之覆試士子多視爲具文學使亦有以具文視者遂使父兄師長不以此勸其弟子小學之廢風俗人心之憂也今莫若確遵功令先期飭示曰童子試書文二藝次依所限起止書小學數行不記者定行黜落如是則人爭自誦習恐後矣夫內篇者十三經之精義也外篇者十七史之精華也許魯齋云吾於小學敬之如神明今士子尙欲通經學古豈以簡便精要如小學反使束之高閣乎世遠此數載在家鄉凡課

授子弟以及從游之士皆令讀小學講期必與經書性理參講閩
士化者頗多然與其處卑之苦口大聲孰若學使之行一文不勞
而嘉惠靡窮乎今之持論者皆曰外官惟縣令與學使最難供職
世遠竊謂此二者爲最易夫縣令者朝行一政則夕及於民興政
立教無耳目不周之處無中隔之患古人所謂得百里之地而君
之也學使無刑名錢穀之繁惟以衡文勸學廣勵學官振飭士子
爲職業草偃風行比地方職守者尤易或又以爲是二者皆有掣
肘之患不知所謂掣肘者多由於自掣非盡人掣之也夫布衣則
古稱先自強不懈人猶稱其嚴毅清苦力行可畏況居官哉但氣
不可勝事不可激當謹愆完養以合乎中耳謂見掣於人吾未之

聞也世遠邇來無四方志今歲撫軍呂公又禮至鼇峯日取先生
所示羞惡之說與諸生深切而講明之會城氣習甚重然就中亦
必有超俗成材者心誠求之而已江南學使前有余林二同鄉前
輩繼爲同門謝君皆未有一字之通獨於先生惓惓者恃惠子之
知我也其寄甯化五峯諸生曰貴業師貫一相聚都門屢稱諸賢
志道之心甚銳深爲喜慰是日重陽正當休沐持諸賢請業之書
相示不佞見之喜而不寐也年富力強何事不可爲只直捷要學
聖人夫求爲博雅則限於資榮顯富厚則限於命惟直捷要學聖
人可以操之自我眼前立大志向定大規模隨所讀之書身體心
驗隨所行之事遷善改過開其學識使益宏裕養其德器使益堅

定焉斯已矣蓋之來書謂澄本清源惟在義利一關此最得之義
卽天理利卽人欲當認得透徹斷得斬截如寫書來京所言學業
有一毫不本中心發出或拾前人成語要使見者稱爲有志此便
是浮外爲人之心卽利心也思大來書稱近日體認吾未見剛者
一章與整齊嚴肅四字覺更緊切甚是朱子謂徒得一二謹厚之
人未必能自振拔而有爲故聖人只思得一剛者蓋氣質剛勇始
足任道但戒浮氣矜氣耳眼前非必便能事事合中尙須細加涵
養然軟靡無氣骨人必不能有爲也程子論學之切莫要於主敬
曰主一之謂敬無適之謂一又曰只整齊嚴肅則心便一一則自
無非僻之干然此際加功最難過於矜持則苦而難久稍寬緩又

便怠弛惟立志既堅躬行又力用謝氏心常惺惺之法常自提撕
斂束自然坐立不至放佚心體不至昏怠以此窮理心極清明以
此克己氣極勇決更日加涵養自然德成而學就所謂徹始徹終
工夫也又謂時文恐荒正業欲暫去之夫時文亦代聖賢以立言
者只要心得而寫以時文之體勢耳心有實得則文字自有精采
科名在其中矣程子謂科舉不患妨工惟患奪志此言盡之至文
公家禮最切日用未有學道之人而不行禮者此時得行卽行不
可有待也且化民成俗莫不於此思源嚮道自比北溪欲誰當得
朱子惟取朱子北溪之書體究實踐不遺餘力則亦朱子北溪矣
況家有賢父兄庭訓之下益加刻勵使父子繼美與宋代胡文定

蔡西山二家比隆是所深望也與之來書謂取誠意章默會愈覺
警切此欺慊之介體察入細則毛髮竦然願更策勵居業錄體勘
極有益敬齋只一布衣惟能立志居敬苦學程朱故能廟祀百世
觀其辨別何等精嚴用功何等堅苦若有一念不實不但鬼神不
可欺天下後世更不可欺也學山謂朱子全書閱畢欲讀近思錄
全書中有無限道理體用俱備近思錄則領要存焉總在讀時句
句切己行事時刻刻對照耳昔在宋代吾閩名儒甲天下多在延
建今日臨汀風土人情最近古貴業師倡之於前諸賢互相講勵
如上灘之船不上不止則道南之盛復見於今矣不得面暢屬望
之深忘其鄙謏然皆肝膈之要不宣其與雷貫一日兩載都門胡

晨夕也以令祖母年高急於趨省不敢款畱歸後忽忽如有所失
不佞有疑莫析兒輩不得聆誨言能無繫念不佞自數年來曾友
天下士要知賢友之純心篤志以第一等人爲可學而至講明踐
履不少懈者有幾人哉學者患於無志有志矣又苦不能篤實篤
實矣又苦不能曉事以陳北溪之賢受業漳州與聞至道越十年
往見朱子於竹林精舍猶謂其尙少下學之功勉之曰當學會子
之所謂貫勿遽求曾子之所謂一當學顏子之博約勿遽求顏子
之卓爾北溪自此精進有加蓋篤實之難也以司馬溫公之學識
一代甯有幾人明道猶謂君實不曉事使明道得大用於世其明
通公溥比之溫公自是不佞然溫公尙未足當曉事之稱由是言

之學之進境豈有涯哉賢友年方三十有三朝之巨公見者無不崇獎庶所謂篤實而曉事者然以北溪司馬二公律之有不爽然若失乎又何加焉仍在精義集義二者交勛而不息焉耳五峯諸生得承指授英特不羣皆任道之器也然近之君子囿於科舉格於習尚久矣鄉人所不屑矣必勉之使爲天下所不可少之人匪徒爲天下不可少之人又當爲一代之不可少之人匪徒爲一代之不可少之人又當爲千百代所不可少之人志銳守堅捐其所甚利而追其所必至自然日進於高明臻於光大矣夫鼓其趨而指其程途師友之事也餘則在學者之自勉而已有己未克誰則知之半途而廢誰能禁之不佞望之深幸爲我勸勵之不佞粗疏寡陋

然此心實未嘗一刻少懈賢友嘗勸以靜時加功靡日不體斯言
庶後日相見時稍進故吾也先生窮理精密律身謹嚴識量深宏
節操堅定退而居家進而在朝所行皆有益於人之事所言皆有
益於人之言侍講幄數年常以天地性命之奧道心人心危微之
判堯舜禹湯文武周公孔孟周程張朱之心傳從容陳奏荷蒙
天藻褒嘉榮耀千古亦儒林之大盛事矣卒諡文勤

右學案唐鑑輯

公始祖元鼎以理學爲有宋開先自是代有傳人族望蔚爲漳郡
冠子大壯嘉靖己丑鄉薦任甯鄉縣有惠政孫宗禹萬歷辛丑進
士官比部學爲儒宗傳載道南原委宗禹孫璧號武湖生有異質

苦志讀書以博士弟子員貢成均時崑山徐相國爲大司成兩試皆第一因閩省有耿逆之變五年不得歸得交賢豪長者聞見日益廣聲施日益大而雙親朝夕在念或勸之乘時求仕曰吾不以鐘鼎易一日之養也閩土旣靖返里授徒以資奉養益肆力於六經子史及古今制藝求合於道德性命之旨四方士來學者莫不以河汾龍門擬之親歿授羅源教諭慨然曰天下之治亂在人才人才之盛衰由學校學校之責任在官司吾其可苟焉已乎凡分所得爲者毅然爲之如報丁憂一節以爲此人子傷心泣血之時而胥吏因以爲利誰無人心者遂革陋規時令係同姓諱彬者就商佐理政教所敷人稱二蔡焉故歸浦之後羅源士民爲祠以祀

廣文之有生祠自此始公其長子也

武湖公疾革語諸子云人子所以顯揚其親者孝經誌之不徒在爵位之崇高也又曰嗣後苟有餘祿祭田確宜從厚厥配吳太夫人教子自家鄉以至居官諄諄告以大義常曰汝等須誠以持躬謙以待人廉以養德毋以詐御物毋以氣加人毋取一毫非分之有每有錢財入必從容問所從來告以故始帖然曰吾願汝等食菜根無忘先人遺訓也

行狀

公嘗自記曰學問未敢望朱文公庶幾其真希元乎事業未敢望諸葛忠武侯庶幾其范希文乎名一希堂之指以此又嘗曰見人有一言一行之善識之於心而不敢忘此性之所樂也見居官者

行一良法施一美意識之於心而不敢忘此又性之所樂也

雷翠

庭記 二希堂集

嘗言治術關於學術經濟通於性命大臣以身任事必有公清之
操有愷惻之懷有明通之識有強毅之概有傲懼之心無公清之
操則不免有寵利之疚矣無愷惻之懷則不能有納溝之恥矣無
明通之識則膠執而鮮通矣無強毅之概則雖知其然發之不勇
守之不固矣無傲懼之心則自信太過禍且隨之矣

親民之官以廉爲基以仁爲本引而近之欲其親格而禁之欲其
嚴理之欲其明措之欲其簡慮民之不給也爲之勸農桑課節儉
輕徭役廣積蓄遇有故則賑貸之又加詳焉慮民之不戢也爲之

教孝弟敦睦嫺懲誣黠息爭訟以事至者詢諭之又加詳焉根於中而不循乎外者賢守令也結懽上官而不體下情者民之蠹也自恃無他而張弛不協者誠不足識不充也視猶傳舍因爲利藪者本心既失殃及其身者也審此數者其於帝廷咨牧之意庶有合乎

廣勵人才在養其根去其莠期其立俟其成專己者不虛干譽者不正苟安者庸助長者蹶毋徇己私毋耀聰明

樹木者以植根爲上立品者以務實爲貴才名過盛而矜人傲物者非大成之器也恃其所有而攀援趨附輕於一試尤喪檢辱身之士也

學問無窮收斂則愈廣大謹密則愈精明

凡事疏者非難親者爲難又推而論之多者非難少者爲難顯者非難微者爲難是故國難於天下家難於國家之中猶有父子兄弟長幼尊卑之等也身止一耳身爲難身之中猶有耳目口體百骸之司也心無形耳心爲難心之發爲意而意又最難故君子之致力也以誠意爲先其立範也以齊家爲要

謝上蔡稱孟子強勇以身任道由其氣足以勝之也朱子曰曾子大抵剛毅故能獨得斯道之傳子思行事他無所考如孟子所云何等剛毅由是觀之血氣之氣不可有義理之氣不可無

宋朝當理學昌明之會周程張朱比肩而起德性學問之功昭昭

若揭天壤學者有厭於格物窮理之煩者倡爲心學之說恃其超
悟躐等一以致虛立本爲宗其弊不爲佛氏明心見性之學不止
是以有心斯道者起而攻之

議宋儒者以爲研精性命恐少致用之實不知修己盡性功施靡
極使程朱得大用於世隆古之治可復也宋季指爲僞學國隨以
微魯齋之在元略見施用有經邦定國之功明初正學昌明成宏
之際風俗淳茂近古嘉隆以後人不遵朱學術漓而政教亦壞非
其明效大驗歟

四子之書平淡無奇長國家者恐人不肯誦讀而玩索也於是以
經義取士定爲程式使自證其心得而發揮其蘊蓄非由此者雖

奇材異能魁閣博通之士不能以自進又恐人背馳其說附會舛錯而莫知所折衷也於是以朱子之註頒之學宮使天下讀是書者有所依據而返之於身以措之天下國家者可不畱餘憾矣
孝者仁之本也由愛敬之心推之至於無不愛孟子所謂親親而仁民仁民而愛物皆孝之所流也廉者義之本也由不爲穿窬之心推之至於事各有宜以協天則南軒所謂無所爲而爲皆廉之所充也

以父母之心爲心者必能愛其兄弟以祖宗之心爲心者必能聯其宗族

待人最要從厚人待我不循理我以薄施之是我無異於彼也只

宜循我分盡我心

凡事只可罪己不可尤人薛文清公云不忮不求何用不臧是守身常法不可不三思

二希堂集

右政學錄陸言輯

漳浦蔡文勤公之以庶常入都也寶應喬教諭某遇諸逆旅見其舉止而異之聞諸外舅甘撫胡期恆胡以聞年大將軍遂薦諸

上至大用然文勤實不知也見姚椿晚學齋文集平湖顧廣譽云
年薦文勤事與方侍郎作墓誌雷副憲序文集所云奉 特旨入
都者不合傳疑俟考余謂果有其事年罹 嚴譴而公以 恩遇
始終正見公之柴立不阿 世宗之知人則哲

右紀聞陳康祺撰

蔡長澐

少司馬漳浦蔡公克齋卒京邸之明年歸葬有日其弟比部瞻亭以狀請銘余維閩故爲理學之鄉本朝自安溪相國李文貞公以名臣名儒爲朝野重望師友淵源人才繼起後先相望少宗伯蔡文勤公眞儒實學久侍講幃蒙眷獨殷中外推重余官京師獲拜文勤公於邸寓道味相親每一晤談皆閱歷有得之語不愧有體有用之學公爲文勤公仲子端謹質直克繼家學莅任江南卽與余同事最久知公深固宜爲公銘按狀公諱長澐字巨源號克齋世居福建之漳浦公爲世家子性行篤實童穉時儼若成

人無執袴紛華之習年十三補弟子員侍母劉太夫人入都省觀
隨諸兄左右奉養得兩人歡心未幾遭母夫人喪哀毀骨立長兄
輩皆奉喪以歸而文勤公旋病篤遂不起京邸侍疾含殮惟公一
人附身附棺恪遵文勤公所著家禮節要毫無差池日下公卿羣
推其孝乾隆三年食餼於庠學使者以學行兼優特薦引 見得
旨發江南以知縣用五年署甘泉令明年授石埭令調句容無
錫兩縣令又遷太倉牧越六年遷江甯府知府調廬州府知府又
調松江府知府越七年遷江南驛鹽巡道又八年授四川按察使
時辛巳七月也明年 特擢兵部右侍郎蓋自始仕至今歷二十
有四年其始莅甘泉也邑故五方雜處商賈雲集奸匪最易潛藏

公稽查棊嚴懲戒亦切而仁心爲質人咸懾服俗尙淫祀好遊觀
公至嚴禁之毀寺觀十餘所與唐狄梁公之奏毀淫祠及 本朝
湯文正公之驅五通先後符合力屏苞苴絕餽謁往來非公事不
接紳士人亦不敢以私干其嚴氣正性歷終身不易也句容有劇
盜宗千里繫於獄久不決波累無算公秉公鞫訊以至誠感之廉
得真而首從以定秦淮沙流壅陸水勢洶涌當事亟議疏之公循
行視水道考源委究高下因建議開石湫濬赤山湖使支流旣暢
河勢順軌其刺太倉也有民婦詭稱其女曰活菩薩煽惑郡邑公
立發其姦置之法一時皆服其神其任江甯也首都地稱劇要公
勵精治理案無畱牘時值洊饑加賑公議以錢代米民咸稱便相

國黃文襄公移節江南守令皆迎拜道左公獨長揖自後日一趨謁卒未嘗一屈膝也改守廬州會東鄉大水田廬盡沒公救飢拯溺民復故居又勘報阜陽亳泰諸州縣災與所在守令異大吏將易官重勘公乃大言論淮右地瘠民貧積水難涸雖偏災亦當卹大吏乃從公言災民咸得賑松江爲疲難大郡號難治公坐鎮措施民以不擾議築華亭之金山林家嘴二土塘以防秋汛迄今潮汐得無患任江南驛鹽巡道奉檄開濰河挑丹陽運河公減騎沿隄首先率屬往來督視歷次提調文武兩闡清釐弊竇體恤諸生平時作養士子振興學校至今士林咸頌焉計公官江南由縣令至監司者閱十有五年一切勘災發賑修築隄防諸要政余每與

參酌公一秉赤衷不執成見虚心實力利在必興害在必除至今
歷歷可數故余去後而兩臺皆交章稱薦疊邀特擢也兼聞公
初莅江南值飛蝗起撲捕紛然公引罪自慝爲文以祭入蜡蝗亦
旋滅後領七十餘艘泊清河遞送旗兵河流淺淤膠舟公齋祓虔
禱忽東風大作水漲三尺遂得利濟人以爲公精誠所感云秉臬
四川治案牘午夜不休以平允聞川本魚米鄉治生較易楚越
游惰之徒往往徒手入川而所在嘯聚爲匪號啞嚙子禁例甚嚴
捕獲者率皆優敘公申頒條教糾繩不事姑息強暴斂跡未逾年
而兵部侍郎之命下矣蓋公生平純厚坦白衷無矯飾任事一
矢勤慎不墜家聲天子鑒其年勞最著又念文勤公之後無

膺顯秩於朝者乃有是命 陛對之日 恩禮有加公益感戴
隆恩刻自淬勵中樞爲本兵重地趨直入署無虛日雖嚴寒不
少閒終以致疾疾後猶時強起披牘畫諾是可謂一心公事夙夜
匪懈者矣公自幼爲王母吳太夫人所鍾愛疾執其手曰此子異
日必大成憾吾不及見耳後謁相國朱文端公邸第謂其天性敦
厚充其所至可作純儒簡儀親王秉節兩江公爲屬吏愛其才後
入都引 見王指於眾曰此吾前日所稱江南第一清官者也其
爲一時先正名流所賞識如此平居澹泊自甘無他嗜好於嫺族
困乏盡力周卹不少吝卒之日家無積糧亦可以知公之操矣事
叔父兄長以敬撫弟姪以慈旣官京師與弟比部瞻亭寓扉相望

日夕過從聚談至漏下怡怡友愛如幼時嘗語子弟曰人生惟剛
一字最難體認剛則無慾無慾則公正又語僚屬曰居官以清正
爲本以勤爲先然勤之一字必殫出其精神以貫注於一郡一邑
中皆名語也設天假以年罄其底蘊拓其才力恭逢 聖人在上
明良喜起於以大展前猷澤被民生胥於公是望而竟齋志以歿
此同人故友所爲歎歎感歎而不能自己者也公卒於乾隆二十
八年十一月二十九日距生於康熙四十九年九月二十八日享
年五十有三歷任兵部右侍郎 請授通議大夫例贈資政大夫
配吳夫人前山東濟東道興業公女內則具備淑德宜家側室陳
氏男四人長來次本梓次本森嗣弟長浩後次本尙女二人長適

國朝名臣傳卷之六十一
賴丹墀次尚幼孫男五行擢行憲行豁行昌行熾乾隆年月日
卜葬於某鄉某原係以銘曰

明德之後世啟達人治行積懋維清以勤破觚斲雕食德飲醇雨
膏棠蔭媲美召郇使竟厥施光被網緼元氣中徂浩浩還真一棺
故里落落星辰松柏翳鬱詞勒貞珉

右墓誌銘陳宏謀撰

國朝耆獻類徵初編卷七十目錄

卿貳三十

李紱 孫友棠

何世璠

王承烈

補錄

王承烈

國朝耆獻類徵初編卷七十

通奉大夫前署江西巡撫江西布政使司布政使湘陰李桓輯

卿貳三十

李紱

孫友棠

李紱江西臨川人康熙四十八年進士選庶吉士散館授編修累遷侍講學士五十四年充武會試副考官五十六年充日講起居注官尋充雲南鄉試正考官五十七年九月充武會試正考官十月二月奉命祭告南海五十九年六月充浙江鄉試正考官九月擢內閣學士十二月遷左副都御史仍兼學士六十年二月充會試副考官榜發下第舉子擁至紱寓喧鬧匿不奏爲御史舒庫所

劾革職發永定河工效力雍正元年正月 特旨給還原職署吏部右侍郎尋充經筵講官六月 命赴山東催漕七月遷兵部右侍郎九月奉 命截留湖南等幫漕糧於天津收貯二年三月督運抵通得 旨嘉獎四月授廣西巡撫八月奏言廣西賀縣界大金蕉木兩山產礦砂五十里外爲廣東梅崗汛又數里爲宿塘寨礦徒盤據時時竊發臣抵任後擬嚴禁聞督臣孔毓珣條陳開採恐傷協恭之誼因而中止近經平樂府報稱礦徒二百餘流入蕉木山知縣會同富賀營守備千總三路驅逐始退又聞廣東連山縣宜善司巡檢以梅崗宿塘等處礦徒梁二等聚集多人汛兵子弟往附勢難防緝願罷職歸臣思開礦甚有關係目下卽幸無虞將

來或恐滋事 諭曰礦砂之利窮民私採猶當禁之何況明目張
膽而行之者此中利害朕甚知之今既聚眾自稱頭目是斷不可
一日姑容少寬禁捕今將批諭孔毓珣之旨鈔錄示汝汝等可協
力設法嚴禁永令地方無此等事方好須再三畱心籌畫而爲之
慎勿輕忽孟浪凡事悉如此據實入奏纔是此奏朕甚嘉之如宜
善司巡檢所言即使少過朕亦樂聞而不加責也諸如此類何妨
預防於未然耶十月疏陳練兵事宜一先定操地次定操期嚴賞
罰一陣法各有所宜四門方陣止可施於平原曠野而廣西援剿
常在山溪之閒背山而戰用一字陣山曲用三才陣夾溪用雙龍
陣入面受敵用八門陣四圍合攻用圓陣亦曰風雷掃地陣羊腸

鳥道用山路連環陣宜令演習如式一兵丁無論馬步各帶腰刀
然馬上步下宜知用法一獐獍土苗所用烏槍較營槍更長可及
百五十步惟礮可以制之五子礮施放便利宜增製一山賊不時
出沒調兵勦擒帳房鑼鍋宜豫備 諭曰畱心武備殊屬可嘉但
須實力行之方有成效先是康熙五十三年廣西巡撫陳元龍奏
准開捐五十五年停止共捐穀百十七萬八千餘石至是敘奏言
臣聞開捐之始每石折收銀一兩一錢發州縣買貯止三錢而穀
價常在三四錢以上勢難購買率以價銀遞相交盤歷任撫臣責
州縣買補臣抵任嚴催尙欠四萬餘石請寬限一月補足免將見
在州縣官參劾得 旨俞允會提督韓良輔條奏墾荒六事 命

紱議行紱疏言經費有出然後開墾可行廣西捐穀偏積於桂林
柳州梧州南甯四府久貯恐致朽蠹請卽動支爲開墾費 諭曰
朕觀李紱之意不過爲開銷廣西昔年捐納穀石之計此項捐穀
原係陳元龍經手其閒有名無實首尾不清之處甚多朕知之最
悉此時李紱難於料理故借開墾之名以爲開銷虧欠之地可著
陳元龍等往廣西將此項徹底清查儻有不清著李紱據實參劾
以聞至墾荒諸款皆巡撫職所應爲之事不必瑣瑣陳奏十二月
諭曰捐穀一事李紱務須徹底清查如有虧空卽著落陳元龍
等辦理清楚此原屬舊案與李紱無涉伊若以從前未經查清今
卽隱諱瞻徇是將他人虧空認爲己有後經發覺罪皆歸於伊身

因疏參當日收捐穀價數倍於正項請將管捐之布政使今任
福建巡撫黃國材等質問 詔許諸臣將分肥實情供奉免其治
罪並令國材解任赴質嗣審明督撫司道府廳共分肥銀八十二
萬四千七百餘兩勒限分賠有差 諭曰爾於此事秉公執正實
屬可嘉初紋署吏部侍郎因議敘年羹堯子富等捐造營房一事
不肖從優爲羹堯所嫉及奉 旨天津截漕估變米價盈餘銀五
千兩交守道桑成鼎貯庫紋赴廣西成鼎以原銀解交廣西紋以
革屬直隸因具摺送直隸巡撫李維鈞會奏維鈞匿不以 聞三
年二月紋據實陳明 諭曰此一事大奇乃伊等誣捏欲傾陷汝
也年羹堯來京陛見時奏汝巧取此項適李維鈞亦在都中朕因

不信其言向李維鈞降旨云李紱斷不爲此舉李維鈞解會朕意
卽回奏云李紱原未全吞論理此項伊可以入己伊因路遠止取
數百兩作盤費其餘未經交發仍爲伊封好收貯在彼但伊應將
此項奏聞纔是朕隨諭李維鈞旣如此爾應寄字詢問看李紱作
何回覆此彼時之言也殊不料伊等蓄意如此朕今始洞悉矣爾
若根基不牢則已墮其術中大約皆係年羹堯之所指使但此等
作爲朕頗不解其意何居鄙哉小人實爲可愧前項旣經伊等送
到粵西朕又已了然明白可卽畱充公用是月以審擬生員陳爲
翰毆斃何壯深一案擬絞候部駁仍照前具題部臣改爲斬候奉
旨著九卿等會同詳議尋議應如紱所擬 從之四月奏言南

甯思恩太平三府屬土司界連安南土夷劫掠成習伊國王未必盡知應行令自行禁戢但總督有行文安南之案而撫臣並無舊案可稽督臣遠駐廣東文書往還需時請嗣後遇土夷爭奪細故一面咨會督臣一面卽行文安南庶事可速消 允之六月奏言太平思恩府界流言安南內亂奸徒潘騰龍冒認莫姓子孫其黨黃把勢陳亂彈等以護送歸國爲名互相煽誘臣嚴飭文武員弁查拏擒治 諭曰所奏已悉封疆之內極宜整理振作至於安邊柔遠最忌貪利圖功須當慎之又慎八月疏言柳州府轄二州十縣地廣事繁賓州上林等州縣猺獞錯處請改賓州爲直隸州轄附近之上林來賓遷江武宣四縣其與柳州相近之七州縣仍歸

府轄再梧州府治西南至鬱林州三百餘里請改鬱林州爲直隸州轄北流博白陸川興業四縣其與梧州相近之五縣仍歸府轄又泗城土府及三江地方上林安隆二營請俱改歸泗城副將轄下部議行九月奏言猺獞頑梗修仁之十排天河之三疔尤甚劫掠積案纍纍修仁十排臣已捕獲渠魁三疔週八百里萬山重阻所種田在隘口外乘秋稼未收發兵守隘斷其收穫投到者許以免死其爲首八人見俱投到 諭獎其辦理得宜旋授直隸總督四年三月抵任先是左都御史蔡珽薦其故吏已革知縣黃振國起用爲河南信陽州知州巡撫田文鏡劾振國貪劣不法紱由廣西來京 陛見奏言振國無罪文鏡以紱與振國同年劾其袒護

至是紱疏辨奉 旨訓飭五月廣西提督韓良輔等條奏雲南廣西接壤貴州安籠鎮之土司及改流地方均歸安籠鎮節制 詔紱前往與雲貴總督高其倬會議尋合疏言雲南廣羅協廣南營廣西泗城協上林營鎮安營距安籠鎮遠恐鞭長不及惟廣西安隆一營較近但改隸後該鎮又須受兩廣總督提督節制隔省咨呈未便均應照舊管轄部議 從之十月奏請增直隸河員天津州州同青縣子牙河主簿各一隸天津道轄涿州霸州州判吏目各一宛平良鄉固安永清東安武清六縣縣丞主簿各一隸永定河道轄北運河同知通判各一要兒渡縣丞東陽村主簿各一薊州灤州州判各一玉田縣縣丞豐潤縣主簿各一隸通永道轄霸

州清河吏目一隸清河道轄又請將河閒天津所屬旗民案件改歸新設之天津理事同知轄部議如所請行十一月奏言在京部科及直隸藩臬等衙門向有積年書吏盤據招搖役滿雇人承辦仍陰主其事謂之缺主臣遵 旨嚴查逐令出境並飭各州縣毋許容留一人但訪得部科缺主尙有潛居通涿昌平等處者請 敕部科諸臣查開姓名移咨一併驅逐得 旨俞允尋奏言各省候選訓導之歲貢前經田文鏡奏請預行驗看臣思廩生必二三十年而後出貢又三十餘年而後選官亦未必俱能得選見在驗看未老人員至得選時已老豈能懸斷其可否供職且教職領憑必經巡撫考驗又何必預驗於十年二十年之前徒令窮老寒士

奔走跋涉廢業失館請將此例停止 上以其識慮卑淺嚴訓飭
之十二月 諭曰爾自被擢用以來識見實屬平常觀人目力亦
甚不及朕但取爾秉彝之良直率之性而已凡朕一切誨諭如果
傾心感服將來智慮自當增長擴充若硜硜固執鄙見妄自矜高
不但終見棄於朕恐將來噬臍莫及爾其欽承毋忽會御史謝濟
世疏劾田文鏡及黃振國事 諭曰李紱自廣西來京陛見卽奏
田文鏡參劾黃振國及汪誠邵言綸甚爲冤抑張球居官聲名其
劣田文鏡並不糾參且言黃振國此時已爲田文鏡監斃滅口未
幾黃振國從河南解赴來京依然無恙不知李紱受何人意指而
捏造此不稽之言敢於冒昧陳奏也至田文鏡所參黃振國各案

朕差侍郎海壽史貽直到豫已審訊明白定擬具奏其張球一案
田文鏡早經認過請罪部議亦於張球諱盜案内將田文鏡處分
至汪誠邵言綸皆係庸劣不堪之人田文鏡奏參處分並無冤抑
乃謝濟世所言黃振國張球邵言綸汪誠等事竟與從前李紱所
奏一一脗合朕思封疆大臣能爲國家實心任事卽爲國之棟樑
朕之股肱若不保護而受人傾陷則朕何顏對天下封疆大臣乎
此種結黨營私排擠傾陷之惡習不可不嚴加懲治是以令內閣
九卿等公同研究謝濟世所奏各款皆茫無憑據俯首無詞則其
受人指使情弊顯然謝濟世旣自命爲報效國家之人著革職令
往阿爾臺軍前効力贖罪此案亦免深究尋 召紱來京補工部

右侍郎五年二月署廣西巡撫韓良輔奏天河縣獄內拘禁莫東旺一名係李紱批飭枷責追賊結案之犯遷延一載尙未發落致蠻獍糾眾劫去得旨著李紱明白回奏尋奏稱莫東旺一案經臣審結卽赴直隸新任其因何遲延一載尙未發落之處無由得知諭曰舊令尹之政必以告新令尹古人於罷官之後尙以國事爲念豈有李紱身任總督不將此事明白交付接任之巡撫囑其早行完結之理著交部察議尋諭曰雲貴總督鄂爾泰曾奏稱廣西泗城土司甚屬不法請飭廣西巡撫提督懲治朕曾降旨詢問韓良輔據奏請往雲南與鄂爾泰面加商酌朕思此事甚有關係非韓良輔與鄂爾泰面議不可昨都察院奏原任廣西州判

程旦控告土司羅文剛一案羅文剛糾眾肆惡吞噬十一處村落
竟敢與官兵相抗不容設立塘汛李紱身爲封疆大臣遂巡畏縮
苟且彌縫但爲掩飾一時之計而於地方之利害民生之休戚毫
不關心甘汝來時爲臬司亦因循怠忽不能整頓昨令廷臣詢問
二人俱俯首無詞李紱甘汝來相繼爲廣西巡撫著二人前往廣
西辦理土司之事從前疎縱之兇徒羅文剛等著卽責成李紱甘
汝來速行擒拏不得容其免脫韓良輔前往雲南時李紱一同前
往李紱甘汝來負朕擢用深恩今加寬宥容其效力贖罪務將廣
西境內不法之苗夷與地方不法之奸民悉心料理俾盡革凶頑
遵奉國憲以安良善以靖地方儻疎縱之羅文剛等不能擒獲及

伊等料理土司之事虛文掩飾以卸目前之責將來仍有兇苗妄
行干犯王章者定將李紱甘汝來從重治罪又如礦賊盤據兩廣
之間兩省官員互相推諉以致宵小肆行良民時受其擾著李紱
甘汝來會同阿克敦將兩省疆界一一清查分別防範管理使汛
地各有專責匪徒無計潛藏毋得仍前怠忽自干重罪三月紱由
廣西赴雲南與鄂爾泰等酌籌粵黔分界泗城改流等事會直隸
總督宜兆熊等疏參原任大名府知府曾逢聖原任清苑縣知縣
王游虧空錢糧 上以二人均紱所保薦令明白回奏閏三月戶
部議覆紱在總督任內奏懷來縣倉廩坍塌小民竊食顆粒無存
之處應行令確查 諭曰官倉米數至六千餘石之多豈有小民

敢於私取竟至顆粒無存之理明係李紱有意市恩庇護知縣借口巧爲開脫今部議行令確查與李紱本意不合可卽將米石令李紱賠補以成就其市恩之意八月宜兆熊等復參大城縣知縣李先枝私派累民 諭曰李紱任直隸總督時將李先枝題升天津州知州朕調來引見看其人甚屬庸常故令仍回知縣原任今以私派被參劣款見有明據常見科甲出身人員多有夤緣黨庇之惡習而貪贓枉法者尙不多見今李先枝目無國法公然私派科斂苦累小民實爲科目中之匪類而李紱乃敢在朕前特薦題補天津要缺是李紱不但有心袒護且必有暗受李先枝請託之處著將李先枝革職拏問其私派情由該督等一併嚴審定擬再

將如何請託李紱之處究出具奏李紱受朕深恩不思報效敢於營私欺罔甚屬可惡著革工部侍郎職前因廣西貴州查勘疆界及擒拏羅文剛二案將李紱發往廣西彼時降旨若不能拏獲羅文剛卽將李紱在廣西正法今羅文剛已經緝獲是李紱在廣西無可辦理著行文令李紱來京見在應行質問案件甚多且李紱曾在朕前奏稱蔡珽爲人粗疎鹵莽則有之若貪婪不法之事臣可保其必無今蔡珽諸事敗露在四川任內受賄貪贓劣蹟昭著李紱敢於庇護私黨在朕前妄奏此處亦應審問十二月議政大臣等會議紱罪凡二十一款私受門生大城縣知縣李先枝請託妄爲保題徇顧師生罪一將貪婪無厭之蔡珽保奏固結黨援罪

二袒護同知黃振國及息縣知縣邵言綸固始縣知縣汪誠密奏
被參冤抑又控稱田文鏡欲致死黃振國滅口罪三蠻獠莫東旺
一案不早結致劫獄罪四天津道葉前係不應送部引見之員
故違諭旨送部罪五奉旨天津建造營房漠不關心任意遲
延罪六擅將不應離任之通永道高鏞等題請離任另補罪七將
庸劣之廣西上林縣知縣柏宏智妄行特薦罪八所解慶豐司羊
毛等項不據實查明混爲咨覆罪九奏請帶往廣西之都司岳咨
縱兵串通礦賊奉旨詢問並不認罪罪十西隆州土目王尙義
等歷爭歪柒等案並不早結罪十一明知清苑縣知縣王游虧空
不查參反飭阜城縣知縣陸篆交代勒逼出結密奏王游爲直隸

第一好官罪十二擅增直隸兵米價值罪十三順義等十八州縣
靜海等二十七州縣虧空錢糧擅批豁抵罪十四與蔡珽表裏爲
奸奏大名府知府曾逢聖操守並無不好罪十五收受直隸守道
桑成鼎銀五千兩巡撫李維鈞銀一千二百兩罪十六被參清苑
縣知縣姜任修發審串供不嚴究罪十七上年田文鏡奏報豫省
糧船正月出境李紱妄奏偶遇大水僥倖出境將來恐未必能及
今年糧船出境更早又稱誤聽人言罪十八與布政使德明張迺
面奉諭旨回奏時俱舛錯罪十九以故殺馬順之楊四稱爲救
父情急妄引鄭雄救母之例減等罪二十不早除逆賊羅文剛以
致脫逃反參州判程旦浮躁罪二十一律應斬決妻子財產入官

奉 旨李紱既知悔過認罪情詞懇切且其學問尙好著革職從寬免死令在纂修八旗志書館效力行走其妻子財產入官之處俱著寬免七年十月以謝濟世在阿爾臺軍前供出昔年參田文鏡出於李紱蔡珽之授意 上召見廷臣命紱隨入 諭曰朕在藩邸懶於交接人所共知並不知蔡珽李紱之姓名因馬爾濟哈通曉醫理常在府中行走後補授清江理事同知朕問明於醫理之人伊舉蔡珽以對朕因令其來見而蔡珽辭以職居學士不便往來王府且醫理粗淺不能自信朕聞其言深爲嘉許後年羹堯來京力稱蔡珽才守識見實超羣類朕告以招之未來之故年羹堯因見蔡珽面言而蔡珽仍堅辭如前朕是以更器重之次年蔡

臣等奉命來省... 十一
十一
珽補授四川巡撫時朕扈從避暑熱河蔡珽以身屬外員遠行在
卽向年熙轉求欲到朕園中一見朕相見時則極稱李紱才品操
守爲滿漢中所少是時朕方知李紱姓名也朕御極之初延訪人
才以資治理因起復李紱原官旋授侍郎又命辦理漕務旋授爲
廣西巡撫伊具摺密奏黃國材收捐積弊且稱黃國材廣通聲氣
其子弟親戚布滿朝列今臣盡發其私必謀傾害朕諭以爾公忠
爲國朕必加恩保護豈料伊在朕前如此陳奏而暗中則爲黃國
材事事周全其工於欺妄如此至署直隸總督徇私廢公沽名邀
譽倉穀虧空則代爲隱免屬吏貪庸則曲爲庇護以致吏治廢弛
人心玩愒又如塞思黑從西大通調回朕令暫住保定俟各督撫

提鎮回奏到日再降諭旨未幾李紱奏稱塞思黑患病不數日奏報病故而奸邪黨與及庸愚無知之人遂有朕授意於李紱而戕害塞思黑之誣語今李紱在此試問朕曾有授意之處否乎在塞思黑之罪原無可赦之理其從前之所以將伊暫畱保定者蓋因阿其那允禴俱在京師其事未曾定案而邪黨眾多人心叵測不得不畱意防範豈料伊遂伏冥誅而李紱並不將塞思黑自伏冥誅之處明白於眾以致啟匪黨之疑議則李紱能辭其過乎至田文鏡之在河南公忠爲國而李紱蔡珽以其參劾黃振國汪誠等遂極力陷害朋比爲奸指使謝濟世捏款誣參欲令言臣挾制朕躬必遂其私怨而後已此風何可長也李紱蔡珽著交部記取確

供入於謝濟世案內歸結尋廷臣遵 旨訊絀並請交刑部治罪
得 旨寬免十三年八月 今上御極九月 命給侍郎銜管戶
部三庫事十月補戶部左侍郎仍管三庫十一月奏言近來督撫
諸臣往往疏請揀發人員備任使而候選之員亦藉之以僥倖躒
進及赴該省缺少人多有四五年不得官者多羈縻失所而九卿
驗看又不過取辦俄頃別無考驗之法且揀發分發變簡爲煩徒
費章疏應請停止疏下部議除雲貴川廣需人仍准題請揀發外
餘省槩停 從之乾隆元年正月奏請增派翰詹科道磨勘試卷
得 旨允行五月以保舉新進士過多又在朝班囑九卿保舉奉
旨詢問絀奏臣多言滋事今懷承 天語訓誨永絕妄言 諭

曰朕卽位以來並未嘗有因臣工多言卽加以處分者今李紱明係
妄舉乃自謂妄言避重就輕希圖蒙混著交部嚴加察議尋議降
二級調用十一月補詹事十二月充三禮館副總裁二年五月
遣祭夏禹王等陵十月丁母憂六年三月充明史綱目館副總裁
尋補光祿寺卿六月充江南鄉試正考官八月授內閣學士紱平
日講學謂朱子道問學之功居多陸九淵尊德性之見爲卓上
躋其言八年以病致仕 陛辭 上問有所欲陳否紱以慎終如
始對 賜以詩曰 三朝曾侍陛七十竟懸車進退誠無忝邱園
信有諸病餘宜樂志老去尙耽書素悃依閭魏高年息闔廬學嘗
兼慕陸節應上同蘇尤喜臨辭闕嘉謀實起予十五年卒孫友棠

明史紀事本末卷之二十一 卿貳三十

原任工部右侍郎

右 國史館本傳

乾隆十有五年閣學臨川李公卒於家公以病退已十年然海內士大夫猶時時探公起居以爲斯道之重公卒而東南之宿德盡矣嗚呼公揚歷三朝負重望者四十餘年以爲不遇則亦嘗受特達之知荷非常之寵內而槐棘外而節旄至再至三有具臣所不敢望者以爲遇則乍前而遽卻甫合而已離磨蝎蒼蠅旁午中之何造物之顛倒斯人一至此也累厥累起卒不得志終於翫鱗以歿是則可爲痛心者矣公以己丑進士入詞館授編修卽受聖祖不次之擢超五階爲庶子自來詞館所未有也主試滇中浙中

凡再遷而至閣學攝吏部侍郎兼副都且大用矣以辛丑校士之役被論罷官視永定河工蓋未及一年而已黜世宗在潛藩雅知公既嗣位召還盡復其官時時賜獨對參豫大議時有密勿重臣二人禮絕百僚親王亦折節致敬而公平揖之重臣言公賦性剛愎難共事乃解閣部二官但領副都尋復以爲兵部侍郎直講筵視漕歸稱旨旋令填撫廣西重臣終心忌之因作四巡撫論皆加醜詆以爲亂政之魁四巡撫者江撫楊文定公時爲滇撫今大學士海甯陳公時爲東撫其一則公而蔡尙書爲川撫亦豫焉重臣又令其私人汙公以賊卒不得不二年世宗思公召爲直隸總督盼昧倍隆公力言河東總督田文鏡之殃民旣面奏

之漏三下猶未退又連章糾之河督亦劾公以朋黨袒護屬吏之
出自科第者且舉動乖張世祖始頗直公言將斥河督已而稍
猶豫於是封事狎至公雖互有所持而不勝當是時世宗方痛
懲廟堂朋比之習禁尙書者素負才而專己願獨傾心於公會其
失眷忌公者因譖之以爲是其死友歷指其蹤跡公益訕召入
爲工部侍郎其在事方九月也則新任直督及廣撫交章劾公初
公在廣撫任中嘗安插一罪苗至是逃去新廣撫不自引咎追劾
公從前措置不善詔使公隻身前往捕賊自贖不得攜廣中一
更卒人皆危之公至而叛苗束身自歸有司訊之曰吾不可以負
李公其事得解時公已削奪官爵既歸下刑部聽訊大臣議公罪

應絞者十有七應斬者六共應得死罪二十有四凡屬吏於官頂
有虧者皆令公代賠籍其家取其夫人之簪釧視之皆銅器也獄
成世益爲公危顧公處之泰然在囚中日讀書晝飽啖夜熟眠若
不知有憂患者時故甘撫胡君期恆亦以事在繫歎曰真鐵漢也
內外諸臣方以全力羅織公必欲置之死 世宗始終念公特以
其性剛意欲痛有所摧折而後湔洗之而復用之乃大召廷臣并
召公親詰責之公正色無所撓但言臣罪當誅乞卽正法以爲人
臣不忠之戒無乞憐語是日也 天威甚厲近臣皆驚悸汗出浹
背恐有大處分而公自若鄭侍講篋谷在班中最爲子詳言之尋奉 詔恩赦公令
纂修八旗志書敝車羸馬卽日赴局杜門不接賓客重葺平生所

著書如是者八年 今上卽位召見諭曰 先帝固欲用汝卽日授戶部三庫侍郎尋改左侍郎時頗有阻公之起而不得者顧不一年竟左遷詹事公平生以行道濟時爲急用世之心最殷故三黜而其志未嘗少衰浩然之氣亦未嘗少減然而霜雪侵尋日以剝落菁華亦漸耗矣會以丁太夫人憂歸服除又左遷光祿尋遷開學時方主試江南一旦忽大病神氣遂支離與人語健忘一飯之頃重述其言絮絮數十度不止扶疾還 朝 詔在京調治竟不痊許以原官致仕 賜詩以寵其行歸而稍愈優游里社曾一至黃山蓋公先世自王父以上皆休甯產也然非復前此之伉壯矣嗚呼公自釋褐時新城王尙書稱其有萬夫之稟及中年百鍊

芒彩愈出豈知血肉之軀終非金石竟以是焦萃殆盡而要其耿
耿齋志以終者世人亦或未能盡知也世之論公者謂公之生平
良蹇於遇顧亦頗咎公之不能善用其才公以博聞強識之學朝
章國故如肉貫弗抵掌而談如決潰隄而東注不學之徒已望風
不敢前席而公揚休山立左顧右盼千人皆廢未嘗有少接以溫
言故不特同事者惡之卽班行中亦多畏之嘗有中州一巨公自
負能昌明朱子之學一日謂公曰陸氏之學非不岸然特返之吾
心兀兀多未安者以是知其於聖人之道未合也公曰君方總督
倉場而進羨餘不知於心安否是在陸門五尺童子唾之矣其人
失色而去終身不復與公接然其實公之虛懷善下未嘗以我見

自是予以晚進叨公宏獎其在講座每各持一說與公力爭有時
公亦竟舍其說以從予卽其終不合者亦曰各尊所聞可矣故累
語吝賞予之不阿而世方以閉眉合眼嵬呶嚙伺察廟堂意旨
隨聲附和是爲不傳之祕則公之道宜其所往輒窮也計公在九
列共事者曰年大將軍夔堯曰隆太保科多曰桐城常熟二相公
及爲直督襄營田之役曰和碩怡親王公皆一無所附麗而卒困
於河督然其終得保全者則 聖天子有以阿護之也西崦暮齒
尙遭側目可悲也夫公之好士出自天性故校士則蒙關節之謗
察吏則又遭鉤黨之誣然而詞科之役公方待罪書局猶諄諄問
予以天下才俊各取其所長登之簿錄是以丙辰復受薦舉過多

之罰偶取放翁詩題楹曰遠聞佳士輒心許老見異書猶眼明蓋
寶錄也予之罷官也徐相國言於朝曰今日李詹事必大作惡或
問之張尙書從旁荅曰此乃具體而微之李詹事也嗚呼予亦何
足以望公而辱諸君之推轂乎其經術皆足以經世務指揮所至
迎刃而解曾一出視漕卽爲清運丁積年之害至今遵行而惜其
所至皆未有三年淹也生平學道宗旨在先立乎其大者陸子之
教也閒謂予曰吾苟內省不疚生死且不足動其心何況禍福禍
福且不足動其心何況得失以此處境不難矣予於諸生詩業多
述公此言以告之則泰山巖巖之氣象如在目前一念及之足使
頑廉而懦立今老成徂謝後學其安所依歸乎公諱紱字巨來學

者稱爲穆堂先生其居臨川僅二世少貧甚讀書五行竝下落筆
滾滾數千言而無以爲生嘗自其家徒步負襆被之徽又之吳吳
人或異其才然未能振也或言之江撫卽君一見曰非凡人也始
資給之遂魁其曹三世皆以公貴累贈戶部侍郎娶某氏封
夫人子四孝源孝泳孝游孝洋竝登鄉薦而孝源爲縣令孫友棠
進士翰林今改御史公春秋七十有八葬於某山之某原所著有
穆堂類彙五十卷續彙五十卷別彙五十卷春秋一是二十卷陸
子學譜二十卷朱子晚年全論二十卷陽明學錄若干卷八旗志
書若干卷皆行於世公於雍正癸丑之冬見予文而許之遂招予
同居時萬學士孺廬亦寓馮紫藤軒下無日不奉明誨諄諄於義

利之戒公以丁憂歸子以罷官歸學士亦以丁憂歸是後一見公於江甯則公已病甚猶惓惓以子出處爲念旣歸不復相聞矣公之歷官事迹不能悉述且亦有事祕不能直陳者然而子苟不言世且無知者乃略陳其梗槩然終不能百一也嘗謂公之生平盡得江西諸先正之裘治學術則文達文安經術則盱江博物則道原原父好賢下士則堯公文章高處徧南豐下亦不失爲道園而堯舜君民之志不下荆公剛腸勁氣大類楊文節所謂大而非夸者吾言是也其銘曰

用則大受否則卷懷曰亨曰屯我何有哉所可惜者用世之才困頓而死志士所哀名山大川千古昭回英靈之氣長表券臺

右神道碑銘全祖望撰

公姓李諱紱字巨來一號穆堂江西臨川人少孤貧好學常負襆被徒步行千里至徽州吳門訪求賢豪江西巡撫郎公廷極見而奇之厚爲資贈舉康熙戊子鄉試第一己丑進士入翰林安溪李文貞公新城王阮亭尙書俱有國士之目 聖祖知其才從編修超五級爲庶子累遷內閣學士權吏部侍郎兼副都御史出爲雲南浙江兩省主考再充辛丑會試總裁被議罷官出視永定河世宗登極復原官侍講經筵眷寵特隆時九門提督隆科多撫遠大將軍年羹堯俱貴顯用事九卿六曹唯諾恐後而公獨與之抗無所撓屈出爲廣西巡撫未二年 召爲直隸總督路過河南河

南總督田文鏡勢方張冒整飭吏治之名一疏輒劾十餘員半皆
科曰公乍見揖未畢卽厲聲曰明公身任封疆有心蹂踐讀書人
何也田不能堪卽密以公語奏而公於入 覲時亦首劾田之負
國殃民漏三下猶侃侃未退退又連章糾之 世宗頗直公言將
斥田而田亦再劾公乖張數事遂兩有所持猶豫未決會蔡尙書
珽得罪素與公善忌公者因以朋黨事之 世宗震怒下公於獄
命直隸廣西後任督撫撫公罪狀二臣希 上意互有奏聞於是
下刑部訊鞫得應絞者十有七應斬者六其死罪二十有四籍其
家四壁蕭然夫人所戴釵珥悉銅器也 世宗知公深本無意誅
公特惡其崛強故摧折之冀稍改悔兩次決囚 命縛公與蔡珽

同至菜市兩手反接刀置頸問此時知田文鏡好否公奏臣愚雖死不知田文鏡好處乃 宣旨赦還仍囚獄中亡何 世宗傳齊諸王大臣羅列桁楊鉗鋸諸械 召公跪階下親詰責之 天顏甚厲聲震殿角左右股弁而公奏對如常但言臣罪當誅宜速正法爲人臣不忠者戒 世宗爲之霽威 命赦出獄纂修八旗志書在館八年 今上登極 召見諭曰 先帝本欲用汝也卽授戶部三庫侍郎尋改左侍郎公揚休山立鬢眉偉然終日無跛倚之容於古今事宜朝章典故口滔滔如傾河千夫奪氣又絕少溫顏是詞與人諧際以故滿朝文武望而畏之然愛才如命以議一賢拔一士爲生平大欲之所存形迹嫌疑漠然不計庚子辛丑兩

科做唐人通榜故事一時名宿網羅殆盡而毡毳不第者至袖瓦石相隨填公門幾滿以此奪職公終不以爲非乾隆元年詔舉博學鴻詞公已薦六人矣格於例限乃取夾袋中某某名姓於朝房中廣託九卿有吳江詩人王藻者尙無薦主乃交門下士孫副憲國璽薦之孫有難色公大怒責其蔽賢孫不得已長跪謝罪允薦乃已次日其事上聞以浮躁失大臣體鐫二級補詹事府詹事丁母憂歸服闋補光祿卿遷內閣學士典試江南閣中得離胸之疾神氣恟恍與人言絮絮萬語猶不知所謂榜發後中外寂然謂獨是科爲最公然所中雋者名流甚稀公之神明亦從此衰矣還朝乞病天子命在京調治卒不痊許原官歸里賜詩以寵

其行居家十年薨壽七十八公憂國如家勇於任事不以攬越爲嫌典試雲南歸卽以其地之鹽銅利弊作書告知參議李公巡撫廣凶歸卽以泗城改流調土兵法作書告知總督鄂公過黃河卽以新舊支河宜添兩壩作書告知總督齊公巡漕歸卽以運丁疾苦關河事宜作書告知總督張公起用未一月卽上疏請停揀選分發之例以息奔競寬公罪處分之條以惜人才專百官職司之任以成政化洋洋數千言 上嘉納之公博聞強記藏書五萬卷手加丹黃其宏綱巨旨都能省記刑部郎中楊某欲試公故意於押赴市曹時探問經史疑義公對楮衣白刃應荅如流楊退而告人曰李公眞鐵胎人也少好陸王之學不喜朱子有中州貴人某

嘗謂公曰陸氏之學非不高明然返之吾心殊多未安柰何公曰
公總督倉場時邀寵進羨餘不知返之於心可曾安否其芒角皆
此類也初公撫粵時安插一罪苗在安隆州公去苗遁後任撫臣
劾公措置不善 世宗命公單身捕賊不許攜粵中兵役人皆爲
公危公行至半途罪苗束手自歸曰吾不可以負李公其得夷心
如此所著穆堂類彙一百五十卷春秋一是二十卷陸子學譜二
十卷子四孝源孝泳孝游孝洋並登鄉薦孫友棠以進士官翰林
論曰天之生才若可知若不可知以公之志高氣盛如金鐘大鏞
雖目昧者亦不陳之庖漏而必登於明堂此可知者也乃似遇非
遇居高位不能終三年淹此不可知者也使公斂其芒以柔道行

之當必竟其所用而卒使孤行己意屢起屢顛何耶說者謂頗似公家北海一流然北海以罪死而公榮名考終則其廉儉過之且遭逢 盛世之幸也余弱冠入都袖文請業公極愛李德裕論一篇大書卷首云盡洗唐鑑中腐語得此痛快淋漓之作真不覺前賢畏後生矣嗚呼使公得志其功業亦豈在文饒下哉

右傳袁枚撰

李紱字巨來別號穆堂臨川人自幼以神童稱十歲能爲詩十二歲卽與里中諸先生結詩社諸先生齒長矣吳迂齋者其塾師年六十一其餘各四五十不等集中有云困蒙敢遠實養正乃良謀撰杖其陟嶽奉几同息陬卽髫齒時壇坫作也家貧甚嘗於大

風雪中手三百錢獨身重繭尋兄漢陽鎮上匝月走三千里寒餓
困頓之況自言爲有生所未經其得全殆天幸云嗣發解成進士
迴翔史館者一十二年後乃出任封疆入廁卿貳所至以功名顯
願性剛不能容物三起三仆濱於危殆者屢矣卒賴 聖明保全
以閣學放歸田里生平頗享文字之福少卽以舉子業馳名元墨
尤膾炙人口三主文柄所摸索皆名下士當辛丑之典禮闈也不
佞曾以弱齡與試先生奇其文又策問嘉靖間前後廣續五子等
姓名所對俱悉益大喜拔魁一經旋爲遂甯相所塗乙旣力爭不
可得則大恚拂衣出榜後辱寄贈詩有七篇文最賞雙眼淚猶滋
之句嗚呼世有好士憐才如此者乎青眼高歌唾壺欲碎矣蓋嘗

竊取而衡論之先生聲氣應求太邱道廣徐健庵以後一人博聞
強記過目成誦何義門以後一人齷齪辨難持之有故而言之成
理毛西河以後一人要其一生所辦香者不出其鄉而奄有前古
於文取廬陵南豐於制義取臨川兩大於命世之志取介甫於學
術取象山香火情深此自豫章人習氣詩則縱橫爽朗出入眉山
劍南不盡學西江一派也

右小傳鄭方坤撰

李侍郎紱性聰慧少時家貧無賃買書乃借貸於鄰人每一繙釋
無不成誦偶入城市街衢鋪店名號皆默識之後官翰林庫中舊
藏有永樂大典公皆讀之同僚取架上所有抽以難公無不立對

人皆驚駭後典試江南闈中卷幾萬本公皆批示鉛華紛披無不
中旨實近世文人所不逮也

右錄宗室昭榘撰

李紱字巨來由編修官至戶部侍郎著有穆堂初集穆堂來吳問
字於匠門而學問各有所得匠門主溫雅穆堂主闊大也詩品不
加修飾亦復自見風標

右 國朝詩別裁集小傳沈德潛撰

李友棠

李友棠江西臨川人乾隆十年進士改庶吉士十三年五月散館
授職編修六月大考四等罰俸一年十五年充陝西鄉試副考官

十六年補授福建道監察御史奏言江浙士民久殷望幸 鑾輅
經臨地方有司理應平治道路繕具舟車先期料理敬謹將事至
田土戶婚命盜案件或限於期力不能兼顧或藉口辦差任意推
延今值 聖駕迴鑾請 敕諭督撫嚴飭辦差州縣於舊新大小
事件分別先後立定期責令道府等官不時督催應審結者審
結應釋放者釋放儻有玩愒廢弛之員據實糾參則收令益加奮
勉案牘可以肅清於吏治民生不無裨益奏入 上是之十七年
充順天鄉試同考官十八年充貴州鄉試副考官十九年二月升
戶科給事中三月充會試同考官二十年 命巡視臺灣二十一
年提督福建學政二十二年巡撫鍾音奏參友棠考試時場規不

肅並違例豫印坐號分派知府代閩武生童外場不勝學政之任
敕部嚴察議處並諭總督楊應琚查有無別項劣蹟應據尋以
鍾音所參各款俱實此外尙無別項劣蹟覆奏部議降三級調用
詔改爲降四級畱任二十五年丁父憂回籍二十九年服闋補吏
科給事中三十一年遷鴻臚寺少卿三十二年擢太僕寺少卿三
十三年遷通政司副使尋擢光祿寺卿三十四年擢宗人府丞三
十六年命致祭西嶽華山等處及黃帝軒轅等陵三十八年閏
三月充四庫全書館副總裁五月擢內閣學士兼禮部侍郎八月
授工部侍郎三十九年九月提督浙江學政十月因辦理四庫全
書未能悉心校勘疵謬疊出敕部察議四十一年江西巡撫海

成奏新昌縣舉人王錫侯妄作字貫前載友棠古詩一 諭曰李
友棠身爲卿貳乃見此等悖逆之書尙敢作詩讚美實屬天良已
昧著革職五十五年恭逢 八旬萬壽來京祝 嘏 賞給三品
卿銜嘉慶二年二月卒

右 國史館本傳

何世璠

何世璠山東新城人由舉人授莒州學正康熙四十八年進士改庶吉士散館授檢討五十九年充山西鄉試副考官尋授山西道監察御史雍正元年二月充山西鄉試副考官七月提督浙江學政二年遷兩淮鹽運使三年擢貴州巡撫上訓諭之曰爾不可惟務虛名而廢實事不可但求潔己而不奉公不可以因循爲安靜不可以生事爲振作毋偏柔善以盜寬仁之譽毋事姑息以邀屬員之感毋徇朋友之情毋受權要之託爾之操守素爲朕知再武備不宜懈弛苗蠻雖愆然亦人也若實意撫恤令其知感營伍整肅令其知畏可保無事恩威不可偏用鑒別屬員不可盡以科

甲爲人才而視他途爲小人凡事虛衷秉公勿蓄成見平心以待
何事不得其理也時廣順州長寨等處建營房狃苗以防已出入
堵石阻梗前署巡撫石禮哈提督馬會伯商之總督鄂爾泰遣兵
進勦世璠疏言狃苗固兇肆亦有強弱良頑不同驟行進勦恐大
兵所到玉石難分臣仰體 皇上好生之德札囑提臣嚴飭將弁
毋恃勇躁進先宣布 皇恩令歸誠就撫儻怙惡不悛卽與督提
二臣相機行得 旨鄂爾泰非尋常督撫可比其才旣優心復公
誠須 等事當聽其指揮不可另立主見掣肘以失機宜嗣官兵
攻破谷隆長寨遮貢羊城壘等處擒首惡阿革阿擣及從兇川販
等 諭曰狃苗擾害石禮哈署巡撫時卽奏稱應勦何世璠則奏

稱應撫言武員好大喜功貪圖議敘且狎苗藥箭銛利地勢險阻
不易成事曾下旨令其招撫並不能有所招撫何世璠從前見事
不明性又懦弱未必能審究此案著交鄂爾泰訊究定議并安插
撫卹 上以世璠書迂不能振作欲易他人撫黔 諭鄂爾泰據
實奏聞鄂爾泰奏世璠雖拘謹然於官方民事實心實力勤瘁幹
辦而知人解事亦出楊名時上仍請留黔俾臣得同心協力依次
料理五年三月疏言鎮甯州屬康佐司土官薛世乾以罪革職子
幼不能承襲請將地方歸鎮甯州管轄下部議行閏三月疏請開
羊角柞子白蠟三礦廠及白果樹小河二鹽井又言黔粵以紅水
江爲界南屬粵之西隆州北屬黔之普安州而粵有十餘寨插入

江北粵獯句引潛匿劫爭多事欲杜爭端莫若先正疆界劃江而理沿江設汛永杜粵獯往來則引匿焚擄之患可息惟謬衝之花衣苗本屬楚省靖州轄偏近五開負固出沒行劫今既在附近黔省滋事無論其村寨是楚是黔臣等謹遵擒拏賊盜無分此疆彼界之諭旨隨咨督提二臣並會楚省督撫提臣擒剿然後妥勘地界以專職守 上嘉納之是年貴東道李日更劾世璣隱匿民艱寘竇誤政接見秀才講書課文以大吏而行教官之事濫准詞訟沿街投控以憲臣而行有司之事又護庇屬員詳揭虧空錢糧者多不參處 上恐其中有別情下其奏於鄂爾泰令據實覈覆並調日更來京詢問會世璣別奏三事上謂其巧詐並調世璣來

京令與日更對質而鄂爾泰言日更所奏皆虛且多矛盾實因去年奉旨保舉人才日更求世璠保舉不允蓄怨誣劾六年二月諭曰何世璠所奏三事甚屬巧詐如烏蒙等兇苗悉行勦撫聚平接壤之謬衝等苗陸續就擒實鄂爾泰之功今世璠攘爲己功且陳述其調度之方善後之策大言不慙莫此爲甚又如貴州官莊學租米穀名爲散給貧寒實巡撫司道衙門供應石禮哈奏將來變價以充各官養廉欲與眾官公用此米穀也世璠奏仍以此項米穀爲散給貧寒之用是欲以巡撫一人獨據此米穀也蓋不但沽名而且並收其利矣又世璠奏通省收成十分豐足與李日更所奏懸殊日更所奏或過甚然豈全無影響世璠粉飾陳奏隱

匿顯然俟世璣到京大學士九卿將此詢問令其明白回奏世璣至京上覽奏以世璣日更二人所奏瑣屑不必質對並諭曰何世璣謹慎老成但過於柔善不宜巡撫之任著畱京以侍郎補用尋補刑部額外侍郎改戶部右侍郎四月調吏部右侍郎五月命署直隸總督七年卒遺疏奏懇封贈祖父母得旨何世璣老成謹慎操守廉潔署理直隸總督以來實心供職應得卹典該部照例議奏外著加禮部尚書銜並於司庫內賞給銀一千兩爲伊歸櫬之費所請祖父母封典著照特加禮部尚書銜給與賜祭葬如例諡端簡

右 國史館本傳

凡由詞臣出身者諡法例准以文字冠首惟乾隆二十一年兵部
尚書參贊大臣鄂容安以陣前捐軀請諡內閣撰文剛文烈一諡
奏進 上去兩文字賜諡剛烈此異數也又雍正七年 賜吏部
侍郎署直隸總督 贈禮部尚書何世璠諡端簡何亦詞臣而不
用文字莫詳其故詢之館閣老輩亦不能荅

右記梁章鉅撰

何文端公 按諡法考無何文端者雍正初吏部尚書何世璠諡居
端簡何實出身翰林而不得文字殆文端誤記與 居
京師時一同年詣之日晏未起久之方出客問曰尊夫人亦未起
耶荅曰然客曰日高如此內外家長皆未起一家奴僕其爲姦盜
詐僞何所不至耶公瞿然自此至老不晏起見桐城張文端篤素

堂集讀此可見何公進德之勇並可見前輩處朋友間規過責善
如是其嚴也

右紀聞陳康祺撰

王承烈

雍正六年春江西布政使涇陽王公以左副都御史徵秋八月至京師進見首言巡撫某治尙刻深數語屬吏方今時勢譬諸醫藥安調榮衛古方無所用之壹以猛毒攻勿問何證儻吏皆遵信恐爲赤子憂 天子感焉立檄某廷訊而擢公工部右侍郎尋改刑部某至曰臣在江西事從嚴律從重欲恩出自上耳 天子震怒曰朕何自知爾用心若此且如爾所不奏而施行者何聞斯言使我戰慄汗流浹背立落某職而 諭戒內外臣工當是時自公卿大夫以至士庶自畿甸達山陬海隅莫不抃蹈相慶誦 天子聖明公亦以此名聞天下而自入臺府卽病疴淺深寢劇竟卒於逾

歲之冬公始爲庶常貧不能舉火閉戶誦經書不習課試文字用
此散館復畱教習三年眾以爲哈而余獨意其有以爲及雍正元
年改御史巡城有大豪殺人巧脫而以他人抵獄成於九門提督
隆科多諸法司相視莫敢異同公抗言以爭卒免之轉吏科都給
事出爲湖北督糧道遷江西布政使所莅必請奸蠹除弊政其在
江西大府方以威嚴率下百城蕩恐公獨譎譎支柱其閒吏庇而
民依焉公疾旣篤嘗語余曰吾自計莫如死宜吾晚而通籍碌碌
翰林中又十餘年及出爲監司動制於長官齟齬掣曳今驟叨
恩遇列九卿而天抗我不能旬月供職舉生平所學少自達於
明天子欲告歸則非其時賴寵懷祿以負宿心覲清議吾身一日

而生則吾心一日而死不若身死爲安惟子知我非貌言也公嘗
與王徵君爾緝講學豐川自少至老未嘗一日去書癸卯以前有
日省錄反自江西詩說成既遘疾夜不能寐輒思尙書疑義旦伏
枕爲草竟今文二十八篇平生祿賜必於官中盡之以賑凶饑修
城垣學舍家無一椽一畝之殖死無以歸其喪先卒之三月自爲
挽歌而以誌銘屬余余爲文不可以期恐不逮事與其子穆議更
請於高安朱相國旣成葬乃表於其墓之阡公諱承烈字巽功康
熙乙酉鄉試以五經爲舉首己丑成進士年六十有四其葬地及
先世名跡考妣妻子戚屬誌具矣

右墓表方苞撰

國朝通志卷之十一
雍正七年十二月甲申刑部右侍郎王公卒於位 天子加恩賜
卹葬祭 諭禮部具典禮以聞越明年二月其孤穆將歸葬以狀
請於余曰願有以銘其隧道之碑余與公爲同年友知公生平講
道服義立朝益官愛國撫眾諸大節有古大臣風其何敢辭按公
姓王氏諱承烈字遜功陝西涇陽人曾祖諱徵由進士授廣平府
推官魏闕構黃山獄抗爭之全活數百人擢山東按察使司僉事
落職家居闕賊陷關中檄召搢紳稱疾篤不赴甲申之變七日不
食死祖諱永春邑諸生闕賊之變代僉事公繫賊所僉事公得脫
父諱瑱邑諸生以任卹重州郡祖考以公貴 贈某官三代並崇
祀鄉賢祠曾祖妣某氏 封恭人祖妣某氏妣某氏皆 贈恭人

公天性高邁幼嗜學莊誦如成人年十九補博士弟子員旋食餼
嫻詩賦古文敦內行孝養無方家極貧授徒供甘旨歲饑未嘗缺
居鎮城與鄉人按保甲法稽察巡守編善俗歌謠令守城行夜者
誦誦鄉人化之肆力五經陳篋伏讀由心得發爲文章乙酉以五
經領解己丑成進士改翰林院庶吉士丁內外艱喪葬悉依家禮
五年孺慕如一日服闋散館授翰林院檢討 今上御極改河南
道監察御史巡視東北城公性坦易而莅眾方嚴峻廉隅守法度
有巨宦僕戚羈賈人米價素欠則假威怒罵賈人鳴於官僕匿其
戚於巨宦第中公執而寘之法輦下肅然署掌山東道時有旗人
命案兇首非其人九門提督定案當抵命會審諸公莫敢異同公

抗言其冤往復辨爭得免凡公所爲不畏強禦類如此旋補吏科
掌印給事中二年八月 召入養心殿講大學明明德辨儒釋之
分甚詳 上大喜賜性理精義古文淵鑒及珍玩數種卽奉有督
糧湖北之 命湖北漕運頭舵水手皆本軍雇覓沿途苦之時有
請卽用本軍子弟者公以本軍子弟不習操舟且縱水手數萬人
失業於江湖中爲害滋大乃依保甲法編次恩威並用運丁斂戢
江陵荊門蘄水等州縣向有以南兌漕之例水腳運費約千金舊
歸糧道公準其兌而卻其金黃州府屬被災公捐資設飯廠賑之
舊例荆南盤查各倉陋規供應船隻每項約費三千餘金公皆捐
俸自備飭胥吏不得受一錢給發南折兵餉及修船行月等銀悉

照部平而以其餘修造救生船興復江漢書院 天子聞而嘉之
擢江西布政使司布政使署舊設東西通吏作好犯科公莅任卽
革除勒石各州縣凡遇造冊事件吏胥苛駁以索厚費公令黏簽
冊首示以攢造之法需索之弊自絕南昌新建吉安九江等郡被
水公捐三千餘金賑恤會城多圯捐千金倡修之又清釐白鹿洞
學田俾諸生膏火之資不絕時布中丞性苛急待吏民如東溼薪
公委曲調護勁正不苟大拂中丞意公曰吾一日爲藩司一日行
吾心所安甯阿上官以上負 聖明下負百姓耶人咸爲公危之
上察其忠以都察院左副都御史召公進見卽具劄直陳 上
召中丞置對中丞語塞遂落職授公工部右侍郎江右數十萬生

靈咸頂祝曰 天子聖明公有仁者之勇偉哉公自工部調刑部
右侍郎時方苦瘧感 上知遇力疾辦事至秋遂臥牀褥冬十二
月卒春秋六十有四公自少勤學博涉羣書年四十兄事豐川王
先生講明心性修己治人之學以第一等人爲可學而至豐川先
生諱心敬陝西名儒也及成進士出安溪李文貞公門益研究宋
儒書身體心驗不在空言所著日省錄切己內考力行可畏毛詩
解尙書解皆有心得病臥時猶手自改正公嘗語余曰吾自年四
十庶幾無一事不可對人言者歷觀二十餘年清節惠心虔恭不
懈偶有贏餘卽用以惠民濟眾修廢興學不爲生計歿之日身幾
無以爲斂嘗謂其子曰我以清白二字遺汝足矣初登九列士大

夫想望其丰采施爲公益奮勵思上報 聖明竟以纏綿瘧病未
得展其志每與親知子弟言及未嘗不淚泫泫下也嗚呼觀公之
忠誠終始勿替可謂不負所學者矣原配左氏繼娶李氏俱 贈
恭人皆先公卒又娶裴氏 封宜人子男一穆癸卯舉人內閣中
書舍人孝謹能世其家學女三長適太學生李思孝次適候選經
歷蕭侯次幼孫女一公之歷官行事相國高安朱公旣爲之誌以
納之幽余所以銘公者亦將以傳公於後也銘曰

王氏高節世有賢哲陰德之光其祥長發我公繼之孝德作其董
帷發憤擇友親師年旣四十淵修益密約己以正居官以律 天
子達聰進秩登庸其艱其瘁一其初終臺垣數載寢奸宥罪吏以

從風民以樂愷兩湖之間水運盤環公施大德墮淚峴山江藩嗣
命以煦以泳棘棘不阿強權莫競載道歌賡惟 天子明既毗
邦憲若工司刑公曰嗚呼身非我有我疾不瘳 帝恩有負竟不
少留遂終於位述公生平忠誠不二有耀其學有昭其繼刻石垂
休以質來裔

右神道碑蔡世遠撰

國朝耆獻類徵初編卷七十補錄

卿貳三十

王承烈

少司寇王公諱承烈字遜功號復庵世爲陝西西安之涇陽人曾祖徵明天啟壬戌進士歷官山東按察使司僉事落職家居李自成入西安檄召搢紳公拒以疾比聞都城陷痛哭不食死祖永春邑庠生嘗陷賊中械繫月餘不屈賊知其意堅釋之父瑣以文學知名公天性高邁幼嗜學鄉人社臘報賽同學爭往觀公獨端誦不輟年十九補博士弟子員乙酉以五經領解己丑成進士讀中祕書連丁內外艱哀毀骨立喪葬以禮服闋授翰林院檢討今

皇上御極之元年授江南道監察御史巡視東城有豪棍爲巨室僕人媼姪素行兇惡賈人控於公棍知公不可干以私乃竄身巨室公督卒搜執寘之法由是不逞之徒皆悚慄畏避輦下肅然嘗召對 養心殿講大學明明德章反覆敷陳格致誠正之義

上大嘉賞賚甚厚明年以諫垣督湖北漕政湖漕錮弊多端每僉丁撥運軍民譁然不可制公下車數月得其要領逐一指揮不動聲色而諸弊盡除江陵荆門蘄水諸邑請就便以南兌漕公如所請水腳運費約千金盡汰予民黃州府屬被災公率屬捐貲賑粥日親按視曰吾不目覩吾心未安也押運至虎頭磯厲風大作舟幾覆公拜祝曰承烈奉職無狀願身當天譴勿損船沈米致誤天

庾須臾風止漕舟得無恙比遷江藩楚中兵民數千人灑淚擁送揮之不去江藩舊有東西通吏作奸犯科官民並受害公莅任卽革除勒石署前郡邑攢造部籍吏書百計苛駁公令黏簽冊首俾照式改造需索之弊不禁自絕時中丞性苛急公多方調劑凡中丞所爲有未合必力爭得請乃已然終以此拂中丞意戊申春升都察院左副都御史中丞亦解任來京公與中丞質奏 上前中丞語塞 上嘉公嚴褻中丞旋授工部侍郎改刑部侍郎自入臺府輒病瘡時作時止力疾視事未嘗一刻少懈迄己酉夏疾大作支離數月而卒予思關中理學淵源於橫渠張子先儒謂張子如伊尹西銘言仁發明萬物一體之義伊尹納溝之恥卽此意也所

論井田學校農桑禮樂親切可見諸施行又嘗欲以一鄉之地畫為井制為天下後世法張子之於治道其志可謂勤矣而卒不獲抒其所蓄樹聲績於當時為蒼生利賴良可惜也近代若呂涇野馮少墟皆學張子之學者也涇野仕終南禮部侍郎雖立朝侃侃而所言終不獲用少墟以講學為小人所阻致仕飲恨而卒豐於德而嗇於遇千古同慨說者遂謂儒術迂疏多不用於世即用亦未必效今觀於公而知其言之大謬不然也公自為諸生讀書談道精研性命之旨體察於身心之間立意較然以聖人為必可學以唐虞三代之治為必可復先是李二曲講學盤屋公族兄豐川親受業於其門公嘗自謂平生得力於豐川之教益為多然二曲

豐州屢辟不起而公獨毅然以斯世斯民爲任比之橫渠張子涇
野少墟諸儒其學同其志同而遭際之壑隘則前賢所未有也夫
以草茅崛起之寒賤備員史館孤介特立而數年之間敷歷中外
功績懋著爲世名臣公誠上不負君下不負所學而 聖主之知
人善任豈漢唐以來賢君之所能及哉公嘗語子弟曰我三家村
一窮秀才受 恩至此何由仰稱言之涕零自五月乞假養疾
皇上屢遣御醫調治輒整衣冠倚牀叩首嗚咽不止重九日自爲
挽歌四章有蠨螋何意別鸞鸞天地恩深圖報難之句易簣時無
一語及私惟以 君恩未報爲恨夫以公之公忠誠懇孜孜爲國
使得享耄耄之年 天子且將大用公公之所以輔佐太平霖雨

君赤者不更有大焉者哉公生於康熙五年三月二十日申時卒
於雍正七年十二月十四日子時享年六十有四元配左氏繼李
氏俱 誥贈恭人繼裴氏 誥封宜人子一穆癸卯 恩科舉人
任內閣中書將以某年月日葬公於先兆孤穆乞子志其墓子交
公二十餘載公弟孝廉錫綬又嘗遊吾門不敢以不文辭於是誌
而爲之銘銘曰

嘗登崢峒之巔探元鶴之穴下矚涇原細涓活活東流百里濁浪
潺咽毓秀鍾靈寶產人傑味道沈酣砥行孤潔遭逢 聖主樹立
炫赫天不愁耆紉謳悽悲卜佳城於何所蟠石之南莘野而西千
秋華表芳草離離

右蘇志銘朱軾撰

國朝詩話續編改訂局
卷七十一
卽貳三十補錄

四

The image shows a large rectangular table with 10 empty vertical columns and a header row. The table is oriented vertically on the page. The columns are of varying widths, with the two outermost columns being the widest. The table is currently empty of any data.

143-634

國朝書獻類徵初編卷七十一目錄

卿貳三十一

黎致遠

張照

覺羅石麟

路振揚

趙宏恩

鄭其儲

胡煦

何國宗

俞兆岳

王符

任蘭枝

樊廷珍

國朝書獻類徵初編卷七十一目錄

國朝詩林卷之六十一

國朝耆獻類徵初編卷七十一

通奉大夫前署江西巡撫江西布政使司布政使湘陰李桓輯

卿貳三十一

黎致遠

黎致遠字甯先福建長汀人名所居曰抑堂門人因以爲號父士
弘字媿曾歷官參政以文章吏治名於時致遠年二十一登康熙
丙子賢書時參政已大耋矣長兄文遠辛酉舉人任山東新泰令
參政卒致遠遵遺教喪葬悉依古禮不用浮屠時人異之戊子春
應闈撫張公伯行聘居會城修書講學者一載己丑成進士選庶
常壬辰授翰林檢討時士風猶尙干謁通聲氣以詞臣當持衡門

多如市致遠獨峻弗納終日扃扉絕奔競時人以爲高不可攀莫敢以私語者公卿閒雅慕才名冀投一刺不可得大學士李公光地己丑會閣座師也方宣白麻倡正學教誘後進門牆甚盛以致遠同鄉植氣節獨加敬禮致遠淡然每進謁起居數語輒負牆而退或以爲太冷不近情李公獨喜曰賢者也張公伯行任倉場總督屬吏有知致遠與張厚者願納交餽問慙慙致遠峻卻之戒闈者曰彼爲倉場張公來非爲我來也張公以正人待我我豈藉張公以爲利且我生平自命居何等可於此兩失之乎丁酉典試粵西願納交者踵其門詭云與太史公面言畱白金四十兩家用家人辭不獲置筥中致遠粵還甫踰閩行裝未卸詢家事家人以爲言

則大驚命送還家人請伏卸裝不可且誓曰吾既知之矣此豈可
片刻存哉聞者歎服庚子冬奉 命督楚學政痛抑奔競先品行
而後文藝一時拔擢稱得人成進士讀中祕書者甚眾雍正二年
甲辰還 朝復命 上疏通言路加意詞臣欲使敷歷中外明體
用以備任使授致遠吏科給事中致遠忠誠慎密每奏輒焚草雖
至親不得聞丙午春以保舉山東巡察引 覓 上大喜謂廷臣
曰此人可大用山東巡察未足展其長湖廣係兩撫地大事繫命
巡湖廣改竊德慎山東 上又言此人大有見識前歲年羹堯方
盛他人未敢言獨密陳請加裁抑深爲可取蓋致遠此奏畱中舉
朝無有知者至是皆竦然起敬且服致遠之果不猶人也致遠奏

講馳驛徧歷荒州僻縣 旨俞之 賜紫貂錠子藥以行單車赴
所部弊絕風清驛站塘汛皆肅然盜賊屏息靖州有謬衝花衣苗
估險爲寇截商旅抄村落守令苦之然畏及兵戈多遷延觀望致
遠慨然謂宜亟治無使羽翼日多根柢深固爲害滋大移檄督撫
提鎮言謬衝花衣苗焚劫抄掠毒害州邑小民痛恨深入骨髓環
輿泣訴咸謂該州詳請會拏民皆鼓舞以爲更生不虞黔省稽延
推諉徒費文移肆惡猖狂日甚一日方今 天子聲靈四訖澤被
遐荒當事文武兼資壯猷偉略蠢爾不悛難於寬宥所當殲而殲
之以示懲創之威不徒驅而去之僅紆旦夕之憤不知黔省官弁
何以稽延推諉一至於斯以封疆之嫌耶則 天語煌煌罔分彼

此以山峒之險火槍之毒耶則楚人粵人亦重身命況苗性至惡
莫甚於謬衝毋論在黔在楚總宜發兵剿捕懲一儆百化梗還濱
儻再濡遲觀望致使生靈遭殃貽誤封疆咎將誰諉於是諸當事
感動奮發齊聲剿擒粵黔兩撫提督以兵四面阻絕湖廣官弁采
入進剿渠魁就擒旬月平定楚人嘖嘖歸功致遠不任受也明年
報政 命往江南稽察河工錢糧未幾遷光祿少卿復遷奉天府
丞俱未行比役竣則丁母艱奔赴京邸哀毀不自勝復拜大理寺
卿給假扶柩南還己酉 命典江南鄉試庚戌夏六月授奉天府
尹兼盛京刑部侍郎奉天爲 國家龍興地勳貴莊屯禁網疏闊
屬吏多因循積習不能自奮致遠極力振飭以興起土風民俗爲

已任案無停牘官無玩愒遠近肅然又修舉文廟禮制鄉飲酒禮刊圖式頒行各州縣講習在刑部則常以欽恤爲心多所平反飭各司無濫刑出俸錢資囚米罪人多賴以全活年五十六以疾卒於官囊橐蕭然無百金之蓄屬吏士民助其喪以歸舊屋數椽不蔽風雨蓋致遠嘗言吾仕宦二十餘年不敢他有所積以玷先人清白惟大參公文集失序編次訂譌刊刻成書吾願已畢子孫貧寒非吾所及也是以畢生未置田園半畝先世所遺亦於巡察湖廣及查河時鬻爲資斧不少畱今妻孥饘粥不充而家聲弗替論曰京兆性端介立氣節一生無所依附座客或涉勢利言某人遷某官則笑曰何足道或舉杯飲之曰後但言立身行己人以爲

孤高絕物不可攀躋矯矯乎雲中之鶴也然和平謙雅與人無競
舉動豁達開誠直爽以此人多愛慕之歷顯仕官九列無半畝田
宅以累子孫可不謂大丈夫乎

右傳藍鼎元撰

張照

張照江蘇婁縣人康熙四十八年進士改庶吉士五十一年散館授檢討五十四年入直南書房雍正元年五月遷贊善六月遷侍講七月轉侍讀九月遷右庶子十月充福建鄉試副考官二年轉左庶子三年二月遷侍講學士四月充日講起居注官疏言 聖諭廣訓一書請令學政轉頒各州縣學俾童蒙誦讀府縣考覆試時背錄一條方准錄取奉 旨允行四年四月充雲南鄉試正考官八年二月遷少詹事九年七月擢內閣學士十年七月奏言臣祖淇曾以田千畝爲義田贍族未經奏明立案旣爲公產轉恐爭競請官爲存案載入縣誌不得擅賣擅買違者雖臣子孫亦以盜

賣官田論疏入 上允所請立冊存案並 敕部旌獎以彰義舉
尋議贈淇如其子原任吏部侍郎等官十二月擢刑部左侍郎仍
兼內閣學士尋署順天府府尹十一年四月授左都御史暫署刑
部尙書兼管順天府府尹七月奏請更定律例一夫毆妻至死審
無故殺別情如無承祀之人准畱承祀枷責完結一竊盜三犯通
計贓五十兩以下罪止滿杖者從重擬遣五十兩以上罪止徒者
擬絞監候一承審官重刑疊奏致斃笞杖人犯二命以上徒流人
犯四命以上者以故勘論擬斬監候一斬絞人犯在獄如強橫不
法及犯賭博等事照原擬卽行正法提牢官議處禁卒責懲一支
囚糧每石腳價銀五分以贓罰銀給發移戶部查覈一刑部見審

左右二司郎中員外主事缺出揀選調補遺缺歸銓下部議行十
二月授刑部尙書以預修 大清會典書成議敘加一級十二年
五月刑部議覆福建民藍厚正毆斃胞兄一案照以援擬失當降
一級畱任十三年正月充 皇清文穎館副總裁五月貴州九股
生苗不法揚威將軍哈元生副將軍董芳分剿 上命照爲撫定
苗疆大臣照抵黔倡分地分兵之議因施秉爲適中地遂以其上
爲上游用滇黔兵專屬哈元生以其下爲下游用楚粵兵專屬董
芳於是進剿之兵紛紜撤換哈元生董芳欲將村莊道路盡劃上
下界文移辨論日久無功八月 今上御極尋 命照來京以湖
廣總督張廣泗往代 諭曰從前經理古州苗疆原係鄂爾泰獨

任其事後來逆苗煽動張照在京時見 皇考申飭鄂爾泰因其
向來料理原未盡善繼有解任之 旨張照遂以私意揣度過甚
其詞彼時廷議新疆不可棄置張照卽在預議之列 皇考深以
爲然今張照以爲密奉棄置之 諭旨轉告將軍哈元生因降旨
棄絕乖謬已極 諭張廣泗知之十一月 諭曰張照辦理苗疆
事務本係自請前往乃到黔以來挾詐懷私擾亂軍務罪過多端
伊到京時著總理事務王大臣會同刑部審擬具奏嗣廣泗劾照
立意阻撓與元生互相攻訐置應辦之事不理致大兵雲集數月
毫無成效 命革職拏問乾隆元年九月廷議依律擬斬 諭曰
張照浮躁性成又誤聽傳聞之言立意與哈元生齟齬朕念哈元

生從前征剿烏蒙曾經效力業已從寬免死張照亦一體釋放尋
命在武英殿修書處行走二年二月授內閣學士入直南書房
十二月充經筵講官四年三月請終養 上慰留之五年五月授
刑部右侍郎十月轉左十二月奏言律例刊校頒行尙須一年各
省未發新書擬罪必遵舊例舊輕而新改重者仍待奉到日遵行不
必駁改舊重新輕者刑部卽引新書改正使一年之內溥海內外
早被 恩光 特旨允行六年二月請假歸省九月回任十一月
上以朝會樂章句讀與樂音不相比合 敕莊親王同照查明
律呂正義源委又 壇 廟樂章恐不合律並查奏尋合疏言律
呂正義一書編摩未備請重修律呂正義後編與前書並垂萬世

壇廟朝廷樂章應遵聖訓將新舊所定並宋朱子六經圖及明朱載堉樂書式考定宮商字譜備載於篇使律呂克諧尋考易曉其民間俗樂亦宜一體釐正下部議行七年二月疏言軍流遣犯例應僉妻如子孫願隨往者聽並不在應遣之列向來旗人由旗咨部文內註明隨往字樣至民人刑部據文轉咨多不註明至配一例羈管本犯身故隨往子孫不得援奉恩例請嗣後該管衙門僉遣時卽於文內註明隨往字樣以免濫行羈管本犯身故妻子願歸給照回籍仍報部存案又遣犯在配本身既不許他往子孫又一例羈管困頓飢寒情殊可憫請嗣後遣犯在配所生子孫該犯在日如有附近謀生者准呈明給限前往逾限

不同查究在配所生之女或許嫁他處或寄養於人悉聽自便又各邊鎮賞旗爲奴人犯在籍子孫本非例應僉遣如往遣所省視情殷依戀或窮途艱苦不能卽歸旗主藉其力作歲月浸久並沒爲奴甚屬冤抑請嗣後到配省視者赴該管衙門報名存案回籍日卽給印票放行如旗主刁畱計陷照律治罪部議 從之四月擢刑部尙書五月管理樂部先是雍正五年八旗佐領等有指扣兵丁錢糧印子錢者 世宗憲皇帝諭禁定枷責追利入官之條雍正十三年都統李禧請旗民一體嚴禁借債人自首免罪並免償放債人治罪仍追利入官民間爭首告冀免至是照疏言八旗佐領等官盤剝該管兵丁放印子錢者仍遵例擬追外如止重利

放債悉依違禁取利本律治罪禱所奏自首免償例已經律例館
刪除不准引用部議 從之十月中允于振請釐定 文廟樂章

上命照撰擬進呈頒發曲阜及各省學宮八年十月 諭曰朕

登極詔內四品以上官例得恩廕刑部尚書張照因彼時緣事未
與今特加恩補行給與恩廕九年十二月丁父憂 上以照父隸

義方有素訓子成名 特諭於本籍賜祭一壇十年正月照奔喪

行至江南徐州卒漕運總督顧琮以 聞 諭曰張照才品優長

兼諳法律學問充裕詞藻清新侍直內廷勤慎素著前聞伊父訃

音抱病星馳朕切諭其以禮節哀毋致毀瘠今聞在途溘逝朕心

深爲憫悼著加太子太保吏部尚書應得卹典察例具奏尋 賜

祭葬如例謚文敏二十四年 諭曰前因查閱蔣洲署中所藏字跡書冊見有張照獄中所題白雲亭詩卷詞意怨望因念張照爲受恩已故之人卽已付之炎官以保全其始終未曾明降諭旨昨命大學士蔣溥向伊子張應田寓中查取張照所遺筆札則更有未經朕覽刊入集中者毋論不日不月等語極爲狂誕而一則曰丞相再則曰鄂伯若以伊之獲罪悉由於鄂爾泰之構陷者伊旣以此憤嫉之詞公然付之剗刷傳之後世無知者觀之將謂實有其事故朕不得明白宣示鄂爾泰經理苗疆一事朕與和親王每日親承 皇考訓諭其中端委實所深知張照之奉 命經略原令訪察鄂爾泰事蹟乃張照一入四川妄自尊大不以苗疆重

務爲計立意阻撓於董芳則極口贊揚於哈元生則痛加醜詆且私致書哈元生等令參鄂爾泰以致張廣泗哈元生元展成等將伊乖張謬妄並致書臨參等款紛紛陳奏夫以國家經略大臣膺節鉞重寄而乃挾私僨事至於如此按以軍法立置重辟實所應得使非朕深知張照素與鄂爾泰嫌怨豈僅付法司擬以監候爲此格外矜原乎乃張照尙不知痛心悔改妄生不平之鳴耶朕爾時深見苗疆之事惟專任張廣泗庶可集事卽不得不將張照撤回以防牽制嗣念張照辦事尙有小才出之囹圄之中棄瑕錄用不數年由內閣學士洊擢尙書供奉內廷時得召對不啻家人父子在伊素性乖謬不愜人望一時諸人未必不以朕爲寵遇過優

而朕並不以此少弛其恩禮其感激又當何如耶卽如在獄時所處本非順境抑鬱之狀猶或人情所有迨至再躋顯秩疊受殊恩苟有人心則從前骯髒激烈之詞亦當猛省剴削而必將此刊刻流傳其居心又可問耶使張照仍在卽應治以國法今其人已死姑免深究伊子張應田所得廕生官職亦從寬免其革退四十四年 上念照資敏博學尤工書 御製懷舊詩列照於五詞臣中詩曰書有米之雄而無米之略復有董之整而無董之弱義之後一人舍照誰能若卽今觀其蹟宛似成於昨精神貫注深非人所能學 三朝直內廷受 恩早且渥其詩喜談禪學蘇太相著以苗疆獲罪意實別有託平苗事旣久復用仍遷擢性敏才本高未

免失行薄使生前明時標榜必致錯本朝無所施小哉張與鄂四
十七年十一月 諭曰昨閱進呈一統志內國朝松江府人物祇
載王頊齡王鴻緒諸人而不載張照其意或因張照從前辦理貴
州苗疆曾經獲罪又其獄中所題白雲亭詩意感憤經朕明降諭
旨宣示中外因而此次纂辦一統志竟將伊姓名里居槩從刪削
殊屬非是張照不知朕辦理其案之公衷而反挾私怨恨誠非大
臣公忠體國精白一心之道然其文采風流實不愧爲鄉賢卽董
其昌亦豈純全之正人君子哉使竟不登志乘傳示藝林致一代
文人學士不數十年竟歸泯沒可乎況從前張照之獲罪固疑爲
鄂爾泰傾陷其獄中憤怨之詞亦大都指摘鄂爾泰者居多蓋鄂

爾泰欲置伊於死地朕若聽信其言張照豈獲生全彼不知朕非
信讒之主而鄂爾泰又豈能讒張照之人卽如朕初政時戶部尙
書缺出果親王保薦右侍郎託時朕以海望乃左侍郎資俸旣深
皇考眷注亦優特予擢用夫鄂爾泰之力必不能過於果親王
果親王尙不能薦用一尙書豈鄂爾泰能構一尙書致死耶嗣念
張照究係可用之材因出之囹圄不數年閒由內閣學士游擢刑
部尙書供奉內廷朕之待張照終始成全原不以一眚之微始終
損棄可謂極儒臣之榮遇卽將來國史中亦當令載筆之臣將伊
事蹟詳晰編入何此時纂辦一統志轉佚其名耶總之張照雖不
得謂醇儒而其資學明敏書法精工實爲海內所共推重瑕瑜不

掩公論自在所有此次進呈之一統志卽將張照官秩出處事蹟
一併載入

右 國史館本傳

純廟時張文敏照獻松苓酒方於山中覓古松伐其本根將酒甕
開罈埋其下使松之精液吸入酒中逾年後掘之其色如琥珀名
曰松苓酒 上偶飲之故壽躋九旬康壯日健有以哉

乾隆初 純皇帝以海內昇平命張文敏製諸院本進呈以備樂
部演習凡各節令皆奏演其時典故如屈子競渡子安題閣諸事
無不譜入謂之月令承應其於 內廷諸慶事奏演祥瑞應者
謂之法宮雅奏其於 萬壽令節前後奏演羣仙神道添壽錫禧

以及黃童白叟含哺鼓腹者謂之九九大慶又演目連尊者救母
事析爲十本謂之勸善金科於歲暮奏之以其鬼魅雜出以代古
人儼敬之意演唐元奘西域取經事謂之昇平寶筏於上元前後
日奏之其曲文皆文敏親製詞藻奇麗引用內典經卷大爲超妙
其後又命莊恪親王譜蜀漢三國志典故謂之鼎峙春秋又譜宋
政和閒梁山諸盜及宋金交兵徽欽北狩諸事謂之忠義璇圖其
詞皆出自華遊客之手惟能敷衍成章又鈔襲元明水滸義俠西
川圖諸院本曲文遠不逮文敏多矣嘉慶癸酉 上以教匪事
特命罷演諸連臺上元日惟以月令承應代之其放除聲色至矣

右錄宗室昭榘撰

張涇南司寇墜馬傷右臂幾折時方進呈落葉倡和詩遂用左手書楷凝厚蘊藉無一筆呆滯真造化手也時得蒙古良醫百日全愈

右茶餘客話阮葵生撰

張照字得天由檢討官至刑部尚書諡文敏文敏性地高明通釋氏教所作詩左磕右觸皆禪語也子未諳禪理仍以主性情叶風雅者取之

右 國朝詩別裁集小傳沈德潛撰

華亭張得天尚書曾屏車騎訪予櫻桃斜街云昨見君風氏園古松歌病虎癡龍造語險怪君善八分遐陬外域爭購極類建甯光

和筆法曷不寫五經以繼鴻都石刻吾當言之曲阜上公

右自序金農撰

正德九年庚辰春正月



卷十一

三

覺羅石麟

覺羅石麟滿洲正紅旗人康熙五十年授工部筆帖式雍正二年在奏事處行走三年擢員外郎四年二月授江甯布政使五月奏上江各州縣向有虧空銀二十萬九千四百兩有奇經前撫臣李成龍准前布政使董永艾據府州公議將上司節禮及官役俸工等銀從雍正二年起按季解藩庫抵補至四年三月已解銀六萬一千三百餘兩乃升任通政使前布政使博爾多於此項內動用三萬七千七百餘兩自欠京餉一萬七千有奇疏入得 旨博爾多虛懸之項一一秉公查揭甚是似此辜負朕恩之人豈容絲毫姑寬且爾亦豈便代他人任過耶八月奏言泗州被水 命臣動

庫銀二萬兩親往散給臣卽馳往料理無絲毫假手胥吏內有被災三四分者雖不蠲免錢糧尙有賑粥之例酌減散給又有無田代耕窮民止有草房被水衝倒棲息無所其苦更甚亦照成災例行散賑日自辰至午恐饑民守候拍買餅餌使食得 旨料理甚屬妥協可嘉之至非實心任事何能有此賑過情形已悉爾其勉之十二月疏言外省虧空等案入官田屋例應估變乃遷延日久地乏人耕遂致荒蕪屋無人居日漸坍塌甚至州縣屢易其人漫無稽查或官役侵收肥己應查田地荒蕪者招佃耕種房屋分別賃租收息造冊送部存案民間有願買者照時價估變又言江安十府糧道每年收放漕糧約四十餘萬與小省藩庫無異請照司

庫例每年春秋二季分別應存應解登冊報記聽候檄解糧道例
應押運過淮抵通在署日少凡各屬解到錢糧及支放糧船行月
並修船等項未便槩任佐雜胥役請添設庫大使一員均下部議
行五年六月遷山西巡撫十一月奏言大同府大有倉朔平府常
豐倉所貯糧石原備軍需四月准部咨將二倉米六萬石發給范
毓黻秋後買補還倉見飭催買補第大朔二府地連直省今歲來
晉販糶者多價難平減且有關民食採買未便急迫查各屬存貯
倉穀不下百萬石請先動十五萬石運至二處碾米貯倉以備軍
需各屬倉穀請動存公銀陸續買補 上是之乾隆元年四月疏
言晉省汛堡墩臺向來建設多未齊整今擬省南省北及鄰界僻

路等處添設墩臺七十八座營房六百七十三間汛兵三百三十
一名就近撥補其煙墩牌坊如數製造又有應裁塘汛二十二處
變價充公兵六十八名撤歸伍七月疏言戶部覆准侍講學士楊
椿條奏山西佐雜等官宜給養廉查教職已按品給全俸藩庫大
使鹽場各官已有養廉者毋庸議給所有司府經歷照磨及州判
縣丞等官每員每年應給養廉銀八十兩吏目巡檢司獄驛丞六
十兩在耗羨項下支給其兼署之員因有本任養廉向無兼支例
但念本任養廉除贍家外僅充本任公用而兼署之任亦有幕賓
束脩與應辦公之費請准支養廉一半餘仍扣歸缺官項下充公
均議行十二月奏稱蒲州平垣潞澤澤州等營汛廣兵單撫標原

設二營兵數獨少請添清州協一百二名平坦營八十六名潞澤營一百八十八名澤州營七十五名卽在裁兵內撥給太原營與撫標左右二營同城兵數足敷防守惟守糧過多拔補未免壅滯無以鼓勵勤勞今擬改步戰兵百充給撫標左右二營又言先是設額外營兵時在省城建營房四千間衙署十四座今兵汰宜估但撫標並太原營本城兵千四百餘名租住民房而額外營兵又添撫標請將此營房撥給其備弁房屋仍爲公署均從之四年二月奏綏遠城副都統甘國璧條奏撥銀買糧貯歸化城綏遠城托克托城三處命臣議奏查此三處自移駐官兵招民種地以來生聚日繁需糧益多應如所請但行之貴乎可久此項倉貯既

無撥用原額而隨時平糶不盡出陳易新若照原議貯至二十萬石之多恐致紅朽請動支藩庫耗羨存公銀在歸化綏遠二城各買貯穀五萬石托克托城十萬石碾運協濟請自乾隆四年始每於秋收前遇稔卽買價昂卽止其領收平糶出納等事委本處理事同知與協理通判管理仍令朔平府雁平道查察歲底由布政使考成奏銷得 旨著照所議行五月疏言左都御史陳世倌條奏山東濟南等處及山西潞安以西各府屬久未得雨民望甚殷宜及時籌備查晉省山多水少不通舟楫米糧仰賴外來者無幾但民儉多有蓋藏且上年豐收民情甚安儻至下月尙無透雨致成偏災則宜請動倉穀按被災輕重定賑多寡又思以工代賑實

爲良法晉省各屬城已估計應修報部者共三十四州縣此內有成災處卽動項發州縣備料興工俾貧民得傭工度日報可五年閏六月丁父憂回旗十月授內閣學士兼禮部侍郎銜六年七月以山西巡撫任內失察布政使薩爾亮貪黷褫職九月特授鑲藍旗漢軍副都統先是山西平陽府知府章廷珪有婪贓事石麟曾經保薦至是事發議降五級調用十二年卒

右 國史館本傳

匡章者魯齊在才也

卷一

二

路振揚

路振揚陝西長安人由行伍拔補把總洊任守備遊擊康熙五十年授西安參將五十四年遷漢中副將明年擢四川松潘總兵五十六年策妄阿喇布坦侵西藏命四川提督康泰領兵千餘往青海偵禦至黃勝關柏木橋兵譟棄泰走振揚自松潘前往彈壓事聞命泰來京振揚署提督事因疏言松潘所屬黃勝關並無墩堡向設漳臘營遊擊一員駐劄管轄番眾迤南爲雜谷安撫土司種繁俗悍南境直抵打箭鑪與天全招討司明正土司接壤今該土司良爾吉之子班第爾吉尙未承襲臣備兵之初密令選屬防守各隘頗稱勤順請准襲職並加賞賚又加渴瓦寺安撫土

司桑郎温愷所部羌苗亦眾接近漢地見募部眾運糧又有漳臘營所轄之旗命上下包坐司等土官土兵習於戰鬪熟諳邊情臣曾令備土兵一千候調咸知踊躍亦請加賞如有調發准支口糧下議政大臣議並如所請雍正元年三月調重慶總兵四年三月遷陝西固原提督八月疏言 國家設祿養廉立法懲貪恩至厚法至嚴也乃貪黷猶未盡除查例載凡以財行求及說事過錢者審實計贓同科是皆應得之罪又例載罪未發而自首者免其罪猶徵正贓是自首免罪仍追贓此固垂世之常經然必俟其敗露得其實據而後得以罪之竊思營利之徒彼此容隱其事不易敗露或有告發猶必互相掩飾臣請開其自首之路凡上司保題所

屬並大計軍政卓異薦舉人員屬員以財行求上司受贓彼此皆應治罪如受者於事後能據實盡首則免追原贓并應得之罪止罪與者及說事過錢之人如與者於事後能據實盡首則照原贓倍追給主免其應得之罪止罪受者及說事過錢之人若說事過錢之人能據實盡首除免贓給賞外亦免其應得之罪止罪與受之人如是庶彼此皆存顧慮未事則畏懼不敢爲既事則爭首惟恐後是或除貪之一法得旨向聞路振揚操守甚好今覽此奏非一塵不染之人不敢具此摺也甚屬可嘉該部議行并將路振揚議敘尋議加銜一級特旨再加一級六年八月諭曰提督路振揚居官謹慎操守廉潔但年老精神不及固原要鎮恐有貽

誤著來京月用十月遷兵部尙書七年閏七月奉 旨路振揚受
朕深恩由提督特用爲兵部尙書伊不但不知感激敢於眷戀外
任心懷怨望託病推辭著將伊俸銀俸米永行停止十一月改鑾
儀使八年十二月署直隸古北口提督九年十月 上以沿邊要
地額兵太少古北口宣化大同三處應募兵增防獨石口以西至
殺虎口一帶隘口須勘定增兵定多寡之數邊牆年久坍塌者酌
量修築 敕御史舒喜天津總兵補熙會同振揚往勘嗣振揚等
疏請直隸獨石口參將改副將增設都司一千總二把總三馬營
堡把總改千總再增撥千總一龍門路都司改遊擊趙州堡把總
改守備張家口路屬柴溝堡增參將把總各一其應增兵丁請募

兵四百名餘於宣化鎮抽撥足額山西新平路助馬路增千總把
總各一將軍會堡增千總一馬布水口外委把總改千總平路
增把總三得勝路增把總二鎮洪鎮邊宏賜鎮羌拒門保安鐵山
威虎迎恩等堡及焦尾城增把總各一其應增兵丁於大同鎮殺
虎口協朔平城守營內抽撥足額無庸招募至直隸山西邊牆俱
無庸修築其坍塌各口均應用木柵鹿柵堵塞得 旨俞允乾隆
元年正月回鑾儀使任十一月卒 賜祭葬如例

右 國史館本傳

趙宏恩

趙宏恩漢軍鑲紅旗人由歲貢捐納道員康熙五十一年任湖廣襄陽道雍正元年緣父世被議上書請代父罪部議離任歸旗上召見諭曰爾父乃年羹堯所劾爾仍回楚候補二年補岳常道三年調武昌道四年丁父憂五年三月服闋命赴楚候補九月復授武昌道六年二月授湖南按察使十月授四川布政使七年四月署理湖北巡撫印務九月擢湖南巡撫八年奉旨勦撫苗獠疏報會同總兵官周一德等撫六里紅苗地方設兵汛苗眾歸誠感戴納戶輸糧下部知之九年二月疏言請增湖南六里吉多坪同知一經歷一排補美龍團寨二處巡檢各一詔從所請七

月疏言鎮筵所屬四營紅苗地方分設塘汛請移前營遊擊一
增把總一兵二百駐池河移右營守備一兵一百駐巖口增千總
一兵一百駐地良坡又栗林鴨保寨火略坪各增把總一兵四十
分駐其地餘小汛二十三酌安兵七百五十再黔省五汛至鎮筵
至六里必由之路應歸楚省設汛栗林等寨應歸各營管轄並增
兵四百分防左營撥把總一分防勞神寨均如所請十年九月疏
言乾州所屬襄流溪等九寨及新撫夯坨上下二寨苗民募化輸
誠願納糧賦令乾州應徵管坐撥鎮筵營兵餉又六里苗疆新設
永綏協駐劄兵丁吉多坪地廣扼要請建城垣官署並設倉貯穀
以備兵食乾州百戶照舊按設與汛弁同駐額徵雜糧令各百戶

徵收再永綏苗民漸知向化許其與兵丁結媼並於每里設義學
部議皆從之又奏改衡州府屬桂陽州爲直隸州轄臨武藍山
嘉禾三縣得旨允行十一年請改茶陵州屬小集地方歸攸縣
管轄復設攸縣鳳嶺巡檢一移澧州嘉山巡檢駐津市增設湘陰
縣新市巡檢一從之是年九月署江南總督十月丁母憂請終
制奉旨料理喪事畢著親弟趙宏運扶柩歸葬趙宏恩仍赴江
南委署總督印務十二年實授乾隆元年疏稱儀徵縣之青山頭
及江都縣之馬家橋甘泉縣之邵伯壩僧道橋等處簡派把總四
外委把總一緝捕操防所增新兵青山頭派馬兵二十戰兵三十
守兵五十馬家橋等處派馬兵九戰兵二十四守兵五十七令奇

兵揚州二營各於通營熟兵內拔配卽以新兵補伍青山頭弁兵應歸奇兵營兼轄奏銷仍歸江甯副將馬家橋等處弁兵歸揚州營兼轄奏銷仍歸狼山鎮總兵議如所請又疏稱各項錢糧例收足色紋銀惟江省納解糧銀於雍正六七年閒辦始必凸心鏡面無紋方稱足色較傾足色紋銀外每兩須加一二分耗折及支放俸餉工料等項一兩仍坐一兩之用江南額賦數倍他省各關稅課效尤合計每年傾銷耗費幾至十萬糜耗有用之民膏殊爲可惜請嗣後祇須足色紋銀平面潔白卽行兌收無庸凸心鏡面於國帑無虧而閭閻已節省無窮下部 允行二年三月授工部尙書三年禮科給事中田懋劾宏恩懶惰乖張收受舊屬湖南衡永

邴道許登瀛餽銀三千兩買民房一所不待移居卽行拆修兩月餘並不進署到部以來司官呈稟並不閱看輒行畫題四款奉諭趙宏恩身爲正卿受恩深重乃以納賄敗露殊爲大臣之玷情罪可惡照議革職著自備資斧前往臺站效力凡屬臣工當各自儆省以趙宏恩爲戒七年九月 召還京九年三月授漢軍正紅旗副都統五月授工部侍郎六月轉左兼總管內務府大臣八月署本旗都統十月總管工部錢法堂事擢工部尙書十年五月兼漢軍正紅旗都統十一月罷兼管內務府事務十四年授京口將軍十五年奏請本處協領等員移咨在京各旗簡選 上以宏恩意存推諉下部議革任十六年四月奉 旨京口官兵甚屬廢弛

皆由前任將軍趙宏恩不行訓練之故今雖革任反令安逸趙宏恩著發往熱河給千總職銜在工程地方效力贖罪八月 上諭趙宏恩係獲罪之人不應仍穿補服著在兵丁上效力行走十八年 詔免罪還京二十年授鑲紅旗漢軍副都統二十一年二月授工部尚書六月轉補左都御史七月兼正黃旗漢軍都統三十年九月卒 恩賜白金五百派散秩大臣一員往奠

右 國史館本傳

鄭其儲

公諱其儲字又梁一字虛齋姓鄭氏荆之石首人其先出漢鄭莊
南宋嘉泰間進士冲霄公者卒官江陵葬於石首其子淑濟公遂
家焉世有德鄉里至公考飛雲公 贈中憲大夫有六子公其次
也少爲名諸生年二十七舉康熙辛卯鄉試壬辰成進士改庶吉
士癸巳授檢討辛丑會試充同考官得邵中丞基盧運使見曾等
世宗初元改授戶部山東司郎中絕請謁介然不阿尋隲就理
三年擢工科給事中丙午奉 命主四川鄉試請假省親使竣歸
及夔聞母袁恭人赴明年丁父艱克盡哀禮己酉服闋庚戌授四
川松茂道參議縣州水壩顧廷璋甯壩楊元石馬壩李重吉等掠

借穀麻脅眾債張大吏檄公往治之公廉得民饑先發貸倉穀安
行密捕擒其魁至則帖然時方亢旱公虔禱齋戒日卓午仰顙忽
有雲隱隱心斂益怒少頃雨三日歷禱旁縣皆應岷雜踞泥潦中
送迎公呼聲載路蓋公生平以誠治己其他政類然甲寅奔生母
胡恭人喪 今上乾隆戊午擢太常寺少卿庚申轉大理寺卿遷
左僉都御史明年改順天府府丞丞治京師校士事公刷剔浮籍
寄姓以端始進每科歲郡試衡文拔才勤勤如不及丁卯又轉太
常寺少卿己巳致仕歸越五年終於家配陳恭人孝謹儉勤生子
二家謨家語俱太學生女四孫男二謨生永常語生永琳公生於
康熙二十四年乙丑七月十七日辰時卒於乾隆十九年甲戌二

月十八日巳時壽七十陳恭人之生後公十日於公之歿年九月三日卒乾隆三十三年某月某日合葬於縣之南鄉彭田岡公官少京兆時歲乙丑珪年十五應府試公首擢之期以國士兄垣筠皆辱公知時冬月公來予家坐聽事先君命予兄弟出謁公大詫曰君柰何凍裂吾莊先君愕然公徐曰此三進士吾三莊也速衣之裘先君笑諾珪自是乃得服羊裘及歲丁亥公歿十四年矣珪司臬楚北明年乃助公葬而銘公藏銘曰

誠澤民明擇人銘公德爨余身以脉其後昆

右墓誌銘朱珪撰

胡煦

胡煦河南光山人初任安陽縣教諭康熙五十一年進士改庶吉士五十二年授檢討五十三年正月 召見於乾清宮畫圖講易奏對稱 旨 命直南書房同大學士李光地分纂周易折中五十四年正月在 蒙養齋行走五十六年正月與修卜筮精蘊六月充湖北鄉試正考官五十七年三月遷司經局洗馬八月與修卜筮彙義十二月轉鴻臚寺少卿六十一年三月遷光祿寺少卿十二月遷鴻臚寺卿雍正元年正月擢內閣學士八月 命前往盛京審理私創人葺各案同刑部侍郎馬晉泰錄囚百五十八人論罪如律 諭曰刑部禁止私創人葺舊例不論已得未得俱送

刑部往返拖累故於盛京刑部監禁每年差官前往審理朕思伊等俱係圖利窮民春夏被獲監至九月十月方得審結延挨日月身受寒暑甚屬可憫甯古塔有將軍辦事御史盛京有將軍刑部並副都御史永福嗣後各地方所獲者卽審理速結年底彙奏將審理偷創人蔑之部院堂官停其遣往二年正月命祭告少昊等陵四月充順天武鄉試副考官五年三月擢兵部右侍郎九月充武會試知貢舉十月兼署戶部侍郎六年協理副都御史事二月教習庶吉士十月協辦禮部侍郎事七年九月充順天武鄉試正考官八年六月上書房行走充明史總裁官會試知貢舉九年正月授禮部右侍郎六月以年老衰庸革職十年六月河東總督田

文鏡劾煦長子孟基本邱姓子冒胡姓中式舉人部議斥革乾隆
元年八月煦詣闕 召見 諭曰原任侍郎胡煦年逾八旬服
官年久著賞給原銜回籍其繼子胡孟基復還舉人幼子胡季堂
賞給廕生入監讀書以示朕眷念舊臣至意九月卒 諭曰胡煦
在京病故賞給銀五百兩經理喪事其應得卹典察例具奏 賜
祭葬如例二十五年河南巡撫胡寶琮疏請入祀鄉賢祠三十七
年 詔徵天下遺書河南巡撫何焯以所購書目進呈 諭曰何
焯奏覆購訪遺書一摺並將購得書籍目錄開單進呈因憶籍隸
該省原任侍郎胡煦平素究心理學曾有著述朕所深知今單內
並不見其姓名傳諭何焯再悉心蒐求彙單具奏季堂時官江蘇

按察使奏請以其父所著周易函書約存十八卷約注十八卷別集十六卷卜法詳考四卷校定由原籍彙奏季堂見官刑部尙書

右 國史館本傳

乾隆三十八年 皇帝下詔求遺書直省大吏先後條上所得古今人著撰有 旨諭河南撫臣以前禮部侍郎胡煦究心理學所著周易函書獨不在列命續舉以進於是海內之士咸仰 聖天子褒崇古學發微闡幽光昭文治於無窮也其時胡公子季堂方官江南按察使既刻公遺文行世屬啟豐爲之敘復以公前葬時誌墓之文闕焉更屬次公行事而爲之銘啟豐故以廷試辱公知在翰林時又隸公教習旣公之德不忘於心其敢以不文辭謹按

公諱煦字滄曉河南光山人其先自江西遷湖廣之麻城後由麻城遷河南之光山五世祖諱靖前明嘉靖乙卯舉人官遼陽通判篤於行誼子敏卽公之高祖也曾祖諱某遵化縣諸生祖諱濱亦諸生早卒妣喻氏撫子二一先卒一卽公父諱之杞崇禎十四年遭張獻忠亂喻氏挈其子偕僕胡家和出走倉卒遇賊相失喻歸依母黨居喻家園又遇土寇劫掠乃閉樓固守賊焚樓樓中人俱死之杞旣失母爲賊所掠已而逃歸喻家園遇僕胡始知母遭難狀檢遺骨弗獲泣血終喪生平敦尙節行多陰德 贈通議大夫母高氏 贈淑人公少而好學能文章康熙二十三年舉於鄉官安陽教諭五十一年成進士時年五十八矣居常究心周易得圖

書一貫之旨臚傳後引 見澹甯居卽自陳所學 聖祖叩以河
洛理數公條對甚悉選庶吉士自後屢 召見問卦爻中疑義
命畫圖以講 聖祖曰眞苦心讀書人也旋以檢討直南書房五
十四年充會試同考官五十六年典湖廣鄉試尋轉司經局洗馬
遷鴻臚寺少卿再遷正卿雍正元年授內閣學士兼禮部侍郎明
年典順天武鄉試五年授兵部侍郎攝戶部侍郎閱會試迴避卷
充殿試讀卷官教習庶吉士明年協理都察院左副都御史又攝
刑部右侍郎七年典順天武鄉試八年充明史總裁官直上書房
九年轉禮部右侍郎六月罷職歸公爲人正直忠厚其所建白必
以教化爲先務尤願 朝廷重農桑緩刑罰先仁義而後功利其

請博舉孝弟也曰十室之邑必有忠信愛親敬長誰則無情彼生
監舉貢外其有能竭力奉養無忤於二親者乎稱爲孝子宜也有
能公於財和於室五代不析居者乎稱爲悌弟宜也臣請每一州
縣歲舉孝子一人悌弟一人 敕下督撫給之扁額免其徭役得
見官長如生員禮其或篤於交友敦慈惠厲廉節下逮僕婢之賤
行有可稱亦令州縣隨時申請量加獎勵如此則化行俗美人知
自愛矣又請責成州縣勸課農桑或別設農官專司勸課之任又
言近見督撫於命盜兩案隱伏難明者止用自行招認四字援以
定臬夫奸黠之徒有抵死而不服者愚懦之夫有畏刑而自誣者
然則有辜者幸免而無辜者受禍矣臣請命盜兩案必證據確然

然後付法司閱實一有不當旋卽駁正庶得慎刑之意時方嚴盜
采人濫之禁故事每歲秋遣廷臣一人往訊於盛京自春徂冬羈
候日久瘐死者眾公至錄囚百五十八人其疾病者至五十餘人
斃者二人乃請繼自今私濫之案專歸盛京刑部及將軍府尹隨
時定案俾情輕者便予末減以廣好生之德得 旨允行著爲例
其攝戶部時閱漕項行追案自數百兩至萬餘兩不等公言所追
之案遠者五十年近者三十四五年使其人尙存必已家業蕩然
或其人旣亡必且係累其妻孥遏絕其生計徒有行追之虛名究
鮮 國家之實用臣愚以爲免之便其他請廣言路裕積儲汰浮
糧省冗官平權量多切於世務會河南荒公據實以奏 詔遣刑

部侍郎王國棟馳往賑濟切責總督田文鏡文鏡旋奏公嗣子孟
基本異姓不當冒官卷中式公坐是罷歸 上卽位元年公入

覲 上憫公老 詔復原官致仕蔭一子入監讀書會疾作卒於

京師 賜金五百兩祭葬如禮公所爲周易函書列四大門曰原
圖原卦原文原占凡五十卷又釋經文四十九卷爲正集外有別
集二十五卷又約注十八卷續集十六卷總一百五十八卷自昔
言象數者未有若是其詳也公之善易世固多知之獨其施於家
國政事之大者其言或不盡聞於時能傳道之者鮮矣啟豐謹備
論之使人知公之所以善易者於是乎在不獨訓詁章句之業而
已公卒以元年九月十三日年八十有二妻陳氏封淑人 贈夫

人以十四年十二月二十三日合葬於青龍河之原子四長壘縣
庠生次次壘廩生次仲壘舉人俱早歿次季堂生七歲而公卒撫
於長嫂甘氏以蔭起家順天通判至今官 上嘉其才特遷刑部
侍郎是能繼公之業以施於天下者公於是可無憾矣銘曰

易有三極經中尊乾元長善爲之門俗儒訓詁滋紛紜太清點綴
滓浮雲河洛未啟誰探根時行物生天不言唯公讀書師斲輪得
心應手韋編溫立 朝侃侃敷經綸體仁合禮志所敦地天交泰
方氤氳翩翩失寶嗟其鄰王言如日昭乾坤潛德有耀貽後昆青
山萬古多彌芬有求遺躅尋斯文

右墓誌銘彭啟豐撰

光山胡公之葬也誌有關越二十五年其孤季堂官江蘇以長洲彭芝庭先生舊從公游請爲誌又二十六年猶未納諸竈蓋其慎也彭元瑞曰王文公爲知常州李餘慶誌墓在旣葬之二十三年蘇文忠之祖序葬以慶厯八年越熙甯元年請曾南豐爲之誌上距葬時二十年况王止仲墓銘舉例謂誌石埋墓前數尺固無妨幽宅也禮有改題神主之文神主可改題誌石亦可補納也季堂曰諾則以嘉慶二年行事按前誌公所著周易函書一百五十八卷時初 敕徵校刊未卒事蓋公書始以授門人李學裕失其窠公貧不能全鐫屢舉其約又歲久漫漶至是季堂乃就公手定本鐫爲五十二卷上之今藏七閣者是也詳見四庫全書提要後之

讀公書者毋以誌疑之公以苦心經學上承 睿知乾隆五十九
年十一月十七日奉 特旨追賜易名之典內閣議上 予諡文
良蓋潮公卒時六十年矣 聖情念舊下及泉壤公以正學閱久
彌耀後之人保世滋大克承榮寵皆宜書而事在前誌後按柳河
東集崔祐甫志榮澤尉周君之葬明年祐甫卒而河東復誌其終
事謂之續志敢用此例以鏡諸石之陰

右墓補誌彭元瑞撰

光山胡先生諱煦字滄曉著周易函書約存二十四卷約注十八
卷別集八卷其持論酌於漢學宋學之間與朱子頗有異同然朱
子語錄有曰某作易本義欲將文王卦辭大槩略說至其所以然

之故於孔傳辭中發之如此乃不失文王大意但未暇整頓云云
是朱子於本義蓋欲有所改定而未能則後人辨訂亦未始非朱
子之志也陸游渭南集有朱氏易傳跋曰易道廣大非一人所能
盡堅守一家之說未爲得也元晦尊程氏至矣然其爲說亦已大
異讀者當自知之斯可謂天下之通論矣

右學案唐鑑輯

江蘇省通志

卷之二十一

三

何國宗

何國宗順天大興人康熙五十一年進士改庶吉士內廷行走學
習算法五十二年五月 命御前校對九月彙編 御製律厓淵
源十月授編修五十四年遷中允五十六年三月充日講起居注
官四月遷侍講五十九年十月遷庶子雍正元年五月遷侍讀學
士六月遷少詹事三年三月擢內閣學士七月 命閱視黃運河
道四年正月疏請於戴村壩增築石壩一五月奏言東昌府城南
有七里河口下歸徒駭河城北有魏家灣河口下歸馬頰河德州
南有減水閘下歸老黃河皆運河東岸洩水入海故道與大鹽河
小鹽河爲四支河各渠皆歸此四河以洩民田之水以年久淤塞

應挑濬 諭曰爾等特蒙朕之差委勤慎二字時刻不容少閒七日奏言山東汶泗泉源紆迴二千餘里請設管泉通判一專司疏濬又言高家堰以南石隄之上臨湖鑿墊葦柴高三四尺不等但大隄頂寬八丈三尺鑲墊僅丈餘應於柴工後將土隄一律加高於歲修案內逐漸增修 諭曰何國宗議設管泉通判一員甚是著議准行其高家堰加修隄工關係緊要若於歲修案內逐漸增修恐致遲緩著照何國宗所議卽動正項錢糧估計與修九月奏運河自臨清以北賴衛水濟運而衛水發源百泉益以丹河洹河其流始盛向例三日開閘濟運一日閉閘灌田日久弊生致運河淺阻臣等查勘百泉議分作三渠中爲官渠東西各一爲民渠東

口門寬五尺五寸西口門寬四尺五寸小民灌溉有資亦無損於
漕運洹河萬金渠口外有石壩一上年水溢止露壩頂二十丈餘
坍入水將石壩拆去十五丈迎水入渠今水消壩南淤成沙灘灘
南有石橋一涵洞四十有三請自東頭第十洞處許民於需水灌
田時自築石子壩北接沙灘灘東開小渠一引水入渠其西三十
三洞盡行疏濬無庸拆去石壩洹河之水自可一分灌田三分濟
運下部議行十二月充經筵講官是月署山東巡撫塞楞額以州
縣供應國宗等應於何項開銷請 旨 諭曰前差何國宗等七
人往山東查勘水道朕俱給與夫馬廩糧不使煩擾地方其繞路
躑勘不通驛遞之處令州縣酌量應付今據塞楞額奏稱歷城等

二十二州縣詳報供應欵差食物車馬等項用過銀兩無項可抵除德州泗水恩縣高唐聊城五州縣情願將用過銀一千五百九十九兩自行捐備不請開銷外其餘州縣用過銀七千六百二十餘兩應於何項開銷等語何國宗等查勘河道既給與驛站夫馬廩糧其餘繞地之處地方不遠所費日用之費甚屬有限今覽塞楞額所奏各州縣應付將及萬金之多何國宗不惜地方物力負朕任使交部嚴察議奏尋議降三級調用五年十月補大理寺卿六年十一月遷內閣學士尋遷工部侍郎八年正月 命同侍郎牛鈕督修北運河減水壩並濬引河工程二月奏勘河西務城北老岸舊隄及耍兒渡舊河口魚鱗壩俱大溜頂衝宜保護堅固方

資捍禦請先撥銀二萬兩發通永道辦料興工庶不貽誤 上嘉
其合宜三月奏減水引河經原任通永河道高鑛將壩門加寬四
十丈則引河亦須通身加寬舊引河南岸廢隄拆去方爲暢順但
工作持久應先於新引河中開沿舊廢隄開一深槽直達塌河淀
並將河口淤高及舊河內淤淺開挖自然水流較暢再查塌河淀
下口有陳家溝舊河一道東隄頭舊河一道賈家沽新河一道計
三河寬不及三十丈擬於賈家沽新河旁再開洩水河一寬三十
丈方足暢流歸海得 旨允行是月又奏言三里淺險工應建挑
水壩一並將鷄嘴壩修整其隄灣回溜處應修排樁一路又筐兒
港壩門急溜汕刷應建挑水小板壩一大板壩一順水排樁一路

又孤雲寺係大溜頂灣排椿損壞應修補西岸華家口係舊河上口原有攔河壩一頂衝汕刷僅存靠隄陡岸壁立舊河地勢窪應修葺工一段張家莊老莊刷去僅存月隄應建挑水板壩一後接排椿火燒屯險工舊有排椿應修補又上年水漫隄頂二十處應加培令河道動道庫歲修銀修濬估報水利營田衙門 詔如議速行九年四月兼河東總河田文鏡疏戴村向建玲瓏亂石滾水三壩汶水漲由壩面滾入鹽河歸海沙從三壩洞隙隨水滾瀉冬春水弱築土堰匯流濟運自國宗等增築石壩汎水漲發並尾閘洩水又無罅隙通沙瀕河連年被患汶水沙淤有礙運道請拆石壩仍修爲玲瓏亂石滾水壩得 旨何國宗勘議錯誤貽害地方

著交部嚴察議奏尋議革職乾隆二年 命充算書館總裁四年
五月充國子監算學總管六年十二月充律呂館總裁九年二月
詔給三品頂帶在樂部大臣內行走十月律呂書告竣議敘加
一級十二月授左副都御史十年三月兼管欽天監正事十二年
因議御史馮鈐條奏含糊題覆降一級畱任十三年六月遷工部
侍郎二十一年正月 命同侍衛努三哈清阿率西洋人往伊犁
測量度數並繪地圖十月奏言由巴里坤分西北兩路查勘臣努
三從山後至伊犁將博羅塔拉齊爾哈布塔克拜塔克瀚海等處
勘明繪圖臣何國宗哈清阿越托來嶺將博克達額琳哈畢爾噶
山及土魯番伊拉里克哈喇沙爾等處南北度數測量自海都河

上行由裕勒都至小裕爾都斯哈布齊垓所至地方繪圖復回至
巴里坤將兩路地圖合繪呈 覽報 聞旋 命將諸部節氣及
日出入時刻入時憲書十一月署左都御史二十二年正月授禮
部尙書四月因京察保送親弟何國棟照徇庇例降三級調用旋
得 旨何國宗年老龍鍾著革任五月 諭曰何國宗罷職以來
家居無事算法尙伊世學著賞給編修在上書房行走二十四年
遷內閣學士二十六年遷禮部侍郎二十七年原品休致三十一年
卒

右 國史館本傳

俞兆岳

俞兆岳浙江海甯人由廩貢生授浙江宣平縣教諭康熙五十一年遷福建大田縣知縣五十三年調臺灣縣知縣尋遷江南松江府同知雍正三年遷山東青州府知府五年擢通政使參議八年遷太僕寺卿 命偕原任湖北按察使王柔協理江南海塘事務十三年擢江西巡撫乾隆元年正月以兆岳母吳氏苦節 特旨予旌八月奏民間斗斛之制宜令畫一並禁演淫戲 上是之又奏保甲爲不易之良法其益於百姓者有五夫一家藏奸九家稽察凡行蹤詭祕之徒難以潛藏既可覺察於未事之先又可弋獲於失事之後利一欠糧頑戶每賄託書吏巧爲捏飾今將完糧額

數填註門牌縣官就便覈對一覽周知利二凡遇詞訟卽著該甲
傳集人證無庸差役下鄉百姓得免擾累之苦利三地方偶有賑
卹倉猝造冊胥吏增減戶口乘機舞弊令照甲牌上貧民丁口分
註應領銀米數目既無中飽之虞又免不均之弊利四古者寓兵
於農農隙講武今設立練長不時訓演儻盜賊竊發卽可有備無
患復以其暇日令練長宣講 聖諭俾之言孝言弟敦仁興讓不
但盜息民安兼可移風易俗利五請 敕下各直省次第舉行下
部議行八月以江西歲大熟請買穀數十萬石分貯各府州縣備
荒 從之又請將德化縣城子鎮并赤松南昌二鄉歸典史巡察
其城子鎮巡檢一缺改爲大姑塘巡檢兼轄附近之仁貴鄉下部

議行十月遷吏部左侍郎二年四月以江西九江贛州兩關元年
稅課贏餘銀兩缺額九萬餘 上以兆岳前任巡撫恐有情弊
命巡撫岳濬查覈以聞六月兩江總督慶復以兆岳任巡撫時有
派捐各款復行題參 命革兆岳職所列各款 敕岳濬確查具
奏閏九月以岳濬奏覆贏餘缺額銀其無著者僅二萬五千餘兩
餘皆不得實據 命釋兆岳罪三年卒子良模湖南甯遠縣知縣
敦仁分守山西冀甯道

右 國史館本傳

俞公諱兆岳字岱禎浙江海甯人父宣琅官大竹知縣公生十一
歲而孤母吳知書有志節陳說古事教督公公循蹈義法童而知

方康熙中由廩生捐貢肄業國子監期滿授宣平教諭遷大田知縣喜曰庶幾乎少白吾母之教乎則徒步微服抵縣一童襍被隨寓逆旅中訪利病數十日始出片紙召胥隸一縣大驚自是無聞獄縣以治調臺灣縣臺灣海外巖邑多武弁率恃功驕虐民不堪則相聚爲盜公以計捕其魁得一冊脅從者姓名盡載焉武弁欲取功要窮治之公乃置酒召弁飲熾炭行炙出不意投冊炭中立燼弁大詬公好語曰殺人邀賞仁者不爲也大吏聞之以公爲長者卒聽公誅其魁數人而餘不株問也遷開州知州遘母憂去官服闋補松江同知蘇松賦額溢他郡公力言於布政使西林鄂公轉請怡賢親王入告得豁免浮糧四十餘萬石又言海塘易潰宜

易士以石上官是其言俾督其役大學士高安朱公出視海塘奇
公才特疏薦之且曰兆岳如苦行頭陀年向衰矣及早用之猶可
得其死力有 旨召見入對 上甚壯之授青州知府是時雍正
五年也其年山東旱公以事至省城謁大府大府召優觴公公曰
久不雨 天子減膳撤樂矣爲人臣子忍對歌舞安坐終宴乎立
飲三爵趨而出大府怒思中傷之公卽引疾去疏入 召詣闕
上望見公曰強項吏上官所不便朕知其非病也顧宰相曰此人
可何官宰相據例對 上曰兪兆岳非常士也亦拘以例乎授通
政司參議適江南海水溢決壞海塘數處惟公所築塘屹如舊督
撫言諸 朝特擢公太僕寺卿總理海塘時崇明湮沒死者相枕

藉公出賞格募人掩骼招流民赴工就食閱七載成石塘七千一百二十八丈自柘林城至金山城凡四十五里復於金山濼缺險要地捐俸築片石小塘五百五十丈以衛之民得安堵乾隆改元 今上卽位擢都察院右副都御史巡撫江西 陛見陳母苦節且曰臣母三十餘而寡又受封例不得旌然臣孤苦無狀非母不能有今日乞省臣所例得 覃恩破格旌臣母 上命建坊祀節孝祠而公仍授階如制公之撫江西也謹身察吏廉民之疾苦七十二州縣無不達得請免淨糧十餘萬兩革九江贛州二關額外濫稅如干款除積害十七事勒之石置石府縣官之門示永禁七閱月而 召爲吏部左侍郎疏請便省墓至里招故人雅飲論

故事分俸贈族黨置義田百畝族人昏喪祭葬取給焉時海甯方
大築塘閘部無錫嵇公總其事公爲嵇門生聞公至使使候公公
進使者曰 天子發內府錢築塘而派夫擾及七縣沿隄取土壤
民田墓怨聲流道路吾厭聞之矣今日吾不言於師則負師不言
於朝則負 君其何以處我使者兼程返告厥明則馬上傳箭諸
不便事悉罷到部未久江西巡撫岳公奏公前解關稅較常年缺
額九萬餘兩下刑部鞠之實浮減免銀二萬五千兩除賞官兵其
無款可銷者才三百八十兩事在赦前得免議奉 特旨昭雪而
公已卒年七十有七公天性耿介能勞苦勇於有爲未至大田時
大田民有送妹嫁而失所在者其家訟之官官疑其妹之婿也拷

掠自誣服覈尸所在云在某所發之無有則盡繫兩姓迎送者公
至盡釋去而宿禱於城隍廟誓曰罪人不得則吾當斲廟而去官
夜則夢神示以小旗書輦字旦卽廟召所釋人間之曰某以肩輿
行乎曰然曰神已告我矣殺人者輿夫也時有二人在廟竊瞰伏
泥鬼後觀者眾推泥鬼仆適當二人頸二人面如土卽輿夫也鞫
之吐實果得尸其折疑獄誠心推求多類此而築海塘則功在蘇
松其法疊層石而中穿之貫以鐵筍其橫犬牙相銜銘鐵灌之膠
結眾石爲一水卽甚怒不可動先後督撫如李公衛尹公繼善皆
奏上其法爲築海塘式公之旣葬也有數十人詣祠焚香楮誦佛
經守者詰之流涕曰吾儕海塘夫耳酌以茶泥首公像前曰力非

不能具牲牢饋錢恐傷公心公不要民一錢者也如是十數年不絕于良模甯遠知縣馮赤舉人敦仁山西真甯道僉事降汀州府知府

李文藻曰予少時聞人言公守郡遺事惟恐其辭之盡也公嘗冒雪過鄉官馮協一家索飲協一爲言民害數事立除之或布袍棉履行市井民所苦樂無弗知旣引疾僦居府治南民宅父老獻蔬米者日闌於門彼召赴都民罷市遮畱三易期而不得行乃夜從二僕自持鎗啟城東門去質明民爭追之無及矣當時肖像范公祠之後樂亭蹟久圯而北郭汪公喬年祠前公之去思碑在焉予讀碑略得公名實近客濟南復交公之孫濟陽知縣調元悉其

世調元出家傳俾予第之嗚呼吾郡之民猶然兪公之民也今往
往以事控臺使擊登聞鼓矣或者謂青州民悍黠樂訟無仁恩乃
當兪公時何其彬彬然有情禮哉

右傳李文藻撰

王符

公姓王氏諱符字徵遠號溟波山東福山人也其先自滇宦遊於此因家焉世以儒業仕進至公九赴棘闈不一得薦而被斥者再於時公年四十餘矣不得已循例注籍康熙五十二年授知雲龍州州治在萬山中蠻獠雜處不知廉恥禮義公至始興教化舊俗浸變五十八年課最擢知太平府太平古南詔極邊領流官四土司二十有一類皆宋元時山崗明初始闢其人獷悍難治而思明州有黃而芸者在眾土司中尤號梟桀肆虐其下人又與各司相仇殺無已剽劫行旅取財內地商賈咸被其毒聚黨數千人鉦鼓旗纛漫山谷勢猖獗莫能制公白大府請擒治之不許公固請曰

極知閣下慮之深也顧某區區惟恃 朝廷威德方隆不當令豺
虎窺伺邊徼且流土皆赤子忍坐視所部陷水火中乎願假便宜
得自處置不煩一兵不濟則以官徇之督撫臣壯其言遂許之公
返郡密遣偵者廉得虛實乃佯以巡邊爲名徑赴明江而芸初聞
郡將猝至大賊旣乃聞輕裝單騎遂不爲備而循故事來迎入城
抵廨舍舍旁有鐘樓鐘以發號集兵公卽遣人斷其懸而仆之趣
召而芸執之而芸出不意不知所爲其黨洵欲爲變公乃出懷
中大府檄屬聲數其罪且曰罪止而芸汝曹皆良民各自安業敢
有譁者大兵且至汝曹無噍類矣眾皆誓服有頃各散去公以而
芸歸州人焚香羅拜道左歡呼動天地公復遣隸密捕其尤用事

助惡者數人具搆上大府以聞於是而芸等抵罪其旁州愿謹
順命者捐袍服以示獎異思明之改土爲流自此始龍英州土目
趙雍城剝下無厭求按治之雍城獻厚賂求貸公集官民於臺出
其金爲州人償逋賦而置雍城於法以故諸司感悅令行禁止爲
前此所未有雍正元年爲同城武弁某飛語所中罷任士民泣送
者數萬人六年起知成都府至則首開濬李冰故堰躬自相度督
察以利農田旋以公坐合睦被劾先帝以細故不足挂彈章令
來京授順天府丞八年遷光祿卿領府丞事如故是年山東偏災
大發帝賑救公請捐雜糧三千石助賑十年克東旱復請往協勘
情報可而克東之役督臣田以市恩濫賑密奏奉有王符居心

端直之 諭見 殊批寶笈中是年遷太常卿十三年八月 今
上卽位恭辨 山陵大禮皆稱 上意先後資文綺有差乾隆四
年罷七年十月無病而終年七十有六 誥封通議大夫太常寺
卿元配張氏有傳考妣皆 贈如其官子柔辰沅永靖道前湖北
按察使從繩六合參將檢癸丑進士見任翰林院編修孫顯緒亦
以丙辰進士入翰林

贊曰公木久困場屋不欲以他途進平生篤嗜卷軸工時文爲鄉
先達孫先生勅所稱歎既已入官則盡瘁所事絕不趨承上官阿
黨儉屬故往往有不意蹉跌然亦頗有天幸旣蹶復起且因被劾
馴致高位方爲副尹時余就童子試於公署蒙見獎拔重以日月

有課諄諄弗倦公第三子檢爲余癸丑同榜其爲庶常一切館試文字皆公自點勘蓋所好在是而當官果敢能斷大事則中朝人多有不知者徒以京職無事而食指眾晚節頗營園宅租息爲言者所論去官嗚呼宿草之悲其忍忘諸

右別傳陳兆嵩代某撰

任蘭枝

任蘭枝江蘇溧陽人康熙五十二年一甲二名進士授編修雍正元年正月入直南書房二月充江西鄉試副考官尋充日講起居注官九月 命視學四川遷左中允二年擢右庶子三年轉左庶子五年閏三月遷侍講學士四月遷少詹事尋授內閣學士兼禮部侍郎九月以安南國定界事 命偕左副都御史杭奕祿齎詔往諭詳杭奕祿傳七年充浙江鄉試正考官八年充會試副考官尋教習庶吉士九年正月擢兵部右侍郎六月江西廣信營參將張應揭報南昌總兵陳玉章侵扣兵餉諸款 上命蘭枝往按之惟侵扣屬實餘坐誣奏入 上嘉之十二月調吏部右侍郎十

國朝名臣傳卷之二十一 卿貳三十一

三

年七月充八旗志書館副總裁八月充順天鄉試副考官十月轉左侍郎十一月充經筵講官尋充會試副考官四月充一統志館總裁十三年八月 高宗純皇帝御極十月 命充 世宗憲皇帝實錄總裁官擢禮部尚書奏言雍正八年經吏部議准通政司參議吳山條奏將直省舉人預行截取分部學習一年期滿該堂官出具考語仍歸原班銓選蓋欲令其諳練政務以爲後日服官之資也但六部各司額設滿漢司員兼有額外進士及筆帖式等承辦其學習舉人爲數眾多又無畫彙說堂之責一應案卷紛繁若使盡閱轉稽時日兼恐傳說議論別生事端是以伊等分部毫無職掌於堂司官亦漠不相親不過每日赴部畫到期滿日該堂

官出具考語但按到簿稽查填寫行走勤字樣其吏治之熟諳與否實屬無憑考驗况一奉部文截取學習地方官督促赴部不便遲延及至期滿銓選尙遙又難久候仍復回籍長途往返資斧維艱遠省邊方情有可憫且部務原與外任知縣不同諸凡錢糧刑名催科聽斷之法自須因地制宜隨時更變非必在部行走方可學習請嗣後舉人應選知縣者停其分部學習俟選期將屆時陸續截取赴部候選下部議行乾隆二年二月 命蘭枝偕鄂爾泰張廷玉三秦恭點 秦陵神主 諭曰點主大禮攸關必取其人品望素優老成端慤俾之敬謹將專方克稱尊奉之隆儀卿等皆國家大臣夙荷 皇考恩遇付任有年名望夙著故藉卿等襄此

鉅典其體朕哀慕悃忱齋莊嚴恪靜慮凝神以對越 皇考在天
之靈庶得仰邀 皇考歆鑒朕有厚望焉三年十月調戶部尙書
四年正月 上御乾清宮新煖閣 賜諸王貝勒貝子大學士九
卿翰詹科道及督撫學政在京者九十九人宴賦柏梁體 御製
洪鈞氣轉叶韶年句首唱羣臣恭賦成章 賜箋硯筆墨有差蘭
枝與焉復調禮部尙書五年四月蘭枝門生太常寺卿陶正靖謝
恩時奏對失指 諭曰從來師生同年袒護朋比最爲惡習關
於風俗政治者非淺我 皇考屢垂訓戒力爲整頓此風已覺改
易近日又有復萌之意前日陶正靖因升授太常寺卿具摺謝恩
召伊進見面詢云見在兩澤愆期朕用人行政之閒或有闕失召

爾獨對當直陳無隱伊沈思良久奏云並無闕失惟處分魏廷珍
一事不無屈抑朕思魏廷珍歷來居官一味因循推諉從未擔承
一事不過師友同年援引標榜博取虛譽有負國恩朕是以因其
自請罷歸降旨革職伊既請離任已不供職與國計民生有何關
係而陶正靖獨舉此一事爲言豈得謂之直陳無隱乎彼時朕並
無責伊之詞亦無疑伊之意及恭閱 皇祖實錄內紀載癸巳科
拔取翰林知魏廷珍任蘭枝孫家淦等皆屬同年朕卽疑陶正靖
必係伊等之門生昨日禮部引見朕問任蘭枝伊果稱陶正靖係
伊門生如此明係任蘭枝將魏廷珍屈抑之處向伊言之而有此
奏據任蘭枝辯稱未曾向伊言及則陶正靖私心揣合任蘭枝之

意互相袒護矣因此事有關師生年誼比周朋黨之漸特令任蘭
枝將朕旨寫出申飭陶正靖並使眾人知所做戒至於陶正靖係
任蘭枝之門生朕問任蘭枝始知之並未向他人問及乃伊書寫
朕旨作爲問陶正靖而知之其居心詐僞避重就輕欲於筆墨之
中逞其伎倆朕豈不讀書之主於字句抑揚閒不能辨別其用意
之所在乎據此朕之所疑者確中情事矣且伊奏稱年老耳聾一
時誤聽是儼然以舊臣自居試問伊自登仕籍以來爲國家宣猷
效力何事亦不過周旋世故依違觀望如魏廷珍之輩爲仕途巧
宦耳卽此刻傳見大臣等而任蘭枝係進呈旨意之人竟在外逍
遙自如以致諸臣等候良久屢經尋喚而後至是又何必任蘭枝

陶正靖俱著交部嚴加議處尋議革職得旨任蘭枝從寬畱任
陶正靖降五級調用八月命往盛京監收穀石七年正月調兵
部尚書七月仍調禮部尚書十年以老致仕十一年卒

右 國史館本傳

乾隆十一年予告禮部尚書任公年七十以正月十八日卒於
京邸越三年葬於桂林山先塋之次迄今二十六年碑表之石未
立又所爲家傳載宗譜者多略兆麟於公爲從孫恐公之生平大
節久而湮沒也謹以夙昔所聞諸先人者撰碑紀實揭之墓原以
示後焉文曰我任姓始祖先賢任子諱不齊在孔門七十二賢之
列傳八世諱敖又五世諱光並以漢功臣終漢世襲侯爵又二十

世諱昉仕梁官御史中丞歷義興新安太守諡敬子實爲江南始
遷祖又三十世諱顯登咸淳戊辰進士始著籍溧陽迄今五百年
子孫蕃衍稱衣冠鉅族自先賢至公凡七十四世公諱蘭枝字香
谷一字隨齋曾祖諱煥祖諱一紳皆有隱德父諱文煒中康熙
二年舉人官無錫教諭以文行道諸生沒祀於學三世並以 覃
恩累贈光祿大夫經筵講官禮部尙書公生而嶷俊天資絕人九
歲誦諸經左氏傳十歲能文章年十七爲縣學生餽焉父老病失
明歸田後寢食動止須人公備盡孝養頃刻不離側父亦樂而安
焉康熙五十二年 恩科魁鄉薦聯捷魁會試殿試對策尤偉麗
典則 特賜進士及第授翰林院編修入直武英殿繕校周易折

中性理精義諸書雍正元年充起居日講官入直南書房遷左春坊左中允奉 命提督四川學政 賜西清南董御書二年遷右庶子兼侍講轉左庶子兼侍讀時並在蜀蜀以僻遠少工文者試院多積弊公立科條悉革之每試所屬閱文過夜半猶覆檢恐有遺才常召諸生訓以學古不宜自安固陋竣事來謁則誠以爲善貽父母令名反覆申訓至有感之泣下者蜀人咸謂自蜀有學使來未有如任公者還 朝 世宗有天下學政第一之褒五年遷翰林院侍講學士再遷少詹事未幾擢內閣學士兼禮部侍郎九月奉 旨宣諭安南初滇之開化與安南接壤有鉛廠山地四十里淪入夷中督臣以中國舊境奏請復之安南抗不服督臣請討

世宗特許以地予之而恐安南昧順道理 詔公宣諭猶以
安南不測戒勿遽入須先至滇與總督商度機宜俟可乃往使未
至而安南上表悔罪 世宗賜敕諭旨卽 命使者齎以往時雍
正六年四月也天方就暑南中瘴癘蒸毒安南以炎酷爲辭請秋
時廷使者公曰王事也誰敢稽日馳馬穿箐响以道粵西五月丁
卯至鎮南前驅款關曰天使至安南使夷官范謙來迎望見 詔
書皆拜謁如中國禮遂出關守土者欲以兵千人爲衛公曰何益
適滋疑耳惟以執事及從者行旣至使示國王跪拜儀注安南有
鄭國公者世掌兵柄無大小皆決於鄭王坐擁虛名而已至是以
書來則鄭銜與王並列公怒而叱之曰此陪隸也而僭侈若是安

南且不國矣趣使更之鄭聞之慚憤爲言於王以書來言從前拜
詔從五拜三叩是禮也安南所以事天以事天者事帝命度無所
失三跪九叩禮安南不習也彼此互持反覆移詰至七日王意奪
始盛服出迎欲使者由左門入公曰吾詔使也何左門爲王不能
答旣而上殿率吏官跪拜如故俗請讀 詔公正色大言曰使者
宣讀 詔書以王能遵中國禮儀故也今若是當奉 敕還京師
耳安得爲王讀乎語未畢殿門忽闔番目酋長夷隸數千人佩刀
睚眦環戶外從官皆失色虞有變公屹不爲動從容曉之王悚然
感悟麾眾退卒行三跪九叩禮乃更諭王以 聖天子綏柔遠人
至意王宜益效恭謹毋負 天朝恩於其還也王贖千金餽方物

並卻之歸奏 世宗喜賜紅絨頂冠曰吾爲汝加冠蓋異數也九年擢兵部侍郎署刑部遷吏部右侍郎十年辦理刑部轉吏部左侍郎 世宗以安南之役謂公忠厚誠實可大用於時被 旨按獄自辛亥至甲寅數奉使若江南河道康宏勳毛浚總管巴什等凡所告劾情辭巖險公悉規其隱而持之以平有袁崧者良鄉縣丞也告諸河官李壇黃瑛等侵漁狀坐訟者至數千人 詔公鞠之被累者皆薄其責十一年充經筵講官協理禮部事務十三年 世宗升遐恪襄喪禮恭題 世宗憲皇帝廟主上 尊諡冊文時稱大手筆公本以文儒雖歷任卿貳司國政然 朝廷大著作必使兼領焉雍正中立賢良祠至是 詔王大臣宜各立傳公與

尚書吳文恪公共成之又命輯執中成憲復充八旗書館副總裁充一統志總裁官奏增故相蔣文肅公所定凡例爲二十一類今上御極授禮部尚書旋充五朝國史總裁官奉詔修禮書乾隆三年調戶部尚書四年仍轉禮部五年夏因太常陶某等更議鑄秩七年復調兵部尚書未幾仍爲禮部時年六十六矣公自登六卿在禮部且十年凡鴻儀鉅典吉凶賓嘉之事皆所總治非淹洽掌故者多不克勝故人謂公爲大宗伯尤宜其接僚友及諸司郎官藹如也至大端所在侃侃執持無少假有山東人自稱孔子母施氏後宜列於官侍郎方苞爲請於朝上令廷臣議有謂事屬先師母卽疑似猶當子封公獨據韓敕史晨碑水經注駁

國朝書目考卷之十一
之又請褒韓文公後裔爲五經博士報 可他如祀先蠶建雩壇
議歷代名臣配享帝王廟皆公所奏定十年公以疾乞告歸 上
允所請俾以原官致仕公篤於天倫厚於故舊先世有田宅悉推
與其弟寬以待人未嘗揚人過見有片善必爲稱道之尤精於衡
鑒歷充庚戌癸丑會試總裁官癸卯江西己酉浙江壬子順天鄉
試正考官戊戌癸卯丁未會試丁酉順天鄉試同考官教習庶吉
士考試中書拔貢所得皆知名士凡臺閣鉅公敷歷中外者半出
公門當世有任太宗活文昌之謬云公少喜爲詩並工古文辭及
典試江西視學蜀中覽匡廬彭蠡長江之勝行劍樓觀峩眉篇詠
尤多有見南樓文集二卷詩集二卷行世配賈夫人子二端書乾

隆二年 賜進士及第授翰林院編修聚書六品廕生早卒女二
長適費傑次適豐縣教諭嵇瑛孫四銘曰

維任之先教承東魯公世載德克光前緒黼黻 三朝化洽隆古
皇華載使懷柔南土 帝用嘉美汝長禮部媿夷軼夔人文咸敘
經緯攸宜和衷殿陛卿雲景星和風祥雨榮遇始終明農引去公
有令名千秋表著桂林之岡先人原樹史臣載考我銘其墓

右神道碑銘任兆麟撰

任蘭枝字香谷由編修官至禮部尚書著有見南詩集公出使安
南宣諭國王使王知 天朝恩重拜舞感泣此生平大節詩亦典
重有體

右 國朝詩別裁集小傳沈德潛撰

魏廷珍

魏廷珍直隸景州人康熙五十二年一甲三名進士授編修五十四年遷侍講命入直南書房五十五年充日講起居注官五十六年轉侍讀五十八年命祭告中嶽及濟淮兩瀆五十九年充江南鄉試正考官擢詹事尋遷內閣學士六十一年管理兩淮鹽政雍正元年授湖南巡撫諭曰爾向日爲人清正和平朕所悉知但欲爲避垢離塵以求自潔而不可任勞怨今膺巡撫重任非當日清高閒散之職可比處事貴剛果嚴厲不宜因循退縮地方利弊之應革應興屬員賢否之應舉應錯須盡力振作一番方冀可收成效二年二月因審辦辰谿縣革生黃先文故殺一案率依

關殺擬絞援赦請免又會同縣民譚子壽等因姦斃三命率擬斬
候均經部駁 諭責其草率蒙混下部議處尋因咨撥綠旗兵餉
應題不題部議降三級調用 諭曰魏廷珍向在內廷行走朕知
其爲人老成學問操守俱好是以用爲湖南巡撫自到任以來甚
乏理繁治劇之才凡料理一切刑名錢穀非過則不及率多罷輒
糊塗著照部議調回以京堂用九月授盛京工部侍郎三年授安
徽巡撫四年三月題報涇縣戶書王時瑞等假印私收錢糧一案
並不嚴審止以追變家產著落各官賠補爲辭刑部議駁 諭曰
此事部駁是魏廷珍前任湖南巡撫時甚屬柔懦不能整頓地方
是以將伊調回去年安徽巡撫員缺朕因一時不得其人故將魏

廷珍補授伊赴任之日朕切加訓諭伊在朕前奏稱力改舊習今觀伊所辦事件仍然瞻徇姑息可見言行不能相符著嚴飭行五年閏三月疏言臣自莅任以來督率清釐錢糧第官役侵蝕見在易於發覺而往往匿於數年以前民欠中官吏數易難以清查此弊不清積久終無底止臣請分作二等如徽州府屬民欠至十七萬餘兩者勒限一年甯池太廬鳳滁和等府州屬民欠五萬餘兩上下者勒限六箇月責令知府直隸州督率州縣細查如係官役侵蝕卽著落官役並前失查上司分賠如實欠在民卽督催徵解限內不行查出知府直隸州降級畱任酌予展限准其開復如再徇延卽當與州縣官一並參處又稽查若不親身止憑書吏粉飾

臣等謹將前案卷宗
卷一
一
將官役侵蝕捏作民欠卽將督令造冊之府州分賠仍革職問罪
清查後接任官能查出前捏造花名將此捏欠盡著前捏造之府
州縣獨賠與接任官無涉接任官不能嚴察致再有侵蝕亦著獨
賠不得推諉前府州縣臣更有請者州縣錢糧惟憑交代出結出
結後查出虛捏卽干徇隱蒙混之咎是以州縣一經出結莫敢自
爲發覺請嗣後有民欠之州縣許於出結後隨查隨報免其處分
詔如所請行嗣因清查之限太迫州縣官降罰者多 敕部改
定原限一年者爲二年六箇月者爲一年仍給展限八箇月廣東
總督孔毓珣因 陛見道出江南奏宿州靈璧縣地方溝洫不通
雨水停積 諭曰魏廷珍身爲巡撫於本省事務漫不關心以致

低窪之處被水停注甚屬疏忽玩著交部嚴察議處其應行疏
濬之水道交署布政使噶爾泰先動正項錢糧辦理皆於魏廷珍
名下追補還項以爲封疆大臣忽視地方利弊者戒十一月疏言
臣年五十有九精力遠不如前乞內補修書之地俾得自效 諭
曰汝蒙朕簡任封疆惟務潔己自好於民生國計毫未補益而遽
望內轉清要安閒適志以保祿全名如是則爲臣不易之語謬矣
汝其勉之果能奮勉精神經理有效令朕嘉悅豈止內補修書之
地而已乎七年二月遵 旨條議安徽各官養廉俱倣江蘇定議
訓飭之五月以自陳用題本爲通政使王廷揚所糾 諭曰魏廷
珍遵例自陳應用奏本而用題本伊並非不知條例之人且由學

士至於巡撫歷任多年上次又曾經自陳而此番忽而錯誤豈得謂出於無心蓋伊之意以爲外任文武大臣題本奏本誤用者朕間常降旨寬其處分而伊自知無邀免之理特有意誤用甘受參罰使天下之人謂朕之待伊事事苛求而伊之獲譴皆屬無心之過假此一節欲以掩蓋眾愆其用心甚屬奸僞夫本章不合體式而免其察議者或係武職大臣不通文翰或係初經外任未諳體格其情皆有可原又如督撫等有降級罰俸之案而寬免者亦因其人平日爲國家實心效力朕不忍以小過處分是以沛恩於常格之外凡此寬嚴輕重之間朕皆準情度理出於至公如魏廷珍苟且因循朕念其何長而寬其循例之處分今又將明知之例故

意錯誤以干參處人臣事君之道固如是乎著魏廷珍明白回奏
部議廷珍自陳不職應照才力不及例降二級調用得旨寬免
八年三月請將潁州州同移駐方家集專司巡緝兼管水利鹽務
部議從之五月調署湖北巡撫九年四月命來京十月授禮
部尙書十年二月授漕運總督五月疏言淮安貧民草房葺牆竹
籠易於引火臣標見建營房與民舍相連俱以瓦覆費亦不多且
可經久上是其言七月疏言漕標城守營兵餉各州縣旋解旋
支並無預備請撥司庫銀三萬兩貯淮安府庫兵餉未到遇有急
辦之事先爲動支解到補項下部議行九月署兩江總督十月疏
言漕標東海營汛改設趕漕船應增兵九十二名並設防汛千總

一管船把總一部議 從之十一年回總漕任十二年遷兵部尙書十三年正月充皇清文穎館副總裁二月調禮部尙書九月今上御極 命赴 泰陵守護乾隆三年授左都御史四年遷工部尙書五年以老病乞休 諭曰魏廷珍歷任中外凡事推諉從不實心供職 皇考世宗憲皇帝曾屢降諭旨申飭此眾所共知朕御極之初仍畱尙書銜派往 泰陵料伊或勉勵思奮痛改前非嗣因左都御史缺出復行起用旋升工部尙書詎伊到任以來並未擔當一事建白一言亦未奏請面陳一語從前習氣並未悛改今又以老病乞休希圖始終保全更冀在家食俸似此因循懈怠持祿保身之陋習斷不可長魏廷珍著革職十三年 上東巡

過景州廷珍迎 鑾 賜林泉者頌額并給還原銜 御製詩二
章賜之曰杖扶靈壽衣看服遂初遺榮辭魏闕頤老返鄉閭便
道因來爾同堂憶贊予白駒誠不駐林下幾三餘 皇祖栽培士
於今賸幾人豈無師濟輩獨惜老成倫絃誦遺風在桑麻樂事眞
如懷退憂志里教勉還淳十六年 賜詩曰高年引養客向日粥
諸卿鶴髮猶然健葵心不改傾遂初孫著作樂志仲高平別後今
三載刪裁可就成尋 命賜其子錫麟一品廕生二十一年二月
諭曰子告尙書魏廷珍本係舊臣今年將九十道左迎鑾允稱
人瑞伊惟一子前經賞給一品廕生例應內外兼用著加恩賞給
員外郎職銜在家侍養以昭眷舊至意并 賜廷珍詩曰懸車辭

魏闕回駕返蓬廬望尤人中瑞無雙林下居精神益軒若風度尙
彬如娛老詢何物三朝有賜書三月卒遺疏入 諭曰魏廷珍簡
任中外年近九旬允稱人瑞今春迎鑾道左朕親召見行殿加以
優遇復賞給伊子員外郎職銜令其在家侍養忽聞溘逝深可憫
惻應得卹典該部察例具奏尋 賜祭葬如例諡文簡

右 國史館本傳

景州魏君璧廷珍以李文貞薦由舉人入直 內廷同王蘭生梅
穀成在館充校對官編樂厯淵源諸書嘗被 命與文貞參酌樂
律韻學士林以爲榮後中康熙癸巳探花 世宗時官工部尙書

右記余金撰

國朝書獻類徵初編卷七十二目錄

卿貳三十二

萬承蒼

吳襄

姚三辰

王國棟

甘汝來

朱定元

馮景夏

常德壽

託時

國朝名獻類徵初編卷七十二

通奉大夫前署江西巡撫江西布政使司布政使涪陰李桓輯

卿貳三十二

萬承蒼

子以雍正癸丑春試報罷東裝欲歸前侍郎臨川李公固留子使之應詞科其時侍郎居宣武門南故合肥李相國邸也西有紫藤軒割以居萬公孺廬又割其東以居子每日高春必相聚一室或講學或考據史事或分韻賦詩葱湯麥飯互爲主賓臨川嘗曰是揚誠齋所謂三三徑者也顧二公皆病老爲子丈人行而略儕輩以下交子竊媿之臨川性剛毅其所持辨萬夫環而攻之莫能屈

嘗主張陸文安公之學過甚遂於朱子有深文公生平亦主陸學然其論戒偏重多從容以解臨川連環之結臨川下筆千言睥睨一時罕有當其意者公之詩文出臨川未嘗不心折也予嘗謂江西文統自歐陽克公後如平園如邵庵如東里皆以和平雅潔嗣其辨香而公其世適也臨川以爲知言臨川最愛士士之赴之者如百谷之趨海門戶旣大不無飾詐之徒夤緣以入故甲乙之目必待公而定蓋二公之交好其道同其志同閒有輸攻墨守之不能者未移時而水乳卒合顧臨川荷三朝特達之知以伉直不容累蹴累起計其所居九列重地久者不滿二年或僅數月淹公則浮沈詞館果遭憂患垂老始以文章見知得殊遷而終不得有

所發抒何其窮也按公諱承蒼其字曰宇光江西南昌府之東壩人也刑部侍郎虞愷六世孫光祿卿汝言五世孫再世皆講學於陽明念庵之門稱碩儒祖象師父興主再世 贈翰林太宜人李氏賢母也方孕公時每默祝於影堂曰不願生兒爲高官但願負荷先世之學統故公少而喜讀宋人講學之書論者以爲得之胎教公以康熙癸巳進士入翰林益與臨川講學相淬厲臨川驟貴左右要人畏其芒角百計擠之以公爲臨川所厚恐援之爲助因并側目焉臨川辛丑主試之謫廟堂流言藉藉及公以爲梁肅之有韓愈皆其所通榜也百口同詞幾莫能白僅而得免 世宗卽位雅知公而臨川亦賜環將引公未及施行則臨川已出爲廣西

巡撫忽奉 嚴旨追舉辛丑流言以罪公罷其官并左遷其弟蓋
當局者皆以臨川之故然臨川特以學術厚公而公實未嘗藉以
求進及其因之以謫則亦恬然受之於是歸而杜門益講學無復
出山之志 世宗徐察公之誣特召入京補原官嘗與同院旅見
見其鬢髮盡白曰汝老矣然終不見用 今上嗣位有薦公者稍
委以 制誥置之講筵又七年臨川已病廢始超五階爲學士是
時三館諸臣苟以文章邀 聖眷者類得取不次之擢立至槐棘
間天下爭爲公喜謂公之足以報 國者不僅在文章殆自此得
大受乃不三年而公卒矣生於康熙某年某月某日卒於乾隆某
年某月某日子四皆以鄉貢進士薦葬於某鄉之某原所著有萬

學士易傳其論互體最精妙自漢儒荀虞以來未有如此之覈者
而一掃宋元林吳諸子言互之謬又有萬學士集如千卷子之別
公也歲在丁巳臨川與公先後以奔喪歸予以罷官歸亦居憂辛
酉臨川主試江南畢病甚由水道還京過揚子亦適在揚而公至
以臨川之疾也相向攢眉踰年公有學士之擢又踰年公主試闕
中歸故人有見之於杭於蘇於揚者皆言公念子不置未幾公貽
書曰穆堂歸里門子又不來老生孤月何如矣豈意是書遂成死
別紫藤花下舊雨更無再聚之期其可恫也諸子以臨川所作墓
志來屬予以窆石之文爲流涕而序之其銘曰

嗟承明之耆舊從此不憇遺兮况予生之知己更舍公其誰兮上

國朝文獻通考卷一百一十二
以爲斯文慟下以哭其私分

右墓誌銘全祖望撰

公嘗侍班嗽作屏息不敢出聲

溫語垂問

賜茶茶膏各一器

右詩人徵略張維屏錄

吳襄

吳襄安徽青陽人康熙四十四年 聖祖仁皇帝南巡襄以諸生
召試一等赴京修書效力五十二年中順天鄉試成進士改庶
吉士五十四年授編修五十七年充會試同考官雍正元年 召
直南書房 特授額外中允遷侍講尋提督順天學政充日講起
居注官疏言 恩詔廣額定例元年舉行但考過府縣亦於限內
補額恐辦理文武闕鄉試期迫難週士子未得均沐 皇恩請於
次年歲考隨棚補額 從之二年五月遷侍講學士七月疏陳學
政事宜一八旗滿洲蒙古漢軍生員向來歲考者不及一半故不
到者多至數百人請 敕八旗都統佐領遇歲考年嚴催赴考果

有患病及隨任事故等情於未按臨前呈明教官申報仍照例補考臨考不到者黜一八旗文武生員考冊但有一二等亦不過一二人初年應試人少略示優容今則文風日盛急宜分別以示勸懲請照例六等發落年老有疾亦准給頂一八旗生員廩增滿洲蒙古二十名漢軍各十名人多額隘查順天府學大宛兩學廩增各八十名請比照加增下部議如所請三年二月轉侍讀學士先是肅甯人張之清賄昌平州教官李琬學書趙一則冒生員張宏人名改歸肅甯籍中式武進士擢侍衛宏人未之知襄按試昌平宏人赴考以學冊無名逐出一則私許賄宏人令改名張棟給白卷應童試教官倪元亮爲求於襄得收考未入學宏人赴州具控

襄疏參下部訊得實之清革侍衛援 赦免科本律坐誣供論杖
流一則杖徒宏人革生員琬病故元亮革職襄以白卷收考降一
級調用 特旨予畱任七月疏言冒籍改歸原以杜弊但改籍改
姓勢必以甲頂之南北更換又准各省通行甚至同省異府同府
異縣里居密邇亦准改歸紛紜弊混莫可稽查且定例兩月爲限
今行至四年未止請 敕部停下九卿議行四年八月疏劾靜海
教諭王夢熊酗酒無行永年教諭李柏年南宮教諭穆宗道貪鄙
成安教諭鍾曙勒索贖禮 上遣工部侍郎劉師恕往審曙事虛
免議夢熊等訊實革職杖流有差又疏言臣衙門書吏五名舊有
缺王詹泰等盤據作弊臣莅任初聞孳潛遁檄五城司坊嚴緝未

報恐日久禁弛積蠹復充乞下都察院飭五城查拏務獲照部院衙門清查缺主之例辦理 敕部緝獲詹泰等訊遣黑龍江九月遷內閣學士十二月充經筵講官初襄任學政時保舉生員張鎮孟澤新劉鵬振朱函夏才品至是引 見 上以襄保舉不實下部議處降二級調用復予畱任五年充殿試讀卷官先後充明史八旗通志總裁九年授禮部右侍郎十一年二月充癸丑科會試知貢舉疏言科場定例外簾官分設受卷彌封謄錄對讀四所鄉試用官十六員會試二十一員鄉試內外收掌各一員會試則內收掌二員外簾不設鄉試督門用千總二員三場畢撤回會試則用員外主事二員至揭曉始卸事員數多寡不一因而所官之房

屋簷錄對讀之號舍不得不增廣修葺吏役叢雜其弊易生查會
試人數減於鄉試一半而所用官較多督門一差既有龍門御史
殊覺冗設且大半部員於本務不無耽誤允宜畫一下部議如所
請惟會試向不設外簾收掌毋庸議三月擢本部尙書十二月兼
管左都御史事務十二年 命禮部議生童罷考事議以生童罷
考應停其考試交督撫查究如有司不公不法卽據實附參如生
童無故罷考除停試外將首倡之人究擬得 旨罷考原有應得
之罪今此奏必待審訊後分別定擬而置罷考於不問但以停考
一事當其罷考之罪豈整飭士風之道乎著另議尋議罷考照光
棍例別首從治罪 上切責部臣引光棍重律而於應赴上司控

告處並未議及生童但有治罪之條無訴冤之路任意輕重前後互異下部嚴察襄同侍郎任蘭枝甘汝來議降一級調用上並予畱任十三年正月卒於官 諭曰吳襄老成謹慎學問優長簡任秩宗正資料理今聞溘逝深爲憫惻著散秩大臣帶領侍衛十員奠茶酒並令禮部堂司官及各部漢堂官前往弔送柩回籍之日經過地方官弁差人護送應得卹典該部察奏 予祭葬如例諡文簡

右 國史館本傳

雍正十三年乙卯正月初九日經筵講官禮部尙書青陽吳公卒於位於時 天子震悼遣散秩大臣率侍衛奠茶酒 命寮屬弔

奠郊送歸途所過有司兵弁護視其喪 賜祭葬如制諡曰文簡
惟公以老學宿望遭逢 聖朝起自逢掖卽以詩翰受 知晚始
策名躋顯仕典領文章出入 禁闈二十餘年食稽古之報爲時
宗工烏可以無銘按狀公諱襄字七雲號懸水江南池州府青陽
縣人五世祖諱某以子貴贈兵科給事中高祖諱某歲貢生以子
貴贈儒林郎曾祖諱某太學生祖諱某庠生考諱某皆以公貴
贈如其官公生而穎異讀書目數行下比長博綜載籍工詩古文
尤精制舉業補博士弟子員試輒冠其曹稱大江南名諸生 聖
祖仁皇帝親征噶爾丹學使者以朔漠蕩平賦課士公立就千言
典贍工麗使者擊節稱國士隨選拔入成均長洲韓公爲大司成

負人倫鑒獨契賞公康熙乙酉 聖祖南巡諸生獻賦 屬車者
召試 行在所公名在一等 命撫臣給帑金資送入都奉 旨
分校歷代詩餘書竣澤州陳文貞公薦協纂他書無何丁太夫人
憂服闋北上以書成敘勞當得縣令去先達多以館閣失人爲惜
會 萬壽特開 恩科投牒就試聯捷成進士改庶吉士其時公
年五十有四矣乙未散館授編修戊戌充會試同考官教習畱京
進士又分教庶吉士己亥入直武英殿辛丑四月 特召赴熱河
偕長洲何義門晉江陳對初兩學士同撰擬文字悉稱 上旨壬
寅正月 賜廷臣年六十以上者宴公年六十有二欣與 盛典
獻詩紀其事是年冬 聖祖賓天奉 世宗憲皇帝命撰擬祭告

几筵諸大篇公自以詞臣受 知眷哀慟至深於齋次和淚滿
墨曲體 聖天子大孝攀慕至意每奏一篇未嘗不嗚咽感動謂
能道意中事自是被 眷逾渥雍正元年 命入直南書房尋授
左中允升侍講提督順天學政時復設日講起居注官視學者例
不列名 上特以授公公初莅學政距鄉試僅一月公先期繕彙
以待比受印立檄行試事始不誤四府拔貢前學臣未及咨部部
議持不便錄科公曰卽不選拔諸生庸不得與試耶請仍以生員
入闈 恩詔廣額部限一年考畢公疏請未科試者隨試增加已
試者於歲試補行他若加入旗廩增及旦字號皆一體廣額視事
四載正文體敦實學自以先正大家開導諸生腐陋爲之一洗所

至留心民瘼敬陳畿南水利請設勸農使奏入並蒙 俞可甲辰
升侍講學士乙巳轉侍讀學士丙午擢內閣學士兼禮部侍郎充
經筵講官辛亥遷禮部右侍郎長白山爲 本朝發祥地載在祀
典遣官不能至率望祀甯古塔將軍請於版山建亭殿公引舜典
禮望祭山川之文參宋明壇側建設齋廳之制宜改享殿名爲望
祭 詔如所議各省條陳學校有不便輒揆事理駁奏諸所援據
具得體要癸丑會試知貢舉剔清夙弊規條寬簡士子便之四月
晉禮部尙書冬奉 命兼攝都察院左都御史乙卯元旦慶賀公
以七十以上大臣在 乾清門行禮卒之日入賀產麟上瑞承
顧問以禪理叩擊公奏對圓通無礙晝漏移數刻始退既退猶過

同年友邸舍追敘疇昔言笑盡歡抵暮返寓與公子語夜分不休
已忽倦若假寐者寤而索茗氣息頓微遂口授遺疏書竟端坐以
逝比秋而 憲皇帝鼎成上賓矣公所居在九華山下九華有老
僧行素高爲贈公所敬禮公之誕也侯門僕恍惚見老僧者杖錫
入後堂日加西公生比入山訪老僧則先一日圓寂矣嗚呼佛氏
來去因緣之義或疑其誕若公者則又何說公性淳厚樂易與人
交無少長貴賤皆得其歡款語移日見者忘爲達官鉅人汲引後
進孜孜不倦獎賞多所成就著述詩書古文不下百卷應制之作
典雅純正詞林中事有資討論者率以屬公先是充 三朝國史
治河方略詩經集說彙纂纂修官及爲大僚充國史明史八旗志

書諸館副總裁分撰 國朝賢良傳兩充殿試讀卷官雍正元年

賜第一區白鏹四百兩 御書堂額曰老成端亮舉朝謂公足

當之不愧其他如 賜予御書書籍及珍器衣裘食物不勝紀享

年七十有五嗚呼清名榮仕耆年令終史冊所紀如公者詎多觀

哉公元配陳氏明工部主事諱明晰曾孫女諱元會女 誥贈宜

人待 贈一品夫人賢明懿淑稱於門內早卒公不再娶至老不

畜侍妾子三人長慶祺庠生先公兩月卒次慶祿康熙庚子舉人

次北雯康熙庚子舉人雍正甲辰進士翰林院編修女二人皆適

名族孫四人某乾隆戊午舉人孫女六人公卒之幾年卜葬於某

阡由敦爲諸生初來京師無一人知者惟公一見以斯文相許及

與季君同館選於後進中荷公知契尤厚公薨而季君以神道之石屬銘由敦遜謝不敢當歷十餘年不已乃敢敘述梗槩揭諸賜塋公鬢眉談笑尙髣髴遇諸毫楮間後之論儒臣宿德者其有所考云銘曰

蓮華九子秀挺嶙峋延陵世胄篤生偉人文成慧業金粟前身甘泉奏賦名震雲津祕閣管毫承明校理萬軸濃香麝煤宮紙供奉西清迴翔金妃讖輔提衡星明太史迺登講筵迺晉春官山龍黼黻色正芒寒名高燕許望峻歐韓既長秩宗兼領臺端畫接頻仍便蕃渥眷甲第南金文羅寶扇老成端亮賜來深殿豈羨昔賢金蓮歸院番番黃髮耆碩鴻儒夔龍事業炳耀六符倏騎箕尾

雲路誰須 鼎成龍馭公殆先驅公在東墀棟梁是寄公返碧霄
士林掩淚禮備哀榮豐碑巖巖協吉幽宮流光奕世

右神道碑銘汪由敦撰

吳襄字七雲江南青陽人康熙癸巳進士官至禮部尙書謚文簡
文簡老年遇合位至六卿出處進退如鳳凰芝草賢愚共稱美瑞
者詩品亦高不肖流入三唐以下

右 國朝詩別裁集小傳沈德潛撰

姚三辰

姚三辰浙江仁和人康熙五十二年進士改庶吉士五十四年散館授檢討雍正四年六月充日講起居注官七月充山西鄉試正考官尋升左春坊左中允十二月查嗣庭以悖逆伏誅 上面諭內閣九卿翰林科道等官曰今日朕面加訓誨諄切周詳爾等諸臣其相敬聽惟姚三辰之詞色神氣不以朕言爲然伊乃浙人必係查嗣庭汪景祺之同類其胸懷甚不可信朕因浙江風俗頹壞不堪力加整頓務使痛改惡習浙省之人自應感朕恩德乃姚三辰心術不端全無儆懼之意著令其同謝濟世前往阿爾泰軍前效力使之習觀本朝兵制諳練邊遠地宜姑且免其革職朕觀人

國朝實錄卷之三十二 卿貳三十二

頗能洞悉隱微姚三辰居心行事眾人內自有知者亦必其服朕之明鑒也七年 召回京仍舊供職旋升侍講侍讀學士十年轉少詹事 命提督安徽學政十三年七月升內閣學士兼禮部侍郎銜奏言廬州府原轄之六安州鳳陽府原轄之泗州潁州亳州俱經改爲直隸州請撥廬州府學原額取進文章三名武童二名歸六安州屬撥鳳陽府原額取進文章五名以二名歸泗州屬二名歸潁州屬一名歸亳州屬部議如所請九月任滿回京乾隆元年三月充殿試讀卷官六月升兵部右侍郎旋充江西鄉試正考官十一月調吏部右侍郎二年二月充會試副考官六月因病奏請開缺調理七月卒子日升刑部主事

右 國史館本傳

仁和姚少宰三辰之祖善醫嘗採藥入山迷徑失足墮溪中以手摸石有涎蠕蠕而動負姚而上意是巨蛇回視兩目如燈照見鬚角委姚地上騰空而去始知爲龍也兩手觸涎處香數月不散以手撮藥病輒愈後不受人謝由是皆呼之爲摸龍阿大及其孫貴人謂陰德之報

右記余金撰

王國棟

王國棟漢軍鑲紅旗人康熙五十二年進士改庶吉士五十四年授檢討五十七年充會試同考官逾年遷國子監司業六十年授侍講尋轉侍讀雍正元年三月充陝西鄉試正考官四月復設日講起居注官以國棟充補六月遷侍讀學士十一月充廣東鄉試正考官二年六月授右通政八月充會試同考官十月命爲河南學政四年五月遷光祿寺卿十月特旨授浙江觀風整俗使國棟抵任以浙江風俗澆漓諸務廢弛仰遵聖訓時以尊親大義宣諭紳士懲頑抗以清積欠究包訟以警奸徒革虛冒以飭營伍嚴保甲以弭盜源巡歷所至據實以聞溫諭獎之是年

遷宗人府府丞五年二月 上以浙江被水米價騰貴 命國棟
同巡撫李衛動帑銀四萬兩於杭州嘉興湖州三府修城濬河築
隄俾民傭工食力國棟奏杭州至海甯河淤應濬太湖隄闢及嘉
興石塘多圯應修理但冬春雨雪多興工未免過費請俟九十月
閒水落再行修築疏濬 上是其言五月擢湖南巡撫 諭曰本
欲令爾在浙整飭數年以期成效但湖南廢弛日久急需治理今
命爾巡撫其地勉之八月疏言督撫大吏去任者固不可沽譽市
恩新蒞者尤當加意整飭風聲所播庶可令行禁止若意示寬大
則吏治必弛民情必慢事難整理 諭嘉國棟得治理寬嚴之要
惟期實力行之時 上命湖廣總督邁柱會修兩省隄工國棟疏

言長沙岳州常德三郡逼近洞庭如湘陰巴陵華容安鄉澧州武陵龍陽沅江益陽九州縣環繞大湖隄塍甚多居民恆於秋冬水涸時築隄堵水而耕但地勢卑下每江漲水不能洩反灌入湖以致隄岸衝決田禾淹沒民難安堵見有潰口四百餘處已飭水利各官刻期完築此外險工次第興修更嚴禁包折等弊務期加高培厚工程堅固七年六月疏言岳州府屬遼闊中隔洞庭石門慈利俱係苗疆九谿永定軍屯雜處文移每至稽遲有鞭長不及之慮請改所屬澧州爲直隸州轄石門慈利安鄉三縣改九谿永定二衛爲一縣設知縣教諭訓導巡檢各一員初僉都御史申大成奏黔省屯田百姓賤價頂種易啟紛爭請做民田一體買賣每畝

納稅五錢官給執照爲業並推行各省七月國棟疏言湖南屯田瘠薄不比黔省膏腴均與民田一例買賣無賤價頂種之弊其科則輸賦較民田更重若照黔例畝稅五錢是合屯糧十餘年常賦之數斷非民力能勝應按各屬屯糧全書分別差等其微價頂種未立賣券糧仍軍戶者令頂種人完稅五錢給照爲業如時價平買並非頂種糧未過割者照屯糧一石稅五錢給照過割其已過割者稅二錢至龍陽武陵長靖諸屯田土賦重應令售主按券價每兩稅三分諸疏並下部議行先是湖南靖州逆犯曾靜遣其徒張熙投逆書於川陝總督岳鍾琪鍾琪以聞上命刑部侍郎杭奕祿副都統海蘭至湖南偕國棟拘訊國棟據曾靜妄供並未

究出黨羽又阿其那塞思黑門下太監以罪徙廣西流言於路直隸河南督撫並查奏國棟稱湖南接解兵役未聞一語又茶陵州黨犯陳蒂西傳播流言 敕國棟提問亦不得實證九月降 旨切責十月革職回京八年正月 命辦理刑部右侍郎事十月充武會試副考官十一月署山東巡撫國棟前任河南學政時薦教職申程章才品俱優 特旨申程章以知州銜授浙江臨安知縣後遷江蘇淮安知府以詐典商楊紀鹽商程星所贓爲巡撫尹繼善所糾部議國棟濫舉應革任得 旨寬留九年二月河南祥符封邱等縣水災 詔國棟往查賑七月署江蘇巡撫尋署浙江巡撫十年仍回刑部侍郎任十一年借尙書彭維新等稽察京通各

國朝通志卷之八十一
倉十二年以與尙書福敏等議福建民藍厚正毆斃胞兄事失當
敕責其糊塗姑息下部嚴查部議降三級調用以國棟係革職
畱任之員無級可降應革任得 旨派充苦差十三年十月 命
署刑部右侍郎十二月卒

右 國史館本傳

甘汝來

甘汝來江西奉新人康熙五十二年進士五十七年由教習授直隸涑水縣知縣五十八年三等侍衛畢里克練鷹至涑水強宿民舍毆傷人汝來拘訊事 聞交部質審議革汝來職罰畢里克俸

特旨畢里克革職汝來免罪六十一年調任新安縣雍正元年三月遷吏部主事十二月授廣西太平府知府二年遷左江道三年遷廣西按察使四年五月擢廣西巡撫七月疏言南甯太平慶遠思恩四府向稱煙瘴正雜各缺例揀員調補查南甯府屬之宣化永淳橫州思恩府屬之武緣見今居民稠密煙瘴全無請改歸部選柳州府屬之馬平雒容直隸賓州屬之上林雖非煙瘴但瑤

獐獷悍難治請照煙瘴例揀調再定例調補各員歷俸三年卽升
嗣部議改爲五年伏思州縣等官雖處煙瘴尙有俸銀火耗足以
養廉至雜職微員俸銀無幾衣食不周情殊可憫請仍照舊例三
年卽升 詔如所請行八月 命來京五年二月授都察院左副
都御史先是汝來任廣西按察使時奉議州土司羅文綱糾眾阻
建塘汛州判程旦請發礮斫捕汝來與巡撫李紱責旦越詳多事
至是事發 敕偕紱同往緝拏並 命汝來署廣西巡撫汝來抵
任疏言思恩府屬之西隆州距府治千餘里請改爲直隸州以西
林縣分歸管轄又言太平府屬之思明州向隸思明土府同知自
改土爲流歸太平府轄祇畱吏目一員駐其地該州地處極邊距

府亦遠請仍歸思明土府同知管轄部議均如所請九月疏請設鎮安土府學以左州訓導移駐 諭曰甘汝來由部屬用府道升臬司超擢巡撫伊自應感激朕恩圖報效力乃聽從李紱指使一味沽取虛名並不實心爲國家辦理政務上年調取來京時朕切加訓誨伊在朕前力認痛改舊習情詞懇切嗣因思明土府一案廣西巡撫韓良輔往雲南與鄂爾泰會商彼時署理廣西巡撫印務不得其人朕意甘汝來在粵年久諸事熟習是以令伊前往乃伊到彼仍不改悔前非其奏摺敷陳之言多屬支離此本內所請鎮安土府設學一事並非目前苗疆急務而甘汝來趁其署印之時星速爲之若刻不可緩者蓋其心急於沽名市惠惟恐爲人所

奪取也此等識見卑鄙之甚設學一事不准行又伊謝恩本內有
荷蒙皇上曲賜寬容之語夫人君秉持國法悉本公心以行直道
曲則不直不直則不公矣而甘汝來所謂曲賜寬容者果感恩之
語乎抑別有用意乎甘汝來著卽回京廣西巡撫事務仍交韓良
輔管理六年良輔緝獲文剛寘之法汝來坐疎縱革職 命在咸
安宮官學行走七年山東巡撫費金吾疏濟濟甯嘉祥等處及江
南徐州沛縣水道 詔汝來偕原任侍郎阿克敦等同往效力九
年二月授直隸霸昌道五月丁母憂 命在任守制九月調江南
蘇松糧道十年二月署廣東布政使八月實授十二年四月擢禮
部右侍郎十三年八月充八旗通志副總裁九月授兵部尙書時

恭修 世宗憲皇帝實錄汝來充副總裁十月條奏廣東圍築沙
坦事宜一定立界之法以杜爭競凡海濱水面微露灘形謂之水
坦漸生青草謂之草坦淤成高土漸可耕種謂之沙坦每歲初坦
見沿海民各自插標出水後各自工築報官給照爲業四至田界
相連者不得於工築後爭控一立限田之法以杜豪占凡本身有
田十頃以上雖田界相連毋許再種灘地小民圍築亦不得過五
頃如控名霸種者治罪其出工本牛種助貧民圍築量取租息田
歸貧民者聽一緩升科之期以寬民力陸地開墾定例六年升科
海田浮肥難恃應寬至十年俟土性堅實再令納賦一厚蠲恤之
法以備不虞潮有大小氣有消息沙坦亦有成壞如潮大而淹所

種則寬緩一歲之糧地遷而毀所圍則寬免升科之額雖有不虞
可恃無恐至海若效靈有功必祀除二八月常祀外應於十月撫
臣親祭一次以答神貺疏入 敕廣東督撫議行乾隆元年正月
疏言沿海居民採捕魚鰕用單桅船不能出洋貿易向例本縣出
照稽出入並不輸稅近聞各海關監督於此等小船亦令領關牌
與雙桅船一體納鈔又閩廣閒貧民資生無業有用竹筴取魚者
有於埠頭養鴨者不肖官吏或按筴按埠私徵稅銀請通行嚴禁
從之七月充三禮館副總裁二年疏言元儒吳澄踐履篤實以
道自任明宣德時詔准從祀及嘉靖初張聰以澄生宋仕元黜之
考宋制鄉薦不第仍充生員澄在宋雖膺鄉薦未霑一命及元有

天下猶十召不起甫進旋退出處卓然臣充三禮總裁見澄所著禮經諸書援據精切義理融貫實足羽翼經傳請 敕廷臣集議仍准入祀 允之三年調吏部尙書仍兼兵部尙書事務四年三月充會試正考官五月加太子少保七月卒 諭曰尙書甘汝來持躬端謹辦事恪勤久歷外任賢聲素著自簡任吏部尙書以來實心供職正資倚用今聞患病溘逝深爲憫惻著派散秩大臣一員帶領侍衛十員往奠茶酒聞其家計寒素且無經理後事之人著賞帑銀千兩該部司官代爲料理應得卹典察例具奏尋 賜祭葬如例諡莊恪

右 國史館本傳

康熙五十八年冬涑水令以拘繫侍衛畢里克逮治 聖祖仁皇帝察其直特還原官於是涑水令名聞於天下則今已故光祿大夫太子少保吏部尚書兼理兵部尚書諡莊恪甘公是也公以縣令起家歟歷中外爲時名臣乾隆四年七月二十一日卒於吏部官署 上聞震悼遣官經紀其喪 賜白金千兩予卹優厚朝野咸歎息焉明年其孤禾等以狀乞余銘公姓甘氏諱汝來字耕道一字遜齋吳丹陽郡人名甯者其始祖晉徙新吳平陂里明徙奉新縣市今爲奉新人曾祖廷仕祖應俊皆 贈如公官父顯祖以教諭登賢書 封如公官年八十一先數日卒曾祖妣陳祖妣熊妣徐皆 贈一品夫人公清鯁強力裕經濟才略康熙辛卯舉於

鄉癸巳成進士觀政三載 御試高等授涇水令時邑久旱公至而雨罷民雜派六千餘兩以火耗充之禁莊田無故增租易佃者有司例不笞旗人請於上官得以柳木棒約束其任事類如此畢里克者侍衛之調鷹差遺者也至涇擅踞民舍民萬廷荷等被其家丁毆幾斃百姓赴愬於令畢里克等亦相率入縣堂責令勢洶涌公勃然怒曰令爲 天子愛百姓而已甯冒令君輩魚肉小民至此遂揮令看守置其家丁於獄將達大府以 聞而其黨已以拘職官入告吏兵刑三部會讞公詞氣不屈使非 聖祖仁皇帝知公已獲罪去自京還治所父老子弟爭奉羊酒以迎都人士作歌詩以紀其事公名由此大起委攝新安調補又攝雄縣在新安

賑災民捐俸子寒諸生禁因 乘輿至供億苛斂及拘民船守候
弊鑿白楊淀河隄溉田數千頃在雄置奸吏於法又罷民雜派凡
三任邑令百姓爭欲得君去則尸祝公 世宗憲皇帝御極之始
擢吏部文選司主事更以賢能薦受 錫養分校會試未幾 特擢
廣西太平府自此凡四任不出廣西皆見才略在郡罷斥龍州土
司在左江巡道任定思明土州與安南祿州地犬牙相錯者由按
察使升巡撫已入爲副都御史又以土官岑映宸事仍往署撫臣
篆與督撫二臣調度策應映宸束身歸罪遂改土爲流先後擒莫
東旺羅文剛等皆兵不血刃其他修舉廢墜發奸摘伏不可勝舉
旋註吏議罷在 咸安宮行走逾年起用霸昌道丁內艱給假在

任守制未還調蘇松糧道又擢廣東布政使平權量減市稅並陳
權關藏匿則例之弊請以沙坦地予民耕種而緩其升科入爲禮
部侍郎遣讞獄大同時雍正十三年也 今上皇帝登極諸大典
禮公以春官多所贊襄擢兵部尙書乾隆三年轉吏部仍兼本兵
於武職議侍衛推用法於文員令雜職官皆關白堂上銓敘先是
公爲文選司時悉僧道科之弊故也四年與柏梁乾清宮兩宴典
校會試 天子特恩晉階官保乃以遴選豫省賑濟人員晨入部
署忽中疾卒公服官二十年中遇摧折而皆蒙 聖主知旋即振
拔受 三朝委任不衰公亦感激圖報強毅能任大事一時稱公
居官清正猶曰此固曩時涑水令之甘公也其丰裁如此至澄敘

官方甄陶士類一時公明交頌其肅吏治而振文風者又如此公
父庭訓嚴承之以恭母徐下世不重茵貳味者九年所至必勸義
學修城堡於家則捐建祠廟朋友解囊殯喪尤畱心文獻奏請同
鄉先賢吳澄從祀學宮名儒故老後人必加存恤蓋見義必爲其
天性也自邑令至於中丞長六卿歿之日囊無十金之積至不能
備喪具 天子嘉公清節且憫其寒素 特賜帑金恩禮優渥則
公之賢亦可知矣所著有遜齋文集詩集奏議若干卷 聖諭廣
訓疏義周禮簡注宦績紀略編輯律例歌諸書距生於康熙二十
三年年五十六元配彭氏 封一品夫人子二禾雍正丙午舉人
廣廢生候補員外郎女六適滎陽縣丞涂光範丙午舉人魏淵映

國子生裴紱未入室者字丙辰科舉人李友棠國子生帥家駒諸生萬祚賚孫男三立德立功立言以乾隆五年八月二十五日葬於奉新進城鄉蓮花蒼山銘曰

豫章之地歷產名賢死而不朽壽夭則天維公之年未及甲子其所建立垂之青史民若慈母亦受主知再蹶而張終始不移畀以巖疆雷厲風發宣布恩威施於百粵畀以臺省天開日晶澄敘官方郡公質成天子曰都而功於國宮保崇階有臣社稷遽乘箕尾天不憖遺野哭巷泣直道匪私表墓有碑易名有諡我銘其藏旨厥後嗣

右墓誌銘張廷玉撰

國家建官銓筦人材塗分文武而權自吏兵二部尙書資崇位高
任隆望重 皇上踐阼之初以至德要道治天下 特旨首擢禮
部右侍郎奉新甘公爲兵部尙書越三載晉吏部尙書仍兼理兵
部尙書事邦治修邦政舉祇慎廉平有馬鈞陽劉華容風歲在屠
維協洽秋孟公以勤勞薨於位 天子震悼給賞帑銀一千兩經
理後事 命大臣往奠茶酒禮臣遵 旨議給全葬 遭官致祭
一次奉 旨依議選與他謚卹典優渥孤子禾廣扶柩歸里擇於
庚申年八月二十五日葬公於進城鄉蓮花山之原爰持行狀踵
門而告於余曰先公忠以事國孝以承家不及今鐫之於石將日
遠日忘奚以示遺胄於無窮敢以請余固素知公之學術經濟者

禮閣偕主試事欽服明德惡得以辭今撮其忠孝大節而序之曰
甘譜源自姬宗東周有卿士甘昭公秦有左丞相茂漢有關內侯
延壽逮折衝甯仕吳甘爲丹陽郡望奉新之甘由丹陽再徙代有
聞人而名位勳業至公而大盛公諱汝來字耕道號遜齋高祖懋
謙文學早逝妣單氏守貞旌表曾祖廷仕妣陳氏祖應俊妣熊氏
並以公貴 贈光祿大夫一品太夫人父顯祖餘干縣教諭雍正
丙午科舉人剛毅端方精研心性之學卓然爲名儒以公貴累
封光祿大夫妣徐氏先卒追 贈一品太夫人公在娠太夫人夢
黑龍繞室幼聰穎讀書善記誦封公督課嚴甚尤以忠孝大節勗
之曰大孝始於事親中於事君終於立身資於事父以事母而愛

同資於事父以事君而敬同孺子識之公長跪受教曰不敢忘公
之行道濟時顯親揚名作 皇朝忠蓋臣者基於是已長淹貫經
史通古今治略辛卯舉於鄉癸巳成進士戊戌授涑水令邑在易
州東四十里密邇涿鹿新城旗民雜居地也糧丁輕雜派重小民
種旗地半莊頭輒增租數農罹困鮮生計公平減禁約俾輸將有
定額供作有餘資例旗人有犯不得捶責公請上官以柳木棒威
之強暴頓戢其尤難者在調鷹放鴉通報事己亥冬鷹上侍衛畢
里克帶領拜唐阿桑格格思乾及家人數十輩至涑虎踞民房騷
擾荼毒雞犬不甯民萬廷荷憤激直前理爭畢揮家奴捶萬幾斃
眾不平赴縣訴而畢反先眾入署咆哮大言責公以不能供帳爲

涑民先公念受父教成名官命吏目擊百姓權害願低首下心
佻視睨爲民羞是不忠而致不孝也遂拘畱畢收繫餘黨通報直
督請上 聞未及奏奉 旨提審蓋鷹上大臣先已摺奏矣公赴
京吏兵刑三部會訊公慷慨陳詞氣色不撓官吏咸驚訝此強項
令何處得來讞上 聖祖仁皇帝特旨甘汝來著免罪侍衛畢里
克著革職公回任辛丑春調補新安令城西有白楊一淀廣數千
畝瀕大河而障以隄公思導河流資耕作質諸父老知官設厲禁
因指陳利益請諸子牙河分司而開鑿灌注之是年民閒收麥數
萬斛荒壤易成膏腴若其修城垣嚴保甲建義學行賑濟恤民隱
於西漢循吏六人東漢十二人真堪頡頏後先濟美時封公迎養

新署見公吏治甚喜每飯常加一餐曰兒果不忘吾教者癸卯升
吏部文選司主事 世宗憲皇帝勵精圖治部臣罔敢玩愒公釐
奸剔弊選法澄清冬授廣西太平知府太平界接安南轄流州縣
僅四土州府至二十有一土人劫掠仇殺無甯歲公察其禍起於
科斂率由流官責賄賂於土官致之首禁絕屬員餽送並檄土司
親謁郡守公具言 天子聖神威武慈仁子養億兆人庶雖在瘴
癘蠻荒苟有疾苦皆得上 聞爾其保守世業毋得自外王化取
殄滅聞公言者鼓舞譴呼悚息流汗輸服而去龍州土司趙某穢
德彰聞公廉得其實請督府參處密以他事調至郡解其印綬分
上下二龍司設土巡檢二土目豪猾束手聽令無一譁者乙巳春

升左江巡道思明土州與安南祿州爭地數年不定公任郡事申
制府移知外藩陪員會勘已訂期矣至是公馳赴思陵失期不至
公卽定界畫圖報上並請申飭外藩使輸誠謝罪制府一一如公
議案得以結夏升本省按察使矜恤寬恕聽獄以情其開釋宣化
縣盜雪潘國正冤平反不讓宋向敏中李若水焉丙午夏升廣西
巡撫秋江右鄉榜發封公偕公弟汝逢子禾獲雋三世同舉盛事
罕覩公喜封公積學苦志稍可慰藉而封公益以書勉公曰孝經
不引詩乎夙夜匪懈以事一人在今時矣冬進都 陛見丁未春
升都察院左副都御史復奉署理廣撫之 旨岑映宸者泗城府
土官也地界黔粵幅員廣闊映宸懦弱貪殘不能彈壓土民仇殺

無已時 上遣前撫升工部侍郎李紱巡撫韓良輔會同雲貴督
臣鄂爾泰經理其事公駐桂林遙爲應援公兼程抵粵區畫周詳
芻蕘振糧舟楫驢馬弓矢器械修整完集 皇威遐播督臣調度
措置應機合宜映宸解印綬自縛詣軍門待罪隨械繫之桂林隸
其土流官憶昔前明岑猛陸梁姚鎮輕用誅討陽明曲撫盧王刑
賞乖張損傷國體未有聲色不動而蠻鄉帖服若是者也蓋公自
簡任粵疆四載之中一議分龍州一定界思明一綏靖泗城他若
天河之莫東旺奉議之羅文綱莫不先後就擒投首恐後邕管一
帶獲安衽席而無枹鼓之警者公之勞績居多而羅文綱一案以
未得實情呈部議矣公奉 旨還京戊申春抵都虔候 宮門待

罪 上命大學士張廷玉召公至乾清門傳 諭云甘汝來年力
精壯才具尙好著畱京朕另有用處公聞 命之下念一介微賤
由縣令不數年洊歷巡撫前以擅鎖職官論革職 聖祖仁皇帝
特恩寬宥今又獲罪巖疆廢棄歸田已屬萬幸乃復奉另用之
旨有生之年將何圖報感深肺腑淚涔涔下已酉春 特命公爲
咸安宮教習總裁公曰是吾職也蓋公幼隨封公館鄉塾中鑽仰
沈研刮磨淬礪而學大成今卽以封公之所訓公者教八旗子弟
或依經辨學或隨方占對一時俊髦皆聞言冰釋奉教惟謹用是
鄉會登選科不乏人吁公之移孝作忠不已於陶育人才見一斑
哉辛亥春 特旨起用霸昌道旋丁母徐太夫人艱給假三月奔

喪抵家未弔月調補蘇松糧道甫莅任奉 旨署理廣東藩篆嶺南古所稱犀珠磊落區也布政錢糧總匯公廉約簡素革平餘銀厚守宰養廉費而嚴其法陳關稅隱匿則例之弊甲寅夏升禮部右侍郎北歸曰庫存稅羨充公銀二十萬餘兩公悉具摺奏明因便道省封公於里門欲繕摺乞終養封公復舉資父事君之訓公灑涕就道抵禮部任乙卯八月二十三日 世宗憲皇帝龍馭升遐公號泣躡踊淚盡見血 今上登極毅然復行三年之喪未蒙 皇太后俞允集羣臣廷議公抗聲言曰三年之喪貴賤一也後世所以不能行者以認理不真故耳我 皇上法堯舜之道行周公之禮立億萬年彝倫之極或謂二十七月中不無妨於朝祭大

典公曰墨纒視事越紼以祭禮固言之夫何疑於是詢謀僉同覆
奏 准行凡有儀制皆白春官主彙公博考載籍援古證今具有
條理而曠古大禮以定嗚呼自漢文短喪後晉武魏孝文周武宋
高皆嘗遵復古制而臣下不能將順其美典禮闕如公獨持大義
襄贊厥事杜元凱其有慚色哉九月升大司馬 皇上聖哲仁恕
勤求治理海內乂安兵革休息公掌部務明大體務興革訂正則
例疏通選法弓箭技勇兼誠武闡無棄材藍翎花翎並取侍衛得
補用給司官吏胥之飯銀恤千總需次之貧乏戎政爲之一清乾
隆三年冬轉太宰仍兼管樞部 命下吏曹胥吏惕息相謂曰豈
非前查對僧道科之主政耶吾輩謹守章程而已舊例雜職選用

設僧道科掌文案堂司以微員故恆不之省奸蠹上下其手京師
號爲黑地獄公前任選司時洞燭其奸吏胥鶻服蓋歷十五六年
而猶心悻者也用是銓政公平倍於曩日夫六卿建自成周逮有
明政歸六部而責任綦重吏部統百官均四海兵部制軍詰禁以
糾邦國王朝公正戴金明敏克稱厥職惟馬文升劉大夏仕同朝
練達並稱一時盛事乃公以一身肩之而邦治修邦政舉祇慎廉
平是合鈞陽華容爲一人也今年五月奉 特諭加太子少保酬
勤勞也公益感激鞠躬盡瘁治文書無休時七月二十一日竟以
勤勞薨於位孝經云夙夜匪懈以事一人我公有焉公生於康熙
甲子九月初十日年五十有六五遇 覃恩晉授光祿大夫配彭

氏封一品夫人子二禾舉人廣廕生女六孫三嗚呼孝始於事親中於事君終於立身公之學術經濟一本庭訓故在家爲孝子在國卽爲忠臣乃公七月歿於京師而封公先於六月終於故里父子相隨地下豈非純孝之所感也歟公之勳名事實傳諸家乘者將炳諸國史余第撮其忠孝大節著於篇銘曰

天生偉人黑龍繞室曰孝曰忠父傳子述作宰道城廉潔其職見義勇爲強項不屈聖皇明哲時惟赦之循績報最擢升選司帝簡良守剖符邊陲州疆分畫漢土攸宜威信慰誘蠻夷馴伏帝眷寵綏高牙大纛弼亮伏波岑猛面縛告厥成功譴罪獲釋皇恩浩蕩敷敘三年廣陽震澤嶺海甸宣韓傳孔戡不名一錢宗

伯典禮佛時仔肩 大孝烝烝超邁炎漢廷議紛紜公言侃侃素
衣練冠 皇心靡憾罔極克伸維公襄贊天官祈父懋績丕嘉志
崇業廣庶政惟和清公見美剛直不阿以槐易榆命也如何凡此
鴻功績承家訓蹇蹇匪躬有懷溫清移孝作忠根諸天性校士禮
闈余躬欽敬公今云亡孰佐時康 宸衷簡在百世難忘豐碑堂
堂松柏之光有不知者視余銘章

右神道碑趙國麟撰

甘莊恪汝來奉新人少任涑水令有德政時有御前侍衛某往放
御鷹蹂躪田苗公卽命鎖至庭大杖數十大吏聞之驚曰某令瘋
耶因其劾之 聖祖笑曰不畏強梁眞民父母也因擢其官後遷

至吏部尙書乾隆初 純皇堅意服三年喪諸臣莫詳其制公時
任禮部依據經注參定大禮繁儉當理後皆遵之後暴薨於署同
事者爲相公訥親因親送其喪歸訥先入見老嫗縫紉於庭訥誤
以爲奴婢因呼曰傳語夫人相公暴薨於署矣婦愕然曰汝爲誰
訥備告其故老婦泣然大泣始知卽夫人也訥因問有餘貲否夫
人曰有啟囊出銀八金曰此志書館月課俸也俸本十六金相公
儉計日以用此所餘半月費也訥因感泣代以衣衾殮之歸奏於
上 上亦爲感動命內務府代理其喪入祀賢良祠

右錄宗室昭榘撰

四
三
二
一
〇

三

朱定元

朱定元貴州黃平州人康熙五十二年舉人雍正五年分發江南河工以知縣管高郵州州判事遷揚州府江防同知十三年遷淮揚海道尋調浙江海防道乾隆二年丁憂督臣稽曾筠奏留定元保固秋汛再令回籍終制尋畱辦塘工之刑部左侍郎劉統勳奏定元自奉部文後查工防險盡心竭力不因將屆離任苟簡所辦絕無舛廢及卸事回籍行李蕭然所屬官吏軍民懷思感戴似此樸直勤謹廉靜端方之員誠足風示臣僚裨益政務但道員服滿赴補必須在部守候臣應該道籍隸貴州或因母老家貧願戀子職未卽赴京補官其年已在五旬外賢能大員未便任其閒曠仰

憲 敕吏部到部卽帶領引 見奉 旨朱定元丁憂日期交部
存記三年十一月 諭浙江海防道朱定元著行文貴州原籍調
取來京四年正月授河南布政使十一月 上因河工重任難得
其人經河東河道總督白鍾山以定元入奏得 旨豫省淮潁汝
蔡諸水著撫臣尹會一河臣白鍾山布政使朱定元悉心熟籌專
委大員親勘全局務令一律疏通毋令各分疆界并 諭朱定元
由南河廳員出身完顏偉亦曾任海防道員各將河道海防事宜
悉心講求以備將來任使五年二月疏言臣查豫東二省止有總
兵並無提督凡隊伍之整弛弁員之勤惰及墩臺營房之有無防
守撫臣不相統屬難於稽查若添設提臣未免紛更成例請照山

西例加撫臣提督銜得 旨允行六月請禁豫省喪葬過奢及山西民人重利盤剝宜定地方官失察處分例奉 旨汝等且亟力行之若地方官不肖奉行參處一二亦足示警矣何庸定例耶五月授山東巡撫六年正月疏言爲治之道不外教養兩端臣謹稟皇上諭旨隨時隨事切實訓誨飭令府州縣所管境內廣行教化有一事近於孝弟者從而嘉獎之不論紳農士庶卽據實詳報大則給扁褒獎小則語言鼓勵有一事近於不孝不弟者從而警覺之先加化導繼嚴飭禁大則依律問擬小則笞杖示戒 上嘉其所奏是王道無近功須行之以實而要之以久則得矣尋奉諭曰山東巡撫朱定元之母年已八十有餘迎養在署朕念朱定

元宣力封疆著加恩於其父母照伊品級賞給封典五月巡漕御史王興吾劾奏山東清查軍地各員奉行不善致衛守備坐派出運丁銀應令各督撫提鎮另委賢員查覈得 旨照所請速行朱定元既不能約束於前若再瞻徇於後經朕訪出或御史奏參定不寬罪也定元覆奏清理軍地一事早經密訪業將派斂之東昌衛守備陳磬參劾并嚴查各衛有無行私情弊奉 諭既知悚惕實心改悔以後毋徒博長厚之名也六月獲山東老瓜賊犯十八名又續拏巨窩積盜等奏入 上嘉焉復奏請行各督撫飭地方官徧行示諭鄰佑地保人等不時稽察如有老瓜賊蹤跡密稟嚴捕俟審實起有贓款將首報人分別給賞部議 從之七年三月

丁母憂九年九月服闋 上以朱定元經歷河工若用爲河東總
河較完顏偉孰優傳 旨詢直隸總督高斌尋高斌覆奏定元累
任河工廳道誠實勤勞操守甚好及任山東巡撫辦理未見優裕
聲名亦祇平常若用爲河東總河未敢必其優於完顏偉儻再加
練習識見開擴以備任使實屬賢員十月授光祿寺卿十一月遷
內閣學士十三年授都察院左副都御史十四年正月休致三十
五年八月卒

右 國史館本傳

馮景夏

誥授通奉大夫晉 贈資政大夫刑部左侍郎馮公名景夏字樹
臣號伯陽浙江桐鄉人高祖攷明隆慶戊辰進士累官湖廣左布
政使曾祖國學生時昇祖一虬考翊均邑庠生以公貴 贈如官
公精敏有氣略喜讀史歷代政典張弛利病博綜鉤貫靡不究悉
壯多貧遊通曉時務該洽古今治術凡經生俗儒之學皆非所好
也康熙甲午年五十二始用癸丑科舉人選授陝西長安縣知縣
時 王師西征兵出其地公宿具資糧屣屨與馬逆而達諸境迅
無淹晷兵民晏如有某帥者縱兵虐民民鬪傷兵帥怒欲奏論以
傾大吏大吏懼公請辭於帥帥盛氣迎謂公吾且論若若奚來公

曰某一長安令逆大帥宜罪願 天子方憂邊屬帥以兵期旦夕
至而盤桓宿留且不戢士卒尙取於市擊無罪人小鬪輒傷懦不
足恃失伍無勇由不訓練不訓練由帥巡撫將以狀上 聞帥且
得罪奈何帥色變氣沮立爲好言浼公謝大吏疾馳去自後軍行
無敢譁者羽書使傳雲委兩集治如故常而公事無留廢公慮囚
重死獄善決疑案雖他所冤民往往待公以雪有醴泉縣殺一家
五口兇犯張九思者以申鞠院司牒寄長安獄凡寄獄令受牒納
囚於獄飭尉若獄卒謹視無逸而已漫不省何事公視牒怪九思
狀良愿疑有冤夜半入獄叩之得其情請於巡撫訊釋之事騰秦
民秦民咸歸誠於公興平縣民亂城閉上官更迭諭解不聽大吏

命公以兵五百往公請單騎赴之至則民望見公爭門出環馬首
跪泣請命公曰疾取首惡來則貰汝眾立縛其魁以獻民用全活
公治行冠秦中又以課民墾邊地充軍儲功最遷山東膠州知州
膠州瀕海南門外河通潮汐多水患俗又畏旱相傳旱魃爲陳尸
所化愚民察墓土色微潤者輒掘尸毀之謂之打旱魃公曰治膠
二者莫與較大於是禁毀尸而隄南門河隄成民德之名馮公隄
久之視聽大化變俗革故澤及枯骨矣公令長安時忤大將軍年
羹堯至是以虧空軍需奏奪官追償公畱膠破產稱貸完不及數
膠人陰代公輸所未入者於官公知不及辭也雍正丙午以原官
起用人 覲 世廟詢罷起狀公奏以實稱 旨卽授廬州府知

府歲大熟穀有一莖五穗者戊申遷布政司參政道督蘇松常鎮
太糧儲五府州漕運甲天下府奸藪弊不可究切有溫鐵匠者善
造斛便吏浮取吏比之尸漕利者數十年公立杖殺之盡收老奸
宿蠹之尤無良者置之法震如雷霆眾寐大覺冬收倉糧公輕舟
往復按部微服雜農民行倉廩閒徐去或突升廳事呼名擊斷倉
中人飲食寤寐如公臨之死守條要莫敢弄以事毗微日覓賦無
漏失公私以饒公謂浮收之數以斛口大小爲多寡部頒斛式口
大不足用製宜豐下殺上以六寸三分爲口之徑博其底徑尺有
六寸八分崇其身縱尺有二寸五分刻口之木冒以鐵脊起如刃
摩之令滑不可駐粒米底四角聯筍嵌以木錠外固漆木用樟櫨

斛必爲槩槩附口著斛角可左右運便民自槩斗方如斛升規之並改用小口凡尺寸準部尺度其內爲率用此製則槩米易淨淨亦立顯便稽察卽不及察淨數亦寡上其法於漕帥三請三駁公復申議云口雖小異而腹之所受與部斛無毫髮盈縮譬之尺止論度之長短不計其或闊或狹也譬之砵馬止論數之輕重不計其或員或方也然則是斛也止當論所受之多寡同異何必拘口之爲大爲小卒不聽時茶陵彭公撫江蘇臈其說命公自行所屬後十有餘年爲乾隆辛酉運軍以南北斛口大小不同訴漕帥咨戶部將罪變法者公援赦幸免而斛仍改用舊製其明年巡撫邢陽陳公始用公製奏入上報可頒式天下而公始事之名不著

是製也一沮於漕帥再革於部議其尺度形製與今奏頌定式或
未能盡合然至今蘇松閒民猶指今斛爲馮糧道小口斛云公既
清漕弊令民納米石輸口袋錢四十二文爲倉運費以卹軍吏例
亦自公始也當是時清釐江蘇逋賦 特命重臣臨之而以常州
一府屬公公分官侵吏蝕民欠爲三等鉤稽密徵萬狀畢出官吏
乾沒無貸民戶之逃絕老幼篤癯者多所縱舍立順莊冊以塞奸
竇今著爲令刑德並流當時稱之就加安徽按察使尋轉安徽布
政使課吏第上下以實盡其力能未期 召爲刑部侍郎時公年
已七十自念爲外吏久熟刑名思盡餘年上弼 聖教俄得寒疾
乞歸 世廟欲畱公憐其老遂得請公家故貧居官不立資聚頌

所有於親舊不恡既歸如其初初部吏有用僞印文盜取安徽藩庫銀二千兩去事發以當公任檄下責償旋被 特旨放免 世廟久熟公廉名故也年七十有九卒於第蘇松鄉民聞喪會哭於門者數百人至今言漕政之善未嘗不及公輒往往歎息泣下也子二長錦陝西宜川縣縣丞次鈴乾隆丁巳進士歷官巡撫安徽等處都察院右副都御史兼兵部侍郎

論曰乾隆丙辰之秋文與公冢孫侍御浩同鄉舉得以子弟之禮謁公於里第時公已病而目光射人眩不敢仰視退而歎曰昌黎所謂龍虎變化魁傑人者公其是矣家居八年布衣徒步曳杖於僧寮田舍竟日忘返遇者不知爲公也嗚呼世之貴人侈於外以

耀庸眾耳目者吾不知其中視公何如也

右傳鄭虎文撰

桐鄉馮少司寇景夏藩江左時 雍正壬子科秋試總理場務見
貢院地勢卑溼捐俸三百金於各號舍加厚板一塊以防雨水灌
浸後遂相沿爲例越二紀少司寇孫孟亭浩典試江南猶賦詩追
紀之馮氏子孫累世貴顯康祺按此雖小事非熱腸者不冒爲況
一舉而惠及萬夫正不得云煦仁子義也

右紀聞陳康祺撰

常德壽

常德壽滿洲鑲紅旗人姓瓜爾佳氏康熙五十三年由刑部筆帖式遷堂主事五十九年遷戶部員外郎雍正元年授直隸巡道二年遷江西布政使抵任嚴查倉糧虛報數目及地丁銀那新掩舊之弊有虧缺者勒補三年調雲南布政使四年疏言雲南距京八千餘里教職缺出咨部銓補必須半年外文憑到省又須轉行地方官具文送撫臣考驗儻有荒疏老邁者勢必繳憑另選經年懸缺仰懇 皇上敕諭吏部將滇省應選教職人員挨次截取二十員發滇令撫臣預先考定等第註冊送部缺出卽將考定之員依次委署咨請實授前項將屆補完續請截發如此則缺不久懸得

旨此奏甚是下部議行五月擢戶部左侍郎六年蘇州水利營田效力官梁文中毀苗殃民擅更成法 特遣常德壽往查治文中罪如律七年 上以西路軍需緊要甯遠大將軍岳鍾琪領兵出口署川陝總督查郎阿陝西巡撫武格新任未諳 命兵部尙書查彌納總理稽查常德壽同常賚協理之各給印信乘傳前往八年六月 諭大學士曰查彌納常德壽等此次查辦軍需甚屬可嘉著交部從優議敘尋議加二級七月遵 旨往甘州涼州辦理大軍駐歇一年口糧行至平番縣之紅城堡卒 予祭葬如例

右 國史館本傳

託時

託時滿洲正黃旗人姓佟佳康熙五十三年由筆帖式授理藩院主事累遷工部郎中雍正元年三月遷內閣侍讀學士六月擢戶部右侍郎三年五月調倉場侍郎六月 上念直隸被水災民乏食 命託時解截留漕米二十萬石貯天津倉備賑託時奏地勢卑溼恐沓爛 詔往勘建八月 命撥通倉陳米十萬石運天津十一月以所撥米不堪用 訓飭之四年十一月奏請於萬年倉開東門二增造船由水運入倉每年疏濬河道部議 從之十二月奏言通州大西中南兩倉所儲稷粟米足敷數十年用致廠座不敷新糧露積請嗣後開年冬放稷粟米一次待支用將完仍舊

兼放又言向來押運旗丁每幫畱一人住通州名曰守候需索分
肥弊由斯起嗣後糧艘到通運官造本管旗丁花名冊投坐糧廳
交畢立押回南違者治官弁以疎縱之罪再各倉例有折價給丁
三升八合之項往往勒索遲延希圖舞弊倉場侍郎察出題參其
應行南追給者坐糧廳行各糧道照數追給取領狀申報如糧道
有勒索情弊總漕查參又各漕幫非失風而報失者不得依報失
風之例止收平米應照當年起運數於次年搭運均下部議行是
月 命兼理戶部侍郎事先是奉 旨修京通各倉工竣五年
上遣大臣等往查得損漏狀 諭曰倉場米石乃國計民命所關
顆粒皆當珍惜必廩座堅完米粟方不至於霉爛朕宵旰勤勞不

惜數十萬帑金剏造修整身任倉場之事者自當加意慎重仰副
朕懷乃託時陳守創身任倉場全不實心料理以致倉廩損壞滲
漏處至九百二十九座米粟竟有霉爛者並無一語奏聞甚爲溺
職託時陳守創俱著革職七年 賞侍郎銜出使鄂羅斯八年襲
其祖舜古爾岱所遺騎都尉世職十年使回補刑部右侍郎旋轉
左兼理工部侍郎事務十一年調工部右侍郎又調戶部右侍郎
十三年因左侍郎海望署尙書託時轉左協辦步軍統領事務乾
隆三年正月奉天將軍傅爾丹等劾知府傅賚與城守尉朝哈岱通
判圖善會飲起衅角罵互毆 命託時往審得實朝哈岱圖善俱
革職傅賚論杖徒如律七月遷漕運總督九月奏言本年因漕運

河閘兌較遲至渡黃又值清口淤阻途次耽延弁兵等星夜儻行
多費工力仰蒙 恩命令臣加賞獎勞查漕白糧船一百二幫其
先渡淮者並無阻滯兼開水深通起剝甚少無需議給惟是江西
吉安幫至浙江嘉興幫守候二十餘日雇船剝米用力獨多臣擬
將依限抵通全完者正副旗丁賞銀一兩領運千總四兩協運隨
幫二兩仰副 皇上軫念優卹之至意疏入報 可十一月奏浙
江紹興前後二幫漕船因乾隆二年截漕濟閩減存在次旗丁等
已領錢糧部議自乾隆四年始分三年扣還請將該幫本年應領
減半糧銀抵充乾隆四年應扣之數餘自乾隆五年起分三年扣
完庶運費從容各丁不致拮据 從之又疏言漕船起運例用同

知通判以總其成領運隨幫弁目以分其任立法詳盡迨回空之日丞倅則借辭引見任意推延千總則託故完呈有心畱滯既不親押回南又不料理空船銀米以致副丁資斧不給棄船潛逃或遇淺擱沈溺卽至脫幫遺棄弊端百出請於起米後令領運千總督同正丁料理回空各項齊備其應給糧席完呈限坐糧廳監督衙門於十日內給發仍照例給限單星飛赴幫總押丞倅引見後部臣亦給限單令速赴大幫統於到淮日詳覈逾者卽行參處允之十二月疏言不法旗丁錢糧到手任意銷糜偶不敷輒逃竄卽拏獲懲創一二年後更易姓名復僉管駕故智復萌其故由於已革逃丁無從辨識以致屢革屢僉誤運蠹漕莫此爲甚請

嗣後有犯除依律治罪外仍照旗逃竊盜例面刺逃丁二字察識
既易不能復充似亦懲奸救弊之一法疏入報 聞四年七月疏
言湖廣漕船由水次抵通計四五里較他省最遙而行月口糧
折銀四錢較他省獨少且該省米價漸昂非從前定價時可比以
故丁力漸難伏查行月口糧各省皆有本折二色應將湖廣省亦
照此例其半仍作折色每石折銀四錢半改本色各照該省兵糧
例湖北每石折銀七錢湖南每石六錢丁力既舒體例亦昭畫一
經大學士等議行十月遷刑部右侍郎九月調補盛京刑部侍郎
十一年以老病乞休 許之二十五年卒子佟起襲世職

右 國史館本傳

國朝書獻類徵初編卷七十三目錄

卿貳三十三

梅穀成

吳應棻

德齡

子書山

凌則煥

楊超曾

陳儀

德爾敏

崔紀

--	--	--	--	--	--	--	--	--	--

國朝耆獻類徵初編卷七十三

通奉大夫前署江西巡撫江西布政使司布政使湘陰李桓輯
卿貳三十三

梅穀成

梅穀成安徽宣城人祖文鼎貢生精天文算學康熙四十一年大學士李光地以所著書進呈 上南巡回鑾 召見於德州舟次御書績學參微額以賜俾還籍 諭光地曰朕畱心數學多年此學今鮮知者如梅文鼎真當世僅見也五十一年 上聞穀成能承家學 召見內廷於是穀成以生員供奉 蒙養齋彙編御製天文樂律算法諸書五十三年 欽賜舉人五十四年復

賜殿試成進士改庶吉士散館授編修雍正七年改江南道御史
命巡視通州漕務八年轉工科給事中九年三月遷光祿寺少
卿八月遷通政司參議尋丁母憂服闋補原官乾隆元年擢順天
府府丞二年充增修時憲算書館總裁官三年十月順天武鄉試
有鹽山縣武生趙大武等因探知外場合式倩人入內場被獲毀
成疏言武鄉試外場請照鄉試例分四圍較閱其合式挑好字及
雙好字者皆暗記密送內場以防洩漏又內場點名冊請按圍分
造卽令原監試御史點名議認下部議行尋以失察頂冒毀成降
一級調用四年補光祿寺少卿總管算學五年疏言舉人會試所
領恩給盤費間因患病事故半途而返或到京不能入場者部

臣恐其假冒託領稟行追繳連年累月追求不已情殊可憫懇自
己未科以前稟免覈追部議查明實係丁憂患病及力不能完者
准豁免餘仍追繳六年疏言臣見兩江總督那蘇圖請禁無印硃
票一疏竊思無印之票固宜禁止而印票不銷蠹役持以嚇詐鄉
愚流毒更甚請差票事竣卽銷上司時加查察違者揭參部議
從之尋遷鴻臚寺卿七年奏言正一真人張遇隆遣人到寺投職
名欲隨班恭祝 萬壽臣未知真人應否隨班應列何品行查禮
部據稱應列左都御史下侍郎前臣思道家濫廁班聯不合典禮
似宜釐正查正一真人襲自明初秩視二品隆慶初臣工多言張
氏所爲不法世襲宜革遂改爲上清觀提點秩五品厥後資緣復

故號迨至 本朝相沿已久祈禳驅邪時有小驗仍而不革可也
假以禮貌可也而乃竟入班行儼然與九卿並列殊於觀瞻有礙
我 皇上聖作明述修禮正樂因太常寺樂員沿明舊例用道士
承充特頒 諭旨謂二氏異樂不宜用之朝廷今駿奔之選已遵
旨改業則舞蹈之班何可仍廁乎其間或言張氏世襲冠帶非
同常道殊不知張氏之襲乃假以冠帶約束黃冠亦如僧人之僧
錄僧綱雖有品級安得與臣工伍臣請 敕部定議嗣後正一眞
人不必令入班行 上是其言下部議行八年疏言外任官自京
赴任者例由鴻臚寺引至午門前謝 恩載在會典近惟月選官
遵例報名其保舉題升揀選等官臣寺無憑查考請 敕吏兵二

部一體移會以便稽查九年又言臣前請定候考序班額並遵會
典行學政咨取不許生員赴寺具呈經部議覆准定額而生員具
呈謂既有同鄉官印結自無冒濫臣思實緣請託之弊不可不杜
請嚴禁 詔並允行十年遷通政司右通政尋擢宗人府府丞十
二年四月遷都察院左副都御史十一月疏言前經禮部議覆臣
所奏道流濫廁班聯一疏據江西通志內稱真人張繼宗於康熙
十九年授光祿大夫署真人張昭麟又於乾隆二年題請承襲彼
時臣因封典非鴻臚寺職掌未敢瀆陳今當重修會典何敢緘默
查道教本屬異端而符籙更道教旁門正一真人秩視二品原係
前明敝政仍而不改已非所宜況又加至光祿大夫官階之極品

封及三代錫類之曠典若係特邀 異數必降 明旨何以不存
於檔冊不見於會典我 國家於世襲之典尤極慎重其襲替之
高卑久暫皆視其功績大小不容絲毫假借張繼宗卽果蒙封典
亦必無准其世世承襲之理且以孔子之聖後裔乃襲公爵顏曾
思孟所襲不過博士儒林已不勝其榮今張氏所襲遠過大賢幾
與聖裔無別可否照提點演法之類給與品級出自 聖恩疏下
部議正一眞人不許援例請封授秩正五品十三年正月疏劾浙
江按察使萬國宣於尼僧羅柴氏控貢生陳學愈僞斃三命一案
不行詳究反將學愈開釋經御史沈廷芳奏參 特遣刑部郎中
德福往審沈寃始雪國宣玩法縱奸草菅民命請交部嚴議 諭

曰梅穀忒據實糾參所奏甚是萬國宜著交部嚴加議處閏七月擢刑部右侍郎八月浙江學政陳其凝署內閣卷生員樊顯自劾命穀成往同巡撫方觀承會鞠得其凝縱子及僕吏串通舞弊狀以聞論罪如律十五年七月疏言科場同考閱卷例分經房請止分房數不必分經可除尋查關節之弊論曰掣籤分經原以除弊不必更改惟一經之中房考數員內有籍係同省者平居棄爲熟習入簾時彼此相通易爲照應朕意不若於定例之中稍示變通之法嗣後房考入闈仍照舊掣籤分經其一經內房考有籍係同省者令主考官酌量對調閱看亦或釐剔弊端之一道著爲令九月擢左都御史十六年穀成劾山東巡撫準泰承審衝突

儀仗之房鎡一案不應擅引乾隆十三年諭旨一面具題一面正法請通飭內外法司嗣後不得假借牽引諭曰朕前所降諭旨原爲聚眾抗官爲首之重犯而言尋常立決之案自難比附援擬至房鎡一案平日居鄉狂悖多事又復造言誹謗逆迹昭著深爲地方人心風俗之害較之首惡脅眾者情罪尤重其所犯本不在衝突儀仗亦不在誣告官長該撫準泰先經面奏外間自無由知卽其摺內所奏亦甚明悉梅穀成未經詳閱遽謂準泰忿其告官故違成例亟欲其死之處實屬深文吹求朕慎重刑章卽尋常案獄皆不憚反覆推求務期平允督撫等孰敢以民命所關竟行率意援引潛移生殺之權者此可信其必無準泰亦何敢出此但

梅穀成因事立言恐開挾私洩忿之端意在防微杜漸則所奏亦未可盡非耳特此曉諭中外知之十七年三月以查議宗人府王公等處分一案有意從重交部嚴議革職得旨從寬畱任十一月充經筵講官十八年尙書步軍統領舒赫德疏劾巡城給事中特吞岱行止卑污庇賤役子濫捐職銜之劉裕泰爲請於堂官列銜贈額部議穀成降三級調用諭曰特吞岱卑污狼籍乃梅穀成於召見時屢次稱薦且倡議給扁劉裕泰又復自行書寫是此案皆起於梅穀成況伊年已衰老著以原品休致二十二年諭曰左都御史梅穀成自皇祖時以算學效力內廷經朕擢用洵歷正卿今謝事家居年近八旬著加恩照原品級在家食俸二十

七年 上南巡穀成迎 駕於清江浦 諭曰原任左都御史梅
穀成以康熙間舊人服官有年休致在籍今前來接駕雖齒逾八
秩而神明不衰居鄉亦復安靜洵屬昇平耆瑞念其家計清素諸
子內亦無通籍之人著加恩將伊子梅鈺賞給舉人一體會試以
示優眷 賜詩曰無欲有精神趨迎清浦濱閉門惟教子下榻不
延賓能駐西山日引恬江國春推恩緣念舊 皇祖內廷臣二十
八年卒遺疏請入籍江甯 允之並 命照原銜予祭葬如例諡
文穆

右 國史館本傳

梅穀成爲宣城梅定九先生之孫先生精通厯算李文貞公爲直

隸巡撫時嘗以其所著書進呈 聖祖仁皇帝爲書績學參微四字以賜而未授以官穀成於康熙末年至生員選入 蒙養齋供奉與魏廷珍王蘭生彙編 御製天文樂律算法等書雖巡幸不離左右口講指畫若師之授業弟子者然嘗爲文貞言 皇上體氣強健神志清明而且涵養之厚溢爲至和藹然如春風之被萬物麗乎如秋月之麗層霄伊等雖在威嚴之側而常遊光霽之中可云奇遇已又 賜爲舉人 賜同殿試成進士以翰林院編修起家歷官至左都御史證文穆稽古之榮視乃祖爲獨食其報不於其身於其子孫抑亦天道之必然歟然而文穆不徒以官爵重也觀其奏劾正一真人一事雖謂之古大臣可矣當乾隆初年文

穆之官鴻臚卿也正一真人張遇隆遣人到部投職名欲隨班恭
祝萬壽文穆奏言臣未知真人應否隨班應列何品行查禮部
據稱應列左都御史位下侍郎前臣思道家濫廁清班不合典禮
似宜釐正查正一真人繼自明初秩視二品隆慶初臣工多言張
氏不法世襲宜革遂改爲上清觀提點厥後黃緣復故號國朝
相沿已久祈禱驅邪時有小驗仍而不革可也假之以禮貌可也
而乃竟入班行儼與九卿並列則於觀瞻有礙我皇上聖作明
述修禮正樂因太常樂官浴明舊制用道士承充特頒諭旨謂二
氏異樂不可用之朝廷今駿奔之選已奉旨改正則舞蹈之
列何可仍廁其間或言張氏襲冠帶非同常道殊不知張氏之襲

乃假以章服約束黃冠亦如僧人之僧錄僧綱雖有品級安得與
臣工伍請 敕部定議嗣後正一真人不得列入班行 上是其
言下部議行十二年遷左副都御史疏言前經部議覆臣疏據江
西通志內稱真人張繼宗於康熙十九年授光祿大夫署真人張
昭麟又於乾隆二年題請承襲彼時臣因封典非鴻臚職掌未敢
瀆陳今因重修會典何敢緘默查道敎本屬異端而符籙更道敎
旁門正一真人原係前明敎政仍而不改已非所宜況又加至光
祿大夫官階之極品封及三代錫類之殊榮若係特邀異數必降
明旨何以不存於檔冊不載於會典我 國家於世襲之典尤
極鄭重其襲之高卑久暫皆視其功績大小不容絲毫假借張繼

宗如果蒙封亦必無准其世世承襲之理且以孔子之聖後裔乃襲公爵顏曾思孟所襲不過博士儒林已不勝其榮今張氏所襲幾與聖裔無別可否照提點之例給與品級出自 聖恩疏下部議正一眞人不許援例請封秩授正五品考龍虎山道教唐宋以來惟元代最爲尊重所稱張留孫吳全節者官爵比於公侯眷遇隆於師保吳草廬虞伯生皆與之周旋假以筆墨或碑或傳備極褒揚不知裁以正理皆孔子之門所不許者也文穆於狂瀾旣倒之後上此二疏當與韓昌黎諫佛骨表並傳萬世然初疏祇云不可入班行而已未嘗執言秩宜降也再疏亦第言不宜世襲而已未嘗固言二品宜改也而部議不惟不准援例請封且秩止五品

焉
聖天子崇正黜邪毅然英斷尤非唐宋元明諸君所能及矣

右事錄李祖陶撰

吳應棻

吳應棻浙江歸安人康熙五十四年進士改庶吉士散館授編修五十九年充河南鄉試副考官尋丁父憂雍正七年充河南鄉試正考官九月提督河南學政十一月疏言州縣民壯多寡不一各省司道府廳等官每派爲隨丁致衝繁之地不敷差遣嗣後請停派撥下部議行八年三月擢右中允五月遷侍講尋遷少詹事八月奉 特旨提督順天學政十二月丁本生母憂服闋補原官十年八月疏言順天府童生考試向惟大宛二縣屬府丞專理其餘州縣由霸昌道錄送霸昌道駐昌平距各州縣遠資斧維艱且童生半係年幼不能跋涉致應試寥寥請就近改歸四路同知錄送

又學臣按考地方官撥役在堂伺候本地衙役入場鮮不勾通作弊請行禁止按考日卽以隨帶軍阜供役則內外聲息無自而通部議從之十月報滿奉旨仍留順天學政任十一年十二月以會典告成議敘加一級十二年三月疏言八旗生員歲試不到者甚多如槩行除名則將去大半若任其規避則傲倖一衿竟成游惰且八旗人才英敏果奮發砥礪不乏超羣之士若自量文理不能上進卽當勤習弓馬自效豈容廁名膠庠優游無事此後如果駐防隨任者令本旗查明知照學臣或發教官造冊申報儻仍無故不到照例斥革上嘉其奏又言定例歲科兩試文武童生由縣考取造冊送府惟大興宛平童生止憑審音並不衡文定去

取請照例由縣審音考試再行造冊送府庶例歸畫一而假冒頂替之弊可杜部議均從之六月轉右通政尋擢左僉都御史仍留學政任十三年正月命署湖北巡撫二月擢兵部右侍郎仍署巡撫事疏言湖北吏治廢弛案件遲延不結按察使胡瀛到任未久辦理竭蹶布政使李世倬在任年餘支銷款項多不清楚奏銷在卽嚴催文冊不應至州縣沈擱之案更不可勝計臣見在按限清查儻數月後仍不能振作當據實陳奏疏入上嘉之乾隆元年二月來京 陛見 諭令回兵部侍郎任疏言臣在湖北巡撫任內見從前奉 旨分發以守備題補之年滿千總約二十餘員有候至五六年不能得缺者蓋因湖廣題缺無多缺出應將預

保人員掣補事簡各缺又統歸部選以致分發之員得缺無期技藝日疏人才漸廢非獨楚省爲然似應少爲變通查武職不論雙單月部推缺出原有一班歸於分發巡捕營當差千總銓補此項人久已用完見存班次名色請卽以此班將各省候補年滿千總掣補俾得及時自效部議如所請行三月疏言督撫司道郡縣勢不能無幕賓而幕賓挾持通患在上司衙門者陰恃下屬爲奇貨在下屬衙門者佯指上司爲奧援稍不覺察卽受其累此輩囊飽遠颺事外近更有一種坐省幕賓在上司衙門坐待呼引散布線索相通從前 世宗憲皇帝洞燭其弊 命督撫保奏以彰激勸行久漸弛臣請略倣漢唐宋辟除僚屬遺意仰承 憲皇帝激勵

人才之盛心而推廣之凡督撫衙門設七品幕職二員兩司設八品記室二員皆報明吏部三年一考有功無過報部存案六年考滿予選府州縣設一九品掾司申報督撫本人有出身者計考先用本官降革不准子考本官或以贓酷敗定議處分不惟除弊且可得人下部議尋議如應某奏申行保薦之法以示勸懲但不必先與職銜亦不必預定處分從之三年轉左侍郎五年四月奏言武職自守備至副參有發各省委署試用及酌量題補者向例不占部推缺但如山東省題缺無多山西河南江西等省並無題缺守候多時補用無日請嗣後簡發人員遇有部推缺出督撫提鎮於本內聲明准題補委署又言各省驍騎校員缺於領催內

預揀引 見俟記名人員用完再行保送此雍正元年福州將軍
宜兆熊題准例也近來如甯古塔將軍保送記名者先後二百四
十四人今補放不過六十餘人黑龍江將軍保送記名者先後一
百五十九人今補放不過五十餘人其餘雖經記名數年或數十
年尚難得缺若復保送愈積愈多補用無期久而倦怠弓馬日疏
且外有保送之領催旋報部註銷者往往有之請 敕下各省駐
防將軍遵照原題俟從前記名領催補用將完再行揀選不得濫
保均下部議行是月卒

右 國史館本傳

德齡子書山

德齡滿洲鑲黃旗人姓鈕祜祿氏康熙五十四年進士改庶吉士散館授檢討五十九年充山東鄉試副考官初德齡曾祖鄂德以軍功授騎都尉世職三遇恩詔加至二等輕車都尉卒子莫洛渾襲卒子佛隆襲襲卽德齡父六十年卒德齡降襲騎都尉雍正元年正月充廣西鄉試副考官四月充日講起居注官六月遷侍講十二月遷侍講學士充湖北鄉試正考官三年轉侍讀學士八年擢內閣學士十年二月充繙譯鄉試副考官四月兼公中佐領閏五月充經筵講官一統志館入旗通志館總裁七月命赴西安同左都御史貽直辦理軍需十一月貽直署陝西巡撫德齡

仍辦理軍需尋授湖北巡撫十一年六月疏言州縣審理刑名案件各有限期逾限不結該管道府直隸州未揭請照徇庇例議處知府直隸州自審之案逾限亦將督催之道議處更有並非難結之案該管府州捏報緣由展限者臬司未參亦照徇庇例議處部議如所請九月疏報武昌等六府墾田千六百頃有奇下部知之十二年二月疏言京山縣多寶灣鎮俗悍並有隄工縣令鞭長莫及請將水利縣丞移駐並將宜都營外委千總撥防又言向例以財行求無祿人照有祿人減一等或照本律遞減二等不畫一嗣後以財行求請照例與受財人同科有祿人槩不減等無祿人各減一等儻承審官不依例擬斷將無祿人仍減二等者照故出人

罪例議處再行求說事宜分首從爲首者照例科斷爲從者各照
有祿無祿聽減一等儻所許財物立議封貯官吏雖未收受亦應
向許財人追入官並將聽許官吏議處俱下部議行五月 命赴
肅州同署陝西總督劉於義辦理軍需八月赴西甯總理青海番
人事務十三年疏言哈爾垓圖所駐綠旗兵見遵 旨撤回但噶
斯一路爲防護青海遊牧最要之區請撥青海蒙古兵二千防守
再選精兵二百及綠旗兵百派員率赴得卜特爾伊克紫達木等
要地更番駐防 詔允所請乾隆元年疏言西甯府之大通衛向
設守備稽查彈壓但山徑歧出外連青海內徧棋子卓子等山番
族聚處爲蒙古逃人潛匿之藪不早清理久必益多請 敕該督

撫會同臣衙門派員赴該衛詳查如係有主令本主領回收管無
主者立有家產准入籍聽該衛轄嗣後外來蒙古潛匿照失察逃
人例定以處分疏下大學士陝西總督查郎阿議以夷漢雜處不
便不准入籍餘如所議行是年還京二年七月授鑲紅旗漢軍副
都統八月仍充一統志館總裁三年授鑲紅旗護軍統領四年九
月補盛京工部侍郎五年調工部右侍郎七年教習庶吉士充經
筵講官八年 上聞德齡母賢年八十 御製詩賜之有治身勤
四德教子勛三遷之句九年三月充繙譯鄉試副考官疏言繙譯
應試童生多至千人順天府員役稽察難周請 敕左右翼於臣
等入場前一日各派參領一領催二馬甲十聽臣等分派巡察如

有越號換卷代倩等弊卽將該參領指參至場外傳遞蹤跡詭秘請令步軍統領派幹役密訪獲則重懲如所請行十年子書山任安徽廬鳳道德齡以母念孫情切乞調補京職 特命書山來京授御史十一年德齡調吏部右侍郎十四年 諭曰德齡不勝吏部侍郎之任著以內閣學士用十六年授盛京禮部侍郎十七年請終養回京三十五年卒子書山由內閣中書授侍讀遷御史乾隆六年轉刑科給事中巡視臺灣八年轉吏科掌印給事中九年授安徽廬鳳道十年還京補山西道御史十一年二月轉工科給事中五月遷太僕寺卿十一月擢內閣學士十二年以巡臺灣時派州縣輸值供應多設胥役爲福建巡撫陳大受所劾 詔革職

畱任十三年四月署倉場侍郎閏七月實授十五年調刑部右侍郎正黃旗滿洲副都統十八年充繙譯鄉試正考官二十年署工部左侍郎尋充經筵講官二十三年 命以侍郎銜往哈喇沙爾辦理屯田二十四年七月多倫回人降參贊舒赫德請移往哈喇沙爾課以耕種交書山就近辦理 允之十一月疏言自庫車以東哈喇沙爾以西玉古爾台至碩爾舒克台皆可引水溉田降眾五千餘分布安置臣同吐魯番公素賚滿等相度妥辦又羅卜淖爾有伯克託克託屬三百餘戶懇請屯田應給其弟阿卜都賚轄報 聞二十六年還京署兵部侍郎仍兼副都統尋 命駐防京口調錦州三十五年丁父憂三十六年襲騎都尉世職授福州副

都統以病解任四十年卒姪文慧見襲世職

右 國史館本傳

凌如煥

凌如煥江南上海人康熙五十四年進士改庶吉士散館授編修
雍正元年恭修 聖祖仁皇帝實錄充纂修官六年五月遷侍讀
七月署日講起居注官十一月提督湖北學政七年轉侍郎八年
侍郎劉於義等奉 旨考試各省拔貢奏湖北楊可鏡卷文理荒
謬下部議革如煥降一級調用得 旨朕聞楊可鏡係明臣楊漣
元孫楊漣之子楊之易爲江南松江府同知於順治四年遭松江
提督吳勝兆之叛捐軀殉難忠節凜然比蒙 世祖章皇帝之恩
優加贈卹此卽楊可鏡之曾祖也朕思楊漣父子兩世忠義其後
嗣子孫若稍能自立品行無虧雖文藝不工亦當格外造就該學

臣將伊入於選拔之內未必不因此起見但不將緣由奏明是卽辦事無識無才之處耳楊可鏡准作選拔赴國子監肄業仍著禮部帶領引見復諭曰湖北今歲選拔生員較他省甚優凌如煥免其降級十年二月遷侍讀學士十一月命仍畱學政任十一年遷內閣學士十二年六月奏言湖北歸州上下皆險灘爲商旅患請 敕督撫於三峽水道勘設救生船又奏報墾地畝升科有司或墾少報多圖增科以邀議敘及至升科之年按冊有餘按畝不足勢必勻派飛灑以求足額調隔屬賢員履勘符實取具印結送部方准議叙捏造一併參處又有泥面石骨之山田土氣本薄數年後發生濱江河之水田一遇漲發淹爲巨浸此皆似田而難

於成熟者亦請詳確勘報分別辦理均議行八月丁母憂乾隆二
年服闋補原官尋奏言直省州縣遇水災驟至督撫一面題報一
面卽撥存公銀委員會同地方官確查如房屋衝塌無力修整或
飢寒切身者均與賑恤其冰雹颶風等災極貧民亦一體給發富
戶能出資救災急加優賞示勵 從之三年四月奏言番捕威偏
認罪當查明被誣之人所偏認罪名遇 恩赦尙准援免者反坐
之番捕亦能援免若將平民及犯竊輕罪偏認爲謀故強盜重罪
則被誣人罪在不赦反坐之罪亦不得倖邀援免下九卿議行是
月遷兵部右侍郎六月充江西鄉試正考官四年充會試副考官
五年轉左六年三月陳請終養奉 旨給假數月且不必開缺九

月奏請展假開缺 從之十二年丁父憂十四年卒

右 國史館本傳

己巳夏德潛奉 予告歸時吾師少司馬凌公來吳門潛拜謁於
遂初園吳氏殷勤教誨老年師弟情倍篤也甫一月詣海上謁公
而公己先兩日辭世矣憑棺哭歸爲位哭踰五月爲十二月初十
日諸孤葬公於鶴沙鎮先塋東北之新阡幽堂有銘墓碑未立諸
孤以命潛潛爲老門生烏敢辭公諱如煥字榆山號新齋天畀異
稟勤苦向學爲名諸生康熙戊子舉北闈乙未成進士入詞館散
館授編修職雍正六年升翰林院侍講充日講官督湖廣湖北學
政七年轉侍讀十年升侍讀學士十一年升內閣學士兼禮部侍

郎前後兩任學政十二年赴闕補閣學未幾丁內艱歸 今上御
極元年服闋補原官三年升兵部右侍郎典江西試四年充會試
總裁六年轉左侍郎七年陳情養親歸在籍五年丁外艱又二年
薨於家時乾隆十四年七月二十三日年六十八公在翰林勤慎
編纂大文字每出其手在學政崇實行輕浮華清德著聲和氣藹
鬱去位久人猶謳思在內閣參贊機務執事有恪在兵部檢軍器
杜冒耗慎銓選老胥猾吏皆洗手奉職在典試慎擇清古屏斥荒
幻識負實學而沈淪者而生平經畫尤在入告諸奏疏當視學楚
中閔歸州風濤之險有灘高浪急沈溺商旅者請添設搶救船以
保護行人自楚入都道經中州時值開墾閒曠見有地本不毛而

有司強民報墾冀迎合上官詭邀議敘者請勘實分別升科以絕
欺隱以全民命 今上卽位孜孜求治公慮游惰之眾無業釀禍
請 飭有司奉行保甲俾勤其肢體并宣布教化同爲良民時水
災屢告 廷議撫恤公慮水患猝至必俟遷延展轉奉行部文恐
婦子已經離散請廣推 皇仁酌撥存公帑項給員同有司隨勘
隨賑西江歸日道經杭郡見北新關吏三十里中搜查屢次又各
壩虎役橫行攫奪請照京中崇文門例酌定經制毋容橫索凡所
陳請 兩朝一德俱報可允行迄今奏牘載在史館知公者謂公
經術經世不以辭章榮其生平公事親仁孝無大小必愉怡稟命
既貴年六十餘猶孺子然乞養後封公年九十餘公扶攜杖屨侍

宴遊峰御閒見者稱神仙中人居喪盡哀盡誠士大夫咸來觀禮
事伯兄公財共產愛護敬禮至老不衰教諸子姪諸孫負實學礪
廉隅不嚴而肅與人交抑損自下和光可飲終始不渝後進之士
有片長足錄者延譽之務成其名在籍時當路者欲一識其面不
可得和而能介聞風者均重其品於學無不窺尤邃易理嘗曰聖
人猶須假年吾輩終身翫索可也近思錄爲四子梯級小學嘉言
懿行切近篤實允宜服膺中歲後涵詠詩學陶白蘇陸天趣盎然
期於陶冶性靈而止所著有應制楚遊讀史皇華黃海紀遊向日
槎雜詠等集公原籍新安代有鉅人長德祖考 誥贈閣學公諱
日榮隱居不仕考 誥封閣學公諱起潛爲諸生遷松江之上海

兩世潛德弗曜公元配胡氏 誥贈夫人繼配張氏 誥封夫人
俱淑慎端肅爲時女宗俱先公卒子四人應蘭乾隆丁巳進士淮
安府高堰通判應雲國學生早卒應熊國學生應豹治制舉業女
七人俱適望族孫六人學昌學賢學詩學恆學禮學文孫女六人
曾孫女一人憶己未會榜發潛以弟子禮拜公邸第公謂我諸生
時卽誦子試牘今乃出我門下方今 文思聖人在上崇獎儒術
期於日贊盛治子雖年老猶及勉旃迄今十餘年遺言猶在公遽
爲古人而潛之老耄退休不能副公之望爲抱愧也吁其可感也
夫銘曰

當公之生爲時準則洎公之沒咸懷令德同朝浩歎失一正臣鄉

黨欲獻失一善人四民卒伍異人同呻音容雖亡隱功滋久奏議
焯爍金石同壽學共推之行共師之子孫繩繩世澤詒之

右神道碑銘沈德潛撰

日本書紀卷之二十三

二

楊超曾

楊超曾湖南武陵人康熙五十四年進士改庶吉士散館授編修雍正四年入直南書房充湖北鄉試正考官尋提督陝西學政五年五月遷司經局洗馬六月遷左庶子六年疏言商州之鎮安山陽商南興安州之平利紫陽石泉白河等縣童生甚少文藝荒疎每將西安漢中各屬頂名冒考諸童取入足額謂之寄籍相沿既久諸弊叢生請嗣後就本籍童生文藝量取不必勉強足額俟人文漸盛補足寄籍諸生改歸原籍廩增俱作附生應試下部議行尋調順天學政八年遷侍講學士九年擢奉天府尹疏言各屬一切公務均有陋規攤派已嚴飭永禁疏入 上是之將所奏宣示

令永禁遵行十年疏言奉屬自光祿寺卿王符奏准商運販糴過多價難平減本年秋收稍歉明春商船雲集勢必騰貴請停禁商運部議准行十一年疏請州縣所收加一耗羨除錦甯遠二屬外俱免提解甯充州縣養廉其府尹等官養廉於中江等稅羨餘銀內撥給首領佐雜等官於錦縣甯遠縣酌派部議如所請以雍正十一年爲始永爲例時內務府議准御史八十條奏於錦州增莊頭百戶將舊交代民種荒餘地揀給超曾奏民種地立業已久今增莊頭百戶給六百五十晌六畝爲一晌計需三十九萬畝以民間每戶耕數十畝論給萬戶無地可耕斷難一時安輯且正值春耕清丈動須時日舊戶新莊俱不能播種本年賦必兩懸臣以

諭民耕種毋妨農業應給莊頭地畝緩俟秋收查丈下部議行又
言復州安州近年戶繁墾廣請裁復州通判改設知州一吏目一
裁金州巡檢改設知縣一典史一義州接壤邊境徼員不足彈壓
請裁巡檢增設知州一吏目一自廣甯牽馬嶺以西錦縣齊家堡
以北歸義州轄土默特耕地民就近附義州民籍又請將奉天治
中照各府管糧廳例分管糧務理事通判照各府督捕廳例專司
督緝又請改奉天各州縣要中簡缺量才補用又承德錦州甯遠
廣甯四州縣衝要解犯絡繹請各增步快二十奉天府獄監犯多
增禁卒八均議行尋定金州新改縣曰甯海四月擢總督倉場侍
郎十二年九月擢刑部額外侍郎仍辦倉場事務十一月授右侍

郎十三年充文穎館八旗通志館副總裁乾隆元年充律例館總裁尋命署廣西巡撫二年正月實授二月疏言桂林等府州縣各墟雜稅寫遠難查請豁除其賀縣花麻地租雜稅有額無徵亦應全裁下部議行十二月疏言泗城鎮安二府及東蘭荔波甯明各州縣應試者少前撫臣金鋈令外省人入籍考試卽爲土著童子之師但冒籍者挂名學宮並未久居土著何從受益今鄉試三科外省人已中式數名若至十科勢將占去過半又其人皆行險僥倖中式後設獲罪逃脫居官虧空籍貫與里居不符從何追究請將外省入籍例停止部議從之先是撫臣金鋈奏令粵西廢員及外省官生借墾荒報捐後捏報者多每搜有餘熟田量給工

本卽作新舉數雲南布政使陳宏謀原籍廣西力陳其弊部議令
超曾秉公確查至是同督臣鄂彌達會奏從前捐墾不實田畝應
減應需及各官生短給工本各款部議巡撫金鋈布政使張鉞革
職私派加徵各官論罪如律其田分別減則豁除三年奏言賓州
原直隸州轄上林遷江二縣近俱改隸思恩府請裁分駐上林縣
州同改設縣丞專司捕盜又言右江鎮增設中營請將思恩營原
撥防田州汛之外委一兵五十移駐適中之馬平汛又言苗疆各
官養廉不敷請將桂林平樂潯州三廠稅課盈餘銀酌繁簡增給
又言泗城鎮安二府俱改土歸流地廣俗悍以知府兼縣事未免
顧此失彼請增附郭知縣各一典史各一撤回駐天義之泗城經

歷改設縣丞一裁去泗城原設之同知照磨均下部議准行十月
擢兵部尙書四年八月充明史綱目副總裁十一月署吏部尙書
充經筵講官尋以任巡撫時濫舉貪酷知府饒鳴鏞部議降調得
旨寬免五年五月署兩江總督九月授吏部尙書仍署總督事
先是蘇州織造兼管潯墅關海保以貪婪參革部議海保管關九
年其守口家人衙役等需索商民數多並著追超曾奏言此等人
役向係一月一換轉徙無常得贓甚零星年遠難查請免追從
之是月奏劾南昌知縣沈宏靖貪婪不法各款尋革宏靖職詔
超曾嚴訊論絞候十一月奏劾江西巡撫岳濬與知府董文偉劉
永錫朋比作奸徇情納賄命戶部侍郎阿里表會同江南河道

總督高斌鞫實得 旨褫岳濬職從寬免罪餘論如律十二月疏
言今秋徐海二屬偏災應納粟米奉 旨改徵折色照部定價每
石七錢五分內贛榆一縣向係民折官辦本年折徵已議定每石
徵銀一兩陸續完納今照部價溢銀二錢五分若以完納在前使
急公良民轉不如未完之戶得沐 皇恩似未均平請將溢銀卽
抵該戶本年未完或明年未完之數其舊欠折漕緩徵各州縣亦
多已徵銀米均作次年分徵之數得 旨允行六年四月疏言松
江府二屬涇係黃浦宣洩要道前兩浙鹽臣佟吉圖恐沙隨潮進
淤積鹽河於涇口築壩攔截壩內民田蓄洩無備舟楫出入迂迴
撫臣張渠請開壩建閘但建閘或害鹽運請開壩後卽於壩基設

立木柵中畱寬闊柵門每屆六月十二日掣鹽時依期封閉以防
偷漏平時聽商民往來庶爲兩便又言松江太倉沿海土石塘工
計占壓及空廢田不下百餘頃撫臣許容奏請空廢零田原令業
戶領種定額輸租臣思此田皆民間恆產並未給還原價若以錢
糧既經豁免又必按畝徵租似非情理之平且半作溝潭不成阡
陌將來歲修取土正無底止在舊戶亦不能長爲己有請聽耕種
免租均如所請議行又言崇明一邑向係蘇松巡道統轄雍正八
年因其孤懸海外文職僅縣令增駐太通道轄太倉通州兩屬但
道員於地方案件不過一加覆覈原不親駐辦理況增設以來該
道憚於過海俱駐太倉此缺無關輕重可見又揚州三江營原設

同知一巡緝私鹽雍正十年改爲鹽務道要缺查兩淮鹽務有運
司經理運判大使分地稽察且地方官俱有禁緝私販之責該道
不過據文轉詳全無關係請俱裁汰通州就近歸併常鎮道轄餘
如舊管理部議 從之六月兼署安徽巡撫時提督南天祥聲名
平常超曾奉 旨訪察奏言天祥明於水陸營制愛憎任情諸子
及家人丁弁藉端營私漫無約束尋 命南天祥原官休致先是
乾隆元年三年安徽各屬賑濟銀米數溢例屢經部駁布政使託
庸請以司庫節年盈餘照數支補奉 旨令督撫查奏至是超曾
奏言此項銀米並無捏報以不應著賠之項設法彌補不可爲平
應卽照數銷結疏入報 聞八月 諭令回部辦事疏言本年七

月間風雨大作上江臨淮鳳臺等二十四州縣下江上元江甯等二十六州縣及山陽鹽城等處沿江沿海田禾被淹災重急應撫卹者已將本州縣所存銀米動用又餘上江酌撥司庫銀八萬解宿州靈壽虹縣將鄰近不被水州縣倉米分撥十萬備賑動支司庫銀二十萬買米麥以供賑糶下江各縣穀見存及動買者約百餘萬又撥司庫銀十餘萬解徐海二屬撥銀三千解六合江浦二縣分別賑卹餘銀放給籽種疏入 諭曰料理賑卹事宜頗爲得法務令屬員咸知朕視民如傷之意以至誠惻怛之心爲之庶可稍救災黎耳時通州鹽河工因春漲不能速竣辦理水利大理寺卿汪滢副都御史德爾敏議開唐家閘宣洩商民以外港水無去

路必淹麥田紛集欲罷市吏部侍郎楊嗣璟奏開闢錯謬 命超
曾查覈超曾奏言事皆出入因公民實切於爲己並無挾制阻撓
且未竣工程稍遲數月亦無貽誤似可無庸深究又言通州知州
王師旦深知唐家闢不可開因汪瀼等檄諭嚴切不能堅執失在
依違並非偏謬汪瀼年老多病不能專主德爾敏矜才自用未能
和衷此外並無不妥之處 上曰此公論也十二月丁父憂回籍
七年卒 賜祭葬如例諡文敏

右 國史館本傳

楊超曾字孟班湖南武陵人由甲科入詞館未十年歷擢刑部侍
郎兼奉天府尹時內務府議添設錦州莊頭將原給民種之退園

地畝改撥超曾力言地交民種立業已久今添設莊頭百戶卽有萬戶無地可耕之民且清丈動需經時復失小民西成之望事遂寢授廣西巡撫益肅清吏治有寄籍官生借墾報捐有司因以爲利就民舊冊荒額田勒令首墾卽抵作報捐之田升科超曾以粵西地瘠民貧捏墾報捐加賦累民不淺請將捏墾者豁除果有實在開墾者補給工本分別升科得 旨俞允所免加賦之田以數萬計晉兵部尙書授兩江總督築陂塘增兵額撤冗稅浚支河時鳳穎淮徐大水超曾力爲賑卹民免流離仍還部視事未幾父艱歸藉橐喪次致溼病卒謚文敏子植秉淵博克世家學廕主事

右述聞謚瑤錄

公諱超曾字孟班湖南武陵人楊氏本武陵世族公胚胎前光生
有奇稟書過目成誦由進士授編修官至兵部尙書公性孝友優
於文學尤負經世才莅官能盡力民事在遼東奏罷莊頭之議俾
萬戶得安其居在粵西豁加賦虛田凡數萬畝在兩江免松太廢
田額租其利澤及民皆不可以世數計賑災之役動帑銀至四十
餘萬米穀至百餘萬而 聖諭猶諄諄誠勉惟恐一夫不得其所
則尤歎 明良一德公所遭之盛爲千載一時也年裁五十 上
嚮用方殷遽以毀卒致施澤未盡下究朝野惜焉

右事略李元度撰

陳儀

陳儀順天文安人生而穎異讀書過目不忘嗜爲古文康熙五十四年進士改翰林院庶吉士五十七年散館授編修與修三朝實錄雍正三年直隸大水諸河泛濫壞民田廬無算世宗憲皇帝命怡賢親王偕大學士朱軾相度濬治王欲得善治河者與俱軾素器儀遂以儀對王延見訪以治河所宜先儀曰朱子有言治河先從低處下手天津上應析木古渤海逆河之會百川之尾閘也今南北二運並漲東西兩淀爭奔駢趨於三岔一口而強潮復來拒之抵牾洄漩而不時下下隘則上溢其勢宜然故欲治河莫如先擴達海之口欲擴海口莫如先減入口之水入口之水減則

達海之口寬而北之永定南之子牙中之七十二清河乃得沛然入三岔口而東注矣四年春隨王行視水利軾以憂歸而教令牋奏皆出儀手 命儀以侍講攝天津同知轉侍讀擢庶子五年王奏設水利營田官分四局儀領天津局兼屬以文安大城隄工二邑形如釜底積潦不消秋復大水夾隄內外皆巨浸儀購菰蓆十餘萬束立表下楫以禦險要隄本民工儀言於王請發帑金數萬爲民興修用以代賑隄遂完固南運長屯隄地隸靜海不過數武吏舞法歲調發霸州文安大城民協修百里裹糧成以爲苦儀除其籍民便之畿輔七十餘河疏故濬新儀所勘定者殆十六七云八年擢侍講學士時議設營田觀察使二員分轄京東西以督率

州縣儀以僉都御史兼領豐潤諸路營田於天津倣明汪應蛟遺制築十字圍三面開渠與海河通潮來渠滿則閉之以供灌溉白塘葛沽之間斥鹵盡變膏腴豐潤玉田多沮洳之區儀教之開渠築圩皆成良田十一年大雨山水暴漲淹沒田廬萬計儀疏聞或以侵官爲疑儀不顧諭總督籌賑命儀董其事全活甚眾轉侍讀學士尋罷觀察使還領史職如故儀篤於內行先世所遺田數百畝悉推以讓其兄既仕祿又悉分給諸昆弟歿無餘財乾隆七年卒年七十有三著述甚富有集十八卷子玉友刻於閩中又有毛詩臆評鄉黨私記學庸私記南華經解蘭雪齋讀離騷廣前定錄天游錄子玉友雍正八年進士福建臺灣府知府所至有惠

政閩人稱之

右 國史館本傳

故學士文安陳君既葬三年其繼配王淑人卒合葬於某原禮也子鳳友等搏地稽顙乞誌其墓余與君同歲舉孝廉於君之本末爲悉不敢辭謹按狀君諱儀字子翹一字一吾先世自山西洪洞小興州遷文安爲文安人曾祖國維由孝廉仕遵義府推官祖怙以蔭補某部郎父良瑛未仕君以康熙庚午舉於鄉乙未成進士改庶吉士授編修旋丁外艱服闋以原官充省方盛典兼 三朝國史館纂修雍正四年奉 命隨怡賢親王治畿輔西南水利遷侍講明年遷詹事府右春坊右庶子仍領天津水利又三年遷翰

林院侍講學士明年丁內艱卽家起爲豐潤等處水利營田觀察使兼僉都御史學士如故又五年轉侍讀學士乾隆二年調補鴻臚寺少卿未任歸七年卒享年七十有三方君隨怡邸出津門也桑乾滹沱諸水羨溢文霸津靜諸州縣田廬決壞積潦不消民失業王急延君計君曰天津上應析木古渤海逆河之會百川尾閘南北二運交匯東下當以海河爲經二運爲緯層而溯之桑乾沽白漳衛滹沱諸河之水脈絡關注可次第治也王善之悉以屬君君先疏下流使四出毋壅徐理其上作長隄束之凡四閱月而工舉君爲諸生時卽以經世爲己任於水利屯田諸大務考鏡得失達其經權相國高安朱公知之深言於王王因請以自隨用其所

長故舉事易而成功速也頃之怡邸奏設水利營田司分四局以理其事天津一局則君領之而文安大城隄工屬焉文大地窪下數被水夾隄內外成巨浸波衝浪齧隄欲壞者屢矣君購菰蔣十餘萬束立表下楫捍之目不交睫者十晝夜而隄全隄故民工君以時方被災請於王奏發帑金數萬兩代賑民得安業南運長屯一隄隸靜海縣歲撥霸州文安大城民夫協治民弗堪命君曰文大隄工險民自治不暇能遠助他邑乎且長屯所治不數十丈而遠調三邑非所以均勞逸也檄天津道除其籍三邑民至今戶祝之時議豐潤玉田間多棄壤鑿渠築圩可使馮鹵生稻梁迺詔君爲營田觀察使君既受事度其可爲田者爲通溝瀆畜陂澤闢

關洞引可注可洩又疏引山泉灌高卽惡地俾成沃野期月之內
得水田四萬二千畝有奇收皆畝一鍾歲得穀四萬二千餘鍾報
最人 覲 天子嘉焉再出視事復得田二萬幾千畝田旣饒益
歲且比登米溢於市糶不得售君疏請採買以實天庾公私稱便
會 今上龍飛罷營田君以舊史臣簪筆入侍晉階中憲大夫
贈祖考如其官久之以故人子貧窶甚屬諸門人牛叔易令謀生
業罹吏議鑄五級君年屆縣車遂絕意仕進著書自娛所著有毛
詩臆評鄉黨篇私記學庸私記讀離騷廣前定錄天游錄等書及
蘭雪齋制義行世元配井淑人早卒繼室王淑人恭儉有家法子
三夔友舉人早歿鳳友玉友俱成進士官於 朝孫六斐庠生霞

裕恩榮寔俱幼君性純孝母姜淑人遘疾幾殆君跪禱北斗下百餘日病瘳乃已田園若干頃悉推以讓兄遇 覃恩以其蔭蔭姪諸弟或不給爲經紀其家完其子女婚嫁無倦色爲觀察時所部偶被水君立具疏聞或尼之君曰 天子方切已溺憂臣子懷私不顧民命可乎果得請全活甚眾田或生螻蝻伏土下食根苗聒聒作聲君禱於神一夕盡死蛙入竇坻界忽集飛鳩數千食之盡古稱呪虎馴鱷徵之君乃信他不勝書書其大者而系之銘曰遷書河渠固志溝洫叔孫芍陂西門溉鄴 天子曰儀爾其繼之十載功成見歌於詩昔在京邑魚頭戢戢衣之收之君爲安集儒林之宗循吏之風著述名山勳猷鼎鐘書云惟孝君子是做友于

兄弟永爲德教可興可羣式用思君及其蹉跌觀過知仁相是幽
宅迺安體魄我無愧辭勒此貞石

右墓誌銘顧鎮代某撰

國朝名臣類傳卷之三

三

德爾敏

德爾敏姓鄂卓氏滿洲鑲藍旗人康熙五十年由閑散充哈哈珠子五十六年捐納工部主事雍正二年遷員外郎五年遷郎中十年擢太僕寺少卿乾隆元年授江南副總河二年正月疏請於清口以內河水出口之處加以關鍵啟閉出入又偏近海口三千里外地方應接築隄岸收束水勢雲梯關下馬家港水口亦應築隄堵閉高家堰大壩至小黃莊舊砌石工宜拆修補葺 諭曰河工非經數年虛心平氣明體達用不能知其原委也汝甫到任卽爲此奏具見汝畱心河務而以爲必可行則朕不敢保當與高斌悉心妥議行之四月裁江南副總河缺 召德爾敏回京署理通政

使司通政使八月 命赴 泰陵查勘工程疏言直隸涑水縣之
拒馬河在 泰陵東南辰方出水今河頭被碎石淤塞南流之水
轉向東流應相度疏濬下王大臣議行十二月授詹事府詹事三
年授通政使司通政使四年正月 命偕大理寺卿汪滢辦理江
南水利工程三月奏言淮揚河道請先將就近工程疏濬其餘挑
挖引河修建閘壩俟逐段挨勘陸續估辦 上諭以不可惜費亦
不可冒費必期一勞永逸於民生有益方為善舉五年三月擢都
察院左副都御史五月江南河道總督高斌密奏汪滢年逾七旬
動履維艱辦事實屬老成請令駐劄適中地方就近察理以德爾
敏各處履勘則兩有裨益並奏德爾敏操守清苦地方或有餽送

俱不收受所得養廉實不敷用應請加增 從之六年二月 諭
曰汪漣德爾敏奉差江南辦理水利工程已經數年之久至今未
竣從前尙將情形奏報自去秋以後並無陳奏之摺今又於泰州
江都山陽等處奏請動帑興工共計六疏朕不知見在工程若何
何時可以竣局通計需費若干豈有漫無起止徒事遷延虛糜國
帑之理令其明白回奏三月覆奏水利鹽河工程共需銀六十七
萬兩前經奏請遵辦動工以來所用錢糧俱係於原奏項下支用
並非數請動項興工各工亦將次告竣其題估題銷各案應俟彙
齊奏報 諭曰卽前經題定之數亦豈可漫無覺察聽眾人之分
肥冒銷乎近今布政使薩哈諒學政喀爾欽皆以貪賊之故朕將

置之重典以警其餘汝二人亦宜慎之卽已無所染指而毫無覺察將來水落石出恐汝一人之身家不能抵眾人之欠項也速行整理察辦爲是四月疏言泰州如皋下游等處因春雨連綿閘座未開以致停工 諭曰觀此事汝等與督撫不和衷之處顯然何不明奏而爲是隱語乎尋復疏到工之日凡興濬修築等事俱會同督撫和衷辦理惟泰州如皋鹽河係鹽運總匯之所行令通州知州王師旦將下游之鹽倉唐家二閘開放洩水該州並未開放機宜坐失工程未能及早完竣皆知州王師旦偏執所致 上以王師旦偏執何不告之督撫 諭將所奏與兩江總督楊超曾閱看尋超曾奏言德爾敏等勘估開挑淮揚運鹽河道議開通州之

鹽倉唐家二閘洩水入江王師且請只將唐家閘開放並於出水之地及該州迤北各築一壩攔截鹽倉並各支河之水不使旁洩正在會同築壩乃鄉市愚民以播種時資水灌溉同聲呼籲求免開閘以致居民罷市 上命秉公查辦七月吏部侍郎楊嗣瑑奏參德爾敏汪澹不諳地方情形罔恤民間疾苦或短發夫價或任意放水或將挑河之土堆入民田耗帑累民請交督撫查覈楊超曾覆奏通州啟放唐家閘及居民罷市情形 上仍以楊嗣瑑參招交楊超曾會同高斌歸案奏結並詢問汪澹等是否別有不安之處尋超曾覆奏俱屬安靜謹飭惟汪澹年老多病德爾敏未免矜才自用不能和衷共濟 諭曰此公論也九月 上以德爾敏

汪濬所辦江南水利大局俱已告竣令回京七年 命與尚書哈達哈侍郎三和等總理修造 萬年吉地工程十二年授戶部左侍郎十七年調工部左侍郎十月以奉安 孝賢皇后梓宮禮成交部議敘十二月授正藍旗滿洲副都統十八年十月總河舒赫德請 簡大員督辦高家堰石工 上命德爾敏與侍郎嵇璜前往十二月奏言高寶石工塌卸殘缺見在一律修補請將高堰原估所餘三萬餘丈石料運往高寶石工應用 上是之是月調盛京兵部侍郎十九年高堰隄成得 旨議敘二十年仍授左都御史二十一年 上以德爾敏不勝副都統令解任二十二年四月以督修徐州石工刑部尚書劉統勳赴滇鞫案 命馳赴工次代

之 諭曰劉統勳另有差遣是以特令德爾敏前赴河南辦理石隄事務但德爾敏非劉統勳之比雖辦事認真而胸次不甚明晰性情亦有偏執之處只可用以督修工程不必另令自出主見一應隄工廟工不過令其監修而已十一月奏報徐城石工完竣交部議敘二十三年復 命督辦黃河北岸隄工二十六年卒

右 國史館本傳

五三ノ人オイシヨ

三三

143-906

崔紀

崔紀山西永濟人康熙五十七年進士改庶吉士散館授編修雍正四年充福建鄉試副考官五年充會試同考官七年三月充日講起居注官八月遷國子監司業八年二月疏言國子監例每年咨取各省貢監生赴監肄業其不來者託送規禮卽准爲到監給告假印票永不繳銷伏思貢監生中實有道遠資艱不能赴監之人若一槩促來又不必親來是專爲陋規不爲肄業又定例到監肄業歲貢八箇月例監內廩生十四箇月增附生十六箇月俊秀二十四箇月期滿方准咨送考職竟有不俟期滿或未到監時補出規禮卽倒提年月咨送積弊相沿請均禁止部議從之九年

丁母憂十二年服闋補原官十三年三月遷司經局洗馬七月遷右庶子十一月遷國子監祭酒乾隆元年三月提督順天學政六月條奏學政見行事例應停者六應改者二一雍正六年安徽學政李鳳翥奏每學歲取生監五人互結聲明並無抗糧包訟等事彙送學政查覈臣思生監果抗糧包訟應不時詳革若不分良莠惟以互結爲憑恐朋比掩飾徒滋煩擾應停一李鳳翥奏生員有切己事赴州縣告理先將呈詞赴學掛號印記臣思事既切己自與包訟不同若必用記恐不肖教職反勒索徇隱應停一雍正五年河南巡撫田文鏡奏生員事切己或代控作證或冒認失主屍親地方官卽先行詳革再審是非曲直臣思未審何由知爲代控

冒認遽斥豈無屈抑卽特符狡供例應革審亦不必另立先革後審之例一律載生員倚恃衣頂毆人至死者審實從重擬斬監候雍正五年刑部議凡被斥劣衿有挾仇報復者照所應得罪加一等又雍正七年湖南學政習寯奏生監有串通竊盜代寫詞狀作媒圖利者加常人罪一等近日學規嚴肅應仍照原例治罪不必加等一習寯奏緣事斥革監生不許出境違者從重治罪臣思所緣事情罪不同槩不許出境是罪止斥革又加禁錮况頑悖之人在籍亦能生事自應分別按例定擬其出境從重之文應停一雍正六年浙江學政王蘭生奏生員欠糧必全完方准收考查學政周行各府未必下車日適當納課且諸生應試又竭蹶完糧勢難

兼顧應請收考一田文鏡奏季考月課三次不到者詳革臣思除實在患病遊學外或遠不能赴試誤課卽斥情殊可憫請改爲嚴行戒飭終年不到詳革一雍正九年部議各省錢糧上戶富生限五月完半十月全完中戶下戶貧生限八月完半歲底全完不完者再予三限仍不完者詳革後全完開復數年來士子急公拖欠甚少請將上戶改爲歲底全完中下戶開歲二月四月全完逾期詳革不必另立三限下部議行四月遷詹事府詹事十一月授倉場侍郎十二月署甘肅巡撫劉於義誣參道員杜濱 國制內娶妾並瞻徇總理屯政侍郎蔣洞題免私借屯田銀兩爲兵部侍郎孫國璽所劾 上命紀與侍郎馬爾泰赴甘詳鞫得實於義交

部議處二年四月 命署陝西巡撫六月疏言陝屬平原八百餘里農作率皆待澤於天旱則束手無策竊思鑿井灌田一法實可補兩澤之缺臣籍居蒲州習見其利思爲廣行除延安榆林二府邠鄜綏德三州所屬地高土厚不能鑿井外西安同州鳳翔漢中四府並渭南九州縣地勢低下或一二丈或三四丈亦可得水渭北二十餘州縣地勢高仰亦不過四五丈或六七丈得水但有力家可勸諭開鑿貧民實難勉強仰懇 聖恩准將地丁耗羨銀兩借給貧民資鑿井費分三年繳完再鑿井耕田民力況瘁與河泉自然水利不同請免以水田升科 諭曰此係極應行之美舉但須徐徐化導又必實力奉行方與民生有益朕自不照水田升科

也八月擢吏部右侍郎仍留署陝西巡撫時奉 旨蠲出征兵借
支銀陝西撫標及延安鎮所借三千九百餘兩於 詔未到陝前
已扣存司庫紀因請按名找給以廣 皇仁 允之閏九月 諭
確查歉收地方分別蠲緩本年錢糧紀奏言延安榆林綏德屬秋
禾被災長安咸甯涇陽藍田鄠縣水淹地百餘頃應照例議蠲又
興平盩厔咸陽渭南咸甯藍田鄠縣水衝地三百餘頃應豁免部
議均如所請十一月實授陝西巡撫十二月疏言陝省水利莫如
龍洞渠在秦爲鄭渠在漢爲白渠迄宋元明或名豐利或名王御
史新築或名廣惠名通濟上承涇水中受諸泉利賴甚溥自雍正
五年督臣岳鍾琪動帑興工涇陽醴泉三原高陵四縣咸資灌溉

奈未定歲修法又因涇漲入渠泥沙澱闕諸泉從渠岸泛出石鱗
滲漏經前撫臣碩色咨部修濬但見在龍洞泉北入涇水南入渠
其篩珠瓊見以下諸泉雖南流奈渠身滲漏亦多入涇若不將龍
洞及諸渠泥沙淘盡不但不能引涇卽龍洞泉亦不下達最要莫
若於龍洞內築石壩以納眾泉不使入涇龍洞南岸石隄應加高
以防濁水溢塞又水磨橋大王橋上下各泉亦應於泉旁築壩收
入渠內請設水夫三十名供啟閉插板之役又言陝省額徵地丁
銀分屯民二項雍正五年民丁議減屯丁議增見在奉 旨恩免
屯丁二萬餘兩請卽於原減民丁七萬餘兩內不分府州均派自
乾隆三年爲始入額徵解得 旨允行是月 上因紀於鑿井灌

田一事辦理未善 特諭詳勘地勢聽從民便毋擾三年三月
諭曰陝西鑿井灌田崔紀祇務多井之虛名未收灌溉之實效經
朕訪聞降旨訓諭乃伊接奉諭旨後檄飭地方官務須鑿深砌固
不得草率從事又遣佐雜等官分路勘驗凡屬淺井悉令掘之使
深而土易淤塞者則令修砌堅固其從前開鑿未成井者又復勒
令填平以致井底之寒泉無處灌注勢必傾瀉於地中井中之溼
土無處搬移勢必堆積於麥上不但麥苗無益亦且大受其損況
去冬得雪霑足今值麥田青蔥秀發之時農民及時鋤治轉盼播
種秋禾東作方興正田功不遑之候而乃迫令掘井砌井使農民
廢時失業人心甚覺徬徨是朕諭令俯順輿情而崔紀則勒令深

鑿修砌以掩其非又令填平廢井以掩其過重負朕委任封疆諄切訓誨之意矣陝西之人嘖有煩言崔紀不便仍畱陝西之任著調補湖北巡撫其陝西巡撫員缺卽以湖北巡撫張楷調補鑿井灌田之事張楷可善體民情妥協辦理五月紀抵湖北巡撫任遵例自陳不職部議降二級調用 諭曰崔紀在陝西巡撫任內鑿井灌田一事經理未善以致滋累咎無可辭本應處分但其本意係爲百姓起見且才尙可用是以調任湖北冀其克自奮勵以觀後效著照部議所降之級從寬畱任六月奏請 頒 御註孝經孝經衍義 御選唐詩資政要覽性理精義古文淵鑒貯書院并刊布 允之五年五月 上聞紀於兩淮運楚鹽船未到飭屬暫

食私鹽總督德沛復疏參紀昶護糧道崔乃鏞於解漕赴淮時批
准動用存公銀兩 諭令明白回奏閏六月紀奏言兩淮鹽船本
年二月內卽應開行遲至四月尙未咨到船到無期價昂日甚臣
因人心惶惶曾令德安安陸襄陽三府確查民間食鹽情形商辦
接濟並未竟食私鹽又崔乃鏞動用公項時德沛亦曾批准事下
部議以崔紀昶庇屬員應降三級調用違例諭食私鹽應革職
諭曰崔紀昶護崔乃鏞一案著照部議降三級調用至令民間暫
食私鹽一案雖悖謬實甚但事尙未行遽議革職未免過重著免
其革職再降五級調用六年 特授國子監祭酒九年八月充順
天鄉試副考官十二月提督江蘇學政十一年五月浙江慈谿縣

知縣倪知本訪獲糾眾爲盜之提標右營兵丁沈光耀等八人營員捏稱自行查拏密遣人赴部探問被獲。上命紀偕江蘇布政使安甯赴浙會總督馬爾泰嚴鞫七月紀等奏言提標兵夥盜係知縣拏獲營員捏飾探問屬實請照例分別議處。上以辦理公平諭獎之九月丁父憂十四年服闋授山東布政使十五年正月以都察院副都御史銜提督江蘇學政八月因病解任九月卒

右 國史館本傳

永濟崔先生諱紀原名瑑字君玉更今名字南有進士官至副都御史撰成均課講周易其說以本義爲主而亦間有異同至其以經文專主卜筮十翼專言義理謂孔子恐人惑於吉凶禍福之說

573298

文科教學研究會覽室

陳東原集卷之十一

要求趨避之術故專以義理為主則似傳非解經惟以補救夫經
矣又有成均課講學庸讀孟子劄記論語溫知錄二卷

右學家唐鑑輯

143-918



21101000161280